## Suttantapiṭake Khuddakanikāye

Dhammapadapāļiyā samvannanābhūtā
Bhadantamahābuddhaghosattherena katā

# **DHAMMAPADAŢŢHAKATHĀ**

(Pathamo bhāgo)



Buddhavasse 2552 Marammavasse 1370 AD. 2008

#### Romanized from Myanmar version published in 1968

© Buddhasāsana Society

#### Atthakathā Series 21

First published in 2008 by Ministry of Religious Affairs
Yangon, Myanmar

# THE PĀĻI ALPHABET IN BURMESE AND ROMAN CHARACTERS

ς.	71	T	λ	71	$\Gamma$	v
7	7.1	г	v	, ,	ι.	v

						VOW.	ELS						
න <i>ව</i>	<b>ì</b> :	නා ā	တ္တ	i	නු	ī	ը ս	l	දී ū		e e		သ ၀
			CO			TS W			EL "A	,,			
		က	ka	ə k	tha	o ga	ì	ဃ ဥ	ha	c na			
		o (	ca	ဆ	cha	е ja		ဈ jh	ıa	ըña			
		•	a	_		ခု da							
						з da				•			
		οĮ	oa	o p	ha	ဗ ba	ì	ဘ b	ha	မ ma	ı		
ω y	a c	ra ra	∾ .	la	o V	'a	သေ S	a	တ h	a	ę ļa	•	ṁ
						IN CO							
_ <b>_</b> .	_1 = ā	<u> </u>	i .	<u> </u>	τ	-( = u	īL	-[ = <sup>[</sup>	Ū a	s- = e	. (	ചേ ചീ	<b>=</b> O
თ ka	ကာ ka	ā ကိ	ki	ကိ	kī	ကု k	u	ကူ k	ū	ကေ k	(e	ကော ါ	02
ວ kha	อ์ khā											බේ kh	
				CON	JUN	CT-C	ONSC	NAN	ITS				
റ്റ്റ kka		င်္ဃ ṅgl	ha	a	g nth	na	ဓျ	dhya	l	ც p	la		လ္လ lla
ന്റ kkh	a	g cca		CI	b úqa	a	8	dhva		g p	ba		ભુ lya
നു kya		g cch	a	a	s init	a	နှီ တ	nta		ల్ల b	bha	Į.	လှ lha
ලී kri		g jja		a	ទ  nha	a	8	ntva		ဗျ b	oya		9 vha
ස kla		g jjha	l	g	g tta		<b>&amp;</b>	ntha		මු b	ora		ည္က sta
ფ kva		ည ñña	a	g	g ttha	a	8	nda		မွ n	npa		ධූ stra
จุ khya	L	ə ñha		o	g tva		<b>୍ଷ</b>	ndra		ଧୃ 11	npha	a	ગ્રૄ sna
g khva		g ñca		o	ą tya	ı	80	ndha	-	မွ n	nba		သျ sya
g gga		නූ ñch	a	0	g tra		8	nna		မ္တ 11	nbha	a	ဿ ssa
ვ ggha		g ñja		<u> </u>	dda		နျ	nya		မ္မ n	nma	l	သ္မ sma
၅ gya		g ñjha	a	<b>3</b>	ddha	a	ş	nha		မျ 11	nya		သွ sva
ြ gra		ş tta		अ	dya		ပ္ပ	ppa		မှ n	nha		<sub>ගු</sub> hma
က် nika ဋ္ဌ ṭṭha			િલ	dra			ppha		ယျ	yya		ფ hva	
å ṅkha		ð qqa		_ ვ	dva			pya			yha		g ļha
δ ṅga		~		J			•			-			 
		Э	J	9	9	9	G	૧	၈	6	0		
		1	2	3	4	5	6	7	8	9	0		

## $Dhammapada \underline{t}\underline{t}hakath\overline{a}$

## Paṭhamabhāga

\_\_\_\_

	Mātikā		Piţ	thaṅka
	Ganthārambhakathā			1
	1. Yamakavagga			
1.	Cakkhupālattheravatthu	•••		2
2.	Maṭṭhakuṇḍalīvatthu			16
3.	Tissattheravatthu			25
4.	Kāļayakkhinīvatthu			29
5.	Kosambakavatthu			34
6.	Mahākāļattheravatthu			42
7.	Devadattavatthu			49
8.	Sāriputtattheravatthu			52
9.	Nandattheravatthu			73
10.	Cundasūkarikavatthu			80
11.	Dhammika-upāsakavatthu		•••	83
12.	Devadattavatthu			86
13.	Sumanādevīvatthu			97
14.	Dvesahāyakabhikkhuvatthu	•••		99
	2. Appamādavagga			
1.	Sāmāvatīvatthu			103
2.	Kumbhaghosakaseṭṭhivatthu		•••	147
3.	Cūļapanthakattheravatthu		•••	153
4.	Bālanakkhattasaṅghuṭṭhavatthu		•••	163
5.	Mahākassapattheravatthu			164

	Mātikā		Piţ	ṭhaṅka
6.	Pamattāpamattadvesahāyakavatthu			166
7.	Maghavatthu			167
8.	Aññatarabhikkhuvatthu			178
9.	Nigamavāsitissattheravatthu			179
	3. Cittavagga			
1.	Meghiyattheravatthu			182
2.	Aññatarabhikkhuvatthu			183
3.	Aññatara-ukkaṇṭhitabhikkhuvatthu			189
4.	Samgharakkhitabhāgineyyattheravatthu			191
5.	Cittahatthattheravatthu			194
6.	Pañcasatabhikkhuvatthu			199
7.	Pūtigattatissattheravatthu			202
8.	Nandagopālakavatthu			205
9.	Soreyyattheravatthu	•••	•••	207
	4. Pupphavagga			
1.	Pathavikathāpasutapañcasatabhikkhuvatthu			212
2.	Marīcikammaṭṭhānikattheravatthu			213
3.	Viṭaṭūbhavatthu			214
4.	Patipūjikakumārivatthu			229
5.	Macchariyakosiyaseţţhivatthu			232
6.	Pāveyyakājīvakavatthu			237
7.	Chattapāṇi-upāsakavatthu			240
8.	Visākhāvatthu			242
9.	Ānandattherapañhāvatthu			265
10.	Mahākassapattherapiņḍapātadinnavatthu			268
11.	Godhikattheraparinibbānavatthu			272
12.	Garahadinnavatthu			275

	Mātikā		Piţ	ṭhaṅka
	5. Bālavagga			
1.	Aññatarapurisavatthu	•••		282
2.	Mahākassapattherasaddhivihārikavatthu			293
3.	Ānandaseṭṭhivatthu			297
4.	Gaṇṭhibhedakacoravatthu			299
5.	Udāyittheravatthu			300
6.	Timsamattapāveyyakabhikkhuvatthu			301
7.	Suppabuddhakuṭṭhivatthu			302
8.	Kassakavatthu			304
9.	Sumanamālākāravatthu			306
10.	Uppalavaṇṇattherīvatthu			310
11.	Jambukattheravatthu			313
12.	Ahipetavatthu			320
13.	Saṭṭhikūṭapetavatthu			323
14.	Cittagahapativatthu			327
15.	Vanavāsītissasāmaņeravatthu	•••	•••	333
	6. Paņḍitavagga			
1.	Rādhattheravatthu	•••		346
2.	Assajipunabbasukavatthu	•••	•••	348
3.	Channattheravatthu	•••	•••	350
4.	Mahākappinattheravatthu	•••	•••	351
5.	Paṇḍitasāmaṇeravatthu	•••	•••	359
6.	Lakuṇḍakabhaddiyattheravatthu		•••	371
7.	Kāṇamātuvatthu	•••		372
8.	Pañcasatabhikkhuvatthu	•••		375
9.	Dhammikattheravatthu	•••	•••	377

	Mātikā		Piţţ	haṅka							
10.	Dhammassavanavatthu		•••	379							
11.	Pañcasata-āgantukabhikkhuvatthu			380							
	7. Arahantavagga										
1.	Jīvakapañhavatthu	•••		382							
2.	Mahākassapattheravatthu		•••	383							
3.	Belatthasīsattheravatthu	•••	•••	386							
4.	Anuruddhattheravatthu	•••	•••	387							
5.	Mahākaccāyanattheravatthu	•••	•••	389							
6.	Sāriputtattheravatthu	•••	•••	390							
7.	Kosambivāsītissattherasāmaņeravatthu	•••	•••	392							
8.	Sariputtattheravatthu	•••	•••	395							
9.	Khadiravaniyarevatattheravatthu	•••		396							
10.	Aññatara-itthivatthu	•••		403							
	8. Sahassavagga										
1.	Tambadāṭhikacoraghātakavatthu		•••	405							
2.	Bāhiyadārucīriyattheravatthu	•••		408							
3.	Kuṇḍalakesittherīvatthu			413							
4.	Anatthapucchakabrāhmaṇavatthu			418							
5.	Sāriputtattherassa mātulabrāhmaņavatthu			420							
6.	Sāriputtattherassa bhāgineyyavatthu		•••	421							
7.	Sāriputtattherassa sahāyakabrāhmaṇavatthu		•••	422							
8.	Āyuvaḍḍhanakumāravatthu	•••	•••	423							
9.	Samkiccasāmaņeravatthu	•••	•••	425							
10.	Khāņukoṇḍaññattheravatthu	•••	•••	433							
11.	Sappadasattheravatthu	•••	•••	434							
12.	Paṭācārātherīvatthu		•••	437							
13.	Kisāgotamīvatthu	•••	•••	443							
14.	Bahuputtikattherīvatthu	•••	•••	446							

Dhammapadaṭṭhakathāya paṭhamabhāge mātikā niṭṭhitā.

# Khuddakanikāya

# Dhammapadatthakathā

Namo tassa Bhagavato Arahato Sammāsambuddhassa.

#### Ganthārambhakathā

- 1. Mahāmohatamonaddhe, loke lokantadassinā. Yena saddhammapajjoto, jālito jalitiddhinā.
- 2. Tassa pāde namassitvā, Sambuddhassa sirīmato. Saddhammañcassa pūjetvā, katvā samghassa cañjalim.
- 3. Taṁ taṁ kāraṇamāgamma, dhammādhammesu kovido. Sampattasaddhammapado¹, Satthā **Dhammapadaṁ** subhaṁ.
- 4. Desesi karuṇāvega samussāhitamānaso. Yam ve devamanussānam, pītipāmojjavaḍḍhanam.
- Paramparābhatā tassa, nipuņā atthavaṇṇanā.
   Yā Tambapaṇṇidīpamhi, dīpabhāsāya saṇṭhitā.
- 6. Na sādhayati sesānam, sattānam hitasampadam. Appeva nāma sādheyya, sabbalokassa sā hitam.
- 7. Iti āsīsamānena<sup>2</sup>, dantena samacārinā. **Kumārakassapenā**ham, therena thiracetasā.
- 8. Saddhammaṭṭhitikāmena, sakkaccaṁ abhiyācito. Taṁ bhāsaṁ ativitthāra - gatañca vacanakkamaṁ.

- 9. Pahāyāropayitvāna, tantibhāsaṁ manoramaṁ. Gāthānaṁ byañjanapadaṁ, yaṁ tattha na vibhāvitaṁ.
- 10. Kevalam tam vibhāvetvā, sesam tameva atthato. Bhāsantarena bhāsissam, āvahanto vibhāvinam. Manaso pītipāmojjam, atthadhammūpanissitanti.

#### 1. Yamakavagga

#### 1. Cakkhupālattheravatthu

Manopubbangamā dhammā, manoseṭṭhā manomayā.
 Manasā ce paduṭṭhena, bhāsati vā karoti vā.
 Tato nam dukkhamanveti, cakkamva vahato padanti—

Ayam dhammadesanā kattha bhāsitāti? Sāvatthiyam. Kam ārabbhāti? Cakkhupālattheram.

Sāvatthiyam kira Mahāsuvaṇṇo nāma kuṭumbiko ahosi aḍḍho mahaddhano mahābhogo aputtako. So ekadivasam nhānatittham¹ gantvā nhatvā āgacchanto antarāmagge sampannapattasākham ekam vanappatim² disvā "ayam mahesakkhāya devatāya pariggahito bhavissatī"ti tassa heṭṭhābhāgam sodhāpetvā pākāraparikkhepam kārāpetvā vālukam³ okirāpetvā dhajapaṭākam ussāpetvā vanappatim alankaritvā añjalim karitvā⁴ "sace puttam vā dhītaram vā labheyyam⁵, tumhākam mahāsakkāram karissāmī"ti patthanam katvā pakkāmi.

Athassa na cirasseva bhariyāya kucchiyam gabbho patiṭṭhāsi. Sā gabbhassa patiṭṭhitabhāvam ñatvā tassa ārocesi. So tassā gabbhassa parihāramadāsi. Sā dasamāsaccayena puttam vijāyi. Tam nāmaggahaṇa-

<sup>1.</sup> Nahānatittham (Sī, Syā)

<sup>2.</sup> Vanasvatim (Sī)

<sup>3.</sup> Vālikam (Sī, Syā)

<sup>4.</sup> Padakkhinam katvā (Ka)

<sup>5.</sup> Alankaritvā puttam vā dhītaram vā labhitvā (Sī, Syā)

divase seṭṭhi attanā pālitaṁ vanappatiṁ nissāya laddhattā tassa **Pālo**ti¹ nāmaṁ akāsi. Sā aparabhāge aññampi puttaṁ labhi. Tassa **Cūṭapālo**ti nāmaṁ katvā itarassa **Mahāpālo**ti nāmaṁ akāsi. Te vayappatte gharabandhanena bandhiṁsu. Aparabhāge mātāpitaro kālamakaṁsu. Sabbampi vibhavaṁ itareyeva vicāriṁsu.

Tasmim samaye Satthā pavattitavaradhammacakko anupubbenāgantvā Anāthapindikena mahāsetthinā catupannāsakotidhanam vissajjetvā kārite Jetavanamahāvihāre viharati mahājanam saggamagge ca mokkhamagge ca patitthāpayamāno. Tathāgato hi mātipakkhato asītiyā, pitipakkhato asītiyāti dve-asītiñātikulasahassehi kārite Nigrodhamahāvihāre ekameva vassāvāsam vasi, Anāthapindikena kārite Jetavanamahāvihāre ekūnapīsativassāni, Visākhāya sattavīsatikotidhanapariccāgena kārite Pubbārāme chabbassānīti dvinnam kulānam gunamahattatam paticca Sāvatthim nissāya pañcavīsativassāni vassāvāsam vasi. Anāthapindikopi Visākhāpi mahāupāsikā nibaddham divasassa dve vāre Tathāgatassa upatthānam gacchanti, gacchantā ca "daharasāmaņerā no hatthe olokessantī"ti tucchahatthā na gatapubbā. Purebhattam gacchantā khādanīyabhojanīyādīni gahetvāva gacchanti, pacchābhattam gacchantā pañca bhesajjāni attha ca pānāni. Nivesanesu pana tesam dvinnam dvinnam bhikkhusahassānam niccam paññattāsanāneva honti. Annapānabhesajjesu yo yam icchati, tassa tam yaticchitameva sampajjati. Tesu Anāthapindikena ekadivasampi Satthā pañham na pucchitapubbo. So kira "Tathagato Buddhasukhumalo khattiya sukhumālo, 'bahūpakāro me gahapatī'ti mayham dhammam desento kilameyyā"ti Satthari adhimattasinehena pañham na pucchati. Satthā pana tasmim nisinnamatteyeva "ayam setthi mam arakkhitabbatthane rakkhati. Ahañhi kappasatasahassādhikāni cattāri asankhyeyyāni alankatapatiyattam attano sīsam chinditvā akkhīni uppātetvā hadayamamsam uppātetvā pānasamam puttadāram pariccajitvā pāramiyo pūrento paresam dhammadesanatthameva pūresim. Esa mam arakkhitabbatthāne rakkkhatī"ti ekam dhammadesanam kathetiyeva<sup>2</sup>.

Tadā Sāvatthiyam satta manusssakoṭiyo vasanti, tesu Satthu dhammakatham sutvā pañcakoṭimattā manussā ariyasāvakā jātā, dvekoṭimattā manussā puthujjanā. Tesu ariyasāvakānam dveyeva kiccāni ahesum—purebhattam dānam denti, pacchābhattam gandhamālādihatthā vatthabhesajjapānakādīni gāhāpetvā dhammassavanatthāya gacchanti. Athekadivasam Mahāpālo ariyasāvake gandhamālādihatthe vihāram gacchante disvā "ayam mahājano kuhim gacchatī"ti pucchitvā "dhammassavanāyā"ti sutvā "ahampi gamissāmī"ti gantvā Satthāram vanditvā parisapariyante nisīdi.

Buddhā ca nāma dhammam desentā saranasīlapabbaijādīnam upanissayam oloketvā ajjhāsayavasena dhammam desenti, tasmā tam divasam Satthā tassa upanissayam oloketvā dhammam desento anupubbikatham kathesi. Seyyathidam? Danakatham silakatham saggakatham kāmānam ādīnavam okāram samkilesam nekkhamme ānisamsam pakāsesi. Tam sutvā Mahāpālo kutumbiko cintesi "paralokam gacchantam puttadhītaro vā bhātaro vā bhogā vā nānugacchanti, sarīrampi attanā saddhim na gacchati, kim me gharāvāsena pabbajissāmī"ti. So desanāpariyosāne Satthāram upasankamitvā pabbajjam yāci. Atha nam Satthā "atthi<sup>1</sup> te koci āpucchitabbayuttako ñātī"ti āha. Kanitthabhātā me atthi bhanteti. Tena hi tam āpucchāhīti. So "sādhū" tisampaticchitvā Satthāram vanditvā geham gantvā kanittham pakkosāpetvā "tāta yam mayham imasmim gehe<sup>2</sup> saviññānakampi aviññāṇakampi dhanam kiñci atthi, sabbam tam tava bhāro, patipajjāhi nan'ti. "Tumhe pana kim karissathā"ti<sup>3</sup> āha. Aham Satthu santike pabbajissāmīti. Kim kathesi bhātika, tvam me mātari matāya mātā viya, pitari mate pitā viya laddho, gehe te mahāvibhavo, sakkā geham ajjhāvasanteheva<sup>4</sup> puññāni kātum, mā evam karitthāti. Tāta aham Satthu dhammadesanam sutvā gharāvāse vasitum na sakkomi. Satthārā hi atisanhasukhumam tilakkhanam āropetvā ādimajjhapariyosānakalyāņo dhammo desito, na sakkā so agāramajjhe vasantena

<sup>1.</sup> Natthi (Sī, Syā)

<sup>2.</sup> Yam imasmim kule (Sī, Syā)

<sup>3.</sup> Tumhe pana sāmīti (Syā), tumhe pana kiṁ sāmīti (Sī)

<sup>4.</sup> Gehe ajjhāvasanteyeva (Ka)

pūretum pabbajissāmi tātāti. Bhātika taruṇāyeva tāva'ttha, mahallakakāle pabbajissathāti. "Tāta mahallakassa hi attano hatthapādāpi anassavā honti, na attano vase vattanti, kimaṅgaṁ¹ pana ñātakā, svāhaṁ tava kathaṁ na karomi, samaṇapaṭipattiṁ yeva pūressāmi,

Jarājajjaritā honti, hatthapādā anassavā. Yassa so vihatatthāmo, kathaṁ dhammaṁ carissati.

Pabbajissāmevāham tātā"ti tassa viravantasseva Satthu santikam gantvā pabbajjam yācitvā laddhapabbajjūpasampado ācariyupajjhāyānam santike pañca vassāni vasitvā vuṭṭhavasso pavāretvā Satthāramupasaṅkamitvā vanditvā pucchi "bhante imasmim sāsane kati dhurānī"ti. Ganthadhuram vipassanādhuranti dveyeva dhurāni bhikkhūti. Katamam pana bhante ganthadhuram, katamam vipassanādhuranti. Attano paññānurūpena ekam vā dve vā nikāye sakalam vā pana tepiṭakam Buddhavacanam uggaṇhitvā tassa dhāraṇam kathanam vācananti idam **ganthadhuram** nāma, sallahukavuttino pana pantasenāsanābhiratassa attabhāve khayavayam paṭṭhapetvā sātaccakiriyavasena vipassanam vaḍḍhetvā arahattaggahaṇanti idam **vipassanādhuram** nāmāti. Bhante aham mahallakakāle pabbajito ganthadhuram pūretum na sakkhissāmi, vipassanādhuram pana pūressāmi, kammaṭṭhānam me kathethāti. Athassa Satthā yāva arahattam kammaṭṭhānam kathesi.

So Satthāram vanditvā attanā sahagāmino bhikkhū pariyesanto saṭṭhi bhikkhū labhitvā tehi saddhim nikkhamitvā vīsayojanasatamaggam² gantvā ekam mahantam paccantagāmam patvā tattha saparivāro piṇḍāya pāvisi. Manussā vattasampanne bhikkhū disvāva pasannacittā āsanāni paññāpetvā nisīdāpetvā paṇītenāhārena parivisitvā "bhante kuhim ayyā gacchantī"ti pucchitvā "yathāphāsukaṭṭhānam upāsakā"ti vutte paṇḍitā manussā "vassāvāsam senāsanam pariyesanti bhadantā"ti ñatvā "bhante sace ayyā imam temāsam idha vaseyyum, mayam saraṇesu patiṭṭhāya sīlāni gaṇheyyāmā"ti āhamsu. Tepi "mayam imāni kulāni nissāya bhavanissaraṇam karissāmā"ti adhivāsesum.

Manussā tesam paṭiññam gahetvā vihāram paṭijaggitvā rattiṭṭhānadivāṭṭhānāni sampādetvā adamsu. Te nibaddham tameva gāmam piṇḍāya pavisanti. Atha ne eko vejjo upasaṅkamitvā "bhante bahūnam vasanaṭṭhāne aphāsukampi nāma hoti, tasmim uppanne mayham katheyyātha, bhesajjam karissāmī"ti pavāresi. Thero vassūpanāyikadivase te bhikkhū āmantetvā pucchi "āvuso imam temāsam katihi iriyāpathehi vītināmessathā"ti. Catūhi bhanteti. Kim panetam āvuso patirūpam, nanu appamattehi bhavitabbam. Mayam hi dharamānakassa Buddhassa santikā kammaṭṭhānam gahetvā āgatā, Buddhā ca nāma na sakkā pamādena¹ ārādhetum, kalyāṇajjhāsayena te vo ārādhetabbā. Pamattassa ca nāma cattāro apāyā sakagehasadisā, appamattā hothāvusoti. Kim tumhe pana bhanteti. Aham tīhi iriyāpathehi vītināmessāmi, piṭṭhim na pasāressāmi āvusoti. Sādhu bhante appamattā hothāti.

Atha therassa niddam anokkamantassa pathamamāse atikkante majjhimamāse sampatte akkhirogo uppajji. Chiddaghatato udakadhārā viya akkhīhi assudhārā paggharanti. So sabbarattim samanadhammam katvā arunuggamane gabbham pavisitvā nisīdi. Bhikkhū bhikkhācāravelāya therassa santikam gantvā "bhikkhācāravelā bhante"ti āhamsu. Tena hi āvuso ganhatha pattacīvaranti. Attano pattacīvaram gāhāpetvā nikkhami. Bhikkhū tassa akkhīhi assūni paggharante disvā "kimetam bhante"ti pucchimsu. Akkhīni me āvuso vātā vijihantīti. Nanu bhante vejjena pavāritamhā, tassa kathemāti. Sādhāvusoti. Te vejjassa kathayimsu. So telam pacitvā pesesi. Thero nāsāya telam āsincanto nisinnakova āsancitvā antogāmam pāvisi. Vejjo tam disvā āha "bhante ayyassa kira akkhīni vāto vijjhatī"ti. Āma upāsakāti. Bhante mayā telam pacitvā pesitam, nāsāya vo telam āsittanti. Ama upāsakāti. Idāni kīdisanti. Rujjateva upāsakāti. Vejjo "mayā ekavāreneva vūpasamanasamattham telam pahitam, kim nu kho rogo na vūpasanto"ti cintetvā "bhante nisīditvā vo telam āsittam, nipajjitvā"ti pucchi. Thero tunhī ahosi, punappunam pucchiyamānopi na kathesi. So "vihāram gantvā

therassa vasanaṭṭhānaṁ olokessāmī'ti cintetvā "tena hi bhante gacchathā'ti theraṁ vissajjetvā vihāraṁ gantvā therassa vasanaṭṭhānaṁ olokento caṅkamananisīdanaṭṭhānameva disvā sayanaṭṭhānaṁ adisvā "bhante nisinnehi vo āsittaṁ, nipannehī'ti pucchi. Thero tuṇhī ahosi. "Mā bhante evaṁ karittha, samaṇadhammo nāma sarīraṁ yāpentena¹ sakkā kātuṁ, nipajjitvā āsiñcathā''ti punappunaṁ yāci. "Gaccha tvaṁ tāvāvuso, mantetvā jānissāmī''ti vejjaṁ uyyojesi. Therassa ca tattha neva ñātī, na sālohitā atthi, kena saddhiṁ manteyya? Karajakāyena pana saddhiṁ mantento "vadehi tāva āvuso Pālita, tvaṁ kiṁ akkhīni olokessasi, udāhu Buddhasāsanaṁ. Anamataggasmiṁ hi saṁsāravaṭṭe tava akkhikāṇassa² gaṇanā nāma natthi, anekāni pana Buddhasatāni Buddhasahassāni atītāni. Tesu te ekabuddhopi na pariciṇṇo³, idāni imaṁ antovassaṁ tayo māse na nipajjissāmīti temāsaṁ nibaddhavīriyaṁ karissāmi⁴. Tasmā te cakkhūni nassantu vā bhijjantu vā, Buddhasāsanameva dhārehi, mā cakkhūnī''ti bhūtakāyaṁ ovadanto imā gāthāyo abhāsi—

"Cakkhūni hāyantu<sup>5</sup> mamāyitāni, Sotāni hāyantu tatheva kāyo. Sabbampidam hāyatu dehanissitam, Kim kāraṇā Pālita tvam pamajjasi.

Cakkhūni jīrantu mamāyitāni, Sotāni jīrantu tatheva kāyo. Sabbampidam jīratu dehanissitam, Kimkāraṇā Pālita tvam pamajjasi.

Cakkhūni bhijjantu mamāyitāni, Sotāni bhijjantu tatheva kāyo. Sabbampidam bhijjatu dehanissitam, Kim kāranā Pālita tvam pamajjasī"ti.

<sup>1.</sup> Sarīre yāpente (Sī, Syā)

<sup>2.</sup> Anakkhikakālassa (Sī)

<sup>3.</sup> Na paricchinno (Ka)

<sup>4.</sup> Te mānasam baddham (Sī, Syā)

<sup>5.</sup> Hāyanti (Sī)

Evam tīhi gāthāhi attano¹ ovādam datvā nisinnakova natthukammam katvā gāmam piṇḍāya pāvisi. Vejjo tam disvā "kim bhante natthukammam katan"ti pucchi. Āma upāsakāti. Kīdisam bhanteti. Rujjateva upāsakāti. Nisīditvā vo bhante natthukammam katam, nipajjitvāti. Thero tuṇhī ahosi, punappunam pucchiyamānopi na kiñci kathesi. Atha nam vejjo "bhante tumhe sappāyam na karotha, ajjato paṭṭhāya 'asukena me telam pakkan'ti mā vadittha, ahampi 'mayā vo telam pakkan'ti na vakkhāmī"ti āha. So vejjena paccakkhāto vihāram gantvā tvam vejjenāpi paccakkhātosi, iriyāpatham mā vissajji samaṇāti.

"Paṭikkhitto tikicchāya, vejjenāpi² vivajjito. Niyato maccurājassa, kim Pālita pamajjasī"ti—

Imāya gāthāya attānam ovaditvā samaņadhammam akāsi. Athassa majjhimayāme atikkante apubbam acarimam akkhīni ceva kilesā ca bhijjimsu. So sukkhavipassako arahā hutvā gabbham pavisitvā nisīdi.

Bhikkhū bhikkhācāravelāya āgantvā "bhikkhācārakālo bhante"ti āhamsu. Kālo āvusoti. Āma bhanteti. Tena hi gacchathāti. Kim tumhe pana bhanteti. Akkhīni me āvuso parihīnānīti. Te tassa akkhīni oloketvā assupuṇṇanettā hutvā "bhante mā cintayittha, mayam vo paṭijaggissāmā"ti theram samassāsetvā kattabbayuttakam vattapaṭivattam katvā gāmam piṇḍāya pavisimsu. Manussā theram adisvā "bhante amhākam ayyo kuhin"ti pucchitvā tam pavattim sutvā³ yāgum pesetvā sayam piṇḍapātamādāya gantvā theram vanditvā pādamūle parivattamānā⁴ roditvā "bhante mayam vo paṭijaggissāma, tumhe mā cintayitthā"ti samassāsetvā pakkamimsu.

Tato paṭṭhāya nibaddhaṁ yāgubhattaṁ vihārameva pesenti. Theropi itare saṭṭhi bhikkhū nirantaraṁ ovadati. Te tasso vāde ṭhatvā upakaṭṭhāya pavāraṇāya sabbeva saha paṭisambhidāhi arahattaṁ pāpuṇiṁsu. Te vuṭṭhavassāca pana Satthāraṁ daṭṭhukāmā hutvā theramāhaṁsu "bhante Satthāraṁ

<sup>1.</sup> Attānaṁ (Ka)

<sup>3.</sup> Tam pavattim ārocesum. Te tam sutvā (Ka)

<sup>2.</sup> Vejjenāsi (Sī, Syā)

<sup>4.</sup> Pavattamānā (Sī, Syā)

daṭṭhukāmamhā"ti. Thero tesaṁ vacanaṁ sutvā cintesi "ahaṁ dubbalo, antarāmagge ca amanussapariggahitā aṭavī atthi, mayi etehi saddhiṁ gacchante sabbe kilamissanti, bhikkhampi labhituṁ na sakkhissanti, ime puretarameva pesessāmī"ti. Atha ne āha "āvuso tumhe purato gacchathā"ti. Tumhe pana bhanteti. Ahaṁ dubbalo, antarāmagge ca amanussapariggahitā aṭavī atthi, mayi tumhehi saddhiṁ gacchante sabbe kilamissathatumhe purato gacchathāti. Mā bhante evaṁ karittha mayaṁ tumhehi saddhiṁ yeva gamissāmāti. "Mā vo āvuso evaṁ ruccittha, evaṁ sante mayhaṁ aphāsukaṁ bhavissati, mayhaṁ kaniṭṭho pana tumhe disvā pucchissati, athassa mama cakkhūnaṁ parihīnabhāvaṁ āroceyyātha, so mayhaṁ santikaṁ kañcideva pahiṇissati, tena saddhiṁ āgacchissāmi, tumhe mama vacanena Dasabalañca asītimahāthere ca vandathā"ti te uyyojesi.

Te theram khamāpetvā antogāmam pavisimsu. Manussā te disvā nisīdāpetvā bhikkham datvā "kim bhante ayyānam gamanākāro paññāyatī"ti. Āma upāsakā, Satthāram daṭṭhukāmamhāti. Te punappunam yācitvā tesam gamanachandameva ñatvā anugantvā paridevitvā nivattimsu. Tepi anupubbena Jetavanam gantvā Satthāranca asītimahāthere ca therassa vacanena vanditvā punadivase yattha therassa kaniṭṭho vasati, tam vīthim piṇḍāya pavisimsu. Kuṭumbiko te sañjānitvā nisīdāpetvā katapaṭisanthāro "bhātikatthero me bhante kuhin"ti pucchi. Athassa te tam pavattim ārocesum. So tam sutvāva tesam pādamūle parivattento roditvā pucchi "idāni bhante kim kātabban"ti. Thero ito kassaci āgamanam paccāsīsati, tassa gatakāle tena saddhim āgamissatīti. Ayam me bhante bhāgineyyo Pālito nāma, etam pesethāti. Evam pesetum na sakkā, magge paripantho atthi tam pabbājetvā pesetum vaṭṭatīti. Evam katvā pesetha bhanteti. Atha nam pabbājetvā aḍḍhamāsamattam pattacīvaraggahaṇādīni sikkhāpetvā maggam ācikkhitvā pahiṇimsu.

So anupubbena tam gāmam patvā gāmadvāre ekam mahallakam disvā "imam gāmam nissāya koci āraññako vihāro atthī"ti pucchi. Atthi bhanteti. Ko nāma tattha vasatīti. Pālitatthero nāma bhanteti. Maggam me ācikkhathāti. Kosi tvam bhanteti. Therassa bhāgineyyomhīti.

Atha naṁ gahetvā vihāraṁ nesi, so theraṁ vanditvā aḍḍhamāsamattaṁ vattapaṭivattaṁ katvā theraṁ sammā paṭijaggitvā "bhante mātulakuṭumbiko me tumhākaṁ āgamanaṁ paccāsīsati, etha, gacchamā"ti āha. Tena hi imaṁ me yaṭṭhikoṭiṁ gaṇhāhīti. So yaṭṭhikoṭiṁ gahetvā therena saddhiṁ antogāmaṁ pāvisi. Manussā theraṁ nisīdāpetvā "kiṁ bhante gamanākāro vo paññāyatī"ti pucchiṁsu. Āma upāsakā, gantvā Satthāraṁ vandissāmīti. Te nānappakārena yācitvā alabhantā theraṁ uyyojetvā upaḍḍhapathaṁ gantvā roditvā nivattiṁsu. Sāmaṇero theraṁ yaṭṭhikoṭiyā ādāya gacchanto antarāmagge aṭaviyaṁ Kaṭṭhanagaraṁ nāma therena upanissāya vuṭṭhapubbaṁ gāmaṁ sampāpuṇi, so gāmato nikkhamitvā araññe gītaṁ gāyitvā¹ dārūni uddharantiyā ekissā itthiyā gītasaddaṁ sutvā sare nimittaṁ gaṇhi. Itthisaddo viya hi añño saddo purisānaṁ sakalasarīraṁ pharitvā ṭhātuṁ samattho nāma natthi, tenāha Bhagavā—

"Nāham bhikkhave aññam ekasaddampi samanupassāmi, yam evam Purisassa cittam pariyādāya tiṭṭhati, yathayidam bhikkhave itthisaddo"ti<sup>2</sup>.

Sāmaņero tattha nimittam gahetvā yaṭṭhikoṭim vissajjetvā "tiṭṭhatha tāva bhante, kiccam me atthī"ti tassā santikam gato. Sā tam disvā tuṇhī ahosi. So tāya saddhim sīlavipattim pāpuṇi. Thero cintesi "idāneva eko gītasaddo suyyittha, so ca kho itthiyā saddo chijji, sāmaņeropi cirāyati, so tāya saddhim sīlavipattim patto bhavissatī"ti. Sopi attano kiccam niṭṭhāpetvā āgantvā "gacchāma bhante"ti āha. Atha nam thero "pucchipāpojātosi sāmaņerā"ti. So tuṇhī hutvā therena punappunam puṭṭhopi na kiñci kathesi. Atha nam thero āha "tādisena pāpena mama yaṭṭhikoṭiggahaṇakiccam natthī"ti. So samvegappatto kāsāyāni apanetvā gihiniyāmena paridahitvā "bhante aham pubbe sāmaṇero, idāni panamhi gihī jāto, pabbajantopi ca svāham na saddhāya pabbajito, maggaparipanthabhayena pabbajito, etha gacchāmā"ti āha. Āvuso gihipāpopi samaṇapāpopi pāpoyeva, tvam samaṇabhāve ṭhatvāpi sīlamattam pūretum nāsakkhi, gihī hutvā kim

nāma kalyāṇaṁ karissasi, tādisena pāpena mama yaṭṭhikoṭiggahaṇakiccaṁ natthī''ti āha. Bhante amanussupaddavo maggo, tumhe ca andhā apariṇāyakā, kathaṁ idha vassissathāti. Atha naṁ thero "āvuso tvaṁ mā evaṁ cintayi, idheva me nipajjitvā marantassāpi aparāparaṁ parivattantassāpi tayā saddhiṁ gamanaṁ nāma natthī''ti vatvā imā gāthā abhāsi—

"Handāham hatacakkhusmi, kantāraddhānamāgato. Seyyamāno<sup>1</sup> na gacchāmi, natthi bāle sahāyatā.

Handāham hatacakkhusmi, kantāraddhānamāgato. Marissāmi, no gamissāmi, natthi bāle sahāyatā''ti.

Tam sutvā itaro samvegajāto "bhāriyam vata me sāhasikam ananucchavikam kammam katan"ti bāhā paggayha kandanto vanasaṇḍam pakkhanditvā tathā pakkantova ahosi. Therassāpi sīlatejena saṭṭhiyojanāyāmam paññāsayojanavitthatam pannarasayojanabahalam jayasumanapupphavaṇṇam nisīdanuṭṭhahanakālesu onamanunnamanapakatikam Sakkassa devarañño Paṇḍukambalasilāsanam uṇhākāram dassesi. Sakko "ko nu kho mam ṭhānā cāvetukāmo"ti olokento dibbena cakkhunā theram addasa. Tenāhu porāṇā—

"Sahassanetto Devindo, dibbacakkhum visodhayi. Pāpagarahī ayam Pālo, ājīvam parisodhayi.

Sahassanetto Devindo, dibbacakkhum visodhayi. Dhammagaruko ayam Pālo, nisinno sāsane rato"ti.

Athassa etadahosi "sacāhaṁ evarūpassa pāpagarahino dhammagarukassa ayyassa santikaṁ na gamissāmi. Muddhā me sattadhā phaleyya, gamissāmi tassa santikan"ti. Tato—

"Sahassanetto Devindo, devarajjasirindharo. Taṅkhaṇena āgantvāna², Cakkhupālamupāgami.

Upagantvā ca pana therassa avidūre padasaddamakāsi. Atha nam thero pucchi "ko eso"ti. Ayam bhante addhikoti. Kuhim yāsi upā-

sakāti. Sāvatthiyam bhanteti. Yāhi āvusoti. Ayyo pana bhante kuhim gamissatīti. Ahampi tattheva gamissāmīti. Tena hi ekatova gacchāma bhanteti. Aham āvuso dubbalo, mayā saddhim gacchantassa tava papañco bhavissatīti. Mayham accāyikam natthi, ahampi ayyena saddhim gacchanto dasasu puñākiriyavatthūsu ekam labhissāmi, ekatova gacchāma bhanteti. Thero "eso sappuriso bhavissatī"ti cintetvā "tena hi saddhim gamissāmi, yaṭṭhikoṭim gaṇha upāsakā"ti āha. Sakko tathā katvā pathavim saṅkhipanto sāyanhasamaye Jetavanam sampāpesi. Thero saṅkhapaṇavādisaddam sutvā "kattheso saddo"ti pucchi. Sāvatthiyam bhanteti. Pubbe mayam gamanakāle cirena gamimhāti. Aham ujumaggam jānāmi bhanteti. Tasmim khaṇe thero "nāyam manusso, devatā bhavissatī"ti sallakkhesi.

Sahassanetto Devindo, devarajjasirindharo. Saṅkhipitvāna taṁ maggaṁ. Khippaṁ Sāvatthimāgamīti.

So theram netvā therassevatthāya¹ kaniṭṭhakuṭumbikena kāritam paṇṇasālam netvā phalake² nisīdāpetvā piyasahāyakavaṇṇena tassa santikam gantvā "samma Cūḷapālā"ti pakkosi. Kim sammāti. Therassāgatabhāvam jānāsīti. Na jānāmi, kim pana thero āgatoti. "Āma samma, idāni aham vihāram gantvā theram tayā kāritapaṇṇasālāya nisinnakam disvā āgatomhī"ti vatvā pakkāmi. Kuṭumbikopi vihāram gantvā theram disvā pādamūle parivattanto roditvā "idam disvā aham bhante tumhākam pabbajitum nādāsin"ti-ādīni vatvā dve dāsadārake bhujisse katvā therassa santike pabbājetvā "antogāmato yāgubhattādīni āharitvā theram upaṭṭhahathā"ti paṭiyādesi³. Sāmaṇerā vattapaṭivattam katvā theram upaṭṭhahimsu.

Athekadivasam disāvāsino bhikkhū "Satthāram passissāmā" ti Jetavanam āgantvā Tathāgatam vanditvā asītimahāthere ca vinditvā<sup>4</sup> vihāracārikam carantā Cakkhupālattherassa vasanatthānam patvā "idampi passissāmā" ti

<sup>1.</sup> Therassa vasanatthāya (Ka)

<sup>3.</sup> Patipādesi (Sī, Syā)

<sup>2.</sup> Pallanke (Sī)

<sup>4.</sup> Disvā (Sī, Syā)

sāyam tadabhimukhā ahesum. Tasmim khaņe mahāmegho uṭṭhahi. Te "idāni atisāyanho, megho ca uṭṭhito, pātova gantvā passissāmā"ti nivattimsu. Devo paṭhamayāmam vassitvā majjhimayāme vigato. Thero āraddhavīriyo āciṇṇacaṅkamano, tasmā pacchimayāme caṅkamanam otari. Tadā ca pana navavuṭṭhāya bhūmiyā bahū indagopakā uṭṭhahimsu. Te there caṅkamante yebhuyyena vipajjimsu. Antevāsikā therassa caṅkamanaṭṭhānam kālasseva na sammajjimsu. Itare bhikkhū "therassa vasanaṭṭhānam passissāmā"ti āgantvā caṅkamane matapāṇake disvā "ko imasmim caṅkamatī"ti pucchimsu. Amhākam upajjhāyo bhanteti. Te ujjhāyimsu "passathāvuso samaṇassa kammam, sacakkhukakāle nipajjitvā niddāyanto kiñci akatvā idāni cakkhuvikalakāle 'caṅkamāmī'ti ettake pāṇake māresi, 'attham karissāmī'ti anattham karotī'ti.

Atha kho te gantvā Tathāgatassa ārocesuṁ "bhante Cakkhupālatthero 'caṅkamāmī'ti bahū pāṇake māresī'ti. Kiṁ pana so tumhehi mārento diṭṭhoti. Na diṭṭho bhanteti. Yatheva tumhe taṁ na passatha, tatheva sopi te pāṇe na passati. Khīṇāsavānaṁ maraṇacetanā nāma natthi bhikkhaveti. Bhante arahattassa upanissaye sati kasmā andho jātoti. Attano katakammavasena bhikkhaveti. Kiṁ pana bhante tena katanti. Tena hi bhikkhave sunātha—

Atīte Bārāṇasiyam Kāsiraññe¹ rajjam kārente eko vejjo gāmanigamesu caritvā vejjakammam karonto ekam cakkhudubbalam itthim disvā pucchi "kim te aphāsukan"ti. Akkhīhi na passāmīti. Bhesajjam te karissāmīti. Karohi sāmīti. Kim me dassasīti. Sace me akkhīni pākatikāni kātum sakkhissasi, aham te saddhim puttadhītāhi dāsī bhavissāmīti. So "sādhū"ti bhesajjam samvidahi, ekabhesajjeneva akkhīni pākatikāni ahesum. Sā cintesi "ahametassa saputtadhītā dāsī bhavissāmīti paṭijānim, na kho pana mam saṃhena sammācārena samudācarissati, vañcessāmi nan"ti. Sā vejjenāgantvā "kīdisam bhadde"ti puṭṭhā "pubbe me akkhīni thokam rujjimsu idāni pana atirekataram rujjantī"ti āha. Vejjo "ayam mam vañcetvā kiñci adātukāmā, na me etāya

dinnāya bhatiyā attho, idāneva nam andham karissāmī"ti cintetvā geham gantvā bhariyāya etamattham ācikkhi. Sā tuṇhī ahosi. So ekam bhesajjam yojetvā tassā santikam gantvā "bhadde imam bhesajjam añjehī"ti añjāpesi. Athassā dve akkhīni dīpasikhā viya vijjhāyimsu. So vejjo Cakkhupālo ahosi.

Bhikkhave tadā mama puttena katakammam pacchato pacchato anubandhi. Pāpakammam hi nāmetam dhuram vahato balibaddassa<sup>1</sup> padam cakkam viya anugacchatīti idam vattum kathetvā anusandhim ghaṭetvā patiṭṭhāpitamattikam sāsanam rājamuddāya lañchanto viya Dhammarājā imam gāthamāha—

 "Manopubbaṅgamā dhammā, manoseṭṭhā manomayā. Manasā ce paduṭṭhena, bhāsati vā karoti vā. Tato naṁ dukkhamanveti, cakkaṁva vahato padan"ti.

Tattha **mano**ti kāmāvacarakusalādibhedam sabbampi catubhūmikacittam. Imasmim pana pade tadā tassa vejjassa uppannacittavasena niyamiyamānam vavatthāpiyamānam paricchijjiyamānam domanassasahagatam paṭighasampayuttacittameva labbhati. **Pubbaṅgamā**ti tena paṭhamagāminā hutvā samannāgatā. **Dhammā**ti guṇadesanāpariyattinissattanijjīvavasena cattāro dhammā nāma. Tesu—

"Na hi dhammo adhammo ca, ubho samavipākino. Adhammo nirayam neti, dhammo pāpeti suggatin"ti<sup>2</sup>—

Ayaṁ guṇadhammo nāma. "Dhammaṁ vo bhikkhave desessāmi ādikalyāṇan"ti³ ayaṁ desanādhammo nāma. "Idha pana bhikkhave ekacce kulaputtā dhammaṁ pariyāpuṇanti Suttaṁ Geyyan"ti⁴ ayaṁ pariyattidhammo nāma. "Tasmiṁ kho pana samaye dhammā honti khandhā hontī"ti⁵ ayaṁ nissattadhammo nāma, nijjīvadhammotipi eso eva. Tesu imasmiṁ ṭhāne nissattanijjīvadhammo adhippeto. So atthato tayo arūpino khandhā vedanākkhandho saññākkhandho saṅkhārakkhandhoti. Ete hi mano pubbaṅgamo etesanti **manopubbaṅgamā** nāma.

<sup>1.</sup> Baliyaddassa (Sī, Syā) 2. Khu 2. 272; Khu 5. 357 pitthesu. 3. Ma 3. 327 pitthe.

<sup>4.</sup> Ma 1. 187 pitthe.

<sup>5.</sup> Abhi 1. 35 pitthe.

Katham panetehi saddhim ekavatthuko ekārammaņo apubbam acarimam ekakkhaņe uppajjamāno mano pubbangamo nāma hotīti? Uppādapaccayaṭṭhena. Yathā hi bahūsu ekato gāmaghātādīni kammāni karontesu "ko etesam pubbangamo"ti vutte yo nesam paccayo hoti, yam nissāya te tam kammam karonti, so datto vā mitto vā tesam pubbangamoti vuccati, evamsampadamidam veditabbam. Iti uppādapaccayaṭṭhena mano pubbangamo etesanti manopubbangamā. Na hi te mane anuppajjante uppajjitum sakkonti, mano pana ekaccesu cetasikesu anuppajjantesupi uppajjatiyeva. Adhipativasena pana mano seṭṭho etesanti manoseṭṭhā. Yathā hi corādīnam corajeṭṭhakādayo adhipatino seṭṭhā, tathā tesampi mano adhipati manova seṭṭho¹. Yathā pana dāru-ādīhi nipphannāni tāni tāni bhanḍāni dārumayādīni nāma honti, tathā tepi manato nipphannattā manomayā nāma.

Paduṭṭhenāti āgantukehi abhijjhādīhi dosehi paduṭṭhena. Pakatimano hi bhavaṅgacittaṁ, taṁ apaduṭṭhaṁ. Yathā hi pasannaṁ udakaṁ āgantukehi nīlādīhi upakkiliṭṭhaṁ nīlodakādibhedaṁ hoti, na ca navaṁ udakaṁ, nāpi purimaṁ pasanna-udakameva, tathā tampi āgantukehi abhijjhādīhi dosehi paduṭṭhaṁ hoti, na ca navaṁ cittaṁ, nāpi purimaṁ bhavaṅgacittameva, tenāha Bhagavā "pabhassaramidaṁ bhikkhave cittaṁ, tañca kho āgantukehi upakkilesehi upakkiliṭṭhan"ti². Evaṁ manasā ce paduṭṭhena, bhāsati vā karoti vā so bhāsamāno catubbidhaṁ vacīduccaritameva bhāsati, karonto tividhaṁ kāyaduccaritameva karoti, abhāsanto akaronto tāya abhijjhādīhi paduṭṭhamānasatāya tividhaṁ manoduccaritaṁ pūreti. Evamassa dasa akusalakammapathā pāripūriṁ gacchanti.

Tato naṁ dukkhamanvetīti tato tividhaduccaritato taṁ puggalaṁ dukkhaṁ anveti, duccaritānubhāvena catūsu apāyesu, manussesu vā tamattabhāvaṁ³ gacchantaṁ kāyavatthukampi itarampīti iminā pariyāyena kāyikacetasikaṁ vipākadukkhaṁ anugacchati. Yathā kiṁ? Cakkaṁva vahato padanti dhure yuttassa dhuraṁ vahato balibaddassa padaṁ cakkaṁ viya. Yathā hi so ekampi divasaṁ dvepi pañcapi dasapi aḍḍhamāsampi māsampi vahanto cakkaṁ nivattetuṁ jahituṁ na

sakkoti, atha khvassa purato abhikkamantassa yugam gīvam bādhati, pacchato paṭikkamantassa cakkam ūrumamsam paṭihanati. Imehi dvīhi ākārehi bādhantam cakkam tassa padānupadikam hoti, tatheva manasā paduṭṭhena tīṇi duccaritāni pūretvā ṭṭhitam puggalam nirayādīsu tattha tattha gatagataṭṭhāne duccaritamūlakam kāyikampi cetasikampi dukkhamanubandhatīti.

Gāthāpariyosāne timsasahassā bhikkhū saha paṭisambhidāyi arahattam pāpuṇimsu. Sampattaparisāyapi desanā sātthikā saphalā ahosīti.

Cakkhupālattheravatthu paṭhamam

#### 2. Matthakundalīvatthu

2. **Manopubbaṅgamā dhammā**ti dutiyagāthāpi Sāvatthiyaṁyeva Matthakundaliṁ¹ ārabbha bhāsitā.

Sāvatthiyam kira Adinnapubbako nāma brāhmaņo ahosi. Tena kassaci kiñci na dinnapubbam, tena tam "Adinnapubbako"tveva sañjānimsu. Tassa ekaputtako ahosi piyo manāpo. Athassa pilandhanam kāretukāmo "sace suvaņņakāre kāressāmi, bhattavetanam² dātabbam bhavissatī"ti sayameva suvaņņam koṭṭetvā maṭṭhāni kuṇḍalāni katvā adāsi. Tenassa putto Maṭṭhakuṇḍalītveva paññāyittha. Tassa soļasavassikakāle paṇḍurogo udapādi. Tassa mātā puttam oloketvā "brāhmaṇa puttassa te rogo uppanno, tikicchāpehi nan"ti āha. Bhoti sace vejjam ānessāmi. Bhattavetanam² dātabbam bhavissati, kim tvam mama dhanacchedam na olokessasīti. Atha nam kim karissasi brāhmaṇāti. Yathā me dhanacchedo na hoti, tathā karissāmīti. So vejjānam santikam gantvā "asukarogassa nāma tumhe kim bhesajjam karothā"ti pucchi. Athassa te yam vā tam vā rukkhatacādim ācikkhanti. So tamāharitvā puttassa bhesajjam karoti, tam karontassevassa rogo balavā ahosi, atekicchabhāvam upāgami.

brāhmaņo tassa dubbalabhāvaṁ ñatvā ekaṁ vejjaṁ pakkosi. So taṁ oloketvāva "amhākaṁ ekaṁ kiccaṁ atthi, aññaṁ vejjaṁ pakkositvā tikicchāpehī"ti taṁ pahāya nikkhami. Brāhmaņo tassa maraṇasamayaṁ ñatvā "imassa dassanatthāya āgatā antogehe sāpateyyaṁ passissanti, bahi naṁ karissāmī"ti puttaṁ nīharitvā bahi-ālinde nipajjāpesi.

Tam divasam Bhagavā balavapaccūsasamaye mahākarunāsamāpattito vutthāya pubbabuddhesu katādhikārānam ussannakusalamūlānam veneyyabandhavānam dassanattham Buddhacakkhunā lokam volokento dasasahassacakkavālesu ñānajālam patthari. Matthakundalī bahi-ālinde nipannākāreneva tassa anto paññāyi. Satthā tam disvā tassa antogehā nīharitvā tattha nipajjāpitabhāvam natvā "atthi nu kho mayham ettha gatapaccayena attho"ti upadhārento idam addasa—ayam mānavo mayi cittam pasadetva kalam katva Tavatimsadevaloke timsayojanike kanakavimāne nibbattissati, accharāsahassaparivāro bhavissati, brāhmanopi tam jhāpetvā rodanto ālāhane<sup>1</sup> vicarissati. Devaputto tigāvutappamānam satthisakatabhārālankārapatimanditam accharāsahassaparivāram attabhāvam oloketvā "kena nu kho kammena mayā ayam sirisampatti laddhā"ti oloketvā mayi cittappasādena laddhabhāvam natvā "ayam brāhmano dhanacchedabhayena mama bhesajjamakatvā idāni āļāhanam gantvā rodati, vippakārappattam nam karissāmī"ti pitari rodante Matthakundalivannena āgantvā ālāhanassāvidūre nipajjitvā rodissati. Atha nam brāhmano "kosi tvam"ti pucchissati. "Ayam te putto Matthakundalī"ti ācikkhissati. Kuhim nibbattosīti. Tāvatimsabhavaneti. "Kim kammam katvā"ti vutte mayi cittappasādena nibbattabhāvam ācikkhissati. Brāhmano "tumhesu cittam pasādetvā sagge nibbatto nāma atthī"ti mam pucchissati. Athassāham "ettakāni satāni vā sahassāni vā satasahassāni vāti na sakkā gananā<sup>2</sup> paricchinditun"ti vatvā Dhammapade gātham bhāsissāmi. Gāthāpariyosāne caturāsītiyā pāṇasahassānam dhammābhisamayo bhavissati, Matthakundalī sotāpanno bhavissati. Tathā Adinnapubbako brāhmaņo.

iti imam kulaputtam nissāya mahādhammābhisamayo<sup>1</sup> bhavissatīti disvā punadivase katasarīrapaṭijaggano mahābhikkhusamghaparivuto Sāvatthim piṇḍāya pavisitvā anupubbena brāhmaṇassa gehadvāram gato.

Tasmim khane Maṭṭhakuṇḍalī antogehābhimukho nipanno hoti. Athassa Satthā attano apassanabhāvam ñatvā ekam rasmim vissajjesi. Māṇavo "kim obhāso nāmeso"ti parivattetvā nipannova Satthāram disvā "andhabālapitaram nissāya evarūpam Buddham upasankamitvā kāyaveyyāvaṭikam vā kātum dānam vā dātum dhammam vā sotum nālattham, idāni me hatthāpi anadhipateyyā, aññam kattabbam natthī"ti manameva pasādesi. Satthā "alam ettakena cittappasādena imassā"ti pakkāmi. So Tathāgate cakkhupatham vijahanteyeva pasannamano kālam katvā suttappabuddho viya devaloke timsayojanike kanakavimāne nibbatti.

Brāhmaņopissa sarīram jhāpetvā āļāhane rodanaparāyaņo ahosi, devasikam āļāhanam gantvā rodati "kaham ekaputtaka, kaham ekaputtakā"ti. Devaputtopi attano sampattim oloketvā "kena me kammena laddhā"ti upadhārento "Satthari manopasādenā"ti ñatvā "ayam brāhmaņo mama aphāsukakāle bhesajjamakāretvā idāni āļāhanam gantvā rodati, vippakārappattameva nam kātum vaṭṭatī"ti Maṭṭhakuṇḍalivaṇṇena āgantvā āļāhanassāvidūre bāhā paggayha rodanto aṭṭhāsi. Brāhmaṇo tam disvā² "aham tāva puttasokena rodāmi, esa kimattham rodati, pucchissāmi nan"ti pucchanto imam gāthamāha—

"Alaṅkato Maṭṭhakuṇḍalī,
Māladhārī<sup>3</sup> haricandanussado.
Bāhā paggayha kandasi,
Vanamajihe kiṁ dukkhito tuvan"ti<sup>4</sup>.

<sup>1.</sup> Dhammayāgo mahā (Sī, Syā)

<sup>3.</sup> Mālabhārī (Sī, Syā)

<sup>2.</sup> Disvā cintesi (Ka)

<sup>4.</sup> Khu 2. 113, 146 pitthesu.

#### So māṇavo āha—

"Sovaṇṇamayo pabhassaro,
Uppanno rathapañjaro mama.
Tassa cakkayugaṁ na vindāmi,
Tena dukkhena jahāmi¹ jīvitan"ti².

#### Atha nam brāhmaņo āha—

"Sovaṇṇamayaṁ maṇimayaṁ,
Lohitakamayaṁ atha rūpiyamayaṁ.
Ācikkha me bhadda māṇava,
Cakkayugaṁ paṭipādayāmi te"ti².

Tam sutvā māṇavo "ayam brāhmaṇo puttassa bhesajjamakatvā puttapatirūpakam mam disvā rodanto 'suvaṇṇādimayam rathacakkam karomī'ti vadati, hotu niggaṇhissāmi nan"ti cintetvā "kīva mahantam me cakkayugam karissasī"ti vatvā "yāva mahantam ākankhasi, tāva mahantam karissāmī"ti vutte candimasūriyehi me attho, te me dehī"ti yācanto āha—

"So māṇavo tassa pāvadi, Candasūriyā ubhayettha dissare. Sovaṇṇamayo ratho mama, Tena cakkayugena sobhatī"ti<sup>3</sup>.

#### Atha nam brāhmaņo āha—

"Bālo kho tvam asi māṇava, Yo tvam patthayase apatthiyam. Maññāmi tuvam marissasi, Na hi tvam lacchasi candasūriye"ti<sup>3</sup>.

<sup>1.</sup> Jahissam (Sī), jahissāmi (Syā)

<sup>2.</sup> Khu 2. 113, 146 pitthesu.

<sup>3.</sup> Khu 2. 113, 147 pitthādīsu.

Atha nam mānavo-āha<sup>1</sup>—

"Kim pana paññāyamānassatthāya rodanto bālo hoti, udāhu apaññāyamānassatthāyā"ti vatvā—

"Gamanāgamanampi dissati, Vaṇṇadhātu ubhayattha vīthiyā. Peto kālakato na dissati, Ko nidha kandataṁ bālyataro"ti².

Tam sutvā brāhmaņo "yuttam esa vadatī"ti sallakkhetvā

"Saccam kho vadesi māṇava, Ahameva kandatam bālyataro. Candam viya dārako rudam, Petam kālakatābhipatthayin"ti<sup>2</sup>—

Vatvā tassa kathāya nissoko hutvā māṇavassa thutim karonto imā gāthā abhāsi—

"Ādittam vata mam santam, ghatasittamva pāvakam. Vārinā viya osiñcam, sabbam nibbāpaye daram. Abbahī vata me sallam, sokam hadayanissitam. Yo me sokaparetassa, puttasokam apānudi. Svāham abbūļhasallosmi, sītibhūtosmi nibbuto. Na socāmi na rodāmi, tava sutvāna māṇavā"ti².

Atha nam "ko nāma tvan"ti pucchanto—

"Devatānusi Gandhabbo, adu Sakko purindado. Ko vā tvam kassa vā putto, katham jānemu tam mayan"ti<sup>2</sup>—

Āha. Athassa māṇavo—

"Yañca kandasi yañca rodasi, Puttaṁ āļāhane sayaṁ dahitvā. Svāhaṁ kusalaṁ karitvā kammaṁ, Tidasānaṁ sahabyataṁ gato"ti<sup>2</sup>—

#### Ācikkhi. Atha nam brāhmaņo āha—

"Appam vā bahum vā nāddasāma, Dānam dadantassa sake agāre. Uposathakammam vā tādisam, Kena kammena gatosi devalokan"ti.<sup>1</sup>

#### Māṇavo āha—

"Ābādhikoham dukkhito gilāno, Ātūrarūpomhi sake nivesane. Buddham vigatarajam vitiņņakankham, Addakkhim Sugatam anomapaññam.

Svāhaṁ muditamano pasannacitto, Añjaliṁ akariṁ Tathāgatassa. Tāhaṁ kusalaṁ karitvāna kammaṁ, Tidasānaṁ sahabyataṁ gato"ti¹.

Tasmim kathenteyeva brāhmaņassa sakalasarīram pītiyā paripūri, so tam pītim pavedento—

"Acchariyam vata abbhutam vata,
Añjalikammassa ayamīdiso vipāko.
Ahampi pamuditamano pasannacitto,
Ajjeva Buddham saranam vajāmī"ti<sup>2</sup>—

#### Āha. Atha nam mānavo—

"Ajjeva Buddham saraṇam vajāhi, Dhammañca samghañca pasannacitto. Tatheva sikkhāpadāni pañca, Akhaṇḍaphullāni samādiyassu. Pāṇātipātā viramassu khippam, Loke adinnam parivajjayassu. Amajjapo mā ca musā bhaṇāhi, Sakena dārena ca hohi tuttho"ti1—

Āha. So "sādhū"ti sampaṭicchitvā imā gāthā abhāsi—

"Atthakāmosi me yakkha, hitakāmosi devate. Karomi tuyham vacanam, tvamsi ācariyo mama.

Upemi saraṇam Buddham, dhammañcāpi anuttaram. Samghañca naradevassa, gacchāmi saraṇam aham.

Pāṇātipātā viramāmi khippam, Loke adinnam parivajjayāmi. Amajjapo no ca musā bhaṇāmi, Sakena dārena ca homi tuṭṭho"ti<sup>1</sup>.

Atha nam devaputto "brāhmaṇa te gehe bahum dhanam atthi, Satthāram upasankamitvā dānam dehi, dhammam suṇāhi, pañham pucchāhī"ti vatvā tattheva antaradhāyi.

Brāhmanopi geham gantvā brāhmanim āmantetvā "bhadde aham ajja samanam Gotamam nimantetvā panham pucchissāmi, sakkāram karohī"ti<sup>2</sup> vatvā vihāram gantvā Satthāram neva abhivādetvā na patisanthāram katvā<sup>3</sup> ekamantam thito "bho Gotama adhivāsehi ajjatanāya bhattam saddhim bhikkhusamghenā"ti āha. Satthā adhivāsesi. So Satthu adhivāsanam viditvā vegenāgantvā sake nivesane panītam khādanīyam bhojanīyanca patiyādāpesi. Satthā bhikkhusamghaparivuto tassa geham gantvā paññattāsane nisīdi. Brāhmano sakkaccam parivisi, mahājano sannipati. Micchāditthikena kira Tathāgate nimantite dve janakāyā sannipatanti micchāditthikā "ajja samanam Gotamam pañham pucchanāya<sup>4</sup> vihethiyamānam passissāmā"ti sannipatanti, sammāditthikā "ajja Buddhavisayam Buddhalīlam passissāmā"ti sannipatanti. Atha kho brāhmano katabhattakiccam Tathāgatamupasankamitvā nīcāsane nisinno pañham pucchi "bho Gotama tumhākam dānam adatvā pūjam akatvā dhammam asutvā uposathavāsam avasitvā kevalam manopasādamatteneva sagge nibbattā nāma hontī"ti. Brāhmana kasmā mam pucchasi, nanu te puttena Matthakundalinā mayi manam

<sup>1.</sup> Khu 2. 115, 148 piṭṭhādīsu.

<sup>3.</sup> Satthārameva abhivādetvā paṭisandhāram katvā (Ka)

<sup>4.</sup> Pañhapucchāya (Sī), pañham pucchāya (Syā)

<sup>2.</sup> Karomīti (Ka)

pasādetvā attano sagge nibbattabhāvo kathitoti. Kadā bho Gotamāti. Nanu tvam ajja susānam gantvā kandanto avidūre bāhā paggayha kandantam ekam māṇavam disvā "alamkato Maṭṭhakuṇḍalī, māladhārī haricandanussado"ti dvīhi janehi kathitakatham pakāsento sabbam Maṭṭhakuṇḍalivatthum kathesi. Tenevetam Buddhabhāsitam nāma jātam.

Taṁ kathetvā ca pana "na kho brāhmaṇa ekasataṁ vā na dvesataṁ¹, atha kho mayi manaṁ pasādetvā sagge nibbattānaṁ gaṇanā nāma natthī"ti āha. Atha mahājano na nibbematiko² hoti, athassa anibbematikabhāvaṁ viditvā Satthā "Maṭṭhakuṇḍalidevaputto vimāneneva saddhiṁ āgacchatū"ti adhiṭṭhāsi. So tigāvutappamāṇeneva dibbābharaṇapaṭimaṇḍitena attabhāvena āgantvā vimānato oruyha Satthāraṁ vanditvā ekamantaṁ aṭṭhāsi. Atha naṁ Satthā "tvaṁ imaṁ sampattiṁ kiṁ kammaṁ katvā patilabhī"ti pucchanto—

"Abhikkantena vaṇṇena, yā tvaṁ tiṭṭhasi devate. Obhāsentī disā sabbā, osadhī viya tārakā. Pucchāmi taṁ deva mahānubhāva, Manussabhūto kimakāsi puññan"ti—

Gāthamāha. Devaputto ayam me bhante sampatti tumhesu cittam pasādetvā laddhāti. Mayi cittam pasādetvā laddhā teti. Āma bhanteti. Mahājano devaputtam oloketvā "acchariyā vata bho Buddhaguṇā, Adinnapubbakabrāhmaṇassa nāma putto aññam kiñci puññam akatvā Satthari cittam pasādetvā evarūpam sampattim paṭilabhī"ti tuṭṭhim pavedesi.

Atha nesam kusalākusalakammakaraņe manova pubbangamo, manova settho. Pasannena hi manena katam kammam devalokam manussalokam gacchantam puggalam chāyāva na vijahatīti idam vatthum kathetvā anusandhim ghatetvā patiṭṭhāpitamattikam sāsanam rājamuddāya lanchanto viya Dhammarājā imam gāthamāha—

 "Manopubbaṅgamā dhammā, manoseṭṭhā manomayā. Manasā ce pasannena, bhāsati vā karoti vā. Tato naṁ sukhamanveti, chāyāva anapāyinī"ti<sup>3</sup>.

Tattha kiñcāpi **mano**ti avisesena sabbampi catubhūmikacittam vuccati, imasmim pana pade niyamiyamānam vavatthāpiyamānam paricchijjiyamānam atthavidham kāmāvacarakusalacittam labbhati. Vatthuvasena panāhariyamānam tatopi somanassasahagatam ñānasampayuttacittameva labbhati. **Pubbangamā**ti tena pathamagāminā hutvā samannāgatā. **Dhammā**ti vedanādayo tayo khandhā. Ete hi<sup>1</sup> uppādapaccayatthena somanassasampayuttamano pubbangamo etesanti manopubbangamā nāma. Yathā hi bahūsu ekato hutvā mahābhikkhusamghassa cīvaradānādīni vā ulārapūjādhammassavanādīni vā mālāgandhasakkārakaraṇādīni vā puññāni karontesu "ko etesam pubbangamo"ti vutte yo tesam paccayo hoti, yam nissaya te tani puññani karonti, so tisso vā phusso vā tesam pubbangamoti vuccati, evamsampadamidam veditabbam. Iti uppādapaccayatthena mano pubbangamo etesanti manopubbangama. Na hi te mane anuppajjante uppajjitum sakkonti, mano pana ekaccesu cetasikesu anuppajjantesupi uppajjatiyeva. Evam adhipativasena pana mano settho etesanti manosettha. Yathā hi ganādīnam adhipati puriso ganasettho senisetthoti vuccati, tathā tesampi manova settho. Yathā pana suvannadīhi nipphāditāni bhandāni suvannamayādīni nāma honti, tathā etepi manato nipphannattā manomayā nāma.

Pasannenāti anabhijjhādīhi guņehi pasannena. Bhāsati vā karoti vāti evarūpena manena bhāsanto catubbidham vacīsucaritameva bhāsati, karonto tividham kāyasucaritameva karoti, abhāsanto akaronto tāya anabhijjhādīhi pasannamānasatāya tividham manosucaritam pūreti. Evamassa dasa kusalakammapathā pāripūrim gacchanti.

Tato naṁ sukhamanvetīti tato tividhasucaritato naṁ puggalaṁ sukhamanveti. Idha tebhūmikampi kusalaṁ adhippetaṁ, tasmā tebhūmikasucaritānubhāvena sugatibhave nibbattaṁ puggalaṁ, duggatiyaṁ vā sukhānubhavanaṭṭhāne ṭhitaṁ kāyavatthukampi itaravatthukampi avatthukampīti kāyikacetasikaṁ vipākasukhaṁ anugacchati, na vijahatīti attho veditabbo. Yathā kiṁ? Chāyāva anapāyinīti yathā hi chāyā nāma sarīrappaṭibaddhā sarīre gacchante gacchati, tiṭṭhante tiṭṭhati, nisīdante nisīdati, na sakkoti² "sanhena vā

pharusena vā nivattāhī"ti vatvā vā pothetvā vā nivattāpetum. Kasmā? Sarīrappaṭibaddhattā. Evameva imesam dasannam kusalakammapathānam āciṇṇasamāciṇṇakusalamūlikam kāmāvacarādibhedam kāyikacetasikasukham gatagataṭṭhāne anapāyinī chāyā viya hutvā na vijahatīti.

Gāthāpariyosāne caturāsītiyā pāṇasahassānaṁ dhammābhisamayo ahosi, Maṭṭhakuṇḍalidevaputto sotāpattiphale patiṭṭhahi, tathā Adinnapubbako brāhmaṇo. So tāvamahantaṁ vibhavaṁ Buddhasāsane vippakirīti.

Matthakundalīvatthu dutiyam.

#### 3. Tissatthera vatthu

**Akkocchi man**ti imam dhammadesanam Satthā Jetavane viharanto Tissattheram ārabbha kathesi.

So kirāyasmā Tissatthero Bhagavato Pitucchāputto ahosi, mahallakakāle pabbajitvā Buddhānam uppannalābhasakkāram paribhuñjanto thūlasarīro ākotitapaccākotitehi cīvarehi nivāsetvā yebhuyyena vihāramajjhe upatthānasālāyam nisīdati. Tathāgatam dassanatthāya āgatā āgantukabhikkhū tam disvā "eko mahāthero bhavissatī" ti saññāya tassa santikam gantvā vattam āpucchanti, pādasambāhanādīni āpucchanti. So tunhī ahosi. Atha nam eko daharabhikkhu "kativassā tumhe"ti pucchitvā "vassam natthi, mahallakakāle pabbajitā mayan"ti vutte "āvuso dubbinīta mahallaka attano pamāṇam na jānāsi, ettake mahāthere disvā sāmīcikammamattampi na karosi, vatte āpucchiyamāne tunhī hosi, kukkuccamattampi te natthī"ti accharam pahari. So khattiyamanam janetva "tumhe kassa santikam agata"ti pucchityā "Satthu santikan"ti vutte "mam pana 'ko eso'ti sallakkhetha mūlameva vo chindissāmī"ti vatvā rudanto dukkhī dummano Satthu santikam agamāsi. Atha nam Satthā "kim nu tvam Tissa dukkhī dummano assumukho rodamāno āgatosī"ti pucchi. Tepi bhikkhū "esa gantvā kiñci ālolam kareyyā"ti

teneva saddhim gantvā Satthāram vanditvā ekamantam nisīdimsu. So Satthārā pucchito "ime mam bhante bhikkhū akkosantī"ti āha. Kaham pana tvam nisinnosīti. Vihāramajjhe upaṭṭhānasālāyam bhanteti. Ime te bhikkhū āgacchantā diṭṭhāti. Āma diṭṭhā bhanteti. Kim uṭṭhāya te paccuggamanam katanti. Na katam bhanteti. Parikkhāraggahaṇam āpucchitanti. Nāpucchitam bhanteti. Vattam vā pānīyam vā āpucchitanti. Nāpucchitam bhanteti. Āsanam nīharitvā abhivādetvā¹ pādasambāhanam katanti. Na katam bhanteti. Tissa mahallakabhikkhūnam sabbam etam vattam kātabbam. Etam vattam akarontena vihāramajjhe nisīditum na vaṭṭati, taveva doso, ete bhikkhū khamāpe hīti. Ete mam bhante akkosimsu, nāham ete khamāpemīti. Tissa mā evam kari, taveva doso, khamāpehi neti. Na khamāpemi bhanteti. Atha Satthā "dubbaco esa bhante"ti bhikkhūhi vutte "na bhikkhave idāneva dubbaco esa, pubbepi esa dubbacoyevā"ti vatvā "idāni tāvassa bhante dubbacabhāvo amhehi ñāto, atīte esa kim akāsī"ti vutte "tena hi bhikkhave suṇāthā"ti vatvā atītamāhari.

Atīte Bārāṇasiyam Bārāṇasiraññe rajjam kārente Devilo² nāma tāpaso aṭṭha māse Himavante vasitvā loṇambilaseva natthāya cattāro māse nagaramupanissāya vasitukāmo Himavantato āgantvā nagaradvāre dārake disvā pucchi "imam nagaram sampattapabbajitā kattha vasantī"ti. Kumbhakārasālāyam bhanteti. Tāpaso Kumbhakārasālam gantvā dvāre ṭhatvā "sace te bhaggava agaru, vaseyyāma ekarattim sālāyan"ti āha. Kumbhakāro "mayham rattim sālāyam kiccam natthi, mahatī sālā, yathāsukham vasatha bhante"ti sālam niyyādesi. Tasmim pavisitvā nisinne aparopi Nārado nāma tāpaso Himavantato āgantvā kumbhakāram ekarattivāsam yāci. Kumbhakāro "paṭhamam āgato iminā saddhim ekato vasitukāmo bhaveyya vā no vā, attānam parimocessāmī"ti cintetvā "sace bhante paṭhamam upagato rocessati³, tassa ruciyā vasathā"ti āha. So tamupasaṅkamitvā "sace te ācariya agaru, mayañcettha ekarattim vaseyyāmā"ti yāci. "Mahatī sālā,

pavisitvā ekamante vasāhī''ti vutte pavisitvā puretaram paviṭṭhassa Devilassa aparabhāge nisīdi. Ubhopi sāraṇīyakatham kathetvā nipajjimsu.

Sayanakāle Nārado Devilassa nipajjanaṭṭhānañca dvārañca sallakkhetvā nipajji. So pana Devilo nipajjamāno attano nipajjanaṭṭhāne anipajjitvā dvāramajjhe tiriyam nipajji. Nārado rattim nikkhamanto tassa jaṭāsu akkami. "Ko mam akkamī"ti ca vutte "ācariya ahan"ti āha. Kūṭajaṭila araññato āgantvā mama jaṭāsu akkamasīti. "Ācariya tumhākam idha nipannabhāvam na jānāmi, khamatha me"ti vatvā tassa kandantasseva bahi nikkhami. Itaro "ayam pavisantopi mam akkameyyā"ti parivattetvā pādaṭṭhāne sīsam katvā nipajji. Nāradopi pavisanto "paṭhamampātam ācariye aparajjhim, idānissa pādapassena pavisissāmī"ti cintetvā āgacchanto gīvāya akkami. "Ko eso"ti ca vutte "aham ācariyā"ti vatvā "kūṭajaṭila paṭhamam mama jaṭāsu akkamitvā idāni gīvāya akkamasi, abhisapissāmi tan"ti vutte "ācariya mayham doso natthi, aham tumhākam evam nipannabhāvam na jānāmi, 'paṭhamampi me aparaddham, idāni pādapassena pavisissāmī'ti paviṭṭhomhi, khamatha me"ti āha. Kūṭajaṭila abhisapissāmi tanti. Mā evam karittha ācariyāti. So tassa vacanam anādiyitvā—

"Sahassaramsī satatejo, sūriyo tamavinodano.
Pātodayante sūriye, muddhā te phalatu sattadhā"ti—

Tam abhisapi eva. Nārado "ācariya mayham doso natthīti mama vadantasseva tumhe abhisapatha, yassa doso atthi, tassa muddhā phalatu, mā niddosassā"ti vatvā—

"Sahassaramsī satatejo, sūriyo tamavinodano.
Pātodayante sūriye, muddhā te phalatu sattadhā"ti—

Abhisapi. So pana mahānubhāvo atīte cattālīsa, anāgate cattālīsāti asītikappe anussarati. Tasmā "kassa nu kho upari abhisapo patissatī"ti upadhārento "ācariyassā"ti ñatvā tasmim anukampam paṭicca iddhibalena aruṇuggamanam nivāreti.

Nāgarā aruņe anuggacchante rājadvāram gantvā "deva tayi rajjam kārente aruņo na uṭṭhahati, aruṇam no uṭṭhāpehī"ti kandimsu. Rājā attano kāyakammādīni olokento kiñci ayuttam adisvā "kim nu kho kāraṇan"ti cintetvā "pabbajitānam vivādena bhavitabban"ti parisankamāno "kacci imasmim nagare pabbajitā atthī"ti pucchi. "Hiyyo sāyam Kumbhakārasālāyam āgatā atthi devā"ti vutte tamkhaṇaññeva rājā ukkāhi dhāriyamānāhi tattha gantvā Nāradam vanditvā ekamantam nisinno āha—

"Kammantā nappavattanti, jambudīpassa Nārada. Kena loko tamobhūto, tam me akkhāhi pucchito"ti.

Nārado sabbam tam pavattim ācikkhitvā iminā kāraņena aham iminā abhisapito, athāham "mayham doso natthi, yassa doso atthi, tasseva upari abhisapo patatū"ti vatvā abhisapim. Abhisapitvā ca pana "kassa nu kho upari abhisapo patissatī"ti upadhārento "sūriyuggamanavelāya ācariyassa muddhā sattadhā phalissatī"ti disvā etasmim anukampam paticca arunassa uggamanam<sup>1</sup> na demīti. Katham pana assa bhante antarāyo na bhaveyyāti. Sace mam khamāpeyya, na bhaveyyāti. "Tena hi khamāpehī"ti vutte eso mahārāja mam jatāsu ca gīvāya ca akkami, nāham etam kūtajatilam khamāpemīti. Khamāpehi bhante, mā evam karitthāti. Na khamāpemīti. "Muddhā te sattadhā phalissatī"ti vuttepi na khamāpetiyeva. Atha nam rājā "na tvam attano ruciyā khamāpessasī"ti hatthapādakucchigīvāsu gāhāpetvā Nāradassa pādamūle onamāpesi. Nāradopi "utthehi ācariya, khamāmi te"ti vatvā "mahārāja nāyam yathāmanena khamāpeti, nagarassa avidūre eko saro atthi, tattha nam sīse mattikāpindam katvā galappamāne udake thapāpehī"ti āha. Rājā tathā kāresi. Nārado Devilam āmantetvā "ācariya mayā iddhiyā vissatthāya sūriyasantāpe utthahante udake nimujjitvā aññena thānena uttaritvā gaccheyyāsī"ti āha. Tassa sūriyaramsīhi samphutthamattova<sup>2</sup> mattikāpindo sattadhā phali, so nimujjitvā aññena thānena palāyīti.

Satthā imam dhammadesanam āharitvā "tadā bhikkhave rājā Ānando ahosi, Devilo Tisso, Nārado ahamevāti evam tadāpesa

dubbacoyevā"ti vatvā Tissattheram āmantetvā "Tissa bhikkhuno nāma 'asukenāham akkuṭṭho¹, asukena pahaṭo, asukena jito, asuko kho me bhaṇḍam ahāsī'ti cintentassa veram nāma na vūpasammati, evam pana anupanayhantasseva upasammatī"ti vatvā imā gāthā abhāsi—

- 3. "Akkocchi mam avadhi mam, ajini² mam ahāsi me. Ye ca tam upanayhanti, veram tesam na sammati.
- 4. Akkocchi mam avadhi mam, ajini mam ahāsi me. Ye ca tam nupanayhanti, veram tesūpasammatī"ti.

Tattha akkocchīti akkosi. Avadhīti pahari. Ajinīti kūṭasakkhi-otāraṇena vā vādapaṭivādena vā karaṇuttariyakaraṇena vā ajesi. Ahāsi meti mama santakaṁ pattādīsu kiñcideva avahari. Ye ca tanti ye keci devatā vā manussā vā gahaṭṭhā vā pabbajitā vā taṁ "akkocchi man"ti ādivatthukaṁ kodhaṁ sakaṭadhuraṁ viya naddhinā, pūtimacchādīni viya ca kusādīhi punappunaṁ veṭhetvā upanayhanti, tesaṁ sakiṁ uppannaṁ veraṁ na sammatīti na vūpasammati. Ye ca taṁ nupanayhantīti asatiyā amanasikāravasena vā kammapaccavekkhaṇādivasena vā ye taṁ akkosādivatthukaṁ kodhaṁ tayāpi koci niddoso purimabhave akkuṭṭho bhavissati, pahaṭo bhavissati, kūṭasakkhiṁ otāretvā jito bhavissati, kassaci te pasayha kiñci acchinnaṁ bhavissati, tasmā niddoso hutvāpi akkosādīni pāpuṇāsīti evaṁ na upanayhanti. Tesu pamādena uppannampi veraṁ iminā anupanayhanena nirindhano viya jātavedo vūpasammatīti.

Desanāpariyosāne satasahassābhikkhū sotāpattiphalādīni pāpuņimsu. Dhammadesanā mahājanassa sātthikā ahosi. Dubbacopi subbacoyeva jākoti.

Tissattheravatthu<sup>3</sup> tatiyam.

#### 4. Kāļayakkhinīvatthu

Na hi verenāti imam dhammadesanam Satthā Jetavane viharanto aññataram vañcyitthim ārabbha kathesi.

Eko kira kutumbikaputto pitari kālakate khette ca ghare ca sabbakammāni<sup>1</sup> attanāva karonto mātaram patijaggi. Athassa mātā "kumārikam te tāta ānessāmī"ti āha. Amma mā evam vadetha, aham yāvajīvam tumhe patijaggissāmīti. Tāta khette ca ghare ca kiccam tvameva karosi, tena mayham cittasukham nāma na hoti, ānessāmīti. So punappunam patikkhipityā tunhī ahosi. Sā ekam kulam gantukāmā<sup>2</sup> gehā nikkhami. Atha nam putto "kataram kulam gacchatha" ti pucchitva "asukakulam nama" ti vutte tattha gamanam patisedhetvā attano abhirucitam kulam ācikkhi. Sā tattha gantvā kumārikam vāretvā<sup>3</sup> divasam vavatthapetvā tam ānetvā tassa ghare<sup>4</sup> akāsi. Sā vañihā ahosi. Atha nam mātā putta tvam attano ruciyā kumārikam ānāpesi, sā idāni vanjhā jātā, aputtakanca nāma kulam vinassati, pavenī na ghatīyati, tena aññam te kumārikam ānemīti. Tena "alam ammā"ti vuccamānāpi punappunam kathesi. Vancyitthī tam katham sutvā "puttā nāma mātāpitūnam vacanam atikkamitum na sakkonti, idāni aññam vijāyinim itthim ānetvā mam dāsibhogena bhunjissati. Yannūnāham sayameva ekam kumārikam ānevyan"ti cintetvā ekam kulam gantvā tassatthāya kumārikam vāretvā "kim nāmetam amma vadesī"ti tehi patikkhittā "aham vañjhā, aputtakam nāma kulam vinassati, tumhākam pana dhītā puttham vā dhītaram vā labhitvā kutumbikassa sāminī bhavissati, mayham sāmikassa nam dethā"ti yācitvā sampaticchāpetvā ānetvā sāmikassa ghare akāsi.

Athassā etadahosi "sacāyam puttam vā dhītaram vā labhissati ayameva kuṭumbassa sāminī bhavissati. Yathā dārakam na labhati, tatheva nam kātum vaṭṭatī"ti. Atha nam sā āha "amma yadā te kucchiyam gabbho patiṭṭhāti, atha me āroceyyāsī"ti. Sā "sādhū"ti paṭissuṇitvā gabbhe patiṭṭhite tassā ārocesi. Itarissā pana sā sayameva niccam yāgubhattam deti, athassā āhāreneva saddhim gabbhapātanabhesajjamadāsi, gabbho pati. Dutiyampi gabbhe patiṭṭhite

<sup>1.</sup> Sabbakiccakammāni (Ka)

<sup>2.</sup> Ekam kulakumārikam ānetum (Ka)

<sup>3.</sup> Dhāretvā (Ka)

<sup>4.</sup> Tam itarassa ghare (Sī, Ka)

ārocesi, itarā dutiyampi tatheva pātesi. Atha nam pativissakitthiyo pucchimsu "kacci te sapatti antarāyam karotī"ti. Sā tamattham ārocetvā "andhabāle kasmā evamakāsi, ayam tava issariyabhayena gabbhassa pātanabhesajjam vojetvā deti, tena te gabbho patati, mā puna evamakatthā"ti vuttā tatiyavāre na kathesi. Atha sā itarissā udaram disvā "kasmā mayham gabbhassa patitthitabhāvam na kathesī"ti vatvā "tvam mam ānetvā vañcetvā dve vāre gabbham pātesi kimattham tuyham kathemī''ti vutte "natthā dānimhī"ti cintetvā tassā pamādam olokentī parinate gabbhe okāsam labhitvā bhesajjam yojetvā adāsi. Gabbho parinatattā patitum asakkonto tiriyam nipati, kharā vedanā uppajji, jīvitasamsayam pāpuni. Sā "nāsitamhi tayā, tvameva mam ānetvā tvameva tayopi vāre dārake<sup>1</sup> nāsesi, idāni ahampi nassāmi, ito dāni cutā yakkhinī hutvā tava dārake khāditum samatthā hutvā nibbatteyyan"ti patthanam patthapetvā kālam katvā tasmim yeva gehe majjārī hutvā nibbatti. Itarampi sāmiko gahetvā "tayā me kulūpacchedo kato"ti kapparajannukādīhi supothitam pothesi. Sā tenevābādhena kālam katvā tattheva kukkutī hutvā nibbattā.

Kukkuṭī na cirasseva aṇḍāni vijāyi, majjārī āgantvā tāni aṇḍāni khādi. Dutiyampi tatiyampi khādiyeva. Kukkuṭī cintesi "tayo vāre mama aṇḍāni khāditvā idāni mampi khāditukāmāsī"ti. "Ito cutā saputtakam tam khāditum labheyyan"ti patthanam katvā tato cutā araññe dīpinī hutvā nibbatti, itarā migī hutvā nibbatti. Tassā vijātakāle dīpinī āgantvā tayo vāre puttake khādi. Migī maraṇakāle "ayam me tikkhattum puttake khāditvā idāni mampi khādissati, ito dāni cutā etam saputtakam khāditum labheyyan"ti patthanam katvā ito cutā yakkhinī hutvā nibbatti. Dīpinīpi tatheva tato cutā Sāvatthiyam kuladhītā hutvā nibbatti, sā vuddhippattā dvāragāmake patikulam agamāsi, aparabhāge ca puttam vijāyi. Yakkhinīpi tassā piyasahāyikāvaṇṇena āgantvā "kuhim me sahāyikā"ti "antogabbhe vijātā"ti vutte "puttam nu kho vijātā, udāhu dhītaranti passissāmi nan"ti gabbham pavisitvā passantī viya dārakam

gahetvā khāditvā gatā. Puna dutiyavārepi tatheva khādi. Tatiyavāre itarā garubhārā hutvā sāmikam āmantetvā "sāmi imasmim ṭhāne ekā yakkhinī mama dve putte khāditvā gatā, idāni mama kulageham gantvā vijāyissāmī"ti kulageham gantvā vijāyi.

Tadā sā yakkhinī udakavāram gatā hoti. Vessavaņassa hi yakkhiniyo vārena Anotattadahato sīsaparamparāya udakamāharanti. Tā catumāsaccayenapi pañcamāsaccayenapi muccanti. Aparā yakkhiniyo kilantakāyā jīvitakkhayampi pāpuņanti. Sā pana udakavārato muttamattāva vegena tam gharam gantvā "kuhim me sahāyikā"ti pucchi. Kuhim nam passissasi¹, tassā imasmim ṭhāne jātajātadārake yakkhinī āgantvā khādati, tasmā kulageham gatāti. Sā "yattha vā tattha vā gacchatu, na me muccissatī"ti veravegasamussāhitamānasā² nagarābhimukhī pakkhandi. Itarāpi nāmaggahaṇadivase nam dārakam nhāpetvā nāmam katvā "sāmi idāni sakagharam gacchāmā"ti puttamādāya sāmikena saddhim vihāramajjhe gatamaggena gacchantī puttam sāmikassa datvā vihārapokkharaṇiyā nhātvā sāmike nhāyante uttaritvā puttassa thaññam pāyamānā ṭhitā yakkhinim āgacchantim disvā sañjānitvā "sāmi vegena ehi, ayam sā yakkhinī, vegena ehi, ayam sā yakkhinī"ti uccāsaddam katvā yāva tassa āgamanam saṇṭhātum asakkontī nivattetvā antovihārābhimukhī pakkhandi.

Tasmim samaye Satthā parisamajjhe dhammam desesi. Sā puttam Tathāgatassa pādapiṭṭhe nipajjāpetvā "tumhākam mayā esa dinno, puttassa me jīvitam dethā"ti āha. Dvārakoṭṭhake adhivattho Sumanadevo nāma yakkhiniyā anto pavisitum nādāsi. Satthā Ānandattheram āmantetvā "gaccha Ānanda, tam yakkhinim pakkosāhī"ti āha. Thero pakkosi. Itarā "ayam bhante āgacchatī"ti āha. Satthā "etu, mā saddamakāsī"ti vatvā tam āgantvā ṭhitam "kasmā evam karosi, sace tumhe mādisassa Buddhassa sammukhībhāvam nāgamissatha, ahinakulānam viya acchaphandanānam viya kākolūkānam viya ca kappaṭṭhitikam vo veram

<sup>1.</sup> Kuhim tvam na passissasi (Sī), kuhim pana tvam passasi (Ka)

<sup>2.</sup> Vātavegena samussāhitamānasā (Ka)

abhavissa, kasmā veram pativeram karotha. Veram hi averena upasammati, no verenā"ti vatvā imam gāthamāha—

5. "Na hi verena verāni, sammantīdha kudācanam. Averena ca sammanti, esa dhammo sanantano"ti.

Tattha na hi verenāti yathā hi kheļasiṅghāṇikādīhi asucīhi makkhitaṁ ṭhānaṁ teheva asucīhi dhovantā suddhaṁ niggandhaṁ kātuṁ na sakkonti, atha kho taṁ ṭhānaṁ bhiyyoso mattāya asuddhatarañceva duggandhatarañca hoti, evameva akkosantaṁ paccakkosanto paharantaṁ paṭipaharanto verena veraṁ vūpasametuṁ na sakkoti, atha kho bhiyyo bhiyyo verameva karoti. Iti verāni nāma verena kismiñci kāle na sammanti, atha kho vaḍḍhantiyeva. Averena ca sammantīti yathā pana tāni kheļādīni asucīni vippasannena udakena dhoviyamānāni nassanti, taṁ ṭhānaṁ suddhaṁ hoti sugandhaṁ, evameva averena khantimettodakena yoniso manasikārena paccavekkhaṇena verāni vūpasammanti paṭippassambhanti abhāvaṁ gacchanti. Esa dhammo sanantanoti esa averena verūpasamanasaṅkhāto porāṇako dhammo sabbesaṁ Buddhapaccekabuddhakhīnāsavānaṁ gatamaggoti.

Gāthāpariyosāne yakkhinī sotāpattiphale patiṭṭhahi. Sampattaparisāyapi dhammadesanā sātthikā ahosi.

Satthā taṁ itthiṁ āha "etissā tava puttaṁ dehī"ti. Bhāyāmi bhanteti. "Mā bhāyi, natthi te etaṁ nissāya paripantho"ti āha. Sā tassā puttamadāsi. Sā taṁ cumbitvā āliṅgetvā puna mātuyeva datvā rodituṁ ārabhi. Atha naṁ satthā "kimetan"ti pucchi. Bhante ahaṁ pubbe yathā vā tathā vā jīvikaṁ kappentīpi kucchipūraṁ nālatthaṁ, idāni kathaṁ jīvissāmīti. Atha naṁ Satthā "mā cintayī"ti samassāsetvā taṁ itthimāha "imaṁ netvā attano gehe nivāsāpetvā aggayāgubhattehi paṭijaggāhī"ti. Sā taṁ netvā piṭṭhivaṁse patiṭṭhāpetvā aggayāgubhattehi paṭijaggi, tassā vīhipaharaṇakāle musalaggena muddhaṁ paharantaṁ viya upaṭṭhāsi. Sā sahāyikaṁ āmantetvā "imasmiṁ ṭhāne vasituṁ na sakkomi, aññattha maṁ patiṭṭhāpehī"ti vatvā musalasālāya udakacāṭiyaṁ uddhane nibbakose saṅkārakūṭe gāmadvāre cāti etesu

thānesu patitthāpitāpi idha me musalena sīsam bhindantam viya upatthāti, idha dārakā ucchitthodakam otārenti, idha sunakhā nipajjanti, idha dārakā asucim karonti, idha kacavaram chaddenti, idha gāmadārakā lakkhayoggam<sup>1</sup> karontīti sabbāni tāni patikkhipi. Atha nam bahigāme vivittokāse patitthāpetvā tattha tassā aggayāgubhattādīni haritvā patijaggi. Sā yakkhinī evam cintesi "ayam me sahāyikā idāni bahūpakārā, handāham kiñci patigunam karomī"ti. Sā "imasmim samvacchare subbutthikā bhavissati, thalatthāne sassam karohi, imasmim samvacchare dubbutthikā bhavissati, ninnatthāneyeva sassam karohī''ti sahāyikāya āroceti. Sesajanehi katasassam ati-udakena vā anodakena vā nassati, tassā ativiya sampajjati. Atha nam sesajanā "amma tayā katasassam neva accodakena, na anudakena nassati, subbutthidubbutthibhāvam ñatvā kammam karosi, kim nu kho etan"ti pucchimsu. Amhākam sahāyikā yakkhinī subbutthidubbutthibhāvam ācikkhati, mayam tassā vacanena thalesu ninnesu sassāni karoma, tena no sampajjati. Kim na passatha nibaddham amhākam gehato yāgubhattādīni hariyamānāni, tāni etissā harīyanti, tumhepi etissā aggayāgubhattādīni haratha, tumhākampi kammante olokessatīti. Athassā sakalanagaravāsino sakkāram karimsu. Sāpi tato patthāya sabbesam kammante olokentī lābhaggappattā ahosi mahāparivārā. Sā aparabhāge attha salākabhattāni patthapesi. Tāni yāvajjakālā dīyantiyevāti.

Kāļayakkhinīvatthu catuttham.

#### 5. Kosambakavatthu

Pare ca na vijānantīti imam dhammadesanam Satthā Jetavane viharanto Kosambake bhikkhū ārabbha kathesi.

Kosambiyañhi Ghositārāme pañcasatapañcasataparivārā dve bhikkhū viharimsu vinayadharo ca dhammakathiko ca. Tesu dhammakathiko

ekadivasam sarīravalanjam katvā udakakotthake ācamana-udakāvasesam bhājane thapetvāva nikkhami. Pacchā vinayadharo tattha pavittho tam udakam disvā nikkhamitvā itaram pucchi "āvuso tayā udakam thapitan"ti. Āma āvusoti. Kim panettha āpattibhāvam na jānāsīti. Āma na jānāmīti. Hoti āvuso ettha āpattīti. Tena hi patikarissāmi nanti. Sace pana te āvuso asañcicca assatiyā katam, natthi āpattīti. So tassā āpattiyā anāpattiditthi ahosi. Vinayadharopi attano nissitakānam "ayam dhammakathiko āpattim āpajjamānopi na jānātī"ti ārocesi. Te tassa nissitake disvā "tumhākam upajjhāyo āpattim āpajjitvāpi āpattibhāvam na jānātī"ti āhamsu. Te gantvā attano upajjhāyassa ārocesum. So evamāha "ayam vinayadharo pubbe anāpattīti vatvā idāni āpattīti vadati, musāvādī eso"ti. Te gantvā "tumhākam upajjhāyo musāvādī"ti āhamsu. Te evam añnamañnam kalaham vaddhayimsu. Tato vinayadharo okāsam labhitvā dhammakathikassa āpattiyā adassane ukkhepanīyakammamakāsi. Tato patthāya tesam paccayadāyakā upatthākāpi dve kotthāsā ahesum, ovādapatiggāhakā bhikkhuniyopi ārakkhadevatāpi tāsam sanditthasambhattā ākāsatthadevatāpīti yāva brahmalokā sabbepi puthujjanā dve pakkhā ahesum. Cātumahārājikam ādim katvā yāva Akanitthabhavanā pana ekaninnādam<sup>1</sup> kolāhalam agamāsi.

Atheko aññataro bhikkhu Tathāgatamupasaṅkamitvā ukkhepakānaṁ vinayadhara-antevāsikānaṁ "dhammikenevāyaṁ vinayakammena ukkhitto"ti laddhiṁ ca, ukkhittānuvattakānaṁ dhammakathika-antevāsikānaṁ pana "adhimmikeneva kammena ukkhitto"ti laddhiṁ ca, ukkhepakehi vāriyamānānampi ca tesaṁ taṁ anuparivāretvā vicaraṇabhāvaṁ cā ārocesi. Bhagavā "samaggā kira hontū"ti dve vāre pesetvā "na icchanti bhante samaggā bhavitun"ti sutvā tatiyavāre "bhinno bhikkhusaṁgho, bhinno bhikkhusaṁgho"ti tesaṁ santikaṁ gantvā ukkhepakānaṁ ukkhepane, itaresañca āpattiyā adassane ādīnavaṁ kathetvā puna tesaṁ

tattheva ekasīmāyam uposathādīni anujānitvā bhattaggādīsu bhaṇḍanajātānam "āsanantarikāya nisīditabban"ti¹ bhattagge vattam paññāpetvā "idānipi bhaṇḍanajātāva viharantī"ti sutvā tattha gantvā "alam bhikkhave mā bhaṇḍanan"ti-ādīni vatvā "bhikkhave bhaṇḍanakalahaviggahavivādā nāmete anatthakārakā. Kalaham nissāya hi laṭukikāpi sakuṇikā hatthināgam jīvitakkhayam pāpesī"ti Laṭukikajātakam² kathetvā "bhikkhave samaggā hotha, mā vivadatha. Vivādam nissāya hi anekasatasahassā vaṭṭakāpi³ jīvitakkhayam pattā"ti Vaṭṭakajātakam⁴ kathesi. Evampi tesu Bhagavato vacanam anādiyantesu aññatarena dhammavādinā Tathāgatassa vihesam anicchantena "āgametu bhante Bhagavā dhammasāmi, appossukko bhante Bhagavā diṭṭhadhammasukhavihāramanuyutto viharatu, mayameva tena bhaṇḍanena kalahena viggahena vivādena paññāyissāmā"ti⁵ vutte atītam āhari—

Bhūtapubbam bhikkhave Bārāṇasiyam Brahmadatto nāma Kāsirājā ahosi. Brahmadattena Dīghītissa<sup>6</sup> Kosalarañño rajjam acchinditvā aññātakavesena vasantassa pituno māritabhāvañceva Dīghāvukumārena attano jīvite dinne tato paṭṭhāya tesam samaggabhāvañca kathetvā "tesam hi nāma bhikkhave rājūnam ādinnadaṇḍānam ādinnasatthānam evarūpam khantisoraccam bhavissati. Idha kho tam bhikkhave sobhetha, yam tumhe evam svākhāte dhammavinaye pabbajitā samānā khamā ca bhaveyyātha soratā cā"ti ovaditvāpi neva te samagge kātum asakkhi. So tāya ākiṇṇavihāratāya ukkaṇṭhito "aham kho idāni ākiṇṇo dukkham viharāmi, ime ca bhikkhū mama vacanam karonti. Yannūnāham ekakova gaṇamhā vūpakaṭṭho vihareyyan"ti cintetvā Kosambiyam piṇḍāya caritvā anapaloketvā bhikkhusamgham ekakova attano pattacīvaramādāya Bālakaloṇakagāmam<sup>7</sup> gantvā tattha Bhaguttherassa ekacārikavattam kathetvā Pācinavamsamigadāye tiṇṇam kulaputtānam sāmaggiyānisamsam<sup>8</sup> kathetvā

<sup>1.</sup> Vi 3. 486 pitthe.

<sup>2.</sup> Khu 5. 124 pitthe.

<sup>3.</sup> Anekasahassavattakā (Sī)

<sup>4.</sup> Khu 5. 27 pitthe.

<sup>5.</sup> Vi 3. 486; Ma 3. 191 pitthesu.

<sup>6.</sup> Dīghāvupitussa (Ka) Vi 3. 487 pitthe passitabbam.

<sup>7.</sup> Bālakaloṇakārāmaṁ (Sī, Syā), Pālileyyakagāmaṁ (Ka) Vi 3. 497 piṭṭhe pana passitabbaṁ.

<sup>8.</sup> Sāmaggīrasānisamsam (Sī, Syā)

yena Pālileyyakam atthi, tadavasari. Tatrasudam Bhagavā Pālileyyakam upanissāya rakkhitavanasaņde bhaddasālamūle Pālileyyakena hatthinā upaṭṭhiyamāno¹ phāsukam vassāvāsam vasi.

Kosambivāsinopi kho upāsakā vihāram gantvā Satthāram apassantā "kuhim bhante Sattha"ti pucchitva Palileyyakavanasandam gatoti. Kim kāranāti. Amhe samagge kātum vāyami, mayam pana na samaggā ahumhāti. Kim bhante tumhe Satthu santike pabbajityā tasmim sāmaggim karonte samaggā nāhuvatthāti. Evamāvusoti. Manussā ime Satthu santike pabbajitvā tasmim sāmaggim karontepi samaggā na jātā, mayam ime nissāya Satthāram datthum na labhimhā, imesam neva āsanam dassāma, na abhivādanādīni karissāmāti tato paṭṭhāya tesam sāmīcimattampi na karimsu. Te appāhāratāya sussamānā katipāheneva ujukā hutvā aññamaññam accayam desetvā khamāpetvā "upāsakā mayam samaggā jātā, tumhepi no purimasadisā hothā"ti āhamsu. Khamāpito pana vo bhante Satthāti. Na khamāpito āvusoti. Tena hi Satthāram khamāpetha, Satthu khamāpitakāle mayampi tumhākam purimasadisā bhavissāmāti. Te antovassabhāvena Satthu santikam gantum avisahantā dukkhena tam antovassam vītināmesum. Satthā pana tena hatthinā upaṭṭhiyamāno sukham vasi. Sopi hi hatthināgo ganam pahāya phāsuvihāratthāyeva tam vanasandam pāvisi.

Yathāha "ahaṁ kho ākiṇṇo viharāmi hattīhi hatthinīhi hatthikalabhehi hatthicchāpehi, chinnaggāni ceva tiṇāni khādāmi, obhaggobhaggañca me sākhābhaṅgaṁ khādanti, āvilāni ca pānīyāni pivāmi, ogāhā cassa me uttiṇṇassa hatthiniyo kāyaṁ upanighaṁsantiyo gacchanti, yannūnāhaṁ ekova gaṇamhā vūpakaṭṭho vihareyyan"ti². Atha kho so hatthināgo yūthā apakkamma yena Pālileyyakaṁ rakkhitavanasaṇḍaṁ bhaddasālamūlaṁ, yena Bhagavā tenupasaṅkami, upasaṅkamitvā pana Bhagavantaṁ vanditvā olokento aññaṁ kiñci adisvā bhaddasālamūlaṁ pādeneva paharanto tacchetvā soṇḍāya sākhaṁ gahetvā sammajji. Tato paṭṭhāya

sondāya ghatam gahetvā pānīyam paribhojanīyam upatthāpeti, unhodakena atthe sati unhodakam patiyādeti. Katham? Hatthena katthāni ghamsitvā aggim sampādeti, tattha dārūni pakkhipanto aggim jāletvā tattha pāsāne pakkhipityā pacityā dārudandakena pavattetyā paricchinnāva khuddakasondikāya khipati, tato hattham otāretvā udakassa tattabhāvam jānitvā gantvā Satthāram vandati. Satthā "udakam te tāpitam Pālilevyakā" ti vatvā tattha gantvā nhāvati. Athassa nānāvidhāni phalāni āharitvā deti. Yadā pana Satthā gāmam pindāya pavisati, tadā Satthu pattacīvaramādāya kumbhe patitthapetvā Satthārā saddhim yeva gacchati. Satthā gāmūpacāram patvā "Pālileyyaka ito patthāya tayā gantum na sakkā, āhara me pattacīvaran"ti āharāpetvā gāmam pindāya pāvisi. Sopi yāva Satthu nikkhamanā tattheva thatvā āgamanakāle paccuggamanam katvā purimanayeneva pattacīvaram gahetvā vasanatthāne otāretvā vattam dassetvā sākhāya bījati, rattim vālamigaparipanthanivāranattham mahantam dandam sondāya gahetvā "Satthāram rakkhissāmī"ti yāva arunuggamanā vanasandassa antarantarena vicarati. Tato patthāyayeva kira so vanasando Pālileyyakarakkhitavanasando nāma jāto. Arune uggate mukhodakadānam ādim katvā tenevūpāvena sabbavattāni karoti.

Atheko makkato tam hatthim uṭṭhāya samuṭṭhāya divase divase Tathāgatassa ābhisamācārikam karontam disvā "ahampi kiñcideva karissāmī"ti vicaranto ekadivasam nimmakkhikam daṇḍakamadhum disvā daṇḍakam bhañjitvā daṇḍakeneva saddhim madhupaṭalam Satthu santikam āharitvā kadalipattam chinditvā tattha ṭhapetvā adāsi. Satthā gaṇhi. Makkaṭo "karissati nu kho paribhogam, na karissatī"ti olokento gahetvā nisinnam disvā "kim nu kho"ti cintetvā daṇḍakoṭiyam gahetvā parivattetvā upadhārento aṇḍakāni disvā tāni saṇikam apanetvā puna adāsi. Satthā paribhogamakāsi. So tuṭṭhamānaso tam tam sākham gahetvā naccantova aṭṭhāsi. Athassa gahitasākhāpi akkantasākhāpi bhijjimsu. So ekasmim khāṇumatthake patitvā niviṭṭhagatto¹ Satthari pasanneneva

cittena kālam katvā Tāvatimsabhavane timsayojanike kanakavimāne nibbatti, accharāsahassaparivāro Makkaṭadevaputto nāma ahosi<sup>1</sup>.

Tathāgatassa tattha hatthināgena upatthiyamānassa vasanabhāvo sakalajambudīpe pākato ahosi. Sāvatthinagarato "Anāthapindiko Visākhā ca mahā-upāsikā"ti-evamādīni mahākulāni Ānandattherassa sāsanam pahinimsu "Satthāram no bhante dassethā"ti. Disāvāsinopi pañcasatā bhikkhū vutthavassā Ānandattheram upasankamitvā "cirassutā no<sup>2</sup> āvuso Ānanda Bhagavato sammukhā dhammī kathā, sādhu mayam āvuso Ānanda, labheyyāma Bhagavato sammukhā dhammim katham savanāyā"ti yācimsu. Thero "te bhikkhū ādāya tattha gantvā temāsam ekavihārino Tathāgatassa santikam ettakehi bhikkhūhi saddhim upasankamitum ayuttan"ti cintetvā te bhikkhū bahi thapetvā ekakova Satthāram upasankami. Pālileyyako tam disvā dandamādāya pakkhandi. Satthā oloketvā "apehi apehi Pālileyyaka, mā nivārayi, Buddhupatthāko eso"ti āha. So tattheva dandam chaddetvā pattacīvarapatiggahanam<sup>3</sup> āpucchi. Thero nādāsi. Nāgo "sace uggahitavatto bhavissati, Satthu nisīdanapāsānaphalake attano parikkhāram na thapessatī"ti<sup>4</sup> cintesi. Thero pattacīvaram bhūmiyam thapesi. Vattasampannā hi garūnam āsane vā sayane vā attano parikkhāram na thapenti.

Thero Satthāraṁ upasaṅkamitvā vanditvā ekamantaṁ nisīdi. Satthā "Ānanda ekova āgatosī"ti pucchitvā pañcasatehi bhikkhūhi saddhiṁ āgatabhāvaṁ sutvā "kahaṁ panete"ti vatvā "tumhākaṁ cittaṁ ajānanto bahi ṭhapetvā āgatomhī"ti vutte "pakkosāhi ne"ti āha. Thero tathā akāsi. Te bhikkhū āgantvā Satthāraṁ vanditvā ekamantaṁ nisīdiṁsu. Satthā tehi saddhiṁ paṭisanthāraṁ katvā tehi bhikkhūhi "bhante Bhagavā hi Buddhasukhumālo ceva khattiyasukhumālo ca, tumhehi temāsaṁ ekakehi tiṭṭhantehi nisīdantehi ca dukkaraṁ kataṁ vattapaṭivattakārakopi mukhodakādidāyakopi nāhosi maññe"ti vutte "bhikkhave Pālileyyakahatthinā mama sabbakiccāni katāni. Evarūpaṁ hi sahāyaṁ

<sup>1.</sup> Accharāsahassaparivāro ahosi (Sī, Syā)

<sup>3.</sup> Pattacīvaram patiggahetum (Ka)

<sup>2.</sup> Cirassam vata no (Ka)

<sup>4.</sup> Na thapetīti (Sī)

labhantena ekatova vasitum yuttam, alabhantassa ekacārikabhāvova seyyo''ti vatvā imā Nāgavagge tisso gāthā abhāsi—

"Sace labhetha nipakam sahāyam, Saddhimcaram sādhuvihāri dhīram. Abhibhuyya sabbāni parissayāni, Careyya tenattamano satīmā.

No ce labhetha nipakam sahāyam, Saddhimcaram sādhuvihāri dhīram. Rājāva raṭṭham vijitam pahāya, Eko care Mātangaraññeva nāgo.

Ekassa caritam seyyo,
Natthi bāle sahāyatā.
Eko care na ca pāpāni kayirā,
Appossukko Mātangaraññeva nāgo"ti1.

Gāthāpariyosāne pañcasatāpi te bhikkhū arahatte patiṭṭhahimsu. Ānandattheropi Anāthapiṇḍikādīhi pesitasāsanam ārocetvā "bhante Anāthapiṇḍikappamukhā te pañca ariyasāvakakoṭiyo tumhākam āgamanam paccāsīsantī"ti āha. Satthā "tena hi gaṇhāhi pattacīvaran"ti pattacīvaram gāhāpetvā nikkhami. Nāgo gantvā gatamagge tiriyam aṭṭhāsi. ( )² Kim karoti bhante nāgoti. "Tumhākam bhikkhave bhikkham dātum paccāsīsati, dīgharattam kho panāyam mayham upakārako, nāssa cittam kopetum vaṭṭati, nivattatha bhikkhave"ti Satthā bhikkhū gahetvā nivatti. Hatthīpi vanasaṇḍam pavisitvā panasakadaliphalādīni nānāphalāni samharitvā rāsim katvā punadivase bhikkhūnam adāsi. Pañcasatā bhikkhū sabbāni khepetum nāsakkhimsu. Bhattakiccapariyosāne Satthā pattacīvaram gāhetvā nikkhami. Nāgo bhikkhūnam antarantarena gantvā Satthu purato tiriyam aṭṭhāsi. Kim karoti bhante nāgoti. Ayam hi bhikkhave tumhe pesetvā mam nivattetukāmoti³. Atha nam Satthā "Pālileyyaka idam

<sup>1.</sup> Vi 3. 496; Ma 3. 192; Khu 1. 60, 286 pitthesu.

<sup>2. (</sup>Bhikkhū taṁ disvā Bhagavantaṁ pucchiṁsu) (Syā)

<sup>3.</sup> Nivattetīti (Sī, Syā)

pana mama anivattagamanam¹, tava iminā attabhāvena jhānam vā vipassanam vā maggaphalam vā natthi, tiṭṭha tvamʾʾti āha. Tam sutvā nāgo mukhe soṇḍam pakkhipitvā rodanto pacchato pacchato agamāsi. So hi Satthāram nivattetum labhanto teneva niyāmena yāvajīvam paṭijaggeyya, Satthā pana tam gāmūpacāram patvā "Pālileyyaka ito paṭṭhāya tava abhūmi, manussāvāso saparipanto, tiṭṭha tvanʾʾti āha. So rodamāno tattheva ṭhatvā Satthari cakkhupatham vijahante hadayena phalitena kālam katvā Satthari pasādena Tāvatimsabhavane timsayojanike kanakavimāne accharāsahassamajjhe nibbatti. Pālileyyakadevaputtoyevassa nāmam ahosi.

Satthāpi anupubbena Jetavanam agamāsi. Kosambakā bhikkhū "Satthā kira Sāvatthim āgato"ti sutvā Satthāram khamāpetum tattha agamamsu. Kosalarājā "te kira Kosambakā bhandanakārakā bhikkhū āgacchantī"ti sutvā Satthāram upasankamitvā "aham bhante tesam mama vijitam pavisitum na dassāmī"ti āha. Mahārāja sīlavantā ete bhikkhū, kevalam aññamaññam vivādena mama vacanam na ganhimsu, idāni mam khamāpetum āgacchanti, āgacchantu mahārājāti. Anāthapindikopi "aham bhante tesam vihāram pavisitum na dassāmī"ti vatvā tatheva Bhagavatā patikkhitto tunhī ahosi. Sāvatthiyam anuppattānam pana tesam Bhagavā ekamante vivittam kārāpetvā senāsanam dāpesi. Aññe bhikkhū tehi saddhim neva ekato nisīdanti, na titthanti<sup>2</sup>, āgatāgatā Satthāram pucchanti "katamete bhante bhandanakārakā Kosambakā bhikkhū"ti. Satthā "ete"ti dasseti. "Ete kira te, ete kira te"ti āgatāgatehi aṅguliyā dassiyamānā lajjāya sīsaṁ ukkhipituṁ asakkontā Bhagavato pādamūle nipajjitvā Bhagavantam khamāpesum. Satthā "bhāriyam vo bhikkhave katam, tumhe hi nāma mādisassa Buddhassa santike pabbajitvā mayi sāmaggim karonte mama vacanam na karittha porānakapanditāpi vajjhappattānam<sup>3</sup> mātāpitūnam ovādam sutvā tesu jīvitā voropiyamānesupi tam anatikkamitvā pacchā dvīsu ratthesu rajjam kārayimsū"ti vatvā

<sup>1.</sup> Anivattanīyagamanam (Sī)

<sup>3.</sup> Paccāmittānam (Ka)

<sup>2.</sup> Na titthanti, na vandanti (Ka)

punadeva **Kosambikajātakaṁ**¹ kathetvā "evaṁ bhikkhave Dīghāvukumāro mātāpitūsu jīvitā voropiyamānesupi tesaṁ ovādaṁ anatikkamitvā pacchā Brahmadattassa dhītaraṁ labhitvā dvīsu Kāsikosalaraṭṭhesu rajjaṁ kāresi, tumhehi pana mama vacanaṁ akarontehi bhāriyaṁ katan"ti vatvā imaṁ gāthamāha—

6. "Pare ca na vijānanti, mayamettha yamāmase. Ye ca tattha vijānanti, tato sammanti medhagā"ti.

Tattha pareti paṇḍite ṭhapetvā tato aññe bhaṇḍanakārakā pare nāma. Te tattha saṁghamajjhe kolāhalaṁ karontā "mayaṁ yamāmase uparamāma vinassāma satataṁ samitaṁ maccusantikaṁ gacchāmā"ti na vijānanti. Ye ca tattha vijānantīti ye tattha paṇḍitā "mayaṁ maccusantikaṁ gacchāmā"ti vijānanti. Tato sammanti medhagāti evaṁ hi te jānantā yonisomanasikāraṁ uppādetvā medhagānaṁ kalahānaṁ vūpasamāya paṭipajjanti. Atha nesaṁ tāya paṭipattiyā te medhagā sammantīti. Atha vā pare cāti pubbe mayā "mā bhikkhave bhaṇḍanan"ti-ādīni vatvā ovadiyamānāpi mama ovādassa apaṭiggahaṇena atikkamanena amāmakā pare nāma. "Mayaṁ chandādivasena micchāgāhaṁ² gahetvā ettha saṁghamajjhe yamāmase bhaṇḍanādīnaṁ vuddhiyā vāyamāmā"ti na vijānanti. Idāni pana yoniso paccavekkhamānā tattha tumhākaṁ antare ye ca paṇḍitapurisā "pubbe mayaṁ chandādivasena vāyamantā ayoniso paṭipannā"ti vijānanti, tato tesaṁ santikā te paṇḍitapurise nissāya ime dāni kalahasaṅkhātā medhagā sammantīti ayamettha atthoti.

Gāthāpariyosāne sampattabhikkhū sotāpattiphalādīsu patiṭṭhahimsūti.

Kosambakavatthu pañcamam.

## 6. Mahākāļattheravatthu

**Subhānupassin**ti imam dhammadesanam Satthā Setabyanagaram upanissāya Simsapāvane viharanto Cūļakāļamahākāļe ārabbha kathesi.

Setabyanagaravāsino hi Cūļakāļo Majjhimakāļo Mahākāļoti tayo bhātaro kuṭumbikā. Tesu jeṭṭhakaniṭṭhā disāsu vicaritvā pañcahi sakaṭasatehi bhaṇḍaṁ āharanti, Majjhimakāļo ābhataṁ vikkiṇāti. Athekasmiṁ samaye te ubhopi bhātaro pañcahi sakaṭasatehi nānābhaṇḍaṁ gahetvā Sāvatthiṁ gantvā Sāvatthiyā ca Jetavanassa ca antare sakaṭāni mocayiṁsu. Tesu Mahākāļo sāyanusamaye mālāgandhādihatthe Sāvatthivāsino ariyasāvake dhammassavanāya gacchante disvā "kuhiṁ ime gacchantī"ti pucchitvā tamatthaṁ sutvā "ahampi gamissāmī"ti cintetvā kaniṭṭhaṁ āmantetvā "tāta tesu sakaṭesu appamatto hohi, ahaṁ dhammaṁ sotuṁ gacchāmī"ti vatvā gantvā Tathāgataṁ vanditvā parisapariyante nisīdi. Satthā taṁ disvā tassa ajjhāsayavasena anupubbiṁ kathaṁ kathento

**Dukkhakkhandhasuttā**divasena<sup>1</sup> anekapariyāyena kāmānam ādīnavam okāram samkilesanca kathesi. Tam sutvā Mahākālo "sabbam kira pahāya gantabbam, paralokam gacchantam neva bhogā, na ñātakā ca anugacchanti, kim me gharāvāsena pabbajissāmī''ti cintetvā mahājane Satthāram vanditvā pakkante Satthāram pabbajjam yācitvā Satthārā "natthi te koci apaloketabbo"ti vutte "kanittho me bhante atthī"ti vatvā "tena hi apalokehi nan"ti vutte "sādhu bhante"ti vatvā gantvā kanittham pakkosāpetvā "tāta imam sabbam sāpateyyam patipajjāhī"ti āha. Tumhe pana kim karissatha bhātikāti. Aham Satthu santike pabbajissāmītī. So tam nānappakārehi yācitvā nivattetum asakkonto "sādhu sāmi yathā-ajjhāsayam karothā"ti āha. Mahākālo gantvā Satthu santike pabbaji. "Aham bhātikam gahetvāva uppabbajissāmī'ti Cūlakālopi pabbaji. Aparabhāge Mahākālo upasampadam labhitvā Satthāram upasankamitvā sāsane dhurāni pucchitvā Satthārā dvīsu dhuresu kathitesu "aham bhante mahallakakāle pabbajitattā ganthadhuram pūretum na sakkhissāmi, vipassanādhuram pana pūressāmī"ti yāva arahattā kammatthānam kathāpetvā sosānikadhutangam samādāya paṭhamayāmātikkante sabbesu niddam okkantesu susānam gantvā<sup>2</sup> paccūsakāle sabbesu anutthitesuyeva vihāram āgacchati.

Athekā susānagopikā Kālī nāma chavaḍāhikā therassa thitaṭṭhānaṁ nisinnaṭṭhānaṁ caṅkamitaṭṭhānañca disvā "ko nu kho idhāgacchati, pariggaṇhissāmi nan"ti pariggaṇhituṁ asakkontī ekadivasaṁ susānakuṭikāyameva dīpaṁ jāletvā puttadhītaro ādāya gantvā ekamante nilīyamānā¹ majjhimayāme theraṁ āgacchantaṁ disvā gantvā vanditvā "ayyo no bhante imasmiṁ ṭhāne viharatī"ti āha. Āma upāsiketi. Bhante susāne viharantehi nāma vattaṁ uggaṇhituṁ vaṭṭatīti. Thero "kiṁ pana mayaṁ tayā kathitavatte vattissāmā"ti avatvā "kiṁ kātuṁ vaṭṭati upāsike"ti āha. Bhante sosānikehi nāma susāne vasanabhāvo susānagopakānaṁ ca vihāre mahātherassa ca gāmabhojakassa ca kathetuṁ vaṭṭatīti. Thero kiṁ kāraṇāti. Katakammā corā dhanasāmikehi padānupadaṁ anubaddhā susāne bhaṇḍakaṁ chaḍḍetvā palāyanti, atha manussā sosānikānaṁ paripanthaṁ karonti, etesaṁ pana kathite "mayaṁ imassa bhaddantassa ettakaṁ nāma kālaṁ ettha vasanabhāvaṁ jānāma, acoro eso"ti upaddavaṁ nivārenti. Tasmā etesaṁ kathetuṁ vaṭṭatīti.

Thero aññaṁ kiṁ kātabbanti. "Bhante susāne vasantena nāma ayyena macchamaṁsatilapiṭṭhatelaguļādīni² vajjetabbāni, divā na niddāyitabbaṁ, kusītena na bhavitabbaṁ, āraddhavīriyena bhavitabbaṁ, asaṭhena amāyāvinā hutvā kalyāṇajjhāsayena bhavitabbaṁ, sāyaṁ sabbesu suttesu vihārato āgantabbaṁ, paccūsakāle sabbesu anuṭṭhitesuyeva vihāraṁ gantabbaṁ. Sace bhante ayyo imasmiṁ ṭhāne evaṁ viharanto pabbajitakiccaṁ matthakaṁ pāpetuṁ sakkhissati, sace matasarīraṁ ānetvā chaḍḍenti, ahaṁ kambalakūṭāgāraṁ āropetvā gandhamālādīhi sakkāraṁ katvā sarīrakiccaṁ karissāmi. No ce sakkhissati, citakaṁ āropetvā aggiṁ jāletvā saṅkunā ākaḍḍhitvā bahi khipitvā pharasunā koṭṭetvā khaṇḍākhaṇḍikaṁ chinditvā aggiṁhi pakkhipitvā jhāpessāmī'ti āha. Atha naṁ thero "sādhu bhadde, ekaṁ pana rūpārammaṇaṁ disvā mayhaṁ katheyyāsī'ti āha. Sā "sādhū''ti paccassosi³. Thero yathājjhāsayena susāne samaṇadhammaṁ karoti.

Cūlakālatthero pana utthāya samutthāya gharāvāsam cinteti, puttadāram anussarati. "Bhātiko me atibhāriyam kammam karotī"ti cinteti.

Athekā kuladhītā tammuhuttasamutthitena byādhinā sāyanhasamaye amilātā akilantā kālamakāsi. Tamenam ñātakādayo dārutelādīhi saddhim sāyam susānam netvā susānagopikāya "imam jhāpehī"ti bhatim datvā niyyādetvā pakkamimsu. Sā tassā pārutavattham apanetvā tammuhuttamatam pīnitapīnitam<sup>1</sup> suvannavannam sarīram disvā "imam ayyassa dassetum patirupam arammanan"ti cintetva gantva theram vanditva "bhante evarūpam nāma ārammanam atthi, oloketha ayyā"ti āha. Thero "sādhū"ti vatvā pārupanam nīharāpetvā<sup>2</sup> pādatalato yāva kesaggā oloketvā "atipīnitametam<sup>3</sup> rūpam suvannavannam, aggimhi nam pakkhipitvā mahājālāhi gahitamattakāle mayham āroceyyāsī"ti vatvā sakatthānameva gantvā nisīdi. Sā tathā katvā therassa ārocesi. Thero gantvā olokesi. Jālāya pahatapahatatthānam kabaragāviyā viya sarīravannam ahosi, pādā namitvā<sup>4</sup> olambimsu, hatthā patikutimsu, ūrunalātam<sup>5</sup> niccammam ahosi. Thero "idam sarīram idāneva olokentānam apariyantakaram hutvā idāneva khayam pattam vayam pattan"ti rattitthanam gantva nisiditva khayayam sampassamāno—

> "Aniccā vata sankhārā, uppādavayadhammino. Uppajjitvā nirujjhanti, tesam vūpasamo sukho"ti6—

Gātham vatvā vipassanam vaddhetvā saha patisambhidāhi arahattam pāpuni.

Tasmim arahattam patte Satthā bhikkhusamghaparivuto cārikam caramāno Setabyam gantvā Simsapāvanam pāvisi. Cūlakālassa bhariyāyo "Satthā kira anuppatto Simsapāvāvanan"ti sutvā "amhākam sāmikam ganhissāmā"ti pesetvā Satthāram nimantāpesum. Buddhānam pana aparicinnatthāne<sup>7</sup> āsanapaññattim ācikkhantena ekena bhikkhunā pathamataram gantum vattati. Buddhānañhi majjhimatthāne āsanam paññapetva tassa dakkhinato Sariputtattherassa,

<sup>1.</sup> Paņītappaņītam (Syā), paņītam (Ka) 2. Harāpetvā (Sī) 3. Atipaņītametam (Ka)

<sup>4.</sup> Nikkhamitvā (Ka)

<sup>6.</sup> Dī 2. 129, 161; Sam 1. 160, 398; Khu 5. 22 pitthesu.

<sup>5.</sup> Nalātam (Sī)

<sup>7.</sup> Aparicitatthāne (Sī, Syā)

vāmato Mahāmoggallānattherassa, tato patthāya ubhosu passesu bhikkhusamghassa āsanam paññāpetabbam hoti. Tasmā Mahākālatthero cīvarapārupanatthāne thatvā "Cūlakāla tvam purato gantvā āsanapaññattim ācikkhā"ti Cūlakālam pesesi. Tassa ditthakālato patthāya gehajanā tena saddhim parihāsam karontā nīcāsanāni samghattherassa kotiyam attharanti, uccāsanāni samghanavakassa kotivam. Itaro "mā evam karotha, nīcāsanāni upari mā paññāpetha, uccāsanāni upari paññāpetha, nīcāsanāni hetthā"ti āha. Itthiyo tassa vacanam asunantiyo viya "tvam kim karonto vicarasi, kim tava āsanāni paññāpetum na vattati, tvam kam āpucchitvā pabbajito, kena pabbajitosi, kasmā idhāgatosī"ti vatvā nivāsanapārupanam acchinditvā setakāni nivāsetvā sīse ca mālācumbutakam thapetvā "gaccha Satthāram" ānehi, mayam āsanāni paññāpessāmā"ti pahinimsu. Na ciram bhikkhubhāve thatvā avassikova uppabbajitattā lajjitum na jānāti, tasmā so tena ākappena nirāsankova gantvā Satthāram vanditvā Buddhappamukham bhikkhusamgham ādāya āgato. Bhikkhusamghassa pana bhattakiccāvasāne Mahākālassa bhariyāyo "imāhi attano sāmiko gahito, mayampi amhākam sāmikam ganhissāmā"ti cintetvā punadivase Satthāram nimantayimsu. Tadā pana āsanapaññāpanattham añño bhikkhu agamāsi. Tā tasmim khaņe okāsam alabhitvā Buddhappamukham bhikkhusamgham nisīdāpetvā bhikkham adamsu. Cūlakālassa pana dve bhariyāyo, Majjhimakālassa catasso, Mahākālassa pana attha. Bhikkhūpi bhattakiccam kātukāmā nisīditvā bhattakiccamakamsu, bahi gantukāmā utthāya agamamsu. Satthā pana nisīditvā bhattakiccam kari. Tassa bhattakiccapariyosāne tā itthiyo "bhante Mahākālo amhākam anumodanam katvā āgacchissati, tumhe purato gacchathā"ti vadimsu. Satthā "sādhū"ti vatvā purato agamāsi. Gāmadvāram patvā bhikkhū ujjhāyimsu "kim nāmetam Satthārā katam, ñatvā nu kho katam, udāhu ajānitvā. Hiyyo Cūlakālassa purato gatattā pabbajjantarāyo jāto, ajja aññassa purato gatattā antarāyo nāhosi. Idāni Mahākāļam thapetvā āgato, sīlavā kho pana bhikkhu ācārasampanno, karissati nu kho tassa pabbajjantarāyan"ti. Satthā tesam vacanam sutvā nivattitvā thito "kim kathetha bhikkhave"ti

pucchi. Te tamattham ārocesum. Kim pana tumhe bhikkhave Cūļakāļam viya Mahākāļam sallakkhethāti. Āma bhante. Tassa hi dve pajāpatiyo, imassa aṭṭha. Aṭṭhahi parikkhipitvā gahito kim karissati bhanteti. Satthā "mā bhikkhave evam avacuttha, Cūļakāļo uṭṭhāya samuṭṭhāya subhārammaṇabahulo viharati, papāte ṭhito dubbalarukkhasadiso. Mayham pana putto Mahākāļo asubhānupassī viharati, ghanaselapabbato viya acalo"ti vatvā imā gāthā abhāsi—

- 7. "Subhānupassim viharantam, indriyesu asamvutam. Bhojanamhi cāmattaññum, kusītam hīnavīriyam. Tam ve pasahati māro, vāto rukkhamva dubbalam.
- 8. Asubhānupassim viharantam, indriyesu susamvutam. Bhojanamhi ca mattaññum, saddham āraddhavīriyam. Tam ve nappasahatī māro, vāto selamva pabbatan"ti.

Tattha subhānupassim viharantanti subham anupassantam, itthārammane mānasam vissajietvā viharantanti attho. Yo hi puggalo nimittaggāham anubyanjanaggāham ganhanto "nakhā sobhanā"ti ganhāti, "aṅguliyo sobhanā"ti ganhāti, "hatthapādā jaṅghā ūru kati udaraṁ thanā gīvā otthā dantā mukham nāsā akkhīni kannā bhamukā nalātam kesā sobhanā"ti ganhāti, "kesā lomā nakhā dantā taco sobhanā"ti ganhāti, vanno subho, santhānam subhanti ayam subhānupassī nāma. Evam tam subhānupassim viharantam. **Indriyesū**ti cakkhādīsu chasu indriyesu. Asamvutanti cakkhudvārādīni arakkhantam. Pariyesanamattā patiggahanamattā paribhogamattāti imissā mattāya ajānanato bhojanamhi cāmattaññum. Apica paccavekkhanamattā vissajjanamattāti imissāpi mattāya ajānanato amattaññum, idam bhojanam dhammikam, idam adhammikantipi ajānantam. Kāmacchandabyāpādavihim sāvitakkavasitāya kusītam. Hīnavīriyanti nibbīriyam catūsu iriyāpathesu vīriyakaranarahitam. Pasahatīti abhibhavati ajjhottharati. Vāto rukkhamva dubbalanti balavavāto chinnapapāte jātam dubbalarukkham viya. Yathā hi so vāto tassa dubbalarukkhassa pupphaphalapallavādīnipi<sup>1</sup> pāteti, khuddakasākhāpi bhañjati,

mahāsākhāpi bhañjati, samūlakampi tam rukkham uppāṭetvā¹ uddhammūlam adhosākham katvā gacchati, evameva evarūpam puggalam anto uppanno kilesamāro pasahati, balavavāto dubbalarukkhassa pupphaphalapallavādipātanam² viya khuddānukhuddakāpatti-āpajjanampi karoti, khuddakasākhābhañjanam viya nissaggiyādi-āpatti-āpajjanampi karoti, mahāsākhābhañjanam viya terasasamghādisesāpatti-āpajjanampi karoti, uppāṭetvā uddhammūlakam heṭṭhāsākham katvā pātanam viya pārājikāpatti-āpajjanampi karoti, svākkhātasāsanā nīharitvā katipāheneva gihibhāvam pāpetīti evam evarūpam puggalam kilesamāro attano vase vattetīti attho.

Asubhānupassinti dasasu asubhesu aññataraṁ asubhaṁ passantaṁ paṭikūlamanasikāre yuttaṁ kese asubhato passantaṁ lome nakhe dante tacaṁ vaṇṇaṁ saṇṭhānaṁ asubhato passantaṁ. Indriyesūti chasu indriyesu. Susaṁvutanti nimittādiggāharahitaṁ pihitadvāraṁ.

Amattaññutāpaṭikkhepena **bhojanamhi ca mattaññuṁ. Saddhan**ti kammassa ceva phalassa ca saddahanalakkhaṇāya lokikāya saddhāya ceva tīsu vatthūsu aveccappasādasaṅkhātāya lokuttarasaddhāya ca samannāgataṁ.

Āraddhavīriyanti paggahitapīriyam paripuṇṇavīriyam. Tam veti evarūpam tam puggalam yathā dubbalavāto saṇikam paharanto ekagghanam selam cāletum na sakkoti, tathā abbhantare uppajjamānopi dubbalakilesamāro nappasahati, khobhetum vā cāletum vā na sakkotīti attho.

Tāpi kho tassa purāṇadutiyikāyo theram parivāretvā "tvam kam āpucchitvā pabbajito, idāni gihī bhavissati na bhavissasī"ti-ādīni vatvā kāsāvam nīharitukāmā ahesum. Thero tāsam ākāram sallakkhetvā nisinnāsanā vuṭṭhāya iddhiyā uppatitvā kūṭāgārakaṇṇikam dvidhā bhinditvā ākāsenāgantvā Satthari gāthā pariyosāpente yeva Satthu suvaṇṇavaṇṇam sarīram abhitthavanto ākāsato otaritvā Tathāgatassa pāde vandī. Gāthāpariyosāne sampattabhikkhū sotāpattiphalādīsu patiṭṭhahimsūti.

## Mahākāļattheravatthu chaṭṭhaṁ.

#### 7. Devadattavatthu

**Anikkasāvo**ti imam dhammadesanam Satthā Jetavane viharanto Rājagahe Devadattassa kāsāvalābham¹ ārabbha kathesi.

Ekasmim hi samaye dve aggasāvakā pañcasate pañcasate attano attano parivāre ādāya Satthāram āpucchitvā vanditvā Jetavanatho Rājagaham agamamsu. Rājagahavāsino dvepi tayopi bahūpi ekato hutvā āgantukadānam adamsu. Athekadivasam āyasmā Sāriputto anumodanam kāronto "upāsakā eko sayam dānam deti, param na samādapeti, so nibbattanibbattaṭṭhāne bhogasampadam labhati, no parivārasampadam. Eko sayam na deti, param samādapeti, so nibbattanibbattaṭṭhāne parivārasampadam labhati, no bhogasampadam. Eko sayampi na deti, parampi na samādapeti, so nibbattanibbattaṭṭhāne kiñjikamattampi kucchipūram na labhati, anātho hoti nippaccayo. Eko sayampi deti, parampi samādapeti, so nibbattanibbattaṭṭhāne attabhāvasatepi attabhāvasahassepi attabhāvasatasahassepi bhogasampadam ceva parivārasampadam ca labhatī"ti evam dhammam desesi.

Tameko paṇḍitapuriso dhammaṁ sutvā "acchariyā vata bho, abbhutā vata bho dhammadesanā, sukāraṇaṁ kathitaṁ², mayā imāsaṁ dvinnaṁ sampattīnaṁ nipphādakaṁ kammaṁ kātuṁ vaṭṭatī"ti cintetvā "bhante sve mayhaṁ bhikkhaṁ gaṇhathā"ti theraṁ nimantesi. Kittakehi te bhikkhūhi attho upāsakāti. Kittakā pana vo bhanthe parivārāti. Sahassamattā upāsakāti. Sabbehi saddhiṁyeva sve bhikkhaṁ gaṇhatha bhanteti. Thero adhivāsesi. Upāsako nagaravīthiyaṁ caranto "ammā tātā mayā bhikkhusahassaṁ nimantitaṁ, tumhe kittakānaṁ bhikkhūnaṁ bhikkhaṁ dātuṁ sakkhissatha, tumhe kittakānaṁ ti samādapesi. Manussā attano attano pahonakaniyāmena "mayaṁ dasannaṁ dassāma, mayaṁ vīsatiyā, mayaṁ satassā"ti āhaṁsu. Upāsako "tena hi ekasmiṁ ṭhāne samāgamaṁ katvā ekatova parivisissāma³, sabbe tilataṇḍulasappimadhuphāṇitādīni samāharathā"ti ekasmiṁ ṭhāne samāharāpesi.

<sup>1.</sup> Gandhārakāsāvalābham (Syā)

<sup>2.</sup> Sukhakāranam kathitam (Syā), sukhakāranam sukathitam (Ka)

<sup>3.</sup> Pacissāma (Sī, Syā)

Athassa eko kutumbiko satasahassagghanikam gandhakasavavattham<sup>1</sup> datvā "sace te danavattam nappahoti, idam vissajjetva vam ūnam, tam pūrevyāsi. Sace pahoti, vassicchasi, tassa bhikkhuno dadevyāsī"ti āha. Tadā tassa sabbam dānavattam pahosi, kinci unam nāma nāhosi. So manusse pucchi "idam avvā kāsāvam² ekena kutumbikena evam nāma vatvā dinnam atirekam jātam, kassa nam demā"ti. Ekacce "Sāriputtattherassā"ti āhamsu. Ekacce "thero sassapākasamaye<sup>3</sup> āgantvā gamanasīlo, Devadatto amhākam mangalāmangalesu sahāyo udakamaniko viya niccam patitthito, tassa tam demāti āhamsu. Sambahulikāya kathāyapi "Devadattassa dātabban"ti vattāro bāhutarā ahesum, atha nam Devadattassa adamsu. So tam chinditvā sibbitvā<sup>4</sup> rajitvā nivāsetvā pārupitvā vicarati. Tam disvā manussā "nayidam Devadattassa anucchavikam, Sāriputtattherassa anucchavikam. Devadatto attano ananucchavikam nivāsetvā pārupitvā vicaratī"ti vadimsu. Atheko disāvāsiko bhikkhu Rājagahā Sāvatthim gantvā Satthāram vanditvā katapatisanthāro Satthārā dvinnam aggasāvakānam phāsuvihāram pucchito ādito patthāya sabbam tam pavattim ārocesi. Satthā "na kho bhikkhu idāneveso attano ananucchavikam vattham dhāreti, pubbepi dhāresiyevā"ti vatvā atītam āhari—

Atīte Bārāṇasiyam Brahmadatte rajjam kārente Bārāṇasivāsī eko hatthimārako hatthim māretvā māretvā dante ca nakhe ca<sup>5</sup> antāni ca ghanamamsanca āharitvā vikkiṇanto jīvikam kappeti. Athekasmim aranne anekasahassā hatthino gocaram gahetvā gacchantā Paccekabuddhe disvā tato paṭṭhāya gacchamānā gamanāgamanakāle jaṇṇukehi nipatitvā vanditvā pakkamanti. Ekadivasanhi hatthimārako tam kiriyam disvā "aham ime kicchena māremi, ime ca gamanāgamanakāle Paccekabuddhe vandanti, kim nu kho disvā vandantī"ti cintento "kāsāvan"ti sallakkhetvā "mayāpi idāni kāsāvam laddhum vaṭṭatī"ti cintetvā ekassa Paccekabuddhassa Jātassaram oruyha nhāyantassa tīre thapitesu kāsāvesu cīvaram

<sup>1.</sup> Gandhārakāsāvavatthaṁ (Syā)

<sup>3.</sup> Sassaparipākasamaye (Syā)

<sup>5.</sup> Tace ca (Syā)

<sup>2.</sup> Idam anagghakāsāvam (Syā)

<sup>4.</sup> Samvidahitvā (Sī, Ka)

thenetvā tesam hatthīnam gamanāgamanamagge sattim gahetvā sasīsam pārupitvā nisīdati. Hatthino tam disvā "Paccekabuddho"ti saññāya vanditvā pakkamanti. So tesam sabbapacchato gacchantam sattiyā paharitvā māretvā dantādīni gahetvā sesam bhūmiyam nikhanitvā gacchati. Aparabhāge bodhisatto hatthiyoniyam patisandhim gahetvā<sup>1</sup> hatthijetthako yūthapati ahosi. Tadāpi so tatheva karoti. Mahāpuriso attano parisāya parihānim ñatvā "kuhim ime hatthī gatā, mandā jātā"ti pucchitvā "na jānāma sāmī"ti vutte "kuhiñci gacchantā mam anāpucchitvā na gamissanti, paripanthena bhavitabban"ti vatvā<sup>2</sup> "ekasmim thāne kāsāvam pārupitvā nisinnassa santikā paripanthena bhavitabban"ti parisankitvā "tam parigganhitum vattatī"ti sabbe hatthī purato pesetvā sayam pacchato vilambamāno āgacchati. So sesahatthīsu vanditvā gatesu mahāpurisam āgacchantam disvā cīvaram samharitvā sattim vissajji. Mahāpuriso satim upatthapetvā<sup>3</sup> āgacchanto pacchato patikkamitvā sattim vivajiesi. Atha nam "iminā ime hatthī nāsitā"ti ganhitum pakkhandi. Itaro ekam rukkham purato katvā nilīyi. Atha "nam rukkhena saddhim sondāva parikkhipitvā gahetvā bhūmiyam pothessāmī"ti tena nīharitvā dassitam kāsāvam disvā "sacāham imasmim dubbhissāmi, anekasahassesu me Buddhapaccekabuddhakhīnāsavesu lajjā nāma bhinnā bhavissatī"ti adhivāsetvā "tayā me ettakā ñātakā nāsitā"ti pucchi. Āma sāmīti. Kasmā evam bhāriyakammamakāsi, attano ananucchavikam vītarāgānam anucchavikam vattham paridahitvā evarūpam kammam<sup>4</sup> karontena bhāriyam tayā katanti. Evanca pana vatvā uttaripi nam nigganhanto "anikkasāvo kāsāvam -pa- sa ve kāsāvamarahatī" ti gātham vatvā "ayuttam te katan" ti vatvā tam vissajjesi.

Satthā imam dhammadesanam āharitvā "tadā hatthimārako Devadatto ahosi, tassa niggāhako hatthināgo ahamevā"ti jātakam samodhānetvā "na bhikkhave idāneva, pubbepi Devadatto attano ananucchavikam vattham dhāresiyevā"ti vatvā imā gāthā abhāsi—

<sup>1.</sup> Gahetvā jātakāle (Ka)

<sup>3.</sup> Upatthapento (Sī, Ka)

<sup>2.</sup> Cintetvā (Sī, Syā)

<sup>4.</sup> Pāpakammam (Syā)

- 9. "Anikkasāvo kāsāvam, yo vattham paridahissati. Apeto damasaccena, na so kāsāvamarahati.
- Yo ca vantakasāva'ssa, sīlesu susamāhito.
   Upeto damasaccena, sa ve kāsāvamarahatī''ti.

Chandantajātakenāpi<sup>1</sup> ca ayamattho dīpetabbo.

Tattha anikkasāvoti rāgādīhi kasāvehi sakasāvo. Paridahissatīti nivāsanapārupana-attharaņavasena paribhuñjissati. Paridhassatītipi pāṭho. Apeto damasaccenāti indriyadamena ceva paramatthasaccapakkhikena vacīsaccena ca apeto, viyutto pariccattoti² attho. Na soti so evarūpo puggalo kāsāvam paridahitum nārahati. Vantakasāva'ssāti catūhi maggehi vantakasāvo chaḍḍitakasāvo pahīnakasāvo assa. Sīlesūti catupārisuddhisīlesu. Susamāhitoti suṭṭhu samāhito suṭṭhito³. Upetoti indriyadamena ceva vuttappakārena ca saccena upagato. Sa veti so evarūpo puggalo tam gandhakāsāvavattham arahatīti.

Gāthāpariyosāne so disāvāsiko bhikkhu sotāpanno ahosi, aññepi bahū sotāpattiphalādīni pāpuņimsu. Desanā mahājanassa sātthikā ahosīti.

Devadattavatthu sattamam.

# 8. Sāriputtattheravatthu

**Asāre sāramatino**ti imam dhammadesanam Satthā Veļuvane viharanto aggasāvakehi niveditam Sañcayassa<sup>4</sup> anāgamanam ārabbha kathesi.

Tatrāyam anupubbikathā—amhākañhi Satthā ito kappasatasahassādhikānam catunnam asankhyeyyānam matthake Amaravatiyā nāma nagare Sumedho nāma brāhmaṇakumāro hutvā sabbasippesu nipphattim patvā

<sup>1.</sup> Khu 5. 371 pitthe.

<sup>3.</sup> Sutthu thito  $(Sy\bar{a})$ 

<sup>2.</sup> Apeto, viyuttoti (Syā)

<sup>4.</sup> Sañjayassa (Sī, Syā)

mātāpitūnam accayena anekakotisankhyam dhanam pariccajitvā isipabbajjam pabbajitvā Himavante vasanto jhānābhiññā nibbattetvā ākāsena gacchanto Dīpankaradasabalassa Sudassanavihārato Rammavatīnagaram pavisanatthāya maggam sodhayamānam janam disvā sayampi ekam padesam gahetvā maggam sodheti. Tasmim asodhiteyeva āgatassa Satthuno attānam setum katvā kalale ajinacammam attharitvā "Satthā sasāvakasamgho kalalam anakkamitvā mam akkamanto gacchatū"ti nipanno. Satthārā tam disvāva "Buddhankuro esa, anāgate kappasatasahassādhikānam catunnam asankhyeyyānam pariyosāne Gotamo nāma Buddho bhavissatī''ti byākato. Tassa Satthuno aparabhāge "Kondañño Mangalo Sumano Revato Sobhito Anomadassī Padumo Nārado Padumuttaro Sumedho Sujāto Piyadassī Atthadassī Dhammadassī Siddhattho Tisso Phusso Vipassī Sikhī Vessabhū Kakusandho Konāgamano Kassapo"ti lokam obhāsetvā uppannānam imesampi tevīsatiyā Buddhānam santike laddhabyākarano "dasa pāramiyo dasa upapāramiyo dasa paramatthapāramiyo"ti samattimsa pāramiyo pūretvā Vessantarattabhāve thito pathavikampanāni mahādānāni datvā puttadāram pariccajitvā āyupariyosāne Tusitapure nibbattitvā tattha yāvatāyukam thatvā dasasahassacakkavāladevatāhi sannipatitvā—

"Kālo deva mahāvīra, uppajja mātukucchiyam.
Sadevakam tārayanto, bujjhassu amatam padan'ti¹—

Vutte—

Kālam desanca dīpanca. Kulam mātarameva ca. Ime panca viloketvā, uppajjati mahāyasoti—

Pañca mahāvilokanāni viloketvā tato cuto Sakyarājakule paṭisandhiṁ gahetvā (dasamāsaccayena mātukucchito vijāyi. Soļasavassakāle)<sup>2</sup> tattha mahāsampattiyā parihariyamāno<sup>3</sup> anukkamena bhadrayobbanaṁ patvā tiṇṇaṁ utūnaṁ anucchavikesu tīsu pāsādesu

<sup>1.</sup> Khu 4. 305 Buddhavamse.

<sup>2. ( )</sup> Sī-Syā-potthakesu natthi, Abhi-Ţtha 1. 76 piţthe ca.

<sup>3.</sup> Paricāriyamāno (Sī, Syā)

devalokasirim viya rajjasirim anubhavanto uyyānakīlāya gamanasamaye anukkamena jinnabyādhimatasankhāte tayo devadūte disvā sañjātasamvego nivattitvā catutthavāre pabbajitam<sup>1</sup> disvā "sādhu pabbajjā"ti pabbajjāya rucim uppādetvā uyyānam gantvā tattha divasam khepetvā Mangalapokkharanītīre nisinno kappakavesam gahetvā āgatena Vissakammena<sup>2</sup> devaputtena alankatapatiyatto Rāhulakumārassa jātasāsanam sutvā puttasinehassa balavabhāvam natvā "yāva idam bandhanam na vaddhati, tāvadeva nam chindissāmī"ti cintetvā sāyam nagaram pavisanto—

> "Nibbutā nūna sā mātā, nibbuto nūna so pitā. Nibbutā nūna sā nārī, vassāyam īdiso patī"ti—

Kisāgotamiyā nāma pitucchādhītāya bhāsitam imam gātham sutvā "aham imāya nibbutapadam sāvito"ti muttāhāram omuncitvā tassā pesetvā attano bhavanam<sup>3</sup> pavisitvā sirisayane nisinno<sup>4</sup> niddopagatānam nātakitthīnam vippakāram disvā nibbinnahadayo Channam utthāpetvā Kandakam<sup>5</sup> āharāpetvā tam āruyha Channasahāyo dasasahassacakkavāladevatāhi parivuto mahābhinikkhamanam nikkhamitvā Anomānadītīre pabbajitvā anukkamena Rājagaham gantvā tattha pindāya caritvā Pandavapabbatapabbhāre nisinno Magadharaññā rajjena nimantiyamāno tam patikkhipitvā sabbañnutam patvā attano vijitam āgamanatthāya tena gahitapatiñño Ālārañca Udakañca upasankamitvā tesam santike adhigatavisesam analankarityā<sup>6</sup> chabbassāni mahāpadhānam padahityā visākhapunnamadivase<sup>7</sup> pātova Sujātāya dinnapāyasam paribhuñjitvā Nerañjarāya nadiyā suvannapātim pavāhetvā Nerañjarāya nadiyā tīre Mahāvanasande nānāsamāpattīhi divasabhāgam vītināmetvā sāyanhasamaye Sottiyena<sup>8</sup> dinnam tinam gahetvā Kālena nāgarājena abhitthutaguno Bodhimandam āruyha tināni santharitvā "na tāvimam pallankam bhindissāmi, yāva me

<sup>1.</sup> Pabbajitarūpam (Sī)

<sup>2.</sup> Vissukammena (Syā), Visukammena (Ka)

<sup>3.</sup> Gabbham (Ka)

<sup>4.</sup> Nipanno (Sī)

<sup>5.</sup> Kanthakam (Sī, Syā)

<sup>6.</sup> Adisvā analankaritvā (Sī) 7. Visākhapunnamīdivase (Syā) 8. Sotthiyena (Sī, Syā)

anupādāya āsavehi cittam na vimuccissatī"ti<sup>1</sup> patiññam katvā puratthābhimukho nisīditvā sūriye anatthangamiteyeva mārabalam vidhamitvā pathamayāme pubbenivāsañānam, majjhimayāme cutū papātañānam patvā pacchimavāmāvasāne paccavākāre ñānam otāretvā arunuggamane dasabalacatuvesārajjādisabbagunapatimanditam sabbaññutaññānam pativijihitvā sattasattāham Bodhimande vītināmetvā atthame satthāhe Ajapālanigrodhamūle nisinno dhammagambhīratāpaccavekkhanena appossukkatam āpajjamāno dasasahassacakkavālamahābrahmaparivārena Sahampatibrahmunā āyācitadhammadesano Buddhacakkhunā lokam voloketvā brahmuno ajjhesanam adhivāsetvā "kassa nu kho aham pathamam dhammam deseyyan"ti olokento Ālārudakānam kālakatabhāvam ñatvā pañcavaggiyānam bhikkhūnam bahūpakāratam anussaritvā utthāyāsanā Kāsipuram gacchanto antarāmagge Upakena saddhim mantetvā āsālipunnamadivase Isipatane Migadāye pañcavaggiyānam vasanatthānam patvā te ananucchavikena samudācārena samudācarante saññāpetvā Aññātakondaññappamukhe atthārasa brahmakotiyo amatapānam pāyento dhammacakkam pavattetvā pavattitavaradhammacakko pañcamiyam pakkhassa sabbepi te bhikkhū arahatte patitthāpetvā tam divasameva Yasakulaputtassa upanissayasampattim ditvā tam rattibhāge nibbinditvā<sup>2</sup> geham pahāya nikkhantam disvā "ehi Yasā"ti pakkositvā tasmim yeva rattibhāge sotāpattiphalam pāpetvā punadivase arahattam pāpetvā aparepi<sup>3</sup> tassa sahāyake catupannāsa jane ehibhikkhupabbajjāya pabbājekvā arahattam pāpesi.

Evam loke ekasaṭṭhiyā arahantesu jātesu vuṭṭhavasso pavāretvā "caratha bhikkhave cārikan"ti saṭṭhi bhikkhū disāsu pesetvā sayam Uruvelam gacchanto antarāmagge Kappāsikavanasaṇḍe timsa jane Bhaddavaggiyakumāre vinesi. Tesu sabbapacchimako sotāpanno, sabbuttamo anāgāmī ahosi. Te sabbepi ehibhikkhubhāveneva pabbājetvā disāsu pesetvā sayam Uruvelam gantvā aḍḍhuḍḍhāni pāṭihāriyasahassāni dassetvā Uruvelakassapādayo sahassajaṭilaparivāre tebhātikajaṭile vinetvā ehibhikkhubhāveneva pabbājetvā

<sup>1.</sup> Na vimuccatīti (Sī, Ka) Ma 1. 281 pitthe pana passitabbam.

<sup>2.</sup> Nibbijjitvā (Sī)

<sup>3.</sup> Aparabhāgepi (Ka)

Gayāsīse nisīdāpetvā Ādittapariyāyadesanāya¹ arahatte patiṭṭhāpetvā tena arahantasahassena parivuto "Bimbisārarañňo dinnam paṭiññam mocessāmī"ti Rājagahanagarūpacāre Laṭṭhivanuyyānam gantvā "Satthā kira āgato"ti sutvā dvādasanahutehi brāhmaṇagahapatikehi saddhim āgatassa rañňo madhuradhammakatham kathento rājānam ekādasahi nahutehi saddhim sotāpattiphale patiṭṭhāpetvā ekanahutam saraṇesu patiṭṭhāpetvā punadivase Sakkena devarājena māṇavakavaṇṇam gahetvā abhitthutaguṇo Rājagahanagaram pavisitvā rājanivesane katabhattakicco Veļuvanārāmam paṭiggahetvā tattheva vāsam kappesi. Tattha nam Sāriputtamoggallānā upasaṅkamimsu.

Tatrāyam anupubbikathā—anuppanneyeva hi Buddhe Rājagahato avidūre Upatissagāmo Kolitagāmoti dve brāhmanagāmā ahesum. Tesu Upatissagāme Sāriyā<sup>2</sup> nāma brāhmaniyā gabbhassa patitthitadivaseyeva Kolitagāme Moggaliyā nāma brāhmaniyāpi gabbho patitthāsi. Tāni kira dvepi kulāni yāva sattamā kulaparivattā ābaddhapatibaddhasahāyakāneva ahesum, tāsam dvinnampi ekadivasameva gabbhaparihāram adamsu. Tā ubhopi dasamāsaccayena putte vijāyimsu. Nāmaggahanadivase Sāriyā brāhmaniyā puttassa Upatissagāmake jetthakulassa puttattā Upatissoti nāmam karimsu, itarassa Kolitagāme ietthakulassa puttattā **Kolito**ti nāmam karimsu. Te ubhopi vuddhimanvāya sabbasippānam pāram agamamsu. Upatissamānavassa kīlanatthāya nadim vā uyyānam vā gamanakāle pañca suvannasivikasatāni parivārāni honti, Kolitamānavassa pañca ājaññayuttarathasatāni. Dvepi janā pañcapañcamānavakasataparivārā honti. Rājagahe ca anusamvaccharam giraggasamajjo<sup>3</sup> nāma ahosi. Tesam dvinnampi ekatthāneyeva mañcam bandhanti. Dvepi ekato nisīditvā samajjam passantā hasitabbatthāne hasanti, samvegatthāne samvejenti, dāyam dātum yuttatthāne dāyam denti. Tesam imināva niyāmena ekadivasam samajjam passantānam paripākagatattā ñānassa purimadivasesu viya hasitabbatthāne hāso vā samvegatthāne samvego<sup>4</sup> vā dātum yuttatthāne dānam vā

<sup>1.</sup> Vi 3. 44; Sam 2. 251 pitthesu.

<sup>3.</sup> Giraggasamajjam (Sī, Ka)

<sup>2.</sup> Rūpasāriyā (Sī, Ka)

<sup>4.</sup> Samvegajananam (Sī, Ka)

nāhosi. Dvepi pana janā evam cintayimsu "kimettha oloketabbam atthi, sabbepime appatte vassasate appaṇṇattikabhāvam gamissanti, amhehi pana ekam mokkhadhammam pariyesitum vaṭṭatī"ti ārammaṇam gahetvā nisīdimsu. Tato Kolito Upatissam āha "samma Upatissa na tvam aññesu divasesu viya haṭṭhapahaṭṭho, idāni anattamanadhātukosi, kim te sallakkhitan"ti. "Samma Kolita etesam volokane sāro natthi, niratthakametam, attano mokkhadhammam gavesitum vaṭṭatī"ti idam cintayanto nisinnomhi, tvam pana kasmā anattamanosīti. Sopi tatheva āha. Athassa attanā saddhim ekajjhāsayatam ñatvā Upatisso āha "amhākam ubhinnampi sucintitam, mokkhadhammam pana gavesantehi ekā pabbajjā laddhum vaṭṭati¹, kassa santike pabbajāmā"ti.

Tena kho pana samayena Sañcayo nāma paribbājako Rājagahe pativasati mahatiyā paribbājakaparisāya saddhim. Te "tassa santike pabbajissāmā"ti pañcamānavakasatāni "sivikāyo ca rathe ca gahetvā gacchathā"ti uyyojetvā ekāya sivikāya ekena rathena gantvā Sañcayassa<sup>2</sup> santike pabbajimsu. Tesam pabbajitakalato patthaya Sancayo atirekalābhaggayasaggappatto ahosi. Te katipāheneva sabbam Sancayassa samayam parimadditvā<sup>3</sup> "ācariya tumhākam jānanasamayo ettakova, udāhu uttarimpi attī"ti pucchimsu. "Ettakova, sabbam tumhehi natan"ti vutte cintayimsu "evam sati imassa santike brahmacariyavāso niratthako, mayam yam mokkhadhammam gavesitum nikkhanta, so imassa santike uppadetum na sakkā, mahā kho pana jambudīpo, gāmanigamarājadhāniyo carantā addhā mokkhadhammadesakam kañci ācariyam labhissāmā"ti. Tato patthāya "yattha yattha panditā samanabrāhmanā atthī"ti vadanti, tattha tattha gantvā sākaccham karonti. Tehi puttham panham anne kathetum na sakkonti, te pana tesam pañham vissajjenti. Evam sakalajambudīpam parigganhitvā nivattitvā sakatthānameva āgantvā "samma Kolita amhesu yo pathamam amatam adhigacchati, so itarassa ārocetū"ti katikam akamsu.

Evam tesu katikam katvā viharantesu Satthā vuttānukkamena Rājagaham patvā Veļuvanam paṭiggahetvā Veļuvane viharati. Tadā "caratha bhikkhave

<sup>1.</sup> Mokkhadhammam pana gavesitum vaṭṭati, gavedantehi nāma ekam pabbajjam laddhum vaṭṭati (Syā)

<sup>2.</sup> Uyyojetvā pañcahi mānavakasatehi saddhim Sañcayassa (Sī, Syā)

<sup>3.</sup> Parigganhitvā (Syā)

cārikam bahujanahitāyā"ti ratanattayaguṇapakāsanattham uyyojitānam ekasaṭṭhiyā arahantānam antare pañcavaggiyānam abbhantaro Assajitthero paṭinivattitvā Rājagaham āgato, punadivase pātova pattacīvaramādāya Rājagaham piṇḍāya pāvisi. Tasmim samaye Upatissaparibbājakopi pātova bhattakiccam katvā paribbājakārāmam gacchanto theram disvā cintesi "mayā evarūpo pabbajito nāma na diṭṭhapubboyeva, ye loke arahanto vā arahattamaggam vā samāpannā, ayam tesam bhikkhūnam aññataro, yannūnāham imam bhikkhum upasankamitvā puccheyyam 'kamsi tvam āvuso uddissa pabbajito, ko vā te Satthā. Kassa vā tvam dhammam rocesī'ti". Athassa etadahosi "akālo kho imam bhikkhum pañham pucchitum, antaragharam paviṭṭho piṇḍāya carati, yannūnāham imam bhikkhum piṭṭhito piṭṭhito anubandheyyam, atthikehi upaññātam maggan''ti. So theram laddhapiṇḍapātam aññataram okāsam gacchantam disvā nisīditukāmatañcassa ñatvā attano paribbājakapīṭhakam paññāpetvā adāsi, so bhattakiccapariyosānepissa attano kuṇḍikāya udakam adāsi.

Evam ācariyavattam katvā katabhattakiccena therena saddhim madhurapaṭisanthāram katvā evamāha "vippasannāni kho pana te āvuso indriyāni, parisuddho chavivaṇṇo pariyodāto, kamsi tvam āvuso uddissa pabbajito, ko vā te Satthā, kassa vā tvam dhammam rocesī"ti pucchi. Thero cintesi "ime paribbājakā nāma sāsanassa paṭipakkhabhūtā, imassa sāsanassa¹ gambhīratam dassessāmī"ti. Attano navakabhāvam dassento āha "aham kho āvuso navo acirapabbajito, adhunāgato imam dhammavinayam, na tāvāham sakkhissāmi vitthārena dhammam desetun"ti. Paribbājako "aham Upatisso nāma, tvam yathā sattiyā appam vā bahum vā vada, etam nayasatena nayasahassena paṭivijjhitum mayham bhāro"ti cintetvā āha—

"Appam vā bahum vā bhāsassu, atthamyeva me brūhi. Attheneva me attho, kim kāhasi byañjanam bahun"ti².

Evam vutte thero "ye dhammā hetuppabhavā"ti¹ gāthamāha. Paribbājako paṭhamapadadvayameva sutvā sahassanayapaṭimaṇḍite² sotāpattiphale patiṭṭhahi, itaram padadvayam sotāpannakāle niṭṭhāpesi. So sotāpanno hutvā uparivisese appavattante "bhavissati ettha kāraṇan"ti sallakkhetvā theram āha "bhante mā upari dhammadesanam vaḍḍhayittha, ettakameva hotu, kuhim amhākam Satthā vasatī"ti. Veļuvane āvusoti. Tena hi bhante tumhe purato yātha, mayham eko sahāyako atthi, amhehi ca aññamaññam katikā katā "amhesu yo amatam paṭhamam adhigacchati, so itarassa ārocetū"ti. Aham tam paṭiññam mocetvā sahāyakam gahetvā tumhākam gatamaggeneva Satthu santikam āgamissāmīti pañcapatiṭṭhitena therassa pādesu nipatitvā tikkhattum padakkhiṇam katvā theram uyyojetvā paribbājakā rāmābhimukho agamāsi.

Atha kho Kolitaparibbājako tam dūratova āgacchantam disvā "ajja mayham sahāyakassa mukhavaṇṇo na aññadivasesu viya, addhā tena amatam adhigatam bhavissatī"ti amatādhigamam pucchi. Sopissa "āmāvuso amatam adhigatam"ti paṭijānitvā tameva gātham abhāsi. Gāthāpariyosāne Kolito sotāpattiphale patiṭṭhahitvā āha "kuhim kira samma amhākam Satthā vasatī"ti. Veļuvane kira samma, evam no ācariyena Assajittherena kathitanti. Tena hi samma āyāma, Satthāram passissāmāti. Sāriputtatthero ca nāmesa sadāpi ācariyapūjakova, tasmā sahāyam evamāha "samma amhehi adhigatam amatam amhākam ācariyassa Sañcayaparibbājakassāpi kathessāma, bujjhamāno paṭivijjhissati, appaṭivijjhanto amhākam saddahitvā Satthu santikam gamissati, Buddhānam desanam sutvā maggaphalapaṭivedham karissatī"ti. Tato dvepi janā Sañcayassa santikam agamamsu.

Sañcayo te disvāva "kiṁ tātā koci vo amatamaggadesako laddho"ti pucchi. Āma ācariya laddho, Buddho loke uppanno, dhammo loke uppanno, saṁgho loke uppanno, tumhe tucche asāre vicaratha, tasmā etha, Satthu santikaṁ gamissāmāti. Gacchatha tumhe, nāhaṁ

<sup>1.</sup> Vi 3. 51; Khu 3. 27 pitthesu.

<sup>2.</sup> Sahassanayasampanne (Sī, Syā, Am-Ttha 1. 124 pitthe ca)

sakkhissāmīti. Kim kāranāti? Aham mahājanassa ācariyo hutvā vicarim, vicarantassa me ante vāsikavāso cātiyā udancanabhāvappatti<sup>1</sup> viya hoti, na sakkhissāmaham antevāsikavāsam vasitunti. Mā evam karittha ācariyāti. Hotu tātā, gacchatha tumhe, nāham sakkhissāmīti. Ācariya loke Buddhassa uppannakālato patthāya mahājano gandhamālādihattho gantvā tameva pūjessati, mayampi tattheva gamissāma, tumhe kim karissathāti. Tātā kimnu kho imasmim loke dandhā bahū, udāhu panditāti. Dandhā ācariya bahū, panditā ca nāma katipayā<sup>2</sup> eva hontīti. Tena hi tātā panditā panditassa samanassa Gotamassa santikam gamissanti, dandhā dandhassa mama<sup>3</sup> santikam āgamissanti, gacchatha tumhe, nāham gamissāmīti. Te "paññāyissatha tumhe ācariyā"ti pakkamimsu. Tesu gacchantesu Sañcayassa parisā bhijji, tasmim khane ārāmo tuccho ahosi. So tuccham ārāmam disvā unham lohitam chaddesi. Tehipi saddhim gacchantesu pañcasu paribbājakasatesu Sañcayassa addhateyyasatāni nivattimsu, atha kho te attano antevāsikehi addhateyyehi paribbājakasatehi saddhim Veluvanam agamamsu.

Satthā catuparisamajjhe nisinno dhammam desento te dūratova disvā bhikkhū āmantesi "ete bhikkhave dve sahāyakā āgacchanti Kolito ca Upatisso ca, etam me sāvakayugam bhavissati aggam bhaddayugan"ti. Te Satthāram vanditvā ekamantam nisīdimsu, nisīditvā ca pana Bhagavantam etadavocum "labheyyāma mayam bhante Bhagavato santike pabbajjam, labheyyāma upasampadan"ti. "Etha bhikkhavo"ti Bhagavā avoca "svākkhāto dhammo, caratha brahmacariyam sammā dukkhassa antakiriyāyā"ti. Sabbepi iddhimayapattacīvaradharā saṭṭhivassikattherā<sup>4</sup> viya ahesum.

Atha nesam parisāya caritavasena<sup>5</sup> Satthā dhammadesanam vaḍḍhesi. Thapetvā dve aggasāvake avasesā arahattam pāpuṇimsu, aggasāvakānam pana uparimaggattayakiccam na niṭṭhāsi. Kim kāraṇā? Sāvakapāramiñāṇassa mahantatāya. Athāyasmā Mahāmoggallāno

- 1. Udakacalanabhāvappatti (Syā), udakasiñcanabhāvappatti (Ka)
- 2. Kadāci (Ka)

3. Dandhā manussā amhākaṁ (Ka)

4. Vassasatikattherā (Sī, Syā)

5. Cariyāvasena (Syā)

pabbajitadivasato sattame divase Magadharaṭṭhe Kallavālagāmakaṁ upanissāya viharanto thinamiddhe okkamante Satthārā saṁvejito thinamiddhaṁ vinodetvā Tathāgatena dinnaṁ dhātukammaṭṭhānaṁ suṇantova uparimaggattayakiccaṁ niṭṭhāpetvā sāvakapāramiñāṇassa matthakaṁ patto. Sāriputtattherovi pabbajitadevasato aḍḍhamāsaṁ atikkamitvā Satthārā saddhiṁ tameva Rājagahaṁ upanissāya Sūkarakhataleṇe viharanto attano bhāgineyyassa Dīghanakhaparibbājakassa Vedanāpariggahasuttante desiyamāne suttānusārena ñāṇaṁ pesetvā parassa vaḍḍhitabhattaṁ paribhuñjanto viyasāvakapāramiñāṇassa matthakaṁ patto. Nanu cāyasmā mahāpañño, atha kasmā Mahāmoggallānato ciratarena sāvakapāramiñāṇaṁ pāpuṇīti? Parikammamahantatāya. Yathā hi duggatamanussā yattha katthaci gantukāmā khippameva nikkhamanti, rājūnaṁ pana hatthivāhanakappanādiṁ mahantaṁ parikammaṁ laddhuṁ vaṭṭati, evaṁsampadamidaṁ veditabbaṁ.

Tam divasaññeva pana Satthā vaddhamānakacchāyāya Veluvane sāvakasannipātam katvā dvinnam therānam aggasāvakatthānam datvā pātimokkham uddisi. Bhikkhū ujjhāyimsu "Satthā mukholokanena bhikkham¹ deti, aggasāvakatthānam dadantena nāma pathamam pabbajitānam pañcavaggiyānam dātum vattati, ete anolokentena Yasatherappamukhānam pañcapannāsabhikkhūnam dātum vattati, ete anolokentena Bhaddavaggiyānam timsajanānam, ete anolokentena Uruvelakassapādīnam tebhātikānam ete pana ettake mahāthere pahāya sabbapacchā pabbajitānam aggasāvakatthānam dadantena mukham oloketvā dinnan"ti<sup>2</sup>. Satthā "kim kathetha bhikkhave"ti pucchitvā "idam nāmā"ti vutte nāham bhikkhave mukham oloketvā bhikkham demi, etesam pana attanā attanā<sup>3</sup> patthitapattitameva demi. Aññātakondañño hi ekasmim sasse nava vāre aggasassadānam dadanto aggasāvakatthānam patthetvā nādāsi, aggadhammam pana arahattam sabbapathamam pativijjhitum patthetvā adāsīti. Kadā pana Bhagavāti. Sunissatha bhikkhaveti. Āma bhanteti. Bhagavā atītam āhari—

Bhikkhave ito ekanavutikappe Vipassī nāma Bhagavā loke udapādi. Tadā Mahākālo Cūlakāloti dvebhātikā kutumbikā mahantam

<sup>1.</sup> Bhikkhūnam (Syā)

<sup>3.</sup> Attano attano (Ka)

<sup>2.</sup> Dinnam ayuttam vatāti vadimsu (Ka)

sālikkhettam vapāpesum. Athekadivasam Cūļakāļo sālikkhettam gantvā ekam sāligabbham phāletvā khādi, tam atimadhuram ahosi. So Buddhappamukhassa samghassa sāligabbhadānam dātukāmo hutvā jeṭṭhabhātikam upasaṅkamitvā "bhātika sāligabbham phāletvā Buddhānam anucchavikam katvā pacāpetvā dānam demā"ti āha. "Kim vadesi tāta, sāligabbham phāletvā dānam nāma neva atīte bhūtapubbam, na anāgatepi bhavissati, mā sassam nāsayī"ti¹ vuttopi so punappunam yāciyeva. Atha nam bhātā "tena hi sālikkhettam dve koṭṭhāse katvā mama koṭṭhāsam anāmasitvā attano koṭṭhāse khette yam icchasi, tam karohī"ti āha. So "sādhū"ti khettam vibhajitvā bahū manusse hatthakammam yācitvā sāligabbham phāletvā nirudakena khīrena² pacāpetvā sappimadhusakkharādīhi yojetvā Buddhappamukhassa bhikkhusamghassa dānam datvā bhattakiccapariyosāne "idam bhante mama aggadānam aggadhammassa sabbapaṭhamam paṭivedhāya samvattatū"ti āha. Satthā "evam hotū"ti anumodanamakāsi.

So khettami³ gantvā olokento sakalakkhettami⁴ kaṇṇikabaddhehi viya sālisīsehi sañchannami disvā pañcavidhapītimi paṭilabhitvā "lābhā vata me"ti cintetvā puthukakāle puthukaggami nāma adāsi, gāmavāsīhi saddhimi aggasassadānami nāma adāsi, lāyane lāyanaggami, veṇikaraṇe veṇaggami, kalāpādīsu kalāpaggami, khalaggami, khalabhaṇḍaggami⁵, koṭṭhagganti. Evami ekasasse nava vāre aggadānami adāsi. Tassa sabbavāresu gahitagahitaṭṭhānami paripūri, sassami atirekami uṭṭhānasampannami ahosi. Dhammo hi nāmesa attānami rakkhantami rakkhati. Tenāha Bhagavā—

"Dhammo have rakkhati dhammacārim, Dhammo suciņņo sukhamāvahāti. Esānisamso dhamme suciņņe, Na duggatim gacchati dhammacārī"ti<sup>6</sup>.

1. Na sassam nāsehīti (Ka)

2. Nirudake khīre (Sī, Syā)

3. Pacchā khettam (Sī)

- 4. Sakalakhette (Sī, Syā)
- 5. Khalaggam maddanaggam minaggam (Ka) Am-Ttha 1. 111 pitthe pana passitabbam.
- 6. Khu 2. 272; Khu 5. 215 pitthesu.

Evamesa Vipassīsammāsambuddhakāle aggadhammam paṭhamam paṭivijjhitum pattento nava vāre aggadānāni adāsi. Ito satasahassakappamatthake pana Hamsavatīnagare padumuttarasambuddhakālepi sattāham mahādānam datvā tassa Bhagavato pādamūle nipajjitvā aggadhammassa paṭhamam paṭivijjhanatthameva patthanam ṭhapesi. Iti iminā patthitameva mayā dinnam, nāham bhikkhave mukham oloketvā demīti.

Yasakulaputtappamukhā pañcapaññāsa janā kim kammam karimsu bhanteti. Etepi ekassa Buddhassa santike arahattam patthenta bahum puññakammam katvā aparabhāge anuppanne Buddhe sahāyakā hutvā vaggabandhanena puññāni karontā anāthamatasarīrāni patijaggantā vicarimsu. Te ekadivasam sagabbham itthim kālakatam disvā "jhāpessāmā"ti susānam harimsu. Tesu pañca jane "tumhe jhāpethā"ti susāne thapetvā sesā gāmam pavitthā. Yasadārako tam matasarīram sūlehi vijihityā parivattetyā parivattetyā ihāpento asubhasañnam patilabhi. itaresampi catunnam jananam "passatha bho, imam sarīram tattha tattha viddhamsitacammam<sup>1</sup>, kabaragorūpam viya asucim duggandham patikūlan"ti dassesi. Tepi tattha asubhasañnam patilabhimsu. Te pancapi janā gāmam gantvā sesasahāyakānam kathayimsu. Yaso pana dārako geham gantvā mātāpitūnañca bhariyāya ca kathesi. Te sabbepi asubham bhāvayimsu. Idametesam pubbakammam. Teneva yasassa itthāgāre susānasaññā uppajji, tāya ca upanissayasampattiyā sabbesampi visesādhigamo nibbatti. Evam imepi attanā patthitameva labhimsu. Nāham mukham oloketvā dammīti.

Bhaddavaggiyasahāyakā pana kiṁ kammaṁ kariṁsu bhanteti. Etepi pubbabuddhānaṁ santike arahattaṁ patthetvā puññāni katvā aparabhāge anuppanne Buddhe tiṁsa dhuttā hutvā Tuṇḍilovādaṁ sutvā saṭṭhivassasahassāni pañca sīlāni rakkhiṁsu. Evaṁ imepi attanā patthitameva labhiṁsu. Nāhaṁ mukhaṁ oloketvā dammīti.

Uruvelakassapādayo pana kim kammam karimsu bhanteti. Tepi arahattameva patthetvā puññāni karimsu. Ito hi dvenavutikappe

Tisso Phussoti dve Buddhā uppajjimsu. Phussabuddhassa Mahindo nāma rājā pitā ahosi. Tasmim pana sambodhim patte rañño kanitthaputto pathama aggasāvako, purohitaputto dutiya-aggasāvako ahosi. Rājā Satthu santikam gantvā "jetthaputto me Buddho, kanitthaputto pathama-aggasāvako, purohitaputto dutiya-aggasāvako"ti te oloketvā "mameva Buddho, mameva dhammo, mameva samgho, namo tassa Bhagavato Arahato Sammāsambuddhassā"ti tikkhattum udānam udānetvā Satthu pādamūle nipajjitvā "bhante idāni me navutivassasahassaparimānassa āyuno kotiyam nisīditvā niddāyanakālo viya aññesam gehadvāram agantvā yāvāham jīvāmi, tāva me cattāro paccaye adhivāsethā"ti paţiññam gahetvā nibaddham Buddhupatthānam karoti. Rañño pana aparepi tayo puttā ahesum. Tesu jetthassa pañca yodhasatāni parivārāni, majjhimassa tīni, kanitthassa dve. Te "mayampi bhātikam bhojessāmā"ti pitaram okāsam yācityā alabhamānā punappunam yācantāpi alabhitvā paccante kupite tassa vūpasamanatthāya pesitā<sup>1</sup> paccantam vūpasametvā pitu santikam āgamimsu. Atha ne pitā ālingitvā sīse cumbitvā "varam vo tātā dammī"ti āha.

Te "sādhu devā"ti varam gahitakam katvā puna katipāhaccayena pitarā "gaṃhatha tātā varan"ti vuttā<sup>2</sup> "deva amhākam aññena kenaci attho natthi, ito paṭṭhāya mayam bhātikam bhojessāma, imam no varam dehī"ti āhamsu. Na demi tātāti. Niccakālam adento satta samvaccharāni detha devāti. Na demi tātāti. Tena hi cha pañca cattāri tīṇi dve ekam samvaccharam detha devāti. Na demi tātāti. Tena hi deva satta māse dethāti. Cha māse pañca māse cattāro māse tayo māse detha devāti. Na demi tātāti. Hotu deva, ekekassa no ekekam māsam katvā tayo māse dethāti. "Sādhu tātā, tena hi tayo māse bhojethā"ti āha. Te tuṭṭhā rājānam vanditvā sakaṭṭhānameva gatā. Tesam pana tiṇṇampi ekova koṭṭhāgāriko, ekova āyuttako, tassa dvādasanahutā purisaparivārā. Te te pakko sāpetvā "mayam imam temāsam dasa sīlāni gahetvā dve

1. Pesetvā (Ka) 2. Vutte (Ka)

kāsāvāni<sup>1</sup> nivāsetvā Satthārā sahavāsam vasissāma, tumhe ettakam nāma dānavattam gahetvā devasikam navutisahassānam bhikkhūnam yodhasahassassa ca sabbam khādanīyabhojanīyam pavatteyyātha. Mayam hi ito paṭṭhāya na kiñci vakkhāmā"ti vadimsu.

Te tayopi janā parivārasahassam gahetvā dasa sīlāni samādāya kāsāyavatthāni nivāsetvā vihāreyeva vasimsu. Koṭṭhāgāriko ca āyuttako ca ekato hutvā tiṇṇam bhātikānam koṭṭhāgārehi vārena vārena dānavattam gahetvā dānam denti, kammakārānam pana puttā yāgubhattādīnam atthāya rodanti. Te tesam bhikkhusamghe anāgateyeva yāgubhattādīni denti. Bhikkhusamghassa bhattakiccāvasāne kiñci atirekam na bhūtapubbam. Te "aparabhāge dārakānam demā"ti attanāpi gahetvā khādimsu. Manuñām āhāram disvā adhivāsetum nāsakkhimsu. Te pana caturāsītisahassā ahesum. te samghassa dinnadānavattam khāditvā kāyassa bhedā param maraṇā Pettivisaye nibbattimsu. Tebhātikā pana purisasahassena saddhim kālam katvā devaloke nibbattitvā devalokā manussalokam, manussalokā devalokam samsarantā² dvenavutikappe khepesum. Evam te tayo bhātaro arahattam patthentā tadā kalyāṇakammam karimsu. Te attanā patthitameva labhimsu. Nāham mukham oloketvā dammīti.

Tadā pana tesam āyuttako Bimbisāro rājā ahosi, koṭṭhāgāriko Visākho upāsako. Tayo rājakumārā tayo jaṭilā ahesum. Tesam kammakārā tadā Petesu nibbattitvā sugatiduggativasena samsarantā imasmim kappe cattāri Buddhantarāni Petalokeyeva nibbattimsu. Te imasmim kappe sabbapaṭhamam uppannam cattālīsavassasahassāyukam Kakusandham Bhagavantam upasankamitvā "amhākam āhāram labhanakālam ācikkhathā"ti pucchimsu. So "mama tāva kāle na labhissatha, mama pacchato mahāpathaviyā yojanamattam abhiruļāya Koṇāgamano nāma Buddho uppajjissati, tam puccheyyāthā"ti āha. Te tattakam kālam khepetvā tasmim uppanne tam pucchimsu. Sopi "mama kāle na labhissatha, mama pacchato mahāpathaviyā yojanamattam abhiruļāya Kassapo

<sup>1.</sup> Kāsāyāni (Sī, Syā)

<sup>2.</sup> Nibbattitvā devalokā devalokam samsarantā (Sī, Syā)

nāma Buddho uppajjissati, tam puccheyyāthā"ti āha. Te tattakam kālam khepetvā tasmim uppanne tam pucchimsu. Sopi "mama kāle na labhissatha mama pana pacchato mahāpathaviyā yojanamattam abhiruļhāya Gotamo nāma Buddho uppajjissati, tadā tumhākam ñātako Bimbisāro nāma rājā bhavissati, so Satthu dānam datvā tumhākam pattim pāpessati, tadā labhissathā"ti āha. Tesam ekam Buddhantaram svedivasasadisam¹ ahosi. Te Tathāgate uppanne Bimbisāraraññā paṭhamadivasam dāne dinne pattim alabhitvā rattibhāge bheravasaddam katvā rañño attānam dassayimsu. So punadivase Veļuvanam gantvā² Tathāgatassa tam pavattim ārocesi.

Satthā "mahārāja ito dvenavutikappamatthake Phussabuddhakāle ete tava ñātakā, bhikkhusamghassa dinnadānavattam khāditvā petaloke nibbattitvā samsarantā Kakusandhādayo Buddhe pucchitvā tehi idañcidañca vuttā ettakam kālam tava dānam paccāsīsamānā hiyyo tayā dāne dinne pattim alabhamānā evamakamsū"ti āha. Kim pana bhante idānipi dinne labhissantīti. Āma mahārājāti. Rājā Buddhappamukham bhikkhusamgham nimantetvā punadivase mahādānam datvā "bhante ito tesam petānam dibbaannapānam sampajjatū"ti pattim adāsi, tesam tatheva nibbatti. Punadivase naggā hutvā attānam dassesum. Rājā "ajja bhante naggā hutvā attānam dassesun"ti ārocesi. Vatthāni te na dinnāni mahārājāti. Rājāpi punadivase Buddhappamukhassa bhikkhusamghassa cīvaradānam datvā "ito tesam petānam dibbavatthāni hontū"ti pāpesi<sup>3</sup>. Tamkhanaññeva tesam dibbavatthāni uppajjimsu, te petattabhāvam vijahitvā dibbattabhāve santhahimsu. Satthā anumodanam karonto "Tirokuttesu titthantī"ti-ādinā<sup>4</sup> Tirokuttānumodanam akāsi. Anumodanāvasāne caturāsītiyā pānasahassānam dhammābhisamayo ahosi. Iti Satthā tebhātikajatilānam vatthum kathetvā imampi dhammadesanam āhari.

Aggasāvakā pana bhante kim karimsūti. Aggasāvakabhāvāya patthanam karimsu. Ito kappasatasahassādhikassa hi kappānam asankhyeyyassa matthake Sāriputto brāhmanamahāsālakule nibbatti, nāmena

<sup>1.</sup> Svedivasam viya (Syā)

<sup>3.</sup> Dāpesi (Ka)

<sup>2.</sup> Āgantvā (Sī, Syā)

<sup>4.</sup> Khu 1. 8; Khu 2. 129 pitthesu.

Saradamānavo nāma ahosi. Moggallāno gahapatimahāsālakule nibbatti, nāmena Sirivaddhanakutumbiko nāma ahosi. Te ubhopi sahapamsukīlakā<sup>1</sup> sahāyakā ahesum. Tesu Saradamānavo pitu accayena kulasantakam mahādhanam patipajjitvā<sup>2</sup> ekadivasam rahogato cintesi "aham idhalokattabhāvameva jānāmi, no paralokattabhāvam. Jātasattānañca maranam nāma dhuvam, mayā ekam pabbajjam pabbajitvā mokkhadhammagavesanam kātum vattatī"ti. So sahāyakam upasankamitvā āha "samma Sirivaḍḍhana aham pabbajitvā mokkhadhammam gavesissāmi, tvam mayā saddhim pabbajitum sakkhissasi, na sakkhissasī"ti. Na sakkhissāmi samma, tvamyeva pabbajāhīti. So cintesi "paralokam gacchanto sahāye vā ñātimitte vā gahetvā gato nāma natthi, attanā katam attanova hotī"ti. Tato ratanakotthāgāram vivarāpetvā kapanaddhikavanibbakayācakānam mahādānam datvā pabbatapādam pavisitvā isipabbajjam pabbaji. Tassa eko dve tayoti evam anupabbajjam pabbajitā catusattatisahassamattā jatilā ahesum. So pañca abhiññā attha ca samāpattiyo nibbattetvā tesam jatilānam kasinaparikammam ācikkhi. Tepi sabbe pañca abhiññā attha ca samāpattiyo nibbattesum.

Tena samayena Anomadassī nāma Sammāsambuddho loke udapādi. Nagaraṁ Candavatī nāma ahosi, pitā Yasavā nāma khattiyo, mātā Yasodharā nāma devī, bodhi Ajjunarukkho, Nisabho ca Anomo ca dve aggasāvakā, Varuṇo nāma upaṭṭhāko, Sundarā ca Sumanā ca dve aggasāvikā ahesuṁ. Āyu vassasatasahassaṁ ahosi, sarīraṁ aṭṭhapaññāsahatthubbedhaṁ, sarīrappabhā dvādasayojanaṁ phari, bhikkhusatasahassaparivāro ahosi. So ekadivasaṁ paccūsakāle mahākaruṇāsamāpattito vuṭṭhāya lokaṁ volokento Saradatāpasaṁ disvā "ajja mayhaṁ Saradatāpasassa santikaṁ gatapaccayena dhammadesanā ca mahatī bhavissati, so ca aggasāvakaṭṭhānaṁ patthessati, tassa sahāyako Sirivaḍḍhanakuṭumbiko dutiyasāvakaṭṭhānaṁ, desanāpariyosāne cassa parivārā catusattatisahassamattā jaṭilā arahattaṁ pāpuṇissanti, mayā tattha gantuṁ vaṭṭatī"ti attano pattacīvaramādāya aññaṁ kañci anāmantetvā sīho viya ekacaro hutvā Saradatāpasassa

antevāsikesu phalāphalatthāya gatesu "Buddhabhāvaṁ me jānātū"ti adhiṭṭhahitvā passantasseva Saradatāpasassa ākāsato otaritvā pathaviyaṁ patiṭṭhāsi. Saradatāpaso Buddhānubhāvañceva sarīranipphattiṁ cassa disvā lakkhaṇamante sammasitvā "imehi lakkhaṇehi samannāgato nāma agāramajjhe vasanto rājā hoti cakkavattī, pabbajanto loke vivaṭṭacchado Sabbaññubuddho hoti, ayaṁ puriso nissaṁsayaṁ Buddho"ti jānitvā paccuggamanaṁ katvā pañcapatiṭṭhitena vanditvā aggāsanaṁ paññāpetvā adāsi. Nisīdi Bhagavā paññatte aggāsane. Saradatāpasopi attano anucchavikaṁ āsanaṁ gahetvā ekamantaṁ nisīdi.

Tasmim samaye catusattatisahassajatilā panītapanītāni ojavantāni phalāphalāni gahetvā ācariyassa santikam sampattā Buddhānanceva ācariyassa ca nisinnāsanam oloketvā āhamsu "ācariya mayam 'imasmim loke tumhehi mahantataro natthī'ti vicarāma<sup>1</sup>, ayam pana puriso tumhehi mahantataro maññe"ti. Tātā kim vadetha, sāsapena saddhim atthasatthiyojanasatasahassubbedham<sup>2</sup> Sinerum samam katum icchatha, Sabbaññubuddhena saddhim mamam upamam mā karittha puttakāti. Atha te tāpasā "sacāyam ittarasatto abhavissa, amhākam ācariyo na evarūpam upamam āharissa, yāva mahā vatāyam puriso"ti sabbeva pādesu nipatitvā sirasā vandimsu. Atha ne ācariyo āha "tātā amhākam Buddhānam anucchaviko deyyadhammo natthi, Satthā ca bhikkhācāravelāyam idhāgato, mayam yathāsatti yathābalam deyyadhammam dassāma, tumhe yam yam panītam phalāphalam, tam tam āharathā"ti āharāpetvā hatthe dhovitvā sayam Tathāgatassa patte patithāpesi. Satthārā phalāphale patiggahitamatte devatā dibbojam pakkhipimsu. So tāpaso udakampi sayameva parissāvetvā adāsi. Tato bhattakiccam katvā nisinne Satthari sabbe antevāsike pakkositvā Satthu santike sāraņīyakatham kathento nisīdi. Satthā "dve aggasāvakā bhikkhusamghena saddhim agacchantu"ti cintesi. Te Satthu cittam natva satasahassakhīṇāsavaparivārā āgantvā Satthāram vanditvā ekamantam atthamsu.

Tato Saradatāpaso antevāsike āmantesi "tātā Buddhānam nisinnāsanampi nīcam, samaņasatasahassānampi āsanam natthi, ajja tumhehi uļāram Buddhasakkāram kātum vaṭṭati, pabbatapādato vaṇṇagandhasampannāni pupphāni āharathā"ti. Kathanakālo papañco viya hoti, iddhimato pana iddhivisayo acinteyyoti muhuttamatteneva te tāpasā vaṇṇagandhasampannāni pupphāni āharitvā Buddhānam yojanappamāṇam pupphāsanam paññāpesum. Ubhinnam aggasāvakānam tigāvutam, sesabhikkhūnam aḍḍhayojanikādibhedam, samghanavakassa usabhamattam ahosi. "Katham ekasmim assamapade tāva mahantāni āsanāni paññattānī"ti na cintetabbam. Iddhivisayo hesa. Evam paññattesu āsanesu Saradatāpaso Tathāgatassa purato añjalim paggayha ṭhito "bhante mayham dīgharattam hitāya sukhāya imam pupphāsanam abhiruhathā"ti āha. Tena vuttam—

"Nānāpupphañca gandhañca, sampādetvāna¹ ekato. Pupphāsanam paññāpetvā, idam vacanamabravi. Idam me āsanam vīra, paññattam tavanucchavim. Mama cittam pasādento, nisīda pupphamāsane. Sattarattindivam Buddho, nisīdi pupphamāsane. Mama cittam pasādetvā, hāsayitvā sadevake"ti.

Evam nisinne Satthari dve aggasāvakā sesabhikkhū ca attano attano pattāsane² nisīdimsu. Saradatāpaso mahantam pupphacchattam gahetvā Tathāgatassa matthake dhārento aṭṭhāsi. Satthā "jaṭilānam ayam sakkāro mahapphalo hotū"ti nirodhasamāpattim samāpajji. Satthu samāpattim samāpannabhāvam ñatvā dve aggasāvakāpi sesabhikkhūpi samāpattim samāpajjimsu. Tathāgate sattāham nirodhasamāpattim samāpajjitvā nisinne antevāsikā bhikkhācārakāle sampatte vanamūlaphalāphalam paribhuñjitvā sesakāle Buddhānam añjalim paggayha tiṭṭhanti. Saradatāpaso pana bhikkhācārampi agantvā pupphacchattam dhārayamānova sattāham pītisukhena vītināmesi. Satthā nirodhato vuṭṭhāya dakkhiṇapasse nisinnam paṭhama-aggasāvakam Nisabhattheram āmantesi "Nisabha

sakkārakārakānam tāpasānam pupphāsanānumodanam karohī'ti. Thero cakkavattirañño santikā paṭiladdhamahālābho mahāyodho viya tuṭṭhamānaso sāvakapāramiñāṇe ṭhatvā pupphāsanānumodanam ārabhi. Tassa desanāvasāne¹ dutiyasāvakam āmantesi "tvampi bhikkhu dhammam desehī'ti, Anomatthero tepiṭakam Buddhavacanam sammasitvā dhammam kathesi, dvinnam aggasāvakānam desanāya ekassāpi abhisamayo nāhosi. Atha Satthā aparimāṇe Buddhavisaye ṭhatvā dhammadesanam ārabhi. Desanāpariyosāne ṭhapetvā Saradatāpasam sabbepi catusattatisahassajaṭilā arahattam pāpuṇimsu, Satthā "etha bhikkhavo"ti hattam pasāresi. Tesam tāvadeva kesamassūni antaradhāyimsu, aṭṭha parikkhārā kāye paṭimukkāva ahesum.

Saradatāpaso kasmā arahattam na pattoti? Vikkhittacittattā. So<sup>2</sup> kira Buddhānam dutiyāsane nisīditvā sāvakapāramiñāne thatvā dhammam desayato aggasāvakassa dhammadesanam sotum āraddhakālato patthāya "aho vatāhampi anāgate uppajjanakabuddhassa sāsane iminā sāvakena patiladdhadhuram labheyyan"ti cittam uppādesi. So tena parivitakkena maggaphalapativedham kātum nāsakkhi. Tathāgatam pana vanditvā sammukhe thatvā āha "bhante tumhākam anantarāsane nisinno bhikkhu tumhākam sāsane ko nāma hotī"ti. Mayā pavattitam dhammacakkam anupavattento sāvakapāramiñānassa kotippatto solasa paññā pativijjhitvā thito mayham sasane aggasavako Nisabho nama esoti. "Bhante yvayam mayā sattāham pupphacchattam dhārentena sakkāro kato, aham imassa phalena aññam Sakkattam vā brahmattam vā na patthemi, anāgate pana ayam Nisabhatthero viya ekassa Buddhassa aggasāvako bhaveyyan"ti patthanam akāsinti. Satthā "samajjhissati nu kho imassa purisassa patthanā"ti anāgatamsañānam pesetvā olokento kappasatasahassādhikam ekam asankhyeyyam atikkamitvā samijihanabhāvam addasa. Disvāna Saradatāpasam āha "na te ayam patthanā moghā bhavissati, anāgate pana kappasatasahassādhikam ekam asankhyeyyam atikkamitvā Gotamo nāma Buddho uppajjissati, tassa mātā

Mahāmāyā nāma devī bhavissati, pitā Suddhodano nāma mahārājā, putto Rāhulo nāma, upaṭṭhāko Ānando nāma, dutiya-aggasāvako Moggallāno nāma, tvaṁ panassa paṭhama-aggasāvako Dhammasenāpati Sāriputto nāma bhavissasī"ti. Evaṁ tāpasaṁ byākaritvā dhammakathaṁ kathetvā bhikkhusaṁghaparivuto ākāsaṁ pakkhandi.

Saradatāpasopi antevāsikattherānam santikam gantvā sahāyakassa Sirivaddhanakutumbikassa sāsanam pesesi "bhante mama sahāyakassa vadetha 'sahāyakena te Saradatāpasena Anomadassībuddhassa pādamūle anāgate uppajjanakassa Gotamabuddhassa sāsane pathamaaggasāvakatthānam patthitam, tvam dutiya-aggasāvakatthānam pattehī'ti". Evañca pana vatvā therehi puretarameva ekapassena gantvā Sirivaddhanassa nivesanadvāre atthāsi. Sirivaddhano "cīrassam vata me ayyo āgato"ti āsane nisīdāpetvā attanā nīcāsane<sup>1</sup> nisinno "antevāsikaparisā pana vo bhante na paññāyatī"ti pucchi. Āma samma, amhākam assamam Anomadassī Buddho āgato, mayam tassa attano balena sakkāram akarimhā, Satthā sabbesam dhammam desesi, desanāpariyosāne thapetvā mam sesā arahattam patvā pabbajimsu. Aham Satthu pathama-aggasāvakam Nisabhattheram disvā anāgate uppajianakassa Gotamabuddhassa nāma sāsane pathamaaggasāvakatthānam patthesim, tvampi tassa sāsane dutiyaaggasāvakatthānam patthehīti. Mayham Buddhehi saddhim paricayo natthi bhanteti. Buddhehi saddhim kathanam mayham bharo hotu, tvam mahantam sakkāram<sup>2</sup> sajjehīti.

Sirivaḍḍhano tassa vacanaṁ sutvā attano nivesanadvāre rājamānena aṭṭhakarīsamattaṁ ṭhānaṁ samatalaṁ kāretvā vālukaṁ okirāpetvā lājapañcamānipupphāni vikirāpetvā nīluppalacchadanaṁ maṇḍapaṁ kāretvā Buddhāsanaṁ paññāpetvā sesabhikkhūnampi āsanāni paṭiyādetvā mahantaṁ sakkārasammānaṁ sajjetvā Buddhānaṁ nimantanatthāya Saradatāpasassa saññaṁ adāsi. Tāpaso Buddhappamukhaṁ bhikkhusaṁghaṁ gahetvā tassa nivesanaṁ agamāsi. Sirivaḍḍhanopi paccuggamanaṁ katvā Tathāgatassa hatthato pattaṁ gahetvā maṇḍapaṁ pavesetvā paññattāsanesu nisinnassa Buddhappamukhassa bhikkhusaṁghassa

<sup>1.</sup> Nīcatare āsane (Sī, Syā)

<sup>2.</sup> Adhikāram (Sī, Am-Ṭṭha 1. 120 piṭṭhe ca), abhisakkāram (Syā)

dakkhinodakam datvā panītena bhojanena parivisitvā bhattakiccapariyosāne Buddhappamukham bhikkhusamgham mahārahehi vatthehi acchādetvā "bhante nāyam ārambho appamattakaṭṭhānatthāya, imināva niyāmena sattāham anukampam karothā"ti āha. Satthā adhivāsesi. So teneva niyāmena sattāham mahādānam pavattetvā Bhagavantam vanditvā añjalim paggayha ṭhito āha "bhante mama sahāyo Saradatāpaso yassa Satthussa paṭhamaaggasāvako bhaveyyan"ti patthesi, ahampi "tasseva dutiya-aggasāvako bhaveyyan"ti patthemīti.

Satthā anāgatam oloketvā tassa patthanāya samijjhanabhāvam disvā byākāsi "tvam ito kappasatasahassādhikam asankhyeyyam atikkamitvā Gotamabuddhassa dutiya-aggasāvako bhavissasī"ti. Buddhānam byākaraṇam sutvā Sirivaḍḍhano haṭṭhapahaṭṭho ahosi. Satthāpi bhattānumodanam katvā saparivāro vihārameva gato. Ayam bhikkhave mama puttehi tadā patthitapatthanā, te yathāpatthitameva labhimsu. Nāham mukham oloketvā demīti.

Evam vutte dve aggasāvakā Bhagavantam vanditvā "bhante mayam agāriyabhūtā samānā giraggasamajjam dassanāya gatā"ti yāva Assajittherassa santikā sotāpattiphalapativedhā sabbam paccuppannavatthum kathetvā "te mayam bhante ācariyassa Sañcayassa santikam gantvā tam tumhākam pādamūle ānetukāmā tassa laddhiyā nissārabhāvam kathetvā idhāgamane ānisamsam kathayimhā. So idāni mayham antevāsikavāso nāma cātiyā udañcanabhāvappattisadiso, na sakkhissāmi antevāsivāsam vasitun''ti vatvā "ācariya idāni mahājano gandhamālādihattho gantvā Satthārameva pūjessati, tumhe katham bhavissatha"ti vutte kim pana imasmim loke panditā bahū, udāhu dandhāti? "dandhā"ti kathite "tena hi panditā panditassa samanassa Gotamassa santikam gamissanti, dandhā dandhassa mama santikam āgamissanti, gacchatha tumhe"ti vatvā āgantum na icchi bhanteti. Tam sutvā Satthā "bhikkhave Sancayo attano micchāditthitāya asāram sāroti, sārañca asāroti ganhi. Tumhe pana attano panditatāya sārañca sārato, asārañca asārato ñatvā asāram pahāya sārameva ganhitthā"ti<sup>1</sup> vatvā imā gāthā abhāsi—

- 11. "Asāre sāramatino, sāre cāsāradassino. Te sāram nādhigacchanti, micchāsankappagocarā.
- Sārañca sārato ñatvā, asārañca asārato.
   Te sāraṁ adhigacchanti, sammāsaṅkappagocarā"ti.

Tattha asāre sāramatinoti cattāro paccayā, dasavatthukā micchādiṭṭhi, tassā upanissayabhūtā dhammadesanāti ayam asāro nāma, tasmim sāradiṭṭhinoti attho. Sāre cāsāradassinoti dasavatthukā sammādiṭṭhi, tassā upanissayabhūtā dhammadesanāti ayam sāro nāma, tasmim "nāyam sāro"ti asāradassino. Te sāranti te pana tam micchādiṭṭhiggahaṇam gahetvā ṭhitā kāmavitakkādīnam vasena micchāsankappagocarā hutvā sīlasāram samādhisāram paññāsāram vimuttisāram vimuttiñāṇadassanasāram "paramatthasāram nibbānañca nādhigacchanti. Sārañcāti tameva sīlasārādisāram "sāro nāmāyan"ti, vuttappakārañca asāram "asāro ayan"ti ñatvā. Te sāranti te paṇḍitā evam sammādassanam gahetvā ṭhitā nekkhammasankappādīnam vasena sammāsankappagocarā hutvā tam vuttappakāram sāram adhigacchantīti.

Gāthāpariyosāne bahū sotāpattiphalādīni pāpuņimsu. Sannipatitānam sātthikā dhammadesanā ahosīti.

Sāriputtattheravatthu<sup>1</sup> aṭṭhamam.

### 9. Nandattheravatthu

**Yathā agāran**ti imam dhammadesanam Satthā Jetavane viharanto āyasmantam Nandam ārabbha kathesi.

Satthā hi pavattitavaradhammacakko Rājagaham gantvā Veļuvane viharanto "puttam me ānetvā dassethā" ti Suddhodanamahārājena pesitānam sahassasahassaparivārānam dasannam dūtānam sabbapacchato gantvā arahattappattena Kāļudāyittherena gamanakālam ñatvā maggavaṇṇam² vannetvā

<sup>1.</sup> Aggasāvakavatthu (Sī), Sañjayavatthu (Syā)

<sup>2.</sup> Āgamanakālam ñatvā satthimattāya gāthāya maggavannam (Syā)

vīsatisahassakhīnāsavaparivuto Kapilapuram nīto ñātisamāgame pokkharavassam atthuppattim katvā **Vessantarajātakam**<sup>1</sup> kathetvā punadivase pindāya pavittho "uttitthe nappamajjeyyā"ti<sup>2</sup> gāthāya pitaram sotāpattiphale patitthāpetvā "dhammañcare"ti<sup>3</sup> gāthāya Mahāpajāpatim sotāpattiphale, rājānañca sakadāgāmiphale patitthāpesi. Bhattakiccāvasāne pana Rāhulamātugunakatham nissāya Candakinnarījātakam<sup>4</sup> kathetvā tato tatiyadivase<sup>5</sup> Nandakumārassa abhisekagehappavesanavivāhamaṅgalesu pavattamānesu pindāva pavisitvā Nandakumārassa hatthe pattam datvā mangalam vatvā utthāyāsanā pakkamanto Nandakumārassa hatthato pattam na ganhi. Sopi Tathāgatagāravena "pattam vo bhante ganhathā" ti vattum nāsakkhi, evam pana cintesi "sopānasīse pattam ganhissatī"ti. Satthā tasmimpi thāne na gaņhi. Itaro "sopānapādamūle gaņhissatī"ti cintesi. Satthā tatthāpi na ganhi. Itaro "rājangane ganhissatī"ti cintesi. Satthā tatthāpi na ganhi. Kumāro nivattitukāmo aruciyā gacchanto Satthugāravena "pattam ganhathā"ti vatthum na sakkoti. "Idha ganhissati, ettha ganhissatī"ti cintento gacchati.

Tasmim khane aññā itthiyo tam disvā Janapadakalyāniyā ācikkhimsu "ayye Bhagavā Nandakumāram' gahetvā gato, tumhehi tam vinā karissatī"ti. Sā udakabindūhi paggharanteheva aḍḍhullikhitehi kesehi vegena gantvā "tuvaṭam kho ayyaputta āgaccheyyāsī"ti āha. Tam tassā vacanam tassa hadaye tiriyam patitvā viya ṭhitam. Satthāpissa hatthato pattam agganhitvāva tam vihāram netvā "pabbajissasi Nandā"ti āha. So Buddhagāravena "na pabbajissāmī"ti avatvā "āma pabbajissāmī"ti āha. Satthā "tena hi Nandam pabbājethā"ti-āha. Satthā Kapilapuram gantvā tatiyadivase Nandam pabbājesi.

Sattame divase Rāhulamātā kumāram alankaritvā Bhagavato santikam pesesi "passa tāta etam vīsatisahassasamaņaparivutam suvaņņavaņņam brahmarūpivaņņam samaņam, ayam te pitā, etassa mahantā nidhikumbhiyo ahesum. Tyāssa nikkhamanato paṭṭhāya na passāma, gaccha nam dāyajjam yācassu

<sup>1.</sup> Khu 6. 312 pitthe.

<sup>2.</sup> Khu 1. 38 pitthe.

<sup>3.</sup> Khu 1. 39 pitthe.

<sup>4.</sup> Khu 5. 277 pitthe.

<sup>5.</sup> Dutiyadivase (Sī, Ka)

<sup>6.</sup> Nandarājānam (Sī, Ka)

'Aham tāta kumāro, abhisekam patvā cakkavattī bhavissāmi, dhanena me attho, dhanam me dehi. Sāmiko hi putto pitusantakassā'ti". Kumāro Bhagavato santikam gantvāva pitusineham paṭilabhitvā haṭṭhacitto "sukhā te samaṇa chāyā"ti vatvā aññampi bahum attano anurūpam vadanto aṭṭhāsi. Bhagavā katabhattakicco anumodanam katvā uṭṭhāyāsanā pakkāmi. Kumāropi "dāyajjam me samaṇa dehi, dāyajjam me samaṇa dehī"ti Bhagavantam anubandhi. Bhagavāpi kumāram na nivattāpesi, parijanopi Bhagavatā saddhim gacchantam nivattetum nāsakkhi. Iti so Bhagavatā saddhim ārāmameva agamāsi.

Tato Bhagavā cintesi "yam ayam pitusantakam dhanam icchati, tam vattānugatam savighātam, handassa bodhitale patiladdham sattavidham ariyadhanam demi, lokuttaradāyajjassa nam sāmikam karomī"ti. Atha kho Bhagavā āyasmantam Sāriputtam āmantesi "tena hi tvam Sāriputta Rāhulakumāram pabbājehī"ti. Thero kumāram pabbājesi. Pabbajite ca pana kumāre rañno adhimattam dukkham uppajji, tam adhivāsetum asakkonto Bhagavato nivedetvā "sādhu bhante, ayyā mātāpitūhi ananuññātam puttam na pabbājevyun"ti varam yāci. Bhagavā tassa tam varam datvā punekadivasam rājanivavesane katapātarāso ekamantam nisinnena raññā "Bhante tumhākam dukkarakārikakāle ekā devatā mam upasankamitvā 'putto te kālakato'ti āha. Aham tassā vacanam asaddahanto 'na mayham putto bodhim appatvā kālam karotī"ti patikkhipin"ti vutte "idāni kim saddahissatha, pubbepi atthikāni dassetvā 'putto te mato'ti vutte na saddahitvā"ti imissā atthuppattiyā **Mahādhammapālajātakam**<sup>2</sup> kathesi. Gāthāpariyosāne rājā anāgāmiphale patitthahi. Iti Bhagavā pitaram tīsu phalesu patitthāpetvā bhikkhusamghaparivuto punadeva<sup>3</sup> Rājagaham gantvā tato Anāthapindikena Sāvatthim āgamanatthāya gahitapatiñño nitthite Jetavane vihāre tattha gantvā vāsam kappesi.

Evam Satthari Jetavane viharante āyasmā Nando ukkanthitvā bhikkhūnam etamattham ārocesi "anabhirato aham āvuso brahmacariyam carāmi,

na sakkomi brahmacariyam sandhāretum, sikkham paccakkhāya hīnāyāvattissāmī"ti. Bhagavā tam pavattim sutvā āyasmantham Nandam pakkosāpetvā etadavoca "saccam kira tvam Nanda sambahulānam bhikkhūnam evam ārocesi 'anabhirato āvuso brahmacariyam carāmi, na sakkomi brahmacariyam sandhāretum, sikkham paccakkhāya hīnāyāvattissāmī'ti". Evam bhanteti. Kissa pana tvam Nanda anabhirato brahmacariyam carasi, na sakkosi brahmacariyam sandhāretum, sikkham paccakkhāya hīnāyāvattissasīti. Sākiyānī mam¹ bhante Janapadakalyānī gharā nikkhamantassa aḍḍhullikhitehi kesehi apaloketvā mam etadavoca "tuvaṭam kho ayyaputta āgaccheyyāsī"ti, so kho aham bhante tam anussaramāno anabhirato brahmacariyam carāmi, na sakkomi brahmacariyam sandhāretum, sikkham paccakkhāya hīnāyāvattissāmī"ti.

Atha kho Bhagavā āyasmantam Nandam bāhāyam gahetvā iddhibalena Tāvatimsadevalokam ānento antarāmagge ekasmim jhāmakkhette jhāmakhānuke nisinnam chinnakannanāsananguttham ekam palutthamakkatim dassetvā Tāvatimsabhavane Sakkassa devarañño upatthānam āgatāni kakutapādāni pañca accharāsatāni dassesi. (**Kakutapādānī**ti rattavannatāya pārevatapādasadisapādāni.)<sup>2</sup> Dassetvā ca panāha "tam kim maññasi Nanda, katamā nu kho abhirūpatarā vā<sup>3</sup> dassanīyatarā vā<sup>3</sup> pāsādikatarā vā<sup>3</sup> sākiyānī vā Janapadakalyānī, imāni vā pañca accharāsatāni kakutapādānī"ti. Tam sutvā āha "seyyathāpi sā bhante chinnakannanāsanangutthā palutthamakkatī, evameva kho bhante Sākiyānī Janapadakalyānī, imesam pañcannam accharāsatānam upanidhāya sankhyampi na upeti, kalampi na upeti, kalabhāgampi na upeti, atha kho imāneva pañca accharāsatāni abhirūpatarāni ceva dassanīyatarāni ca pāsādikatarāni cā"ti. Abhirama Nanda, abhirama Nanda, aham te pātibhogo pañcannam accharāsatānam patilābhāya kakutapādānanti. Sace me bhante Bhagavā pātibhogo pañcannam accharāsatānam patilābhāya kakutapādānam, abhiramissāmaham bhante Bhagavati<sup>4</sup> brahmacariyeti.

<sup>1.</sup> Me (Syā) Udānatthakathāyam Nandasuttavannanāyam passitabbm.

<sup>2. ( )</sup> Syāma-potthake natthi.

<sup>3.</sup> Ca (Syā)

<sup>4.</sup> Bhagavā (Syā)

Atha kho Bhagavā āyasmantam Nandam gahetvā tattha antarahito Jetavaneyeva pāturahosi. Assosum kho bhikkhū "āyasmā kira Nando Bhagavato bhātā mātucchāputto accharānam hetu brahmacariyam carati, Bhagavā kirassa pātibhogo pañcannam accharāsatānam patilābhāya kakutapādānan"ti. Atha kho āyasmato Nandassa sahāyakā bhikkhū āyasmantam Nandam bhatakavādena ca upakkitakavādena ca samudācaranti "bhatako kirāyasmā Nando, upakkitako kirāyasmā Nando, accharānam hetu brahmcariyam carati. Bhagavā kirassa pātibhogo pañcannam accharāsatānam patilābhāya kakutapādānan"ti. Atha kho āyasmā Nando sahāyakānam bhikkhūnam bhatakavādena ca upakkitakavādena ca attiyamāno harāyamāno jigucchamāno eko vūpakattho appamatto ātāpī pahitatto viharanto na cirasseva yassatthāyakulaputtā sammadeva agārasmā anagāriyam pabbajanti, tadanuttaram brahmacariya pariyosānam dittheva dhamme sayam abhiññā sacchikatvā upasampajja vihāsi, "khīnā jāti, vusitam brahmacariyam, katam karanīyam, nāparam itthattāyā"ti abbhaññāsi. Aññataro ca kho panāyasmā Nando arahatam ahosi.

Athekā devatā rattibhāge sakalam Jetavanam obhāsetvā Satthāram upasankamitvā vanditvā ārocesi "āyasmā bhante Nando Bhagavato bhātā mātucchāputto āsavānam khayā anāsavam cetovimuttim paññāvimuttim dittheva dhamme sayam abhiññā sacchikatvā upasampajja viharatī"ti. Bhagavatopi kho ñānam udapādi "Nando āsavānam khayā anāsavam cetovimuttim paññavimuttim dittheva dhamme sayam abhiñña sacchikatva upasampajja viharatī"ti. Sopāyasmā Nando tassā rattiyā accayena Bhagavantam upasankamitvā vanditvā etadavoca "yam me bhante Bhagavā pātibhogo pañcannam accharāsatānam patilābhāya kakutapādānam, muñcāmaham bhante Bhagavantam etasmā patissavā"ti. Mayāpi kho te nanda cetasā ceto paricca vidito "Nando āsavānam khayā anāsavam cetovimuttim paññavimuttim dittheva dhamme sayam abhiñña sacchikatva upasampajja viharatī''ti. Devatāpi me etamattham ārocesi "āyasmā bhante Nando āsavānam khayā anāsavam cetovimuttim paññāvimuttim dittheva dhamme sayam abhiññā sacchikatvā upasampajja viharatī"ti. Yadeva kho te Nanda anupādāya

āsavehi cittam vimuttam, athāham mutto etasmā paṭissavāti. Atha kho Bhagavā etamattham viditvā tāyam velāyam imam udānam udānesi—

"Yassa nittinno panko, maddito kāmakantako.

Mohakkhayam anuppatto, sukhadukkhesu na vedhatī sa bhikkhū"ti¹.

Athekadivasam bhikkhū tam āyasmantam Nandam pucchimsu "āvuso Nanda pubbe tvam 'ukkaṇṭhitomhī'ti vadesi, idāni te kathan"ti. Natthi me āvuso gihibhāvāya ālayoti. Tam sutvā bhikkhū "abhūtam āyasmā Nando katheti, aññam byākaroti, atītadivasesu 'ukkaṇṭhitomhī'ti vatvā idāni 'natthi me gihibhāvāya ālayo'ti kathetī"ti gantvā Bhagavato ekamattham ārocesum. Bhagavā "bhikkhave atītadivasesu Nandassa attabhāvo ducchannagehasadiso ahosi, idāni succhannagehasadiso jāto. Ayam hi dibbaccharānam diṭṭhakālato paṭṭhāya pabbajitakiccassa matthakam pāpetum vāyamanto tam kiccam patto"ti² vatvā imā gāthā abhāsi—

- 13. "Yathā agāraṁ ducchannaṁ, vuṭṭhī samativijjhati. Evaṁ abhāvitaṁ cittaṁ, rāgo samativijjhati.
- 14. Yathā agāram succhannam, vuṭṭhī na samativijjhati. Evam subhāvitam cittam, rāgo na samativijjhatī"ti.

Tattha **agāran**ti yaṁkiñci gehaṁ. **Ducchannan**ti viraḷacchannaṁ chiddāvachiddaṁ. **Samativijjhatī**ti vassavuṭṭhi vinivijjhati. **Abhāvitan**ti taṁ agāraṁ vuṭṭhi viya bhāvanāya rahitattā abhāvitaṁ cittaṁ rāgo samativijjhati. Na kevalaṁ rāgova, dosamohamānādayo sabbakilesā tathārūpaṁ cittaṁ ativiya vijjhantiyeva. **Subhāvitan**ti samathavipassanābhāvanāhi subhāvitaṁ. Evarūpaṁ cittaṁ succhannaṁ gehaṁ vuṭṭhi viya rāgādayo kilesā ativijjhituṁ na sakkontīti.

Gāthāpariyosāne bahū sotāpattiphalādīni pāpuņimsu. Mahājanassa desanā sātthikā ahosi.

Atha kho bhikkhū dhammasabhāyam katham samuṭṭhāpesum "āvuso Buddhā nāma acchariyā, Janapadakalyānim nissāya ukkanṭhito nāmāyasmā

Nando Satthārā devaccharā<sup>1</sup> āmisam katvā vinīto"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "na bhikkhave idāneva, pubbepesa mayā mātugāmena palobhetvā vinītoyevā"ti vatvā atītam āhari—

Atīte Bārāṇasiyam Brahmadatte rajjam kārente Bārānasivāsī Kappato<sup>2</sup> nāma vānijo ahosi. Tasseko gadrabho kumbhabhāram vahati, ekadivasena<sup>3</sup> satta yojanāni gacchati. So ekasmim samaye gadrabhabhārakehi saddhim Takkasilam gantvā yāva bhandassa vissajjanam, tāva gadrabham caritum vissajjesi. Athassa so gadrabho parikhāpitthe caramāno ekam gadrabhim disvā upasankami, sā tena saddhim patisanthāram karontī āha "kuto āgatosī"ti. Bārānasitoti. Kena kammenāti. Vānijjakammenāti. Kittakam bhāram vahasīti. Kumbhabhāranti. Ettakam bhāram vahanto kati yojanāni gacchasīti. Satta yojanānīti. Gatagatatthāne te kāci pādaparikammapitthiparikammakarā atthīti. Natthīti. Evam sante mahādukkham nāma anubhosīti. Kincāpi hi tiracchānagatānam pādaparikammādikārakā nāma natthi, kāmasamyojanaghattanatthāya pana evarūpam katham kathesi. So tassā kathāya ukkanthi. Kappatopi bhandam vissajjetvā tassa santikam āgantvā "ehi tāta gamissāmā" ti āha. Gacchatha tumhe, nāham gamissāmīti. Atha nam punappunam yācitvā "anicchantam paribhāsetvā<sup>4</sup> nam nessāmī"ti cintetvā imam gāthamāha—

> Patodam te karissāmi, soļasangulikantakam. Lanchindissāmi te kāyam, evam jānāhi gadrabhā''ti.

Tam sutvā gadrabho "evam sante ahampi te kattabbam jānissāmī"ti vatvā imam gāthamāha—

"Patodam me karissasi, soļasangulikantakam. Purato patithahitvāna, uddharitvāna pacchato. Dantam<sup>5</sup> te pātayissāmi, evam jānāhi kappaṭā"ti.

<sup>1.</sup> Devaccharāya (Ka)

<sup>2.</sup> Kappako (Syā)

<sup>3.</sup> Divase divase (Syā)

<sup>4.</sup> Bhāyetvā (Sī, Syā)

<sup>5.</sup> Bhaṇḍaṁ (Syā)

Tam sutvā vāṇijo "kena nu kho kāraṇena esa evam vadatī"ti cintetvā ito cito ca olokento tam gadrabhim disvā "imāyesa evam sikkhāpito bhavissati, "evarūpim nāma te gadrabhim ānessāmī'ti mātugāmena nam palobhetvā nessāmī"ti imam gāthamāha—

"Catuppadim sankhamukhim, nārim sabbangasobhinim. Bhariyam te ānayissāmi, evam jānāhi gadrabhā"ti.

Tam sutvā tutthacitto gadrabho imam gāthamāha—

"Catuppadim sankhamukhim, nārim sabbangasobhinim. Bhariyam me ānayissasi, evam jānāhi kappaṭa. Kappata bhiyyo gamissāmi, yojanāni catuddasā"ti.

Atha nam kappaṭo "tena hi ehī"ti gahetvā sakaṭṭhānam agamāsi. So katipāhaccayena nam āha "nanu mam tumhe 'bhariyam te ānayissāmī'ti avocutthā"ti. Āma vuttam, nāham attano katham bhindissāmi, bhariyam te ānessāmi, vetanam pana tuyham ekakasseva dassāmi, tuyham vetanam dutiyassa¹ pahotu vā mā vā, tvameva jāneyyāsi. Ubhinnam pana vo samvāsamanvāya puttā vijāyissanti, tehipi bahūhi saddhim tuyham tam pahotu vā mā vā, tvameva jāneyyāsīti. Gadrabho tasmim kathenteyeva anapekkho ahosi.

Satthā imam dhammadesanam āharitvā "tadā bhikkhave gadrabhī Janapadakalyāṇī ahosi, gadrabho Nando, vāṇijo ahameva. Evam pubbepesa mayā mātugāmena palobhetvā vinīto"ti jātakam niṭṭhāpesīti.

Nandattheravatthu navamam.

### 10. Cundasūkarikavatthu

**Idha socetī**ti imam dhammadesanam Satthā Veļuvane viharanto Cundasūkarikam nāma purisam ārabbha kathesi.

<sup>1.</sup> Tuyham pana attadutiyassa (Sī), tuyham attano dutiyassa (Syā)

So kira pañcapannāsa vassāni sūkare vadhitvā khādanto ca vikkinanto ca jīvikam kappesi. Chātakāle sakatena vīhim ādāya janapadam gantvā ekanālidvenālimattena gāmasūkarapotake kinitvā sakatam pūretvā āgantvā pacchānivesane vajam viya ekam thānam parikkhipitvā<sup>1</sup> tattheva tesam nivāpam ropetvā<sup>2</sup> tesu nānāgacche ca sarīramalanca khāditvā vaddhitesu vam vam māretukāmo hoti, tam tam ālāne<sup>3</sup> niccalam bandhitvā sarīramamsassa uddhumāvitvā bahalabhāvattham caturassamuggarena pothetvā "bahalamamso jāto"ti natvā mukham vivaritvā antare dandakam datvā lohathāliyā<sup>4</sup> pakkuthitam<sup>5</sup> unhodakam mukhe āsiñcati. Tam kucchim pavisitvā pakkuthitam<sup>5</sup> karīsam ādāya adhobhāgena nikkhamati, yāva thokampi karīsam atthi, tāva āvilam hutvā nikkhamati, suddhe udare accham anāvilam hutvā nikkhamati. Athassa avasesam udakam pitthiyam āsiñcati. Tam kālacammam uppātetvā gacchati. Tato tinukkāya lomāni jhāpetvā tikhinena<sup>6</sup> asinā sīsam chindati. Paggharanakam lohitam bhājanena patiggahetvā mamsam lohitena madditvā<sup>7</sup> pacitvā puttadāramajjhe nisinno khāditvā sesam vikkināti. Tassa imināva nivāmena jīvikam kappentassa pañcapannāsa vassāni atikkantāni. Tathāgate dhuravihāre vasante ekadivasampi pupphamutthimattena pūjā vā katacchumattam bhikkhadānam vā aññam vā kiñci puññam nāma nāhosi. Athassa sarīre rogo uppajji, jīvantasseva Avīcimahānirayasantāpo upatthahi. Avīcisantāpo nāma yojanasate thatvā olokentassa akkhīnam bhijjanasamattho<sup>8</sup> parilāho hoti. Vuttampi cetam—

> "Tassa ayomayā bhūmi, jalitā tejasāyutā. Samantā vojanasatam, pharitvā titthati sabbadā"ti<sup>9</sup>.

Nāgasenattherena panassa pākatikaggisantāpato adhimattatāya ayam upamā vuttā "yathā mahārāja kūtāgāramatto pāsānopi nerayikaggimhi pakkhitto khanena vilayam gacchati. Nibbattasattā panettha

<sup>1.</sup> Paricchinditvā (Sī) 2. Nivāsāpetvā (Ka)

<sup>3.</sup> Ālāhane (Syā, Ka)

<sup>4.</sup> Lohanāliyā (Syā)

<sup>5.</sup> Pakkatthitam (Sī)

<sup>6.</sup> Tinhena (Sī, Syā)

<sup>7.</sup> Vaddhetvā (Sī)

<sup>8.</sup> Akkhīni bhindanasamattho (Syā, Ka)

<sup>9.</sup> Ma 3. 222; Am 1. 140 pitthesu.

kammabalena mātukucchigatā viya na vilīyantī"ti¹. Tassa tasmim santāpe upaṭṭhite kammasarikkhako ākāro uppajji. Gehamajjheyeva sūkararavam ravitvā jaṇṇukehi vicaranto puratthimavatthumpi pacchimavatthumpi gacchati. Athassa gehamānusakā tam daļham gahetvā mukham pidahanti. Kammavipāko nāma na sakkā kenaci paṭibāhitum. So viravantova ito cito ca vicarati. Samantā sattasu gharesu manussā niddam na labhanti. Maraṇabhayena tajjitassa pana bahinikkhamanam nivāretum asakkonto sabbo gehajano yathā antoṭhito bahi vicaritum na sakkoti, tathā gehadvārāni thaketvā bahigeham parivāretvā rakkhanto acchati. Itaro antogeheyeva nirayasantāpena viravanto ito cito ca vicarati. Evam sattadivasāni vicaritvā aṭṭhame² divase kālam katvā Avīcimahāniraye nibbatti. Avīcimahānirayo Devadūtasuttena³ vaṇṇetabboti.

Bhikkhū tassa gharadvārena gacchantā tam saddam sutvā "sūkarasaddo"ti saññino hutvā vihāram gantvā Satthu santike nisinnā evamāhamsu "bhante Cundasūkarikassa gehadvāram pidahitvā sūkarānam māriyamānānam ajjasattamo divaso, gehe kāci mangalakiriyā bhavissati mañne. Ettake nāma bhante sūkare mārentassa ekampi mettacittam vā kārunnām vā natthi, na vata no evarūpo kakkhaļo pharuso satto diṭṭhapubbo"ti. Satthā "na bhikkhave so ime sattadivase4 sūkare māreti, kammasarikkhakam panassa vipākam udapādi, jīvantasseva Avīcimahānirayasantāpo upaṭṭhāsi. So tena santāpena satta divasāni sūkararavam ravanto antonivesane vicaritvā ajja kālam katvā Avīcimhi nibbatto"ti vatvā "bhante idha loke evam socitvā puna gantvā socanaṭṭhāneyeva nibbatto"ti vutte "āma bhikkhave, pamattā nāma gahaṭṭhā vā hontu pabbajitā vā, ubhayattha socantiyevā"ti vatvā imam gāthamāha—

15. "Idha socati pecca socati,Pāpakārī ubhayattha socati.So socati so vihaññati,Disvā kammakiliṭṭhamattano"ti.

<sup>1.</sup> Khu 11. 69 pitthe.

<sup>3.</sup> Ma 3. 216; Am 1. 137 pitthesu.

<sup>2.</sup> Sattame (Sī)

<sup>4.</sup> Imesu sattadivasesu (Ka)

Tattha pāpakārīti nānappakārassa pāpakammassa kārako puggalo "akatam vata me kalyāṇam, katam pāpan"ti ekamseneva maraṇasamaye idha socati, idamassa kammasocanam. Vipākam anubhavanto pana pecca socati, idamassa paraloke vipākasocanam. Evam so ubhayattha socatiyeva. Teneva kāraṇena jīvamānoyeva so Cundasūkarikopi socati. Disvā kammakiliṭṭhanti attano kiliṭṭhakammam passitvā nānappakārakam vilapanto vihaññatīti.

Gāthāpariyosāne bahū sotāpannādayo ahesum. Mahājanassa sātthikā dhammadesanā jātāti.

Cundasūkarikavatthu dasamam.

## 11. Dhammika-upāsakavatthu

**Idha modatī**ti imam dhammadesanam Satthā Jetavane viharanto Dhammika-upāsakam ārabbha kathesi.

Sāvatthiyam kira pañcasatā Dhammika-upāsakā nāma ahesum. Tesu ekekassa pañca pañca upāsakasatāni parivārā. Yo tesam jeṭṭhako, tassa satta puttā satta dhītaro. Tesu ekekassa ekekā salākayāgu salākabhattam pakkhikabhattam nimantanabhattam uposathikabhattam āgantukabhattam samghabhattam vassāvāsikam ahosi. Tepi sabbeva anujātaputtā nāma ahesum. Iti cuddasannam puttānam bhariyāya upāsakassāti soļasa salākayāgu-ādīni pavattanti. Iti so saputtadāro sīlavā kalyāṇadhammo dānasamvibhāgarato ahosi. Athassa aparabhāge rogo uppajji, āyusankhāro parihāyi. So dhammam sotukāmo "aṭṭha vā me soļasa vā bhikkhū pesethā"ti Satthu santikam pahiṇi. Satthā pesesi. Te gantvā tassa mañcam parivāretvā paññattesu āsanesu nisinnā. "Bhante ayyānam me dassanam dullabham bhavissati, dubbalomhi, etam me suttam sajjhāyathā"ti vutte kataram suttam sotukāmo upāsakāti. "Sabbabuddhānam avijahitam Satipaṭṭhānasuttan"ti vutte "ekāyano ayam bhikkhave maggo sattānam

visuddhiyā"ti¹ suttantam paṭṭhapesum. Tasmim khaṇe chahi devalokehi sabbālankārapaṭimaṇḍitā sahassasindhavayuttā diyaḍḍhayojanasatikā cha rathā āgamimsu. Tesu ṭhitā devatā "amhākam devalokam nessāma, amhākam devalokam nessāma, ambho mattikabhājanam bhinditvā suvaṇṇabhājanam gaṇhanto viya amhākam devaloke abhiramitum idha nibbattāhi, amhākam devaloke abhiramitum idha nibbattāhi"ti vadimsu. Upāsako dhammassavanantarāyam anicchanto "āgametha āgamethā"ti āha. Bhikkhū "amhe vāretī"ti saññāya tunhī ahesum.

Athassa puttadhītaro "amhākam pitā pubbe dhammassavanena atitto ahosi, idani pana bhikkhū pakkosapetva sajjhayam karetva sayameva vareti, maranassa abhāyanakasatto nāma natthī"ti viravimsu. Bhikkhū "idāni anokāso"ti utthāyāsanā pakkamimsu. Upāsako thokam vītināmetvā satim patilabhitvā putte pucchi "kasmā kandathā"ti. "Tāta tumhe bhikkhū pakkosāpetvā dhammam sunantā sayameva vārayittha, atha mayam maranassa abhāyanakasatto nāma natthī"ti kandimhāti. Ayyā pana kuhinti. "Anokāso"ti utthāyāsanā pakkantā tātāti. "Nāham ayyehi saddhim kathemī"ti vutte atha kena saddhim kathetāti. Chahi devalokehi devatā cha rathe alankaritvā ādāya ākāse thatvā "amhākam devaloke abhirama, amhākam deva loke abhiramā''ti saddam karonti, tāhi saddhim kathemīti. Kuhim tāta rathā, na mayam passāmāti. Atthi pana mayham ganthitāni pupphānīti. Atthi tātāti. Kataro devaloko ramanīyoti. Sabbabodhisattānam Buddhamātāpitūnañca vasitatthānam Tusitabhavanam ramanīyam tātāti. Tena hi "Tusitabhayanato agatarathe laggatu"ti pupphadamam khipathati. Te khipimsu. Tam rathadhure laggitvā ākāse olambi. Mahājano tadeva passati, ratham na passati. Upāsako "passathetam pupphadāman"ti vatvā "āma passāmā"ti vutte "etam Tusitabhavanato āgatarathe olambati. Aham Tusitabhavanam gacchāmi, tumhe mā cintayittha, mama santike nibbattitukāmā hutvā mayā kataniyāmeneva puññāni karothā"ti vatvā kālam katvā rathe patitthāsi.

Tāvadevassa tigāvutappamāņo saṭṭhisakaṭabhārālaṅkārapaṭimaṇḍito attabhāvo nibbatti, accharāsahassaṁ parivāresi, pañcavīsatiyojanikaṁ kanakavimānaṁ pāturahosi. Tepi bhikkhū vihāraṁ anuppatte Satthā pucchi "sutā bhikkhave upāsakena dhammadesanā"ti¹. Āma bhante, antarāyeva pana "āgamethā"ti vāresi. Athassa puttadhītaro kandiṁsu. Mayaṁ "idāni anokāso"ti uṭṭhāyāsanā nikkhantāti. Na so bhikkhave tumhehi saddhiṁ kathesi, chahi devalokehi devatā cha rathe alaṅkaritvā āharitvā taṁ upāsakaṁ pakkosiṁsu. So dhammadesanāya antarāyaṁ anicchanto tāhi saddhiṁ kathesīti. Evaṁ bhanteti. Evaṁ bhikkhaveti. Idāni kuhiṁ nibbattoti. Tusitabhavane bhikkhaveti. Bhante idāni idha ñātimajjhe modamāno vicaritvā idāneva gantvā puna modanaṭṭhāneyeva nibbattoti. "Āma bhikkhave, appamattā hi gahaṭṭhā vā pabbajitā vā sabbattha modantiyevā"ti vatvā imaṁ gāthamāha—

16. "Idha modati pecca modati, Katapuñño ubhayattha modati. So modati so pamodati, Disvā kammavisuddhimattano"ti.

Tattha **katapuñño**ti nānappakārassa kusalassa kārako puggalo "akataṁ vata me pāpaṁ, kataṁ me kalyāṇan"ti idha kammamodanena, pecca vipākamodanena modati. Evaṁ **ubhayattha modati** nāma.

Kammavisuddhinti Dhammika-upāsakopi attano kammavisuddhim puññakammasampattim disvā kālakiriyato pubbe idhalokepi modati, kālam katvā idāni paralokepi atimodatiyevāti.

Gāthāpariyosāne bahū sotāpannādayo ahesum. Mahājanassa sātthikā dhammadesanā jātāti.

# Dhammika-upāsakavatthu ekādasamam.

### 12. Devadattavatthu

Idha tappatīti imam dhammadesanam Satthā Jetavane viharanto Devadattam ārabbha kathesi.

Devadattassa vatthu pabbajitakālato patthāya yāva pathavippavesanā Devadattam ārabbha bhāsitāni sabbāni jātakāni vitthāretvā kathitam. Ayam panettha sankhepo—Satthari Anupiyam nāma Mallānam nigamo atthi, tam nissāya Anupiyambavane viharanteyeva Tathāgatassa lakkhanapatiggahanadivaseyeva asītisahassehi ñātikulehi "rājā vā hotu, Buddho vā, khattiyaparivārova vicarissatī'ti asītisahassaputtā patiññātā. Tesu yebhuyyena pabbajitesu Bhaddiyam nāma rājānam Anuruddham Ānandam Bhagum Kimilam<sup>1</sup> Devadattanti ime cha Sakye apabbajante disvā "mayam attano putte pabbājema, ime cha Sakyā na ñātakā maññe, kasmā<sup>2</sup> na pabbajantī"ti katham samutthāpesum. Atha kho Mahānāmo Sakyo Anuruddham upasankamitvā "tāta amhākam kulā pabbajito natthi, tvam vā pabbaja<sup>3</sup>, aham vā pabbajissāmī"ti āha. So pana sukhumālo hoti sampannabhogo, "natthī" tivacanampi tena na sutapubbam. Ekadivasañhi tesu chasu khattiyesu gulakīlam kīlantesu Anuruddho pūvena parājito pūvatthāva pahini, athassa mātā pūve sajjetvā pahini. Te khāditvā puna kīlimsu. Punappunam tasseva parājayo hoti. Mātā panassa pahite pahite tikkhattum puve pahinitva catutthavare "puva natthi"ti pahini. So "natthi"ti vacanassa asutapubbattā "esāpekā pūvavikati bhavissatī"ti maññamāno "natthipūvam me āharathā"ti pesesi. Mātā panassa "natthipūvam kira ayye dethā''ti vutte "mama puttena 'natthī'ti padam na sutapubbam, iminā pana upāyena nam etamattham jānāpessāmī"ti tuccham suvannapātim aññāya suvannapātiyā patikujjitvā pesesi. Nagarapariggāhikā devatā cintesum "Anuruddhasakyena annabhārakāle attano bhāgabhattam Uparitthapaccekabuddhassa datvā 'natthīti me vacanassa savanam mā hotu, bhojanuppatti<sup>4</sup> tthānajānanam mā hotū"ti patthanā katā, sacāyam tucchapātim passissati, devasamāgamam pavisitum na labhissāma, sīsampi no sattadhā phaleyyā"ti.

<sup>1.</sup> Kimbilam (Sī, Syā)

<sup>2.</sup> Tasmā (Sī)

<sup>3.</sup> Pabbajissasi (Sī, Ka) Vi 4. 336 pitthe pana passitabbam. 4. Bhojanuppattiyā (Sī)

Atha nam pātim dibbapūvehi puṇṇam akamsu. Tassā guļamaṇḍale ṭhapetvā ugghāṭitamattāya pūvagandho sakalanagare chādetvā ṭhito. Pūvakhaṇḍam mukhe thapitamattameva sattarasaharanīsahassāni anuphari.

So cintesi "nāhaṁ mātu piyo, ettakaṁ me kālaṁ imaṁ natthipūvaṁ nāma na paci, ito paṭṭhāya aññaṁ pūvaṁ nāma na khādissāmī"ti, so gehaṁ gantvāva mātaraṁ pucchi "amma tumhākaṁ ahaṁ piyo, appiyo"ti. Tāta ekakkhino akkhi viya ca hadayaṁ viya ca ativiya piyo me ahosīti. Atha kasmā ettakaṁ kālaṁ mayhaṁ natthi pūvaṁ na pacittha ammāti. Sā cūṭūpaṭṭhākaṁ pucchi "atthi kiñci pātiyaṁ tātā"ti "paripuṇṇā ayye pāti pūvehi, evarūpā pūvā nāma me na diṭṭhapubbā"ti ārocesi. Sā cintesi "mayhaṁ putto puññavā katābhinīhāro bhavissati, devatāhi pātiṁ pūretvā pūvā pahitā bhavissantī"ti. Atha naṁ putto amma ito paṭṭhāyāhaṁ aññaṁ pūvaṁ nāma na khādissāmi, natthipūvameva paceyyāsīti. Sāpissa tato paṭṭhāya "pūvaṁ khāditukāmomhī"ti vutte tucchapātimeva aññāya pātiyā paṭikujjitvā pesesi. Yāva agāramajjhe vasi, tāvassa devatāva pūve¹ pahiṇiṁsu.

So ettakampi ajānanto pabbajjam nāma kim jānissati. Tasmā "kā esā pabbajjā nāmā"ti bhātaram pucchitvā ohāritakesamassunā kāsāyanivatthena kaṭṭhattharake² vā bidalamañcake vā³ nipajjitvā viṇḍāya carantena viharitabbam. "Esā pabbajjā nāmā"ti vutte "bhātika aham sukhumālo. Nāham sakkhissāmi pabbajitun"ti āha. Tena hi tāta kammantam uggahetvā gharāvāsam vasa. Na hi sakkā amhesu ekena apabbajitunti. Atha nam "ko esa kammanto nāmā"ti pucchi. Bhattuṭṭhānaṭṭhānampi ajānanto kulaputto kammantam nāma kim jānissatīti. Ekadivasam hi tiṇṇam khattiyānam kathā udapādi "bhattam nāma kuhim uṭṭhahatī"ti. Kimilo āha "koṭṭhe uṭṭhahatī"ti. Atha nam Bhaddiyo "tvam bhattassa uṭṭhānaṭṭhānam na jānāsi, bhattam nāma ukkhaliyam uṭṭhahatī"ti āha. Anuruddho "tumhe dvepi na jānātha, bhattam nāma ratanamakuļāya suvaṇṇapātiyam uṭṭhahatī"ti āha.

Tesu kira ekadivasam Kimilo kotthato vīhī otāriyamāne disvā "ete kottheyeva jātā"ti saññī ahosi. Bhaddiyo ekadivasam ukkhalito bhattam vaddhiyamānam disvā "ukkhaliyaññeva uppannan"ti saññī ahosi. Anuruddhena pana neva vīhī kottentā, na bhattam pacantā, na vaddhentā ditthapubbā, vaddhetvā pana purato thapitameva passati. So bhuñjitukāmakāle "bhattam pātiyam utthahatī"ti saññamakāsi. Evam tayopi te bhattutthānatthānam na jānanti. Tenāyam "ko esa kammanto nāmā"ti pucchitvā "pathamam khettam kasāpetabban"ti ādikam samvacchare samvacchare kattabbam kiccam sutvā "kadā kammantānam anto paññāvissati, kadā mavam appossukkā bhoge bhuñiissāmā"ti vatvā kammantānam apariyantatāya akkhātāya<sup>1</sup> "tena hi tvaññeva gharāvāsam vasa, na mayham etenattho"ti mātaram upasankamitvā "anujānāhi mam amma, pabbajissāmī"ti vatvā tāya nānappakārehi tikkhattum patikkhipitvā "sace te sahāyako Bhaddiyarājā pabbajissati, tena saddhim pabbajāhī"ti vutte tam upasankamitvā "mama kho samma pabbajjā tava patibaddhā"ti vatvā tam nānappakārehi saññāpetvā sattame divase attanā saddhim pabbajanatthāya patiññam ganhi.

Tato Bhaddiyo Sakyarājā Anuruddho Ānando Bhagu Kimilo Devadattoti ime cha khattiyā Upālikappakasattamā devā viya dibbasampattim sattāham sampattim anubhavitvā uyyānam gacchantā viya caturanginiyā senāya nikkhamitvā paravisayam patvā rājānāya senam nivattāpetvā paravisayam okkamimsu. Tattha cha khattiyā attano attano ābharaṇāni omuncitvā bhaṇḍikam katvā "handa bhaṇe Upāli nivattassu, alam te ettakam jīvikāyā"ti tassa adamsu. So tesam pādamūle parivattitvā paridevitvā tesam āṇam atikkamitum asakkonto uṭṭhāya tam gahetvā nivatti. Tesam dvidhā jātakāle² vanam ārodanappattam viya pathavīkampamānākārappattā viya ahosi. Upāli kappakopi thokam gantvā nivattitvā "caṇḍā kho Sākiyā, 'iminā kumārā nippātitā'ti ghāteyyumpi mam. Ime hi nāma Sakyakumārā evarūpam sampattim pahāya imāni anagghāni ābharaṇāni khelapiṇḍam viya chaḍḍetvā pabbajissanti,

kimaṅgaṁ panāhan"ti bhaṇḍitaṁ omuñcitvā tāni ābharaṇāni rukkhe laggetvā "atthikā gaṇhantū"ti vatvā tesaṁ santikaṁ gantvā tehi "kasmā nivattosī"ti puṭṭho tamatthaṁ ārocesi. Atha naṁ te ādāya Satthu santikaṁ gantvā "mayaṁ bhante Sākiyā nāma mānanissitā, ayaṁ amhākaṁ dīgharattaṁ paricārako, imaṁ paṭhamataraṁ pabbājetha, mayamassa abhivādanādīni karissāma, evaṁ no māno nimmānāyissatī"ti vatvā taṁ paṭhamataraṁ pabbājetvā pacchā sayaṁ pabbajiṁsu. Tesu āyasmā Bhaddiyo teneva antaravassena tevijjo ahosi. Āyasmā Anuruddho dibbacakkhuko hutvā pacchā Mahāvitakkasuttaṁ¹ sutvā arahattaṁ pāpuṇi. Āyasmā Ānando sotāpattiphale patiṭṭhahi. Bhagutthero ca Kimilatthero ca aparabhāge vipassanaṁ vaḍḍhetvā arahattaṁ pāpuṇiṁsu. Devadatto pothujjanikaṁ iddhiṁ patto.

Aparabhāge Satthari Kosambiyam viharante sasāvakasamghassa Tathāgatassa mahanto lābhasakkāro nibbatti. Vatthabhesajjādihatthā manussā vihāram pavisitvā "kuhim Satthā, kuhim Sāriputtatthero, kuhim Mahāmoggallānatthero, kuhim Mahākassapatthero, kuhim Bhaddiyatthero, kuhim Anuruddhatthero, kuhim Ānandatthero kuhim Bhagutthero, kuhim Kimilatthero"ti asītimahāsāvakānam nisinnatthānam olokentā vicaranti. "Devadattattero kuhim nisinno vā, thito vā"ti pucchanto nāma natthi. So cintesi "ahampi etehi saddhiññeva pabbajito, etepi khattiyapabbajita, ahampi khattiyapabbajito, labhasakkarahattha manussa eteyeva pariyesanti, mama nāmam gahetāpi natthi. Kena nu kho saddhim ekato hutvā kam pasādetvā mama lābhasakkāram nibbatteyyan"ti. Athassa etadahosi "ayam kho rājā Bimbisāro pathamadassaneneva ekādasahi nahutehi saddhim sotāpattiphale patitthito, na sakkā etena saddhim ekato bhavitum, Kosalaraññāpi saddhim na sakkā bhavitum. Ayam kho pana rañño putto Ajātasattu kumāro kassaci gunadose na jānāti, etena saddhim ekato bhavissāmī"ti. So Kosambito Rājagaham gantvā kumārakavannam abhinimminitvā cattāro āsīvise catūsu hatthapādesu ekam gīvāya

\_\_\_\_\_

pilandhitvā ekam sīse cumbaṭakam¹ katvā ekam ekamsam karitvā imāya ahimekhalāya ākāsato oruyha Ajātasattussa ucchange nisīditvā tena bhītena "kosi tvan"ti vutte "aham Devadatto"ti vatvā tassa bhayavinodanattham tam attabhāvam paṭisamharitvā² samghāṭipattacīvaradharo purato ṭhatvā tam pasādetvā lābhasakkāram nibbattesi. So lābhasakkārābhibhūto "aham bhikkhusamgham pariharissāmī"ti pāpakam cittam uppādetvā saha cittuppādena iddhito parihāritvā Satthāram Veļuvanavihāre sarājikāya parisāya dhammam desentam vanditvā uṭṭhāyāsanā añjalim paggayha "Bhagavā bhante etarahi jiṇṇo vuḍḍho mahallako, appossukko diṭṭhadhammasukhavihāram anuyuñjatu, aham bhikkhusamgham pariharissāmi, niyyādetha me bhikkhusamghan"ti vatvā Satthārā kheļāsakavādena apasādetvā paṭikkhitto anattamano imam paṭhamam Tathāgate āghātam bandhitvā pakkāmi.

Athassa Bhagavā Rājagahe pakāsanīyakammam kāresi. So "pariccatto dāni aham samaņena Gotamena, idānissa anattham karissāmī"ti Ajātasatthum upasankamitvā "pubbe kho kumāra manussā dīghāyukā, etarahi appāyukā. Thānam kho panetam vijjati, yam tvam kumārova samāno kālam kareyyāsi, tena hi tvam kumāra pitaram hantvā rājā hohi, aham Bhagavantam hantvā Buddho bhavissāmī'ti vatvā tasmim rajje patitthite Tathāgatassa<sup>3</sup> vadhāya purise payojetvā tesu sotāpattiphalam patvā nivattesu sayam Gijjhakūtapabbatam abhiruhitvā "ahameva samanam Gotamam jīvitā voropessāmī"ti silam pavijihitvā ruhiruppādakakammam katvā imināpi upāyena māretum asakkonto puna Nālāgirim vissajjāpesi. Tasmim āgacchante Ānandatthero attano jīvitam Satthu pariccajitvā purato atthāsi. Satthā nāgam dametvā nagarā nikkhamitvā vihāram gantvā anekasahassehi upāsakehi abhihatam mahādānam paribhuñjitvā tasmim divase sannipatitānam atthārasakotisankhātānam Rājagahavāsīnam anupubbim katham kathekvā caturāsītiyā pānasahassānam dhammābhisamaye jāte "aho āyasmā Ānando mahāguņo, tathārūpe nāma hatthināge āgacchante attano jīvitam

<sup>1.</sup> Cumbutakam (ka)

pariccajitvā Satthu puratova aṭṭhāsī"ti therassa guṇakathaṁ sutvā "na bhikkhave idāneva, pubbepesa mamatthāya jīvitaṁ pariccajiyevā"ti vatvā bhikkhūhi yācito Cūļahaṁsa¹mahāhaṁsa²kakkaṭakajātakāni³ kathesi. Devadattassāpi kammaṁ neva pākaṭaṁ, tathā rañño mārāpitattā, na vadhakānaṁ payojitattā, na silāya paviddhattā⁴ pākaṭaṁ ahosi, yathā Nāļāgirihatthino vissajjitattā. Tadā hi mahājano "rājāpi Devadatteneva mārāpito, vadhakopi payojito, silāpi apaviddhā. Idāni pana tena Nāļāgiri vissajjāpito, evarūpaṁ nāma pāpakaṁ gahetvā rājā vicaratī"ti kolāhalamakāsi.

Rājā mahājanassa katham sutvā panca thālipākasatāni nīharāpetvā na puna tassūpatthānam agamāsi, nāgarāpissa kulam upagatassa bhikkhāmattampi na adamsu. So parihīnalābhasakkāro kohaññena jīvitukāmo Satthāram upasankamitvā panca vatthūni yācitvā Bhagavatā "alam Devadatta, yo icchati, so āraññako hotu"ti patikkhitto kassāvuso vacanam sobhanam, kim Tathagatassa udahu mama, ahanhi ukkatthavasena evam vadāmi "sādhu bhante bhikkhū yāvajīvam ārañnakā assu, piņdapātikā, pamsukūlikā, rukkhamūlikā, macchamamsam na khādeyyun"ti. "Yo dukkhā muccitukāmo, so mayā saddhim āgacchatū"ti vatvā pakkāmi. Tassa vacanam sutvā ekacce navakapabbajitā mandabuddhino "kalyānam Devadatto āha, etena saddhim vicarissāmā"ti tena saddhim ekato ahesum. Iti so pañcasatehi bhikkhūhi saddhim tehi pañcahi vatthūhi lūkhappasannam janam saññapento kulesu viññapetva viññapetva bhuñjanto samghabhedaya parakkami. So Bhagavatā "saccam kira tvam Devadatta samghabhedāva parakkamasi cakkabhedāyā"ti puttho "saccam Bhagavā"ti vatvā "garuko kho Devadatta samghabhedo"ti-ādīhi ovaditopi Satthu vacanam anādivitvā pakkanto āyasmantam Ānandam Rājagahe pindāya carantam disvā "ajjatagge dānāham āvuso Ānanda añnatreva Bhagavatā, añnatra bhikkhusamghā uposatham karissāmi, samghakammam karissāmī"ti āha. Thero tamattham Bhagavato arocesi. Tam viditva Sattha uppannadhammasamvego hutvā

<sup>1.</sup> Khu 5. 326; Khu 6. 83 pitthesu.

<sup>3.</sup> Khu 5. 78 pitthe.

<sup>2.</sup> Khu 6. 90 pitthe.

<sup>4.</sup> Pavijjhitattā (Ka)

"Devadatto sadevakassa lokassa anatthanissitam attano Avīcimhi paccanakakammam karotī"ti vitakketvā—

"Sukarāni asādhūni, attano ahitāni ca.
Yam ve hitañca sādhuñca, tam ve paramadukkaran"ti<sup>1</sup>—
Imam gātham vatvā puna imam udānam udāneti—

"Sukaram sādhunā sādhu, sādhu pāpena dukkaram, Pāpam pāpena sukaram, pāpamariyehi dukkaran"ti<sup>2</sup>.

Atha kho Devadatto uposathadivase attano parisāya saddhim ekamantam nisīditvā "yassimāni pañca vatthūni khamanti, so salākam ganhatū"ti vatvā pañcasatehi vajjiputtakehi navakehi appakataññūhi salākāya gahitāya samgham bhinditvā te bhikkhū ādāya Gayāsīsam agamāsi. Tassa tattha gatabhāvam sutvā Satthā tesam bhikkhūnam ānayanatthāya dve aggasāvake pesesi. Te tattha gantvā ādesanāpātihāriyānusāsaniyā ceva iddhipātihāriyānusāsaniyā ca anusāsantā te amatam pāyetvā ādāya ākāsena āgamimsu. Kokālikopi kho "utthehi āvuso Devadatta, nītā te bhikkhū Sāriputtamoggallānehi, nanu tvam mayā vutto 'mā āvuso Sāriputtamoggallāne vissāsī'ti. Pāpicchā Sāriputtamoggallānā, pāpikānam icchānam vasam gatā"ti vatvā jannukena hadayamajjhe pahari, tassa tattheva unham lohitam mukhato ugganchi. Ayasmantam pana Sariputtam bhikkhusamghaparivutam ākāsena āgacchantam disvā bhikkhū āhamsu "bhante āyasmā Sāriputto gamanakāle attadutiyo gato, idāni mahāparivāro āgacchanto sobhatī"ti. Satthā "na bhikkhave idāneva Sāriputto sobhati, pubbe tiracchānayoniyam nibbattakālepi mayham putto mama santikam āgacchanto sobhiyevā"ti vatvā—

> "Hoti sīlavatam attho, paṭisanthāravuttinam. Lakkhaṇam passa āyantam, ñātisamghapurakkhatam. Atha passasi'mam kālam, suvihīnamva ñātibhī"ti<sup>3</sup>—

idam jātakam kathesi. Puna bhikkhūhi "bhante Devadatto kira dve aggasāvake ubhosu passesu nisīdāpetvā 'Buddhalīļāya dhammam desessāmī'ti tumhākam anukiriyam karotī''ti vutte "na bhikkhave idāneva, pubbepesa mama anukiriyam kātum vāyami, na pana sakkhī''ti vatvā—

"Api vīraka passesi, sakuņam mañjubhāṇakam. Mayūragīvasankāsam, patim mayham savitthakam.

Udakathalacarassa pakkhino, Niccam āmakamacchabhojino. Tassānukaram saviṭṭhako, Sevāle paligunthito mato"ti<sup>1</sup>—

ādinā jātakam vatvā aparāparesupi divasesu tathānurūpameva katham ārabbha—

"Acāri vatāyam vitudam vanāni, Kaṭṭhaṅgarukkhesu asārakesu. Athā'sadā khadiram jātasāram, Yattha'bbhidā garulo uttamaṅgan''ti<sup>2</sup>.

"Lasī ca te nipphalitā, matthako ca padālito. Sabbā te phāsukā bhaggā, ajja kho tvam virocasī"ti<sup>3</sup>—

evamādīni jātakāni kathesi. Puna "akataññū Devadatto"ti katham ārabbha—

"Akaramhasa te kiccam, yam balam ahuvamhase.

Migarāja namo tyatthu, api kiñci labhāmase.

Mama lohitabhakkhassa, niccam luddāni kubbato.

Dantantaragato santo, tam bahum yampi jīvasī"ti4—

ādīni jātakāni kathesi. Puna vadhāya parisakkanamassa ārabbha—

"Ñatametam kurungassa, yam tvam sepanni siyyasi. Añnam sepanni gacchāmi, na me te ruccate phalan"ti<sup>5</sup>—

<sup>1.</sup> Khu 5. 54 pitthe.

<sup>2.</sup> Khu 5. 56 pitthe.

<sup>3.</sup> Khu 5. 33 pitthe.

<sup>4.</sup> Khu 5. 97 pitthe.

<sup>5.</sup> Khu 5. 6 pitthe.

ādīni jātakāni kathesi. Punadivase<sup>1</sup> "ubhato parihīno Devadatto lābhasakkārato ca sāmaññato cā"ti kathāsu pavattamānāsu "na bhikkhave idāneva Devadatto parihīno, pubbepesa parihīnoyevā"ti vatvā—

"Akkhī bhinnā paṭo naṭṭho, sakhigehe ca bhaṇḍanaṁ. Ubhato paduṭṭhā kammantā, udakamhi thalamhi cā"ti²—

ādīni jātakāni kathesi. Evam Rājagahe viharantova Devadattam ārabbha bahūni jātakāni kathetvā Rājagahato Sāvatthim gantvā Jetavane vihāre vāsam kappesi. Devadattopi kho nava māse gilāno pacchime kāle Satthāram daṭṭhukāmo hutvā attano sāvake āha "aham Satthāram daṭṭhukāmo, tam me dassethā"ti. "Tvam samatthakāle Satthārā saddhim verī hutvā acari, na mayam tattha nessāmā"ti vutte "mā mam nāsetha, mayā Satthari āghāto kato, Satthu pana mayi kesaggamattopi āghāto natthi. So hi Bhagavā—

Vadhake Devadattamhi, core Aṅgulimālake. Dhanapāle Rāhule ca, sabbattha samamānasoti<sup>3</sup>—

dassetha me Bhagavantan"ti punappunam yāci. Atha nam te mañcakenādāya nikkhamimsu. Tassa āgamanam sutvā bhikkhū Satthu ārocesum "bhante Devadatto kira tumhākam dassanatthāya āgacchatī"ti. Na bhikkhave so tenattabhāvena mam passitum labhissatīti. <sup>4</sup>Devadatto kira pañcannam vatthūnam āyācitakālato paṭṭhāya puna Buddham daṭṭhum na labhati<sup>4</sup>, ayam dhammatā. Asukaṭṭhānañca asukaṭṭhānañca āgato bhanteti. Yam icchati, tam karotu, na so mam passitum labhissatīti. Bhante ito yojanamattam āgato, aḍḍhayojanam, gāvutam, Jetavanapokkharaṇīsamīpam āgato bhanteti. Sacepi Antojetavanam pavisati, neva mam passitum labhissatīti. Devadattam gahetvā āgatā Jetavanapokkharaṇītīre mañcam otāretvā pokkharaṇim<sup>5</sup> nhāyitum otarimsu. Devadattopi kho mañcato vuṭṭhāya ubho pāde bhūmiyam ṭhapetvā nisīdi. Pādā pathavim

<sup>1.</sup> Puna (Sī, Syā) 2. Khu 3

<sup>2.</sup> Khu 5. 32 pitthe.

<sup>3.</sup> Khu 3. 51; Khu 11. 396 piṭṭhesu.

<sup>4-4.</sup> Bhikkhū kira ... na labhanti (Sī, Syā)

<sup>5.</sup> Pokkharaniyam (Syā)

pavisimsu. So anukkamena yāva gopphakā, yāva jaṇṇukā, yāva kaṭito, yāva thanato, yāva gīvato pavisitvā hanukaṭṭhikassa bhūmiyam paviṭṭhakāle—

"Imehi aṭṭhīhi¹ tamaggapuggalam, Devātidevam naradammasārathim. Samantacakkhum satapuññalakkhaṇam, Pāṇehi Buddham saraṇam upemī"ti²—

imam gāthamāha. Idam kira ṭhānam disvā Tathāgato Devadattam pabbājesi. Sace hi na so pabbajissa, gihī hutvā kammañca bhāriyam akarissa, āyatim bhavanissaraṇapaccayam³ kātum na sakkhissa, pabbajitvā ca pana kiñcāpi kammam bhāriyam karissati, āyatim bhavanissaraṇapaccayam kātum sakkhissatīti tam Satthā pabbājesi. So hi ito satasahassakappamatthake Aṭṭhissaro nāma Paccekabuddho bhavissati, so pathavim pavisitvā Avīcimhi nibbatti. Niccale Buddhe aparajjhabhāvena pana niccalova hutvā paccatūti⁴ yojanasatike Anto-avīcimhi yojanasatubbedhamevassa sarīram nibbatti. Sīsam yāva kaṇṇasakkhalito upari ayakapallam⁵ pāvisi, pādā yāva gopphakā heṭṭhā ayapathaviyam paviṭṭhā, mahātālakkhandhaparimāṇam ayasūlam pacchimabhittito nikkhamitvā piṭṭhimajjham bhinditvā urena nikkhamitvā purimabhittim pāvisi, aparam dakkhiṇabhittito nikkhamitvā dakkhiṇapassam bhinditvā vāmapassena nikkhamitvā uttarabhittim pāvisi, aparam upari kapallato nikkhamitvā matthakam bhinditvā adhobhāgena nikkhamitvā ayapathavim pāvisi. Evam so tattha niccalova pacci.

Bhikkhū "ettakam ṭhānam Devadatto āgacchanto Satthāram daṭṭhum alabhitvāva pathavim paviṭṭho"ti katham samuṭṭhāpesum. Satthā "na bhikkhave Devadatto idāneva mayi aparajjhitvā pathavim pāvisi, pubbepi paviṭṭhoyevā"ti vatvā hatthirājakāle maggamūṭham purisam samassāsetvā attano piṭṭhim āropetvā khemantam pāpitassa<sup>6</sup> puna tikkhattum āgantvā aggaṭṭhāne

<sup>1.</sup> Atthehi (Sī)

<sup>2.</sup> Khu 11. 116 pitthe.

<sup>3.</sup> Āyatibhavassa ca paccayam (Sī), āyatim bhavassa paccayam (Syā)

<sup>4.</sup> Paccati (Syā)

<sup>5.</sup> Ayakapālam (Sī)

<sup>6.</sup> Pāpitena tena (Sī)

majjhimaṭṭhāne mūleti evam dante chinditvā tatiyavāre mahāpurisassa cakkhupatham atikkamantassa tassa pathavim paviṭṭhabhāvam dīpetum—

"Akataññussa posassa, niccam vivaradassino. Sabbam ce pathavim dajjā, neva nam abhirādhaye"ti<sup>1</sup>—

Idam jātakam kathetvā punapi tatheva kathāya samuṭṭhitāya khantivādibhūte attani aparajjhitvā Kalāburājabhūtassa tassa pathavim paviṭṭhabhāvam dīpetum **Khantivādijātakañca**<sup>2</sup>, Cūļadhammapālabhūte attani aparajjhitvā Mahāpatāparājabhūtassa tassa pathavim paviṭṭhabhāvam dīpetum **Cūļadhammapālajātakañca**<sup>3</sup> kathesi.

Pathavim pavitihe pana Devadatte mahājano hatihatutiho dhajapaṭākakadaliyo ussāpetvā puṇṇaghaṭe ṭhapetvā "lābhā vata no"ti mahantam chaṇam anubhoti. Tamattham Bhagavato ārocesum. Bhagavā "na bhikkhave idāneva Devadatte mate mahājano tussati, pubbepi tussiyevā"ti vatvā sabbajanassa appiye caṇḍe pharuse Bārāṇasiyam Piṅgalaraññe nāma mate mahājanassa tutthabhāvam dīpetum—

"Sabbo jano himsito Pingalena, Tasmim mate paccayā vedayanti. Piyo nu te āsi akanhanetto, Kasmā tuvam rodasi dvārapāla.

Na me piyo āsi akaṇhanetto, Bhāyāmi paccāgamanāya tassa. Ito gato hiṁseyya maccurājaṁ, So hiṁsito āneyya puna idhā"ti<sup>4</sup>—

Idam **Pingalajātakam** kathesi. Bhikkhū Satthāram pucchimsu "idāni bhante Devadatto kuhim nibbatto"ti. Avīcimahāniraye bhikkhaveti. Bhante idha tappanto vicaritvā puna gantvā tappanaṭṭhāneyeva nibbattoti. "Āma bhikkhave, pabbajitā vā hontu gahaṭṭhā vā, pamādavihārino ubhayattha tappantiyevā"ti vatvā imam gāthamāha—

<sup>1.</sup> Khu 5. 17, 199 pitthe.

<sup>3.</sup> Khu 5. 125 pitthe.

<sup>2.</sup> Khu 5. 99 pitthe.

<sup>4.</sup> Khu 5. 66 pitthe.

17. "Idha tappati pecca tappati, pāpakārī ubhayattha tappati. Pāpam me katanti tappati, bhiyyo tappati duggatim gato"ti.

Tattha idha tappatīti idha kammatappanena domanassamattena tappati. Peccāti paraloke pana vipākatappanena atidāruņena apāyadukkhena tappati. Pāpakārīti nānappakārassa pāpassa kattā. Ubhayatthāti iminā vuttappakārena tappanena ubhayattha tappati nāma. Pāpaṁ meti so hi kammatappanena tappanto "pāpaṁ me katan"ti tappati. Taṁ appamattakaṁ tappanaṁ, vipākatappanena pana tappanto bhiyyo tappati duggatiṁ gato atipharusena tappanena ativiya tappatīti.

Gāthāpariyosāne bahū sotāpannādayo ahesum. Desanā mahājanassa sātthikā jātāti.

Devadattavatthu dvādasamam.

### 13. Sumanādevīvatthu

Idha nandatīti imam dhammadesanam Satthā Jetavane viharanto Sumanadevim ārabbha kathesi.

Sāvatthiyam hi devasikam Anāthapiṇḍikassa gehe dve bhikkhusahassāni bhuñjanti, tathā Visākhāya mahā-upāsikāya. Sāvatthiyam yo yo dānam dātukāmo hoti, so so tesam ubhinnam okāsam labhitvāva karoti. Kim kāraṇā? "Tumhākam dānaggam Anāthapiṇḍiko vā Visākhā vā āgatā"ti pucchitvā "nāgatā"ti vutte satasahassam vissajjetvā katadānampi "kim dānam nāmetan"ti garahanti. Ubhopi hi te bhikkhusamghassa rucinca anucchavikakiccāni ca ativiya jānanti, tesu vicārentesu¹ bhikkhū cittarūpam bhuñjanti. Tasmā sabbe dānam dātukāmā te gahetvāva gacchanti. Iti te attano attano ghare bhikkhū parivisitum na labhanti. Tato Visākhā "ko nu kho mama ṭhāne ṭhatvā bhikkhusamgham parivisissatī"ti upadhārentī puttassa dhītaram disvā tam attano ṭhāne ṭhapesi. Sā tassā nivesane bhikkhusamgham parivisati. Anāthapiṇḍikopi Mahāsubhaddam nāma jeṭṭhadhītaram ṭhapesi. Sā

\_\_\_\_\_

bhikkhūnam veyyāvaccam karontī dhammam sunantī sotāpannā hutvā patikulam agamāsi. Tato Cūlasubhaddam thapesi. Sāpi tatheva karontī sotāpannā hutvā patikulam gatā. Atha Sumanadevim nāma kanitthadhītaram thapesi. Sā pana dhammam sutvā sakadāgāmiphalam patvā kumārikāva hutvā tathārūpena aphāsukena āturā āhārupacchedam katvā pitaram datthukāmā hutvā pakkosāpesi. So ekasmim dānagge tassā sāsanam sutvāva āgantvā "kim amma Sumane"ti āha. Sāpi nam āha "kim tāta kanitthabhātikā"ti. Vilapasi<sup>1</sup> ammāti. Na vilapāmi kanitthabhātikāti. Bhāyasi ammāti. Na bhāyāmi kanitthabhātikāti. Ettakam vatvāyeva pana sā kālamakāsi. So sotāpannopi samāno setthidhītari uppannasokam adhivāsetum asakkonto dhītu sarīrakiccam kāretvā rodanto Satthu santikam gantvā "kim gahapati dukkhī dummano assumukho rodamāno āgatosī"ti vutte "dhītā me bhante Sumanadevī kālakatā" ti āha. Atha kasmā socasi, nanu sabbesam ekamsikam marananti. Jānāmetam bhante evarūpā nāma me hiri-ottappasampannā dhītā, sā maranakāle satim paccupatthāpetum asakkontī vilapamānā<sup>2</sup> matā, tena me anappakam domanassam uppajjatīti. Kim pana tāya kathitam mahāsetthīti. Aham tam bhante "amma Sumane"ti āmantesim. Atha mam āha "kim tāta kaniţthabhātikā"ti. Vilapasi ammāti. Na vilapāmi kanitthabhātikāti, bhāyasi ammāti. Na bhāyāmi kanitthabhātikāti. Ettakam vatvā kālamakāsīti. Atha nam Bhagavā āha "na te mahāsetthi dhitā vilapatī'ti. Atha kasmā bhante evamāhāti. Kanitthattāyeva. Dhītā hi te gahapati maggaphalehi tayā mahallikā. Tvañhi sotāpanno, dhītā pana te sakadāgāminī. Sā maggaphalehi tayā mahallikattā tam evamāhāti. Evam bhanteti. Evam gahapatīti. Idāni kuhim nibbattā bhanteti. Tusitabhavane gahapatīti. Bhante mama dhītā idha ñātakānam antare nandamānā vicaritvā ito gantvāpi nandanatthāneyeva nibbattāti atha nam Satthā "āma gahapati, appamattā nāma gahatthā vā pabbajitā vā idha loke ca paraloke ca nandantiyeva"ti vatva imam gathamaha18. "Idha nandati pecca nandati, katapuñño ubhayattha nandati. Puññaṁ me katanti nandati, bhiyyo nandati suggatiṁ gato"ti.

Tattha idhāti idha loke kammanandanena nandati. Peccāti paraloke vipākanandanena nandati. Katapuññoti nānappakārassa puññassa kattā. Ubhayatthāti idha "kataṁ me kusalaṁ, akataṁ me pāpan"ti nandati, parattha vipākaṁ anubhavanto nandati. Puññaṁ meti idha nandanto pana "puññaṁ me katan"ti somanassamatteneva kammanandanaṁ upādāya nandati. Bhiyyoti vipākanandanena pana sugatiṁ gato sattapaññāsavassakoṭiyo saṭṭhivassasatasahassāni dibbasampattiṁ anubhavanto Tusitapure ativiya nandatīti.

Gāthāpariyosāne bahū sotāpannādayo ahesum. Mahājanassa sātthikā dhammadesanā jātāti.

Sumanādevīvatthu terasamam.

## 14. Dvesahāyakabhikkhuvatthu

**Bahumpi ce**ti imam dhammadesanam Satthā Jetavane viharanto dve sahāyake ārabbha kathesi.

Sāvatthivāsino hi dve kulaputtā sahāyakā vihāram gantvā Satthu dhammadesanam sutvā kāme pahāya sāsane uram datvā pabbajitvā pañca vassāni ācariyupajjhāyānam santike vasitvā Satthāram upasankamitvā sāsane dhuram pucchitvā vipassanādhuranca ganthadhuranca vitthārato sutvā eko tāva "aham bhante mahallakakāle pabbajito na sakkhissāmi ganthadhuram pūretum, vipassanādhuram pana pūressāmī"ti yāva arahattā vipassanādhuram kathāpetvā ghaṭento vāyamanto saha paṭisambhidāhi arahattam pāpuṇi. Itaro pana "aham ganthadhuram pūressāmī"ti¹ anukkamena tepiṭakam Buddhavacanam uggaṇhitvā gatagataṭṭhāne dhammam katheti, sarabhaññam bhaṇati, pañcannam bhikkhusatānam dhammam vācento vicarati. Aṭṭhārasannam mahāgaṇānam ācariyo ahosi. Bhikkhū Satthu santike kammatthānam

gahetvā itarassa therassa vasanaṭṭhānaṁ gantvā tassa ovāde ṭhatvā arahattaṁ patvā theraṁ vanditvā "Satthāraṁ daṭṭhukāmamhā"ti vadanti. Thero "gacchatha āvuso, mama vacanena Satthāraṁ vanditvā asīti mahāthere vandatha, sahāyakattherampi me 'amhākaṁ ācariyo tumhe vandatī'ti vadathā"ti peseti. Te bhikkhū vihāraṁ gantvā Satthārañceva asīti mahāthere ca vanditvā Ganthikattherassa santikaṁ gantvā¹ "bhante amhākaṁ ācariyo tumhe vandatī"ti vadanti. Itarena ca "ko nāma so"ti vutte "tumhākaṁ sahāyakabhikkhu bhante"ti vadanti. Evaṁ there punappunaṁ sāsanaṁ pahiṇante so bhikkhu thokaṁ kālaṁ sahitvā aparabhāge sahituṁ asakkonto "amhākaṁ ācariyo tumhe vandatī"ti vutte "ko eso"ti vatvā "tumhākaṁ sahāyakabhikkhū"ti vutte "kiṁ pana tumhehi tassa santike uggahitaṁ, kiṁ Dīghanikāyādīsu aññataro nikāyo, kiṁ tīsu piṭakesu ekaṁ piṭakan"ti vatvā "catuppadikampi gāthaṁ na jānāti. Paṁsukūlaṁ gahetvā pabbajitakāleyeva araññaṁ paviṭṭho, bahū vata antevāsike labhi, tassa āgatakāle mayā pañhaṁ pucchituṁ vaṭṭatī"ti cintesi.

Atha aparabhāge thero Satthāram daṭṭhum āgato. Sahāyakassa therassa santike pattacīvaram ṭhapetvā gantvā Satthārañceva asīti mahāthere ca vanditvā sahāyakassa vasanaṭṭhānam paccāgami. Athassa so vattam kāretvā samappamāṇam āsanam gahetvā "pañham pucchissāmī"ti nisīdi. Tasmim khaṇe Satthā "esa evarūpam mama puttam vihaṭhetvā niraye nibbatteyyā"ti tasmim anukampāya vihāracārikam caranto viya tesam nisinnaṭṭhānam gantvā paññattavarabuddhāsane nisīdi. Tattha tattha nisīdantā hi bhikkhū Buddhāsanam paññāpetvāva nisīdanti. Tena Satthā pakatipaññatteyeva āsane nisīdi. Nisajja kho pana Ganthikabhikkhum paṭhamajjhāne pañham pucchitvā tasmim akathite² dutiyajjhānam ādim katvā aṭṭhasupi samāpattīsu rūpārūpesu ca pañham pucchi. (Ganthikatthero ekampi kathetum nāsakkhi)³. Itaro tam sabbam kathesi. Atha nam sotāpattimagge pañham pucchi. Ganthikatthero kathetum nāsakkhi. Tato khīṇāsavattheram pucchi. Thero kathesi. Satthā "sādhu sādhu bhikkhū"ti abhinanditvā sesamaggesupi

<sup>1.</sup> Vanditvā therañca vanditvā (Ka) 2. Kathite (Sī, Ka) 3. ( ) Sī-Ka-potthakesu natthi.

paṭipāṭiyā pañhaṁ pucchi. Ganthiko ekampi kathetuṁ nāsakkhi, khīṇāsavo pucchitaṁ pucchitaṁ kathesi. Satthā catūsupi ṭhānesu tassa sādhukāraṁ adāsi. Taṁ sutvā bhummadeve ādiṁ katvā yāva brahmalokā sabbā devatā ceva nāgasupaṇṇā ca sādhukāraṁ adaṁsu. Taṁ sādhukāraṁ sutvā tassa antevāsikā ceva saddhivihārino ca Satthāraṁ ujjhāyiṁsu "kiṁ nāmetaṁ Satthārā kataṁ, kiñci ajānantassa mahallakattherassa catūsu ṭhānesu sādhukāraṁ adāsi, amhākaṁ panācariyassa sabbapariyattidharassa pañcannaṁ bhikkhusatānaṁ pāmokkhassa pasaṁsāmattampi na karī"ti. Atha ne Satthā "kiṁ nāmetaṁ bhikkhave kathethā"ti pucchitvā tasmiṁ atthe ārocite "bhikkhave tumhākaṁ ācariyo mama sāsane bhatiyā gāvo rakkhaṇasadiso, mayhaṁ pana putto yathāruciyā pañca gorase paribhuñjanakasāmisadiso"ti vatvā imā gāthā abhāsi—

- "Bahumpi ce samhita bhāsamāno, Na takkaro hoti naro pamatto. Gopova gāvo gaṇayam paresam, Na bhāgavā sāmaññassa hoti.
- 20. Appampi ce samhita bhāsamāno, Dhammassa hoti anudhammacārī. Rāgañca dosañca pahāya moham, Sammappajāno suvimuttacitto. Anupādiyāno idha vā huram vā, Sa bhāgavā sāmaññassa hotī''ti.

Tattha **saṁhitan**ti tepiṭakassa Buddhavacanassetaṁ nāmaṁ. Taṁ ācariye upasaṅkamitvā uggaṇhitvā bahumpi paresaṁ **bhāsamāno** vācento taṁ dhammaṁ sutvā yaṁ kārakena puggalena kattabbaṁ, takkaro na hoti. Kukkuṭassa pakkhapaharaṇamattampi aniccādivasena yonisomanasikāraṁ nappavatteti. Eso yathā nāma divasaṁ bhatiyā gāvo rakkhanto gopo pātova niravasesaṁ sampaṭicchitvā sāyaṁ gahetvā¹ sāmikānaṁ niyyādetvā divasabhatimattaṁ gaṇhāti, yathāruciyā pana pañca gorase

paribhuñjitum na labhati, evameva kevalam antevāsikānam santikā vattapaṭivattakaraṇamattassa bhāgī hoti, sāmaññassa pana bhāgī na hoti. Yathā pana gopālakena niyyāditānam gunnam gorasam sāmikāva paribhuñjanti, tathā tena kathitam dhammam sutvā kārakapuggalā yathānusiṭṭham paṭipajjitvā keci paṭhamajjhānādīni pāpuṇanti, keci vipassanam vaḍḍhetvā maggaphalāni pāpuṇanti, goṇasāmikā gorasasseva sāmaññassa bhāgino honti.

Iti Satthā sīlasampannassa bahussutassa pamādavihārino aniccādivasena yonisomanasikāre pamattassa bhikkhuno vasena paṭhamaṁ gāthaṁ kathesi, na dussīlassa. Dutiyagāthā pana appassutassapi yonisomanasikāre kammaṁ karontassa kārakapuggalassa vasena kathitā.

Tattha appampi ceti thokam ekavaggadvivaggamattampi. Dhammassa

hoti anudhammacārīti atthamaññāya dhammamaññāya navalokuttaradhammassa anurūpaṁ dhammaṁ pubbabhāgapaṭipadāsaṅkhātaṁ catupārisuddhisīladhutaṅga-asubhakammaṭṭhānādibhedaṁ caranto¹ anudhammacārī hoti. So "ajja ajjevā"ti paṭivedhaṁ ākaṅkhanto vicarati. So imāya sammāpaṭipattiyā rāgañca dosañca pahāya mohaṁ sammā hetunā nayena parijānitabbe dhamme parijānanto tadaṅgavikhambhanasamucchedapaṭippassaddhinissaraṇavimuttīnaṁ vasena suvimuttacitto, anupādiyāno idha vā huraṁ vāti idhalokaparalokapariyāpannā vā ajjhattikabāhirā vā khandhā yatanadhātuyo catūhi upādānehi anupādiyanto mahākhīṇāsavo maggasaṅkhātassa sāmaññassa vasena āgatassa phalasāmaññassa ceva pañca-asekkhadhammakkhandhassa ca bhāgavā hotīti ratanakūtena viya agārassa

Gāthāpariyosāne bahū sotāpannādayo ahesum. Desanā mahājanassa sātthikā jātāti.

arahattena desanāya kūtam ganhīti.

Dvesahāyakabhikkhuvatthu cuddasamam.

## Yamakavaggavannanā niţţhitā.

Pathamo vaggo.

## 2. Appamādavagga

## 1. Sāmāvatīvatthu

Appamādo amatapadanti imam dhammadesanam Satthā Kosambim¹ upanissāya Ghositārāme viharanto Sāmāvatippamukhānam pañcannam itthisatānam, Māgaṇḍiyappamukhānañca etissā pañcannam ñātisatānam maranabyasanam ārabbha kathesi.

Tatrāyam anupubbikathā<sup>2</sup>—atīte Allakapparatthe Allakapparājā nāma, Vethadīpakaratthe Vethadīpakarājā nāmāti ime dve daharakālato patthāya sahāyakā hutvā ekācariyakule sippam ugganhitvā attano attano pitūnam accayena chattam ussāpetvā āyāmena dasadasayojanike ratthe rājāno ahesum. Te kālena kālam samāgantvā ekato titthantā nisīdantā nipajjantā mahājanam jāyamānanca jīyamānanca mīyamānanca disvā "paralokam gacchantam anugacchanto nāma natthi, antamaso attano sarīrampi nānugacchati, sabbam pahāya gantabbam, kim no gharāvāsena, pabbajissāmā"ti mantetvā rajjāni puttadārānam niyyādetvā isipabbajjam pabbajitvā Himavantappadese vasantā mantayimsu "mayam rajjam pahāya pabbajitā, na jīvitum asakkontā. Te mayam ekatthāne vasantā apabbajitasadisāyeva homa, tasmā visum vasissāma. Tvam etasmim pabbate vasa, aham imasmim pabbate vasissāmi. Anvaddhamāsam pana uposathadivase ekato bhavissāmā"ti. Atha kho nesam etadahosi "evampi no ganasanganikāva bhavissati tvam pana tava pabbate aggim jāleyyāsi, aham mama pabbate aggim jālessāmi, tāya saññāya atthibhāvam jānissāmā"ti. Te tathā karimsu.

Atha aparabhāge Veṭhadīpakatāpaso kālaṁ katvā mahesakkho devarājā hutvā nibbatto. Tato aḍḍhamāse sampatte aggiṁ adisvāva itaro "sahāyako me kālakato"ti aññāsi. Itaropi nibbattakkhaṇeyeva attano devasiriṁ oloketvā kammaṁ upadhārento nikkhamanato³ paṭṭhāya attano tapacariyaṁ disvā "gantvā mama sahāyakaṁ

passissāmī''ti tam attabhāvam vijahitvā maggikapuriso viya<sup>1</sup> tassa santikam gantvā vanditvā ekamantam atthāsi, atha nam so āha "kuto āgatosī"ti. Maggikapuriso aham bhante dūratova āgatomhi, kim pana bhante ayyo imasmim thāne ekakova vasati, añnopi koci atthīti. Atthi me eko sahāyakoti. Kuhim soti. Etasmim pabbate vasati, uposathadivase pana aggim na jāleti, mato nūna bhavissatīti. Evam bhanteti. Evamāvusoti. Aham so bhanteti. Kuhim nibbattosīti. Devaloke mahesakkho devarājā hutvā nibbattosmi bhante, "ayyam passissāmī"ti puna āgatomhi. Api nu kho ayyānam imasmim thāne vasantānam koci upaddavo atthīti. Āma āvuso, hatthī nissāya kilamāmīti. Kim vo bhante hatthī karontīti. Sammajjanatthāne landam pātenti, pādehi bhūmiyam paharitvā pamsum uddharanti, svāham landam chaddento pamsum samam karonto kilamāmīti. Kim pana tesam anāgamanam icchathāti. Āmāvusoti. "Tena hi tesam anāgamanam karissāmī"ti tāpasassa hatthikantavīņañceva hatthikantamantañca adāsi, dadanto ca pana vīnāya tisso tantiyo dassetvā tayo mante ugganhāpetvā "imam tantim paharityā imasmim mante vutte nivattityā oloketumpi asakkontā hatthī palāyanti, imam tantim paharitvā imasmim mante vutte nivattitvā pacchato olokentā olokentā asakkontā hatthī palāyanti, imam tantim paharitvā imasmim mante vutte nivattitvā pacchato olokentā olokentā palāyanti, imam tantim paharitvā imasmim mante vutte hatthiyūthapati pitthim upanāmento āgacchatī"ti ācikkhitvā "yam vo ruccati, tam kareyyāthā"ti vatvā tāpasam vanditvā pakkāmi. Tāpaso palāyanamantam vatvā palāyanatantim paharitvā hatthī palāpetvā vasi.

Tasmim samaye Kosambiyam Pūrantappo² nāma rājā hohi. So ekadivasam gabbhiniyā deviyā saddhim bālasūriyatapam³ tappamāno abbhokāsatale nisīdi. Devī rañño pārupanam satasahassagghanikam rattakambalam pārupitvā nisinnā raññā saddhim samullapamānā rañño angulito satasahassagghanikam rājamuddikam nīharitvā attano anguliyam pilandhi. Tasmim samaye hatthilingasakuno ākāsena gacchanto dūrato rattakambalapārupanam devim disvā "mamsapesī"ti saññāya pakkhe vissajjetvā otari.

Rājā tassa otaranasaddena bhīto utthāya antonivesanam pāvisi. Devī garugabbhatāya ceva bhīrukajātikatāya ca vegena gantum nāsakkhi. Atha nam so sakuno ajjhappatto nakhapañjare nisīdāpetvā ākāsam<sup>1</sup> pakkhandi. Te kira sakunā pañcannam hatthīnam balam dhārenti. Tasmā ākāsena netvā yathārucitatthāne nisīditvā mamsam khādanti. Sāpi tena nīyamānā maranabhayabhītā cintesi "sacāham viravissāmi, manussasaddo nāma tiracchānagatānam ubbejanīyo<sup>2</sup>, tam sutvā mam chaddessati. Evam sante saha gabbhena jīvitakkhayam pāpunissāmi, yasmim pana thāne nisīditvā mam khāditum ārabhissati tatra nam saddam katvā palāpessāmī"ti. Sā attano panditatāva adhivāsesi. Tadā ca Himavantapadese thokam vaddhitvā mandapākārena thito eko mahānigrodho hoti. So sakuno migarūpādīni tattha netvā khādati, tasmā tampi tattheva netvā vitapabbhantare thapetvā āgatamaggam olokesi. Āgatamaggolokanam kira tesam dhammatā. Tasmim khane devī "idāni imam palāpetum vattatī"ti cintetvā ubho hatthe ukkhipitvā pānisaddañceva mukhasaddañca katvā tam palāpesi. Athassā sūrivatthangamanakāle gabbhe kammajavātā calimsu. Sabbadisāsu gajjanto mahāmegho utthahi. Sukhedhitāya rājamahesiyā "mā bhāyi ayye"ti vacanamattampi alabhamānāya dukkhaparetāya sabbarattim niddā nāma nāhosi. Vibhātāya<sup>3</sup> pana rattiyā valāhakavigamo ca arunuggamanañca tassā gabbhavutthānañca ekakkhaneyeva ahosi. Sā megha-utuñca pabbata-utuñca aruna-utuñca gahetvā jātattā puttassa Utenoti<sup>4</sup> nāmam akāsi.

Allakappatāpasassapi kho tato avidūre vasanaṭṭhānaṁ hoti. So pakatiyāva vassadivase sītabhayena phalāphalatthāya vanaṁ na pavisati, taṁ rukkhamūlaṁ gantvā sakuṇehi khāditamaṁsānaṁ aṭṭhiṁ āharitvā koṭṭetvā rasaṁ katvā pivati. Tasmā taṁ divasaṁ "aṭṭhiṁ āharissāmī"ti tattha gantvā rukkhamūle aṭṭhiṁ pariyesento upari dārakasaddaṁ sutvā ullokento deviṁ disvā "kāsi tvan"ti vatvā mānusitthimhīti. Kathaṁ āgatāsīti.

<sup>&</sup>quot;Hatthilingasakunenānītāmhī"ti vutte "otarāhī"ti

<sup>1.</sup> Ākāsena (Ka)

<sup>2.</sup> Ubbegajaniyo (Ka)

<sup>3.</sup> Vibhātamānāya (Sī), vibhāyamānāya (Syā)

<sup>4.</sup> Udenoti (Sī)

āha. Jātisambhedato bhāyāmi ayyāti. Kāsi tvanti. Khattiyāmhīti. Ahampi khattiyoyevāti. Tena hi khattiyamāyam kathehīti. So khattiyamāyam kathesi. Tena hi āruyha puttam me otārehīti. So ekena passena abhiruhanamaggam katvā abhiruhitvā dārakam gaṇhi, "mā mam hatthena chupī"ti ca vutte tam achupitvāva dārakam otāresi. Devīpi otari. Atha nam assamapadam netvā sīlabhedam akatvāva anukampāya paṭijaggi, nimmakkhikamadhum āharitvā sayamjātasālim āharitvā yāgum pacitvā adāsi. Evam tasmim paṭijaggante sā aparabhāge cintesi "aham neva āgatamaggam jānāmi, na gamanamaggam jānāmi, imināpi me saddhim vissāsamattampi natthi. Sace panāyam amhe pahāya katthaci gamissati, ubhopi idheva maraṇam pāpuṇissāma, yamkiñci katvā imassa sīlam bhinditvā yathā mam na muñcati, tathā tam kātum vaṭṭatī"ti. Atha nam dunnivatthaduppārutadassanena palobhetvā sīlavināsam pāpesi. Tato paṭṭhāya dvepi samaggavāsam vasimsu.

Athekadivasam tāpaso nakkhattayogam ullokento Pūrantappassa nakkhattamilāyanam disvā "bhadde Kosambiyam Pūrantapparājā mato"ti āha. Kasmā ayya evam vadesi. Kim te tena saddhim āghāto atthīti. Natthi bhadde, nakkhattamilāyanamassa disvā evam vadāmīti. Sā parodi. Atha nam "kasmā rodasī"ti pucchitvā tāya tassa attano sāmikabhāve akkhāte āha "mā bhadde rodi, jātassa nāma niyato maccū"ti. "Jānāmi ayyā"ti vutte atha kasmā rodasīti. Putto me kulasantakassa rajjassa anucchaviko, "sace tatra abhavissa, setacchattam ussāpayissa. Idāni mahājāniko vata jāto"ti sokena rodāmi ayyāti. Hotu bhadde, mā cintayi, sacassa rajjam patthesi, ahamassa rajjalabhanākāram karissāmīti. Athassa hatthikantavīņañceva hatthikantamante ca adāsi. Tadā anekāni hatthisahassāni āgantvā vatarukkhamūle nisīdanti. Atha nam āha "hatthīsu anāgatesuyeva rukkham abhiruhitvā tesu āgatesu imam mantam vatvā imam tantim pahara, sabbe nivattitvā oloketumpi asakkontā palāyissanti, atha otaritvā āgaccheyyāsī"ti. So tathā katvā āgantvā tam pavattim ārocesi. Atha nam dutiyadivase āha "ajja imam mantam vatvā imam tantim

pahareyyāsi, sabbe nivattitvā olokentā palāyissantī"ti. Tadāpi tathā katvā āgantvā ārocesi. Atha naṁ tatiyadivase āha "ajja imaṁ mantaṁ vatvā imaṁ tantiṁ pahareyyāsi, yūthapati piṭṭhiṁ upanāmento āgamissatī"ti. Tadāpi tathā katvā ārocesi.

Athassa mātaram āmantetvā "bhadde puttassa te sāsanam vadehi, ettova gantvā rājā bhavissatī"ti āha. Sā puttam āmantetvā "tāta tvam Kosambiyam Pūrantapparañño putto, mam sagabbham hatthilingasakuno ānesī"ti vatvā senāpati-ādīnam nāmāni ācikkhitvā "asaddahantānam imam pitu pārupanakambalañceva pilandhanamuddikañca dasseyyāsī"ti vatvā uyyojesi. Kumāro tāpasam "idāni kim karomī"ti āha. Rukkhassa hetthimasākhāya nisīditvā imam mantam vatvā imam tantim pahara, jetthakahatthī te pitthim upanāmetvā upasankamissati, tassa pitthiyam nisinnova rattham gantvā rajjam ganhāhīti. So mātāpitaro vanditvā tathā katvā āgatassa hatthino pitthiyam nisīditvā kanne mantayi "aham Kosambiyam Pūrantapparañño putto, pettikam me rajjam ganhitvā dehi sāmī"ti. So tam sutvā "anekāni hatthisahassāni sannipatantū"ti hatthiravam ravi, anekāni hatthisahassāni sannipatimsu. Puna "jinnāhatthī paţikkamantū"ti hatthiravam ravi, jinnā hatthī patikkamimsu. Puna "atitarunā hatthī nivattantū"ti hatthiravam ravi, tepi nivattimsu. So anekehi yūthahatthisahasseheva parivuto paccantagāmam patvā "aham rañno putto, sampattim patthayamānā mayā saddhim āgacchantū"ti āha. Tato patthāya manussānam sangaham karonto gantvā nagaram parivāretvā "yuddham vā me detu, rajjam vā"ti sāsanam pesesi. Nāgarā āhamsu "mayam dvepi na dassāma. Amhākañhi devī garugabbhā hatthilingasakunena nītā, tassā atthibhāvam vā natthibhāvam vā mayam na jānāma. Yāva tassā pavattim na sunāma, tāva neva yuddham dassāma, na rajjan"ti. Tadā kira tam pavenirajjam ahosi. Tato kumāro "aham tassā putto"ti vatvā senāpati-ādīnam nāmāni kathetvā tathāpi asaddahantānam kambalañca muddikañca dassesi. Te kambalañca muddikañca sañjānitvā nikkankhā hutvā dvāram vivarikvā tam rajje abhisincimsu. Ayam tāva Utenassa uppatti.

Allakapparatthe<sup>1</sup> pana dubbhikkhe jīvitum asakkonto eko Kotuhaliko nāma manusso Kāpim nāma tarunaputtañca Kālim nāma bhariyañca ādāya "Kosambim gantvā jīvissāmī"ti pātheyyam gahetvā nikkhami. Ahivātarogena mahājane marante disvā nikkhamītipi vadantiyeva. Te gacchantāpātheyye parikkhīne khudābhibhūtā dārakam vahitum nāsakkhimsu. Atha sāmiko pajāpatim āha "bhadde mayam jīvantā puna puttam labhissāma, chaddetvā nam gacchāmā"ti. Mātu hadayam nāma mudukam hoti. Tasmā sā aha "nāham jīvantameva puttam chaddetum sakkhissāmī"ti. Atha kim karomāti. Vārena nam vahāmāti. Mātā attano vāre pupphadāmam viya nam ukkhipitvā ure nipajjāpetvā ankena vahitvā pituno deti. Tassa tam gahetvā gamanakāle chātakatopi balavatarā vedanā uppajji. So punappunam āha "bhadde mayam jīvantā puttam labhissāma. Chaddema nan"ti. Sāpi punappunam patikkhipitvā pativacanam nādāsi. Dārako vārena parivattiyamāno kilanto pitu hatthe niddāyi. So tassa niddāyanabhāvam ñatvā mātaram purato katvā ekassa gacchassa hetthā pannasanthare tam nipajjāpetvā pāyāsi. Mātā nivattitvā olokentī puttam adisvā "sāmi kuhim me putto"ti pucchi. Ekassa me gacchassa hettha nipajjapitoti. "Sami ma mam nāsayi, puttam vinā jīvitum na sakkhissāmi, ānehi me puttan"ti uram paharitvā paridevi. Atha nam nivattitvā ānesi. Puttopi antarāmagge mato hoti. iti so ettake thane puttam chaddetva tassa nissandena bhavantare satta vāre chaddito. "Pāpakammam nāmetam appakan"ti na avamaññitabbam.

Te gacchantā ekam gopālakulam pāpuņimsu. Tam divasanca gopālakassa dhenumangalam hoti. Gopālakassa gehe nibaddham eko Paccekabuddho bhunjati. So tam bhojetvā mangalamakāsi. Bahu pāyāso paṭiyatto hoti. Gopālako te āgate disvā "kuto āgatattā"ti pucchitvā sabbam pavattim sutvā mudujātiko kulaputto tesu anukampam katvā bahukena sappinā pāyāsam dāpesi. Bhariyā "sāmi tayi jīvante ahampi jīvāmi nāma, dīgharattam ūnodarosi yāvadattham bhunjāhī"ti sappinca dadhinca tadabhimukhanneva katvā attanā

mandasappinā thokameva bhuñji. Itaro bahum bhuñjitvā sattaṭṭhadivase chātatāya āhārataṇham chinditum nāsakkhi. Gopālako tesam pāyāsam dāpetvā sayam bhuñjitum ārabhi. Kotuhaliko tam olokento nisīditvā heṭṭhāpīṭhe nipannāya sunakhiyā gopālakena vaḍḍhetvā diyyamānam pāyāsapiṇḍam disvā "puññā vatāyam sunakhī, nibaddham evarūpam bhojanam labhatī"ti cintesi. So rattibhāge tam pāyāsam jīrāpetum asakkonto kālam katvā tassā sunakhiyā kucchimhi nibbatti.

Athassa bhariyā sarīrakiccam katvā tasmim yeva gehe bhatim katvā taṇḍulanāļim labhitvā pacitvā Paccekabuddhassa patte patiṭṭhāpetvā "dāsassa vo pāpuṇātū"ti vatvā cintesi "mayā idheva vasitum vaṭṭati, nibaddham ayyo idhāgacchati, deyyadhammo hotu vā, mā vā, devasikam vandantī veyyāvaccam karontī cittam pasādentī bahum puññam pasavissāmī"ti. Sā tattheva bhatim karontī vasi. Sāpi sunakhī chaṭṭhe vā sattame vā māse ekameva kukkuram vijāyi. Gopālako tassa ekadhenuyā khīram dāpesi. So na cirasseva vaḍḍhi. Athassa Paccekabuddho bhuñjanto nibaddham ekam bhattapiṇḍam deti. So bhattapiṇḍam nissāya Paccekabuddhe sinehamakāsi. Gopālakopi nibaddham dve vāre Paccekabuddhassupaṭṭhānam yāti. Gacchantopi antarāmagge vāļamigaṭṭhāne daṇḍena gacche ca bhūmim ca paharitvā "susū"ti tikkhattum saddam katvā vāļamige palāpeti. Sunakhopi tena saddhim gacchati.

So ekadivasam Paccekabuddham āha "bhante yadā me okāso na bhavissati, tadā imam sunakham pesessāmi, tena saññāṇena āgaccheyyāthā"ti. Tato paṭṭhāya anokāsadivase "gaccha tāta, ayyam ānehī"ti sunakham pesesi. So ekavacaneneva pakkhanditvā sāmikassa gacchapothanabhūmipothanaṭṭhāne tikkhattum bhussitvā tena saddena vāļamigānam palātabhāvam ñatvā pātova sarīrapaṭijagganam katvā paṇṇasālam pavisitvā nisinnassa Paccekabuddhassa vasanaṭṭhānam gantvā paṇṇasāladvāre tikkhattum bhussitvā attano āgatabhāvam jānāpetvā ekamante nipajjati, Paccekabuddhe velam sallakkhetvā nikkhante bhussanto purato gacchati. Antarantarā Paccekabuddho tam vīmamsanto aññam maggam paṭipajjati. Athassa

purato tiriyam ṭhatvā bhussitvā itaramaggameva nam āropeti. Athekadivasam aññam maggam paṭipajjitvā tena purato tiriyam ṭhatvā vāriyamānopi anivattitvā sunakham pādena paharitvā<sup>1</sup> pāyāsi. Sunakho tassa anivattanabhāvam ñatvā nivāsanakaṇṇe ḍamsitvā ākaḍḍhanto itaramaggameva nam āropesi. Evam so tasmim balavasineham uppādesi.

Tato aparabhāge Paccekabuddhassa cīvaram jīri. Athassa gopālako cīvaravatthāni adāsi. Tamenam Paccekabuddho āha "āvuso cīvaram nāma ekakena kātum dukkaram, phāsukaṭṭhānam gantvā kāressāmī"ti. Idheva bhante karothāti. Na sakkā āvusoti. Tena hi bhante mā ciram bahi vasitthāti. Sunakho tesam katham suṇantova aṭṭhāsi. Paccekabuddhopi "tiṭṭha upāsakā"ti gopālakam nivattāpetvā vehāsam abbhuggantvā Gandhamādanābhimukho pāyāsi. Sunakhassa tam ākāsena gacchantam disvā bhukkaritvā ṭhitassa tasmim cakkhupatham vijahante hadayam phalitvā mato. Tiracchānā kira nāmete ujujātikā honti akuṭilā. Manussā pana aññam hadayena cintenti, aññam mukhena kathenti. Tenevāha—gahanañhetam bhante yadidam manussā, uttānakañhetam bhante yadidam pasavoti².

Iti so tāya ujucittatāya akuṭilatāya kālaṁ katvā Tāvatiṁsabhavane nibbatto accharāsahassaparivuto mahāsampattiṁ anubhosi. Tassa kaṇṇamūle mantayantassa saddo soļasayojanaṭṭhānaṁ pharati, pakatikathāsaddo pana sakalaṁ dasayojanasahassaṁ devanagaraṁ chādeti. Tenevassa "Ghosakadevaputto"ti nāmaṁ ahosi. Kissa panesa nissandoti? Paccekabuddhe pemena bhukkaraṇassa nissando. So tattha na ciraṁ ṭhatvā cavi. Devalokato hi devaputtā āyukkhayena puññakkhayena āhārakkhayena kopenāti catūhi kāraṇehi cavanti.

Tattha yena bahum puññakammam katam hoti, so devaloke uppajjitvā yāvatāyukam ṭhatvā uparūpari nibbattati. Evam **āyukkhayena** cavati nāma. Yena parittam puññam katam hoti, tassa rājakoṭṭhāgāre pakkhittam ticatunāḷimattam³ dhaññam viya antarāva tam puññam khīyati, antarāva kālam

karoti. Evam **puññakkhayena** cavati nāma. Aparopi kāmaguņe paribhuñjamāno satisammosena āhāram aparibhuñjitvā kilantakāyo kālam karoti. Evam **āhārakkhayena** cavati nāma. Aparopi parassa sampattim asahanto kujjhitvā kālam karoti. Evam **kopena** cavati nāma.

Ayam pana kāmagune paribhuñjanto mutthassati hutvā āhārakkhayena cavi, cavitvā ca pana Kosambiyam nagarasobhiniyā kucchimhi patisandhim ganhi. Sāpi jātadivase "kim etan"ti dāsim pucchitvā "putto ayye"ti vutte "handa je imam dārakam kattarasuppe āropetvā sankārakūte chaddehī"ti chaddāpesi. Nagarasobhiniyo hi dhītaram patijagganti, na puttam. Dhītarā hi tāsam pavenī ghatīyati. Dārakam kākāpi sunakhāpi parivāretvā nisīdimsu. Paccekabuddhe sinehappabhavassa bhukkaranassa nissandena ekopi upagantum na visahi. Tasmim khane eko manusso bahi nikkhanto tam kākasunakhasannipātam disvā "kim nu kho etan"ti gantvā dārakam disvā puttasineham patilabhitvā "putto me laddho"ti geham nesi. Tadā Kosambakasetthi rājakulam gacchanto rājanivesanato āgacchantam purohitam disvā "kim ācariya, ajja te tithikarananakkhattayogo olokito"ti pucchi. Āma mahāsetthi, amhākam kim aññam kiccanti. Janapadassa kim bhavissatīti. Aññam natthi, imasmim pana nagare ajja jātadārako jetthakasetthi bhavissatīti. Tadā setthino bhariyā garugabbhā hoti. Tasmā so sīgham geham purisam pesesi "gaccha bhane, jānāhi nam vijātā vā, no vā"ti. "Na vijāyatī"ti sutvā rājānam disvāva vegena geham gantvā Kālim nāma dāsim pakkositvā sahassam datvā "gaccha je, imasmim nagare upadhāretvā sahassam datvā ajja jātadārakam ganhitvā ehī"ti. Sā upadhārentī tam geham gantvā dārakam disvā "ayam dārako kadā jāto"ti gahapatānim pucchitvā "ajja jāto"ti vutte "imam mayham dehī"ti ekakahāpanam ādim katvā mūlam vaddhentī sahassam datvā tam ānetvā setthino dassesi. Setthi "sace me dhītā vijāyissati, tāya nam saddhim nivesetvā setthithānassa sāmikam karissāmi. Sace me putto vijāyissati, māressāmi nan"ti cintetvā tam gehe kāresi.

Athassa bhariyā katipāhaccayena puttam vijāyi. Seṭṭhi "imasmim asati mama puttova seṭṭhiṭṭhānam labhissati, idāneva tam māretum vaṭṭatī"ti cintetvā Kāļim āmantetvā "gaccha je, vajato gunnam nikkhamanavelāya vajadvāramajjhe imam tiriyam nipajjāpehi, gāviyo nam madditvā māressanti, madditāmadditabhāvam panassa ñatvā ehī"ti āha. Sā gantvā gopālakena vajadvāre vivaṭamatteyeva tam tathā nipajjāpesi. Gogaṇajeṭṭhako usabho aññasmim kāle sabbapacchā nikkhamantopi tam divasam sabbapaṭhamam nikkhamitvā dārakam catunnam pādānam antare katvā aṭṭhāsi. Anekasatagāviyo usabhassa dve passāni ghamsantiyo nikkhamimsu. Gopālakopi "ayam usabho pubbe sabbapacchā nikkhamati, ajja pana sabbapaṭhamam nikkhamitvā vajadvāramajjhe niccalova ṭhito, kim nu kho etan"ti cintetvā gantvā tassa heṭṭhā nipannam dārakam disvā puttasineham paṭilabhitvā "putto me laddho"ti geham nesi.

Kāļī gantvā seṭṭhinā pucchitā tamatthaṁ ārocetvā "gaccha, naṁ puna sahassaṁ datvā ānehī"ti vuttā sahassaṁ datvā puna ānetvā adāsi. Atha naṁ āha "amma Kāļi imasmiṁ nagare pañcasakaṭasatāni paccūsakāle uṭṭhāya vāṇijjāya gacchanti, tvaṁ imaṁ netvā cakkamagge nipajjāpehi, goṇā vā naṁ maddissanti, cakkā vā chindissanti, pavattiṁ cassa ñatvāva āgaccheyyāsī"ti. Sā taṁ netvā cakkamagge nipajjāpesi. Tadā sākaṭikajeṭṭhako purato ahosi. Athassa goṇā taṁ ṭhānaṁ patvā dhuraṁ chaḍḍesuṁ, punappunaṁ āropetvā pājiyamānāpi purato na gacchiṁsu. Evaṁ tassa tehi saddhiṁ vāyamantasse va aruṇaṁ uṭṭhahi. So "kiṁ nāmetaṁ goṇā kariṁsū"ti maggaṁ olokento dārakaṁ disvā "bhāriyaṁ vata me kamman"ti cintetvā "putto me laddho"ti tuṭṭhamānaso taṁ gehaṁ nesi.

Kāļī gantvā seṭṭhinā pucchitā taṁ pavattiṁ ācikkhitvā "gaccha, naṁ puna sahassaṁ datvā ānehī"ti vuttā tathā akāsi. Atha naṁ so āha "idāni naṁ āmakasusānaṁ netvā gacchantare nipajjāpehi, tattha sunakhādīhi vā khādito, amanussehi vā pahaṭo marissati, matāmatabhāvañcassa jānitvāva āgaccheyyāsī"ti. Sā taṁ netvā tatta nipajjāpetvā ekamante aṭṭhāsi. Taṁ sunakho vā kāko vā amanusso vā

upasaṅkamituṁ nāsakkhi. Nanu cassa neva mātā na pitā na bhātikādīsu koci rakkhitā nāma atthi, ko taṁ rakkhatīti? Sunakhakāle Paccekabuddhe sinehena pavattitabhukkaraṇamattameva taṁ rakkhati. Athako ajapālako anekasahassā ajā gocaraṁ nento susānapassena gacchati. Ekā ajā paṇṇāni khādamānā gacchantaraṁ paviṭṭhā dārakaṁ disvā jaṇṇukehi ṭhatvā dārakassa thanaṁ adāsi, ajapālakena "he he"ti sadde katepi na nikkhami. So "yaṭṭhiyā naṁ paharitvā nīharissāmī"ti gacchantaraṁ paviṭṭho jaṇṇukehi ṭhatvā dārakaṁ khīraṁ pāyantiṁ ajiṁ disvā dārake puttasinehaṁ paṭilabhitvā "putto me laddho"ti-ādāya pakkāmi.

Kāļī gantvā seṭṭhinā pucchitā taṁ pavattiṁ ācikkhitvā "gaccha, taṁ puna sahassaṁ datvā ānehī"ti vuttā tathā akāsi. Atha naṁ āha "amma Kāḷi imaṁ ādāya corapapātapabbataṁ abhiruhitvā pāpate khipa, pabbatakucchiyaṁ paṭihaññamāno khaṇḍākhaṇḍiko hutvā bhūmiyaṁ patissati, matāmatabhāvañcassa ñatvāva āgaccheyyāsī"ti. Sā taṁ tattha netvā pabbatamatthake ṭhatvā khipi. Taṁ kho pana pabbatakucchiṁ nissāya mahāveļugumbo pabbatānusāreneva vaḍḍhi, tassa matthakaṁ ghanajāto jiñjukagumbo avatthari. Dārako patanto kojavake viya tasmiṁ pati. Taṁ divasañca naḷakārajeṭṭhakassa veḷubali patto¹ hoti. So puttena saddhiṁ gantvā taṁ veḷugumbaṁ chindituṁ ārabhi. Tasmiṁ calante dārako saddamakāsi. So "dārakasaddo viyā"ti ekena passena abhiruhitvā taṁ disvā "putto me laddho"ti tuṭṭhacitto ādāya gato.

Kāļī seṭṭhissa santikam gantvā tena pucchitā tam pavattim ācikkhitvā "gacchanam puna sahassam datvā ānehī"ti vuttā tathā akāsi. Seṭṭhino idañcidañca karontasseva dārako vaḍḍhito "Ghosako"tvevassa nāmam ahosi, so seṭṭhino akkhimhi kaṇṭako viya khāyi, ujukam tam oloketumpi na visahi. Athassa māraṇūpāyam cintento attano sahāyakassa kumbhakārassa santikam gantvā "kadā tvam āvāpam ālimpessasī"ti pucchitvā "sve"ti vutte "tena hi idam sahassam gahetvā mama

ekam kammam karohī''ti āha. Kim sāmīti. Eko me avajātaputto atthi, tam tava santikam pesessāmi, atha nam gahetvā gabbham pavesetvā tikhiṇāya vāsiyā khaṇḍākhaṇḍikam chinditvā cāṭiyam pakkhipitvā āvāpe paceyyāsi¹, idam te sahassam saccakārasadisam². Uttarim pana te kattabbayuttakam pacchā karissāmīti. Kumbhakāro "sādhū"ti sampaṭicchi. Seṭṭhi punadivase Ghosakam pakkositvā "hiyyo mayā kumbhakāro ekam kammam āṇatto³, ehi, tvam tassa santikam gantvā evam vadehi 'hiyyo kira me pitarā āṇattam kammam nipphādehī'ti" pahiṇi. So "sādhū"ti agamāsi. Tam tattha gacchantam itaro seṭṭhino putto dārakehi saddhim guļam kīļanto disvā tam pakkositvā "kuhim gacchasi bhātikā"ti pucchitvā "pitu sāsanam gahetvā kumbhakārassa santikan"ti vutte "aham tattha gamissāmi. Ime mam dārakā bahum lakkham jinimsu, tam me paṭijinitvā dehī"ti āha. Aham pitu bhāyāmīti. Mā bhāyi bhātika, aham tam sāsanam harissāmi. Bahūhi⁴ jito, yāvāham āgacchāmi, tāva me lakkham paṭijināti.

Ghosako kira guļakīļāya cheko, tena nam evam nibandhi. Sopi tam "tena hi gantvā kumbhakāram vadehi 'pitarā kira me hiyyo ekam kammam āṇattam, tam nipphādehī'ti" vatvā uyyojesi. So tassa santikam gantvā tathā avaca. Atha nam kumbhakāro seṭṭhinā vuttaniyāmeneva māretvā āvāpe khipi. Ghosakopi divasabhāgam kīļitvā sāyanhasamaye geham gantvā "kim tāta na gatosī"ti vutte attano agatakāraṇañca kaniṭṭhassa gatakāraṇañca ārocesi. Tam sutvā seṭṭhi "aham dhī"ti<sup>5</sup> mahāviravam viravitvā sakalasarīre pakkuthitalohito viya hutvā "ambho kumbhakāra mā mam nāsayi, mā mam nāsayī"ti bāhā paggayha kandanto tassa santikam agamāsi. Kumbhakāro tam tathā āgacchantam disvā "sāmi mā saddam kari, kammam te nipphannan"ti āha. So pabbatena viya mahantena sokena avatthaṭo hutvā anappakam domanassam paṭisamvedesi. Yathā tam appaduṭṭhassa padussamāno. Tenāha Bhagavā—

<sup>1.</sup> Paveseyyāsi (Paṭisaṁ-Ṭṭha 2. 298 piṭṭhe)

<sup>3.</sup> Kumbhakārassa ekam kammam āṇattam (Sī)

<sup>5.</sup> Mā avadhīti (Syā)

<sup>2.</sup> Lañjakārasadisam (Syā)

<sup>4.</sup> Bahum hi (Sī) Bahumpi (Ka)

"Yo daṇḍena adaṇḍesu, appaduṭṭhesu dussati. Dasannamaññataraṁ ṭhānaṁ, khippameva nigacchati.

Vedanam pharusam jānim, sarīrassa ca bhedanam. Garukam vāpi ābādham, cittakkhepañca pāpuņe.

Rājato vā upasaggam, abbhakkhānanca dāruṇam. Parikkhayanca nātīnam, bhogānanca pabhanguram.

Atha vāsssa agārāni, aggi ḍahati pāvako. Kāyassa bhedā duppañño, nirayaṁ sopapajjatī"ti¹.

Evam santepi puna nam setthi ujukam oloketum na sakkoti. "Kinti nam māreyyan"ti cintento "mama gāmasate āyuttakassa santikam pesetvā māressāmī"ti upāyam disvā "ayam me avajātaputto, imam māretvā vaccakūpe khipatu, evam kate aham mātulassa kattabbayuttakam pacchā jānissāmī"ti tassa pannam likhitvā "tāta Ghosaka amhākam gāmasate āyuttako atthi, imam pannam haritvā tassa dehī"ti vatvā pannam tassa dussante<sup>2</sup> bandhi. So pana akkharasamayam na jānāti. Daharakālato patthāya hi nam mārāpentova setthi māretum nāsakkhi, kim akkharasamayam sikkhāpessati. Iti so attano mārāpanapannameva dussante<sup>2</sup> bandhitvā nikkhamanto āha "pātheyyam me tāta natthī"ti. Pātheyyena te kammam natthi, antarāmagge "asukagāme nāma mama sahāyako setthi atthi, tassa ghare pātarāsam katvā purato<sup>3</sup> gacchāhī''ti. So "sādhū''ti pitaram vanditvā nikkhanto tam gāmam patvā setthissa gharam pucchitvā gantvā setthijāyam passi. "Tvam kuto āgatosī"ti ca vutte "antonagarato"ti āha. Kassa puttosīti. Tumhākam sahāyakasetthino ammāti. Tvamsi Ghosako nāmāti. Āma ammāti. Tassā saha dassaneneva tasmim puttasineho uppajji. Setthino panekā dhītā atthi pannarasasolasavassuddesikā abhirūpā pāsādikā, tam rakkhitum ekameva pesanakārikam dāsim datvā sattabhūmikassa pāsādassa uparimatale sirigabbhe vasāpenti. Setthidhītā tasmim khaņe tam dāsim antarāpanam pesesi. Atha nam setthijāyā disvā "kuhim

gacchasī"ti pucchitvā "ayyadhītāya<sup>1</sup> pesanenā"ti vutte "ito tāva ehi, tuṭṭhatu pesanaṁ, puttassa me pīṭhakaṁ attharitvā pāde dhovitvā telaṁ makkhitvā sayanaṁ attharitvā dehi, pacchā pesanaṁ karissasī"ti āha. Sā tathā akāsi.

Atha nam cirenāgatam seṭṭhidhītā santajjesi. Atha nam sā āha "mā me kujjhi, seṭṭhiputto Ghosako āgato, tassa idañcidañca katvā tattha gantvā āgatāmhī"ti. Seṭṭhidhītāya "seṭṭhiputto Ghosako"ti nāmam sutvāva pemam chaviyādīni chinditvā aṭṭhimiñjam āhacca ṭhitam. Kotuhalakālasmim hi sā tassa pajāpatī hutvā nāļikodanam Paccekabuddhassa adāsi, tassānubhāvenāgantvā imasmim seṭṭhikule nibbattā. Iti tam so pubbasineho avattharitvā gaṇhi. Tenāha Bhagavā—

"Pubbeva sannivāsena, paccuppannahitena vā. Evam tam jāyate pemam, uppalamva yathodake"ti<sup>2</sup>.

Atha nam pucchi "kuhim so ammā"ti. Sayane nipanno niddāyatīti. Atthi panassa hatthe kiñcīti. Dussante paṇṇam atthīti. Sā "kim paṇṇam nu kho etan"ti tasmim niddāyante mātāpitūnam aññavihitatāya apassantānam otaritvā samīpam gantvā tam paṇṇam mocetvā ādāya attano gabbham pavisitvā dvāram pidhāya vātapānam vivaritvā akkharasamaye kusalatāya paṇṇam vācetvā "aho vata bālo attano maraṇapaṇṇam dussante bandhitvā vicarati, sace mayā na diṭṭham assa, natthissa jīvitan"ti tam paṇṇam phāletvā seṭṭhissa vacanena³ aparam paṇṇam likhi "ayam mama putto Ghosako nāma, gāmasatato paṇṇākāram āharāpetvā imassa janapadaseṭṭhino dhītarā saddhim maṅgalam katvā attano vasanagāmassa majjhe dvibhūmakam geham kāretvā pākāraparikkhepena ceva purisaguttiyā ca susamvihitārakkham karotu, mayhañca 'idañcidañca mayā katan'ti sāsanam pesetu, evam kate aham mātulassa kattabbayuttakam pacchā ānissāmī'ti. Likhitvā ca pana saṅgharitvā otaritvā dussanteyevassa bandhi.

So divasabhāgam niddāyitvā uṭṭhāya bhuñjitvā pakkāmi. Punadivase pātova tam gāmam gantvā āyuttakam gāmakiccam karontamyeva passi. So tam disvā "kim tātā"ti pucchi. Pitarā me tumhākam paṇṇam pesitanti. "Kim paṇṇam tāta, āharā"ti paṇṇam gahetvā vācetvā tuṭṭhamānaso "passatha bho, mama sāmino mayi sineham katvā¹ jeṭṭhaputtassa me maṅgalam karotū"ti mama santikam pahiṇi. "Sīgham dārukādīni āharathā"ti gahapatike vatvā gāmamajjhe vuttapakāram geham kārāpetvā gāmasatato paṇṇākāram āharāpetvā janapadaseṭṭhino santikā dhītaram ānetvā maṅgalam katvā seṭṭhissa sāsanam pahiṇi "idañcidañca mayā katan"ti.

Tam sutvā setthino "yam kāremi, tam na hoti. Yam na kāremi, tadeva hotī"ti mahantam domanassam uppajji. Puttasokena saddhim so soko ekato hutvā kucchidāham uppādetvā atisāram² janesi. Setthidhītāpi "sace koci setthino santikā āgacchati, mama akathetvā setthiputtassa pathamataram mā kathayitthā"ti jane ānāpesi. Setthipi kho "dāni tam dutthaputtam mama sāpateyyassa sāmikam na karissāmī"ti cintetvā ekam āyuttakam āha "mātula puttam me datthukāmomhi, ekam pādamūlikam pesetvā mama puttam pakkosāpehī"ti. So "sādhū"ti vatvā pannam datvā ekam purisam pesesi. Setthidhītāpi tassa āgantvā dvāre thitabhāvam sutvā tam pakkosāpetvā "kim tātā"ti pucchi. So āha "setthi gilāno, puttam passitum pakkosāpesi ayye"ti. Kim tāta balavā, dubbaloti. Balavā tāva, āhāram bhuñjatiyeva ayyeti. Sā setthiputtam ajānāpetvāva tassa nivesananca paribbayanca dāpetvā "mayā pesitakāle gamissasi, acchassu tāvā"ti āha. Setthi puna āyuttakam avaca "kim mātula, na te mama puttassa santikam pahitan"ti. Pahitam sāmi, gatapuriso na tāva etīti. Tena hi puna aparam pesehīti. So pesesi. Setthidhītā tasmimpi tatheva patipajji. Atha setthino rogo balavā jāto, ekam bhājanam pavisati. Ekam nikkhamati. Puna setthi ayuttakam pucchi "kim matula, na te mama puttassa santikam pahitan"ti. Pahitam sāmi, gatapuriso na

<sup>1.</sup> Sineham (Sī, Syā) sinehena (Ka) Paţisam-Ţtha 2. 300 piţthe pana passitabbam.

<sup>2.</sup> Atīsāram (Sī)

tāva etīti. Tena hi puna aparam pesehīti. So pesesi. Seṭṭhidhītā tatiyavāre āgatampi tam pavattim pucchi. So "bāļhagilāno ayye, seṭṭhi āhāram pacchinditvā maccuparāyaṇo¹ jāto, ekam bhājanam nikkhamati, ekam pavisatī"ti āha. Seṭṭhidhītā "idāni gantum kālo"ti seṭṭhiputtassa "pitā te kira gilāno"ti ārocetvā "kim vadesi bhadde"ti vutte "aphāsukamassa sāmī"ti āha. "Idāni kim kātabban"ti. Sāmi gāmasatato vuṭṭhānakapaṇṇākāram ādāya gantvā passissāma nanti. So "sādhū"ti paṇṇākāram āharāpetvā sakaṭehi ādāya pakkāmi.

Atha nam sā "pitā te dubbalo, ettakam paṇṇākāram gahetvā gacchantānam papañco bhavissati, etam nivattāpehī"ti vatvā tam sabbam attano kulageham pesetvā puna tam² āha "sāmi tvam attano pitu pādapasse tiṭṭheyyāsi, aham ussīsakapasse ṭhassāmī"ti. Geham pavisamānāyeva ca "gehassa purato ca pacchato ca ārakkham gaṇhathā"ti attano purise āṇāpesi. Paviṭṭhakāle pana seṭṭhiputto pitu pādapasse aṭṭhāsi, itarā ussīsakapasse.

Tasmim khaņe seṭṭhi uttānako nipanno hoti. Āyuttako pana tassa pāde parimajjanto "putto te sāmi āgato"ti āha. Kuhim soti. Esa pādamūle ṭhitoti. Atha nam disvā āyakammikam³ pakkosāpetvā "mama gehe kittakam dhanan"ti pucchi. Sāmi dhanasseva cattālīsakoṭiyo, upabhogaparibhogabhaṇḍānam pana

vanagāmakkhettadvipadacatuppadayānavāhanānañca ayañca ayañca paricchedo"ti vutte "ahaṁ ettakaṁ dhanaṁ mama puttassa Ghosakassa na demī"ti vattukāmo "demī"ti āha. Taṁ sutvā seṭṭhidhītā "ayaṁ puna kathento aññaṁ kiñci katheyyā"ti cintetvā sokāturā viya kese vikiritvā rodamānā "kiṁ nāmetaṁ tāta vadetha, idampi nāma vo vacanaṁ suṇoma, alakkhikā vatamhā"ti vatvā matthakena naṁ uramajjhe paharantī patitvā yathā puna vattuṁ na sakkoti, tathāssa uramajjhe matthakena ghaṁsentī ārodanaṁ dassesi. Seṭṭhi taṁ khaṇdaññeva kālamakāsi. Seṭṭhi mato"ti4

<sup>1.</sup> Mañcaparāyano (Sī)

<sup>3.</sup> Āyuttakaṁ (Syā, Ka)

<sup>2.</sup> Setthiputtm (Sī, Syā)

<sup>4.</sup> Tasmim mate (Ka)

gantvā Utenassa rañño ārocayimsu. Rājā tassa sarīrakiccam kārāpetvā "atthi panassa putto vā dhītā vā"ti pucchi. Atthi deva Ghosako nāma tassa putto, sabbam sāpateyyam tassa niyyādetvāva mato devāti.

Rājā aparabhāge seṭṭhiputtam pakkosāpesi. Tasmim ca divase devo vassi. Rājangaņe tattha tattha udakam saṇṭhāti. Seṭṭhiputto "rājānam passissāmī"ti pāyāsi. Rājā vātapānam vivaritvā tam āgacchantam olokento rājangaņe udakam laṅghitvā āgacchantam disvā āgantvā vanditvā ṭhitam "tvam Ghosako nāma tātā"ti pucchitvā "āma devā"ti vutte "pitā me matoti mā soci, tava pettikam seṭṭhiṭṭhānam tuyhameva dassāmī"ti tam samassāsetvā "gaccha tātā"ti uyyojesi. Rājā gacchantam ca nam olokentova aṭṭhāsi. So āgamanakāle laṅghitam udakam gamanakāle otaritvā saṇikam agamāsi. Atha nam rājā tatova pakkosāpetvā "kim nu kho tāta tvam mama santikam āgacchanto udakam laṅghitvā āgamma gacchanto otaritvā saṇikam gacchasī"ti pucchi. Āma deva, aham tasmim khaṇe kumārako, kīṭanakālo nāma so, idāni pana me devena ṭhānantaram paṭissutam. Tasmā yathā pure acaritvā idāni sannisinnena¹ hutvā caritum vaṭṭatīti. Tam sutvā rājā "dhitimāyam puriso, idānevassa ṭhānantaram dassāmī"ti pitarā bhuttam bhogam datvā sabbasatena seṭṭhiṭṭhānam adāsi.

So rathe ṭhatvā nagaraṁ padakkhiṇaṁ akāsi. Olokitolokitaṭṭhānaṁ kampati. Seṭṭhidhītā Kāḷidāsiyā saddhiṁ mantayamānā nisinnā "amma Kāḷi puttassa te ettikā sampatti maṁ nissāya uppannā"ti² āha. Kiṁ kāraṇā ammāti. Ayañhi attano maraṇapaṇṇaṁ dussante bandhitvā amhākaṁ gharaṁ āgato, athassa mayā taṁ paṇṇaṁ phāletvā mayā saddhiṁ maṅgalakaraṇatthāya aññaṁ paṇṇaṁ likhitvā ettakaṁ kālaṁ tattha ārakkho katoti. Amma tvaṁ ettakaṁ passassi, imaṁ pana seṭṭhi daharakālato paṭṭhāya māretukāmo māretuṁ nāsakkhi, kevalaṁ imaṁ nissāya bahuṁ dhanaṁ khīyīti² amma atibhāriyaṁ vata seṭṭhinā katanti. Nagaraṁ padakkhiṇaṁ katvā gehaṁ pavisantaṁ pana naṁ disvā "ayaṁ ettikā sampatti maṁ

nissāya uppannā"ti hasitam akāsi. Atha nam setthiputto disvā "kim kāranā hasī"ti pucchi. Ekam kāranam nissāyāti. Kathehi nanti. Sā na kathesi. So "sace na kathessasi, dvidhā tam chindissāmī"ti tajjetvā asim nikkaddhi. Sā "ayam ettikā sampatti tayā mam nissāya laddhāti cintetvā hasitan"ti āha. Yadi mama pitarā attano santakam mayham niyyāditam, tvam ettha kim hosīti. So kira ettakam kālam kiñci na jānāti, tenassā vacanam na saddahi. Athassa sā "tumhākam pitarā maranapannam datvā pesitā, tumhe mayā idañcidañca katvā rakkhitā"ti sabbam kathesi. "Tvam abhūtam kathesī"ti asaddahanto "mātaram Kālim pucchissāmī"ti cintetvā evam kira ammāti. Āma tāta, daharakālato paṭṭhāya tam māretukāmo māretum asakkonto tam nissāya bahum dhanam khīyi, sattasuthānesu tvam maranato mutto, idāni bhogagāmato āgamma sabbasatena saddhim setthitthānam pattoti. So tam sutvā "bhāriyam vata kammam, evarūpā kho pana maranā muttassa mama pamādajīvitam jīvitum ayuttam<sup>1</sup>, appamatto bhavissāmī"ti cintetvā devasikam sahassam vissajjetvā addhikakapanādīnam dānam patthapesi. Mitto nāmassa kutumbiko dānabyāvato ahosi. Ayam Ghosakasetthino uppatti.

Tasmim pana kāle Bhaddavatīnagare Bhaddavatīyaseṭṭhi nāma Ghosakaseṭṭhino adiṭṭhapubbasahāyako ahosi. Bhaddavatīnagarato āgatānam vāṇijānam santike Ghosakaseṭṭhi Bhaddavatīyaseṭṭhino sampattim ca vayappadesañca sutvā tena saddhim sahāyakabhāvam icchanto paṇṇākāram pesesi. Bhaddavatīyaseṭṭhipi Kosambito āgatānam vāṇijānam santike Ghosakaseṭṭhino sampattiñca vayappadesañca sutvā tena saddhim sahāyakabhāvam icchanto paṇṇākāram pesesi. Evam te aññamaññam adiṭṭhapubbasahāyakā hutvā vasimsu. Aparabhāge Bhaddavatīyaseṭṭhino gehe ahivātarogo patito, tasmim patite paṭhamam makkhikā maranti, tato anukkameneva kīṭā mūsikā kukkuṭā sūkarā gāvo dāsī dāsā sabbapacchā gharamānusakāpi maranti. Tesu ye bhittim bhinditvā palāyanti, te jīvitam labhanti, tadā pana seṭṭhi ca bhariyā ca dhītā cassa tathā

palāyitvā Ghosakaseṭṭhiṁ passituṁ patthentā Kosambimaggaṁ paṭipajjiṁsu. Te antarāmaggeyeva khīṇapātheyyā vātātapena ceva khuppipāsāhi ca kilantasarīrā kicchena Kosambiṁ patvā udakaphāsukaṭṭhāne ṭhatvā nhatvā nagaradvāre ekaṁ sālaṁ pavisiṁsu.

Tato seṭṭhi bhariyaṁ āha "bhadde iminā nīhārena gacchantā vijātamātuyāpi amanāpā honti, sahāyako kira me addhikakapaṇādīnaṁ devasikaṁ sahassaṁ vissajjetvā dānaṁ dāpesi. Tattha dhītaraṁ pesetvā āhāraṁ āharāpetvā ekāhaṁ dvīhaṁ idheva sarīraṁ santappetvā sahāyakaṁ passissāmā"ti. Sā sādhu sāmīti. Te sālāyameva vasiṁsu. Punadivase kāle ārocite kapaṇaddhikādīsu āhāratthāya gacchantesu mātāpitaro "amma gantvā amhākaṁ āhāraṁ āharā"ti dhītaraṁ pesayiṁsu. Mahābhogakulassa dhītā vipattiyā acchinnalajjitāya alajjamānā pātiṁ gahetvā kapaṇajanena saddhiṁ āhāratthāya gantvā "kati paṭivīse gaṇhissasi ammā"ti puṭṭhā ca pana "tayo"ti āha. Athassā tayo paṭivīse adāsi. Tāya bhatte āhaṭe tayopi ekato bhuñjituṁ nisīdiṁsu.

Atha mātādhītaro seṭṭhim āhamsu "sāmi vipatti nāma mahākulānampi uppajjati, mā amhe oloketvā bhuñja, mā cintayī"ti. Iti nam nānappakārehi yācitvā bhojesum. So bhuñjitvā āhāram jīrāpetum asakkonto aruņe uggacchante kālamakāsi. Mātādhītaro nānappakārehi paridevitvā rodimsu. Kumārikā punadivase rodamānā āhāratthāya gantvā "kati paṭivīse gaṇhissasī"ti vuttā "dve"ti vatvā āhāram āharitvā mātaram yācitvā bhojesi. Sāpi tāya yāciyamānā bhuñjitvā āhāram jīrāpetum asakkontī tam divasameva kālamakāsi. Kumārikā ekikāva roditvā paridevitvā tāya dukkhuppattiyā ativiya sañcātachātakadukkhā punadivase yācakehi saddhim rodantī āhāratthāya gantvā "kati paṭivīse gaṇhissasi ammā"ti vuttā "ekan"ti āha. Mittakuṭumbiko tam tayo divase bhattam gaṇhantim sañjānāti, tena tam "apehi, nassa vasali, ajja tava kucchippamāṇam aññāsī"ti āha.

kuladhītā paccorasmim sattipahāram viya vaņe khārodakasecanakam viya¹ ca patvā "kim sāmī"ti āha. Tayā pure tayo koṭṭhāsā gahitā, hiyyo dve, ajja ekam gaṇhāsi. Ajja te attano kucchippamāṇam ñātanti. "Mā mam sāmi attanova atthāya gaṇhī"ti maññitthāti. Atha kasmā evam gaṇhīti. Pure tayo janā ahumha sāmi, hiyyo dve, ajja ekikāva jātāmhīti. So "kena kāraṇenā"ti pucchitvā ādito paṭṭhāya tāya kathitam sabbam pavattim sutvā assūni sandhāretum asakkonto sañjātabalavadomanasso hutvā "amma evam sante mā cintayi, tvam Bhaddavatiyaseṭṭhino dhītā ajjakālato paṭṭhāya mama dhītāyeva nāmā"ti vatvā sīse cumbitvā gharam netvā attano jeṭṭhadhītuṭṭhāne ṭhapesi.

Sā dānagge uccāsaddam mahāsaddam sutvā "tāta kasmā etam janam nissaddam katvā dānam na dethā"ti āha. Na sakkā kātum ammāti. Sakkā tātāti. Katham sakkā ammāti. Tāta dānaggam parikkhipitvā ekekasseva pavesanappamānena dve dvārāni yojetvā "ekena dvārena pavisitvā ekena nikkhamathā"ti vadetha, evam nissaddā hutvāva ganhissantīti. So tam sutvā "bhaddakova amma upāyo"ti tathā kāresi. Sāpi pubbe Sāmā nāma. Vatiyā pana kāritattā **Sāmāvatī** nāma jātā. Tato patthāya dānagge kolāhalam pacchindi. Ghosakasetthi pubbe tam saddam sunanto "mayham danagge" saddo"ti tussati. Dvīhatīham pana saddam asunanto Mittakutumbikam attano upatthānam āgatam pucchi "diyyati kapanaddhikādīnam dānan"ti. Āma sāmīti. Atha kim dvīhatīham saddo na suvyatīti. Yathā nissaddā hutvā ganhanti, tathā me upāyo katoti. Atha pubbeva kasmā nākāsīti? Ajānanatāya sāmīti. Idāni katham te ñātoti. Dhītarā me akkhāto sāmīti. Mayham aviditā "tava dhītā nāma atthī"ti. So ahivātaroguppattito patthāya sabbam Bhaddavatiyasetthino pavattim ācikkhitvā tassā attano jetthadhītutthāne thapitabhāvam ārocesi. Atha nam setthi "evam sante mama kasmā na kathesi, mama sahāyakassa dhītā mama dhītā nāmā"ti tam pakkosāpetvā pucchi "amma setthino dhītāsī"ti. Āma tātāti. Tena hi mā cintayi, tvam

mama dhītāsīti tam sīse cumbitvā parivāratthāya tassā pañca itthisatāni datvā tam attano jeṭṭhadhītuṭṭhāne ṭhapesi.

Athekadivasam tasmim nagare nakkhattam sanghuttham hoti. Tasmim pana nakkhatte bahi anikkhamanakā kuladhītaropi attano parivārena saddhim padasāva nadim gantvā nhāyanti. Tasmā tam divasam Sāmāvatīpi pañcahi itthisatehi parivāritā rājanganeneva nhāyitum agamāsi. Uteno sīhapañjare thito tam disvā "kassimā nātakitthiyo"ti pucchi. Na kassaci nātakitthiyo devāti. Atha kassa dhītaroti. Ghosakasetthino dhītā deva, Sāmāvatī nāmesāti. So disvāva uppannasineho setthino sāsanam pāhesi "dhītaram kira me pesetū"ti. Na pesemi devāti. Mā kira evam karotu, pesetuyevāti. Mayam gahapatikā nāma kumārikānam pothetvā vihethetvā kaddhanabhayena<sup>1</sup> na dema devāti. Rājā kujjhitvā geham lañchāpetvā setthiñca bhariyañca hatthe gahetvā bahi kārāpesi. Sāmāvatī nhāyitvā āgantvā geham pavisitum okāsam alabhantī "kim etam tātā"ti pucchi. Amma rājā tava kāranā pahini. Atha "na mayam dassāmā" ti vutte gharam lañchāpetvā amhe bahi kārāpesīti. Tāta bhāriyam vo kammam katam, raññā nāma pahite "na demā"ti avatvā "sace me dhītaram saparivāram ganhatha, demā"ti vattabbam bhaveyya tātāti. "Sādhu amma, tava ruciyā sati evam karissāmī"ti rañño tathā sāsanam pāhesi. Rājā "sādhū"ti sampaticchitvā tam saparivāram ānetvā abhisiñcitvā aggamahesitthāne thapesi. Sesā tassāyeva parivāritthiyo ahesum. Ayam Sāmāvatiyā uppatti.

Utenassa pana aparāpi Vāsuladattā nāma devī ahosi Caṇḍapajjotassa dhītā. Ujjeniyam hi Caṇḍapajjoto nāma rājā ahosi. So ekadivasam uyyānato āgacchanto attano sampattim oloketvā "atthi nu kho aññassapi kassaci evarūpā sampattī"ti vatvā tam sutvā manussehi "kim sampatti nāmesā, Kosambiyam Utenassa rañño atimahatī sampattī"ti vutte rājā āha "tena hi gaṇhissāma nan"ti. Na sakkā so gahetunti. Kiñci katvā gaṇhissāmayevāti. Na sakkā devāti. Kim kāranāti. So hatthikantam nāma sippam jānāti,

mantam parivattetvā hatthikantavīņam vādento nāge palāpetipi gaņhātipi. Hatthivāhanasampanno tena sadiso nāma natthīti. Na sakkā mayā so gahetunti. Sace te deva ekantena ayam nicchayo<sup>1</sup>. Tena hi dāruhatthim kāretvā tassāsannaṭṭhānam pesehi, so hatthivāhanam vā assavāhanam vā sutvā dūrampi gacchati. Tattha nam āgatam gahetum sakkā bhavissatīti.

Rājā "attheso upāyo"ti dārumayam vantahatthim kārāpetvā bahi pilotikāhi vethetvā katacittakammam katvā tassa vijite āsannatthāne ekasmim saratīre vissajjāpesi. Hatthino antokucchiyam satthi purisā aparāparam cankamanti, hatthilandam āharitvā tattha tattha chaddesum. Eko vanacarako hatthim disvā "amhākam rañno anucchaviko"ti cintetvā gantvā rañño ārocesi "deva mayā sabbaseto kelāsakūtapatibhāgo tumhākaññeva anucchaviko varavārano dittho"ti. Uteno tameva maggadesakam katvā hatthim abhiruyha saparivāro nikkhami. Tassa āgamanam ñatvā carapurisā gantvā Candapajjotassa ārocesum. So āgantvā majjhe tuccham katvā ubhosu passesu balakāyam payojesi. Uteno tassāgamanam ajānanto hatthim anubandhi. Anto thitamanussā vegena palāpesum. Katthahatthī rañño mantam parivattetvā vīnam vādentassa tantisaddam asunanto viva palāyatiyeva. Rājā hatthināgam<sup>2</sup> pāpunitum asakkonto assam āruyha anubandhi. Tasmim vegena anubandhante balakāyo ohīyi. Rājā ekakova ahosi. Atha nam ubhosu passesu payuttā Candapajjotassa purisā ganhitvā attano rañño adamsu. Athassa balakāyo amittavasam gatabhāvam ñatvā bahinagareva khandhāvāram nivesetvā acchi.

Caṇḍapajjotopi Utenaṁ jīvaggāhameva gāhāpetvā ekasmiṁ coragehe pakkhipitvā dvāraṁ pidahāpetvā tayo divase jayapānaṁ pivi Uteno tatiyadivase ārakkhake pucchi "kahaṁ vo tāta rājā"ti. "Paccāmitto me gahito"ti jayapānaṁ pivatīti. Kā nāmesā mātugāmassa viya tumhākaṁ rañño kiriyā, nanu paṭirājūnaṁ

gahetvā vissajjetum vā māretum vā vattati, amhe dukkham nisīdāpetvā jayapānam kira pivatīti. Te gantvā tamattham rañño ārocesum. So āgantvā "saccam kira tvam evam vadasī"ti pucchi. Āma mahārājāti. Sādhu tam vissajjessāmi, evarūpo kira te manto atthi, tam mayham dassasīti. Sādhu dassāmi, gahanasamaye mam vanditvā tam ganhāhi, kim pana tvam vandissasīti. Kyāham tam vandissāmi, na vandissāmīti. Ahampi te na dassāmīti. Evam sante rājānam<sup>1</sup> te karissāmīti. Karohi, sarīrassa me issaro, na pana cittassāti. Rājā tassa sūragajjitam sutvā "katham nu kho imam mantam ganhissāmī"ti cintetvā imam mantam aññam jānāpetum na sakkā, mama dhītaram etassa santike ugganhāpetvā aham tassā santike ganhissāmīti. Atha nam āha "aññassa vanditvā ganhantassa dassasī"ti. Āma mahārājāti. Tena hi amhākam ghare ekā khujjā atthi tassā antosāniyam vanditvā nisinnāva tvam bahisānivam thitova mantam vācehīti. Sādhu mahārāja, khujjā vā hotu pīthasappi vā, vandantiyā dassāmīti. Tato rājā gantvā dhītaram Vāsuladattam āha "amma eko sankhakutthī anagghamantam jānāti, tam aññam jānāpetum na sakkā, tvam antosāniyam nisīditvā tam vanditvā mantam ganha, so bahisāniyam thatvā tuyham vācessati, tava santikā aham tam ganhissāmī"ti.

Evam so tesam aññamaññam santhavakaraṇabhayena dhītaram khujjam, itaram sankhakuṭṭhim katvā kathesi. So tassā antosāṇiyam vanditvā nisinnāya bahi ṭhito mantam vācesi. Atha nam ekadivasam punappunam vuccamānampi mantapadam vattum asakkontim "are khujje atibahaloṭṭhakapolam te mukham, evam² nāma vadehī"ti āha. Sā kujjhitvā are duṭṭhasaṅkhakuṭṭhi kim vadesi, kim mādisā khujjā nāma hotīti. Sāṇikaṇṇam ukkhipitvā "kāsi tvan"ti vutte "rañño dhītā Vāsuladattā nāmāhan"ti āha. Pitā te tam mayham kathento "khujjā"ti kathesīti. Mayhampi kathento tam saṅkhakuṭṭhim katvā kathesīti. Te ubhopi "tena hi amhākam santhavakaraṇabhayena kathitam bhavissatī"ti antosāṇiyaññeva santhavam karimsu.

Tato paṭṭhāya mantaggahaṇaṁ vā sippaggahaṇaṁ vā natthi. Rājāpi dhītaraṁ niccaṁ pucchati "sippaṁ gaṇhasi ammā"ti. Gaṇhāmi tātāti. Atha naṁ ekadiyasaṁ

Uteno āha "bhadde sāmikena kattabbam nāma neva mātāpitaro, na bhātubhaginiyo kātum sakkonti, sace mayham jīvitam dassasi, pañca te itthisatāni parivāram datvā aggamahesitthānam dassāmī"ti. Sace imasmim vacane patitthātum sakkhissatha, dassāmi vo jīvitanti. Sakkhissāmi bhaddeti. Sā "sādhu sāmī"ti pitu santikam gantvā vanditvā ekamantam atthāsi. Atha nam so pucchi "amma nitthitam sippan"ti. Na tava nitthitam tata sippanti. Atha nam so pucchi "kim amma"ti. Amhakam ekam dvaranca ekam vāhanañca laddhum vattati tātāti. Idam kim ammāti. Tāta rattim kira tārakasaññāya mantassa upacāratthāya ekam osadham gahetabbam atthi. Tasmā amhākam velāya vā avelāya vā nikkhamanakāle ekam dvāranceva ekam vāhananca laddhum vattatīti. Rājā "sādhū"ti sampaticchi. Te attano abhirucitam ekam dvāram hatthagatam karimsu. Rañño pana pañca vāhanāni ahesum. Bhaddavatī nāma kareņukā ekadivasam paññāsa yojanāni gacchati, Kāko nāma dāso satthi yojanāni gacchati, Celakatthi<sup>1</sup> ca Muñcakesī cāti dve assā yojanasatam gacchanti, Nāļāgiri hatthī vīsati<sup>2</sup> yojanasatanti.

So kira rājā anuppanne Buddhe ekassa issarassa upaṭṭhāko ahosi. Athekadivasaṁ issare bahinagaraṁ gantvā nhatvā āgacchante eko Paccekabuddho nagaraṁ piṇḍāya pavisitvā sakalanagaravāsīnaṁ mārena āvaṭṭitattā ekaṁ bhikkhampi alabhitvā yathādhoteneva pattena nikkhami. Atha naṁ nagaradvāraṁ pattakāle māro aññātakavesena upasaṅkamitvā "api bhante vo kiñci laddhan"ti pucchi. Kiṁ pana me tvaṁ alabhanākāraṁ³ karīti. Tena hi nivattitvā puna pavisatha, idāni na karissāmīti⁴. Nāhaṁ puna nivattissāmīti. Sace hi nivatteyya, puna so sakalanagaravāsīnaṁ sarīre adhimuñcitvā pāṇiṁ paharitvā hasanakeṭiṁ kareyya. Paccekabuddhe anivattitvā gate māro tattheva antaradhāyi. Atha so issaro yathādhoteneva pattena āgacchantaṁ Paccekabuddhaṁ disvā vanditvā "api bhante kiñci laddhan"ti pucchi. Caritvā nikkhantamhāvusoti. So cintesi "ayyo mayā pucchitaṁ akathetvā aññaṁ vadati, na kiñci laddhaṁ bhavissatī"ti. Athassa pattaṁ olokento tucchaṁ disvā gehe

<sup>1.</sup> Celakanthī (Sī), velakamsī (Syā)

<sup>3.</sup> Labhanākāram (Sī)

<sup>2.</sup> Vīsam (Sī)

<sup>4.</sup> Karissāmīti (Sī)

bhattassa niṭṭhitāniṭṭhitabhāvaṁ ajānanatāya sūro hutvā pattaṁ gahetuṁ avisahanto "thokaṁ bhante adhivāsethā"ti vatvā vegena gharaṁ gantvā "amhākaṁ bhattaṁ niṭṭhitan"ti pucchitvā "niṭṭhitan"ti vutte taṁ upaṭṭhākaṁ āha "tāta añño tayā sampannavegataro nāma natthi, sīghena javena bhadantaṁ patvā 'pattaṁ me bhante dethā'ti vatvā pattaṁ gahetvā vegena ehī"ti. So ekavacaneneva pakkhanditvā pattaṁ gahetvā āhari. Issaropi attano bhojanassa pattaṁ pūretvā "imaṁ sīghaṁ gantvā ayyassa sampādehi, ahaṁ te ito pattiṁ dammī"ti āha.

Sopi tam gahetvā javena gantvā Paccekabuddhassa pattam datvā pañcapatiṭṭhitena vanditvā "bhante 'velā upakaṭṭhā'ti aham atisīghena javena āgato ca gato ca, etassa me javassa phalena yojanānam paṇṇāsasaṭṭhisatavīsasatagamanasamatthāni pañca vāhanāni nibbattantu, āgacchantassa ca me gacchantassa ca sarīram sūriyatejena tattam, tassa me phalena nibbattanibbattaṭṭhāne āṇā sūriyatejasadisā hotu, imasmim me piṇḍapāte sāminā patti dinnā, tassā¹ me nissandena tumhehi diṭṭhadhammassa bhāgī homī'ti āha. Paccekabuddho "evam hotū'ti vatvā—

"Icchitam patthitam tuyham, sabbameva<sup>2</sup> samijjhatu. Sabbe pūrentu sankappā, cando pannaraso yathā<sup>3</sup>.

Icchitam patthitam tuyham, khippameva samijjhatu. Sabbe pūrentu sankappā, manijotiraso yathā''ti—

Anumodanam akāsi. Paccekabuddhānam kira imāva dve gāthā anumodanagāthā nāma honti. Tattha **jotiraso**ti sabbakāmadadam maņiratanam vuccati. Idam tassa pubbacaritam. So etarahi Caṇḍapajjoto ahosi. Tassa ca kammassa nissandena imāni pañca vāhanāni nibbattimsu. Athekadivasam rājā uyyānakīļāya nikkhami. Uteno "ajja palāyitabban"ti mahantāmahante cammapasibbake hiraññasuvaṇṇassa pūretvā Kareṇukāpiṭṭhe ṭhapetvā Vāsuladattam ādāya palāyi. Antepurapālakā palāyantam tam disvā gantvā rañño ārocesum. Rājā "sīgham gacchathā"ti balam pahiņi.

<sup>1.</sup> Tassa (Ka) 2. Khippameva (Syā, Ka) 3. Dī-Ṭtha 2. 82; Am-Ṭtha 1. 146 piṭṭhesu.

Uteno balassa pakkhandabhāvaṁ ñatvā kahāpaṇapasibbakaṁ mocetvā pātesi, manussā kahāpaṇe uccinitvā puna pakkhandiṁsu. Itaro suvaṇṇapasibbakaṁ mocetvā pātetvā nesaṁ suvaṇṇalobhena papañcentānaññeva bahi nivuṭṭhaṁ¹ attano khandhāvāraṁ pāpuṇi. Atha naṁ āgacchantaṁ disvāva attano balakāyo parivāretvā nagaraṁ pavesesi. So patvāva Vāsuladattaṁ abhisiñcitvā aggamahesiṭṭhāne ṭhapesīti. Ayaṁ Vāsuladattāya uppatti.

Aparā pana Māgandiyā<sup>2</sup> nāma rañño santikā aggamahesitthānam labhi. Sā kira Kururatthe Māgandiyabrāhmanassa dhītā. Mātāpissā Māgandiyāyeva nāmam. Cūlapitāpissā Māgandiyova, sā abhirūpā ahosi devaccharapatibhāgā. Pitā panassā anucchavikam sāmikam alabhanto mahantehi mahantehi<sup>3</sup> kulehi yācitopi "na mayham dhītu tumhe anucchavikā"ti tajjetvā uyyojesi. Athekadivasam Satthā paccūsasamaye lokam volokento Māgandiyabrāhmanassa sapajāpatikassa anāgāmiphalūpanissayam disvā attano pattacīvaramādāya tassa bahinigame<sup>4</sup> aggiparicaranatthānam agamāsi. So Tathāgatassa rūpasobhaggappattam attabhāvam oloketvā "imasmim loke iminā purisena sadiso añño puriso nāma natthi, ayam mayham dhītu anucchaviko, imassa posāpanatthāya dhītaram dassāmī"ti cintetvā "samana ekā me dhītā atthi, aham ettakam kālam tassā anucchavikam purisam na passāmi, tumhe tassā anucchavikā, sā ca tumhākaññeva anucchavikā. Tumhākañhi pādaparicārikā, tassā ca bhattā<sup>5</sup> laddhum vattati, tam vo aham dassāmi, yāva mamāgamanā idheva titthathā"ti āha. Satthā kiñci avatvā tunhī ahosi. Brāhmano vegena gharam gantvā "bhoti bhoti dhītu me anucchaviko puriso dittho, sīgham sīgham sīgham nam alankarohī"ti tam alankarapetvā saddhim brāhmaniyā ādāya Satthu santikam pāyāsi. Sakalanagaram sankhubhi. Ayam "ettakam kālam mayham dhītu anucchaviko natthī"ti kassaci adatvā "ajja me dhītu anucchaviko dittho"ti kira vadeti, "kīdiso nu kho so puriso, passissāma nan"ti mahājano teneva saddhim nikkhami.

<sup>1.</sup> Ganhantānaññeva bahi nivitthaṁ (Ka)

<sup>2.</sup> Māgandiyā (Sī, Syā)

<sup>3.</sup> Mahantamahantehi (Sī)

<sup>4.</sup> Bahi nikkhamitvā (Ka)

<sup>5.</sup> Bhattāraṁ (Syā, Ka)

Tasmim dhītaram gahetvā āgacchante Satthā tena vuttaṭṭhāne aṭṭhatvā tattha padacetiyam dassetvā gantvā aññasmim ṭhāne aṭṭhāsi. Buddhānañhi padacetiyam adhiṭṭhahitvā akkantaṭṭhāneyeva paññāyati, na aññattha. Yesañcatthāya adhiṭṭhitam hoti, teyeva nam passanti. Tesam pana adassanakaraṇattham hatthi-ādayo vā akkamantu, mahāmegho vā pavassatu, verambhavātā vā paharantu, na tam koci makkhetum sakkoti. Atha brāhmaṇī brāhmaṇam āha "kuhim so puriso"ti. "Imasmim ṭhāne tiṭṭhāhīti nam avacam, kuhim nu kho so gato"ti ito cito olokento padacetiyam disvā "ayamassa padavalañjo"ti āha. Brāhmaṇī salakhaṇamantānam tiṇṇam vedānam paguṇatāya lakkhaṇamante parivattetvā padalakhaṇam upadhāretvā "nayidam brāhmaṇa pañcakāmaguṇasevino padan"ti vatvā imam gāthamāha—

"Rattassa hi ukkuṭikaṁ padaṁ bhave, Duṭṭhassa hoti sahasānupīlitaṁ. Mūlhassa hoti avakaḍḍhitaṁ padaṁ, Vivaṭṭacchadassa idamīdisaṁ padan"ti1.

Atha nam brāhmaņo evamāha "bhoti tvam udakapātiyam kumbhīlam, gehamajjhe ca pana coram viya mante passanasīlā, tuņhī hotī"ti. Brāhmaņa yam icchasi, tam vadehi, nayidam pañcakāmaguņasevino padanti. Tato ito cito ca olokento Satthāram disvā "ayam so puriso"ti vatvā brāhmaņo gantvā "samaņa dhītaram me tava posāpanatthāya demī"ti āha. Satthā "dhītarā te mayham attho atthi vā natthi vā"ti avatvāva "brāhmaņa ekam te kāraņam kathemī"ti vatvā "kathehi samaņā"ti vutte mahābhinikkhamanato paṭṭhāya yāva Ajapālanigrodhamūlā mārena anubaddhabhāvam Ajapālanigrodhamūle ca pana "atīto dāni me esa visayan"ti tassa sokāturassa sokavūpasamanattham āgatāhi māradhītāhi kumārikavaṇṇādivasena payojitam palobhanam ācikkhitvā "tadāpi mayham chando nāhosī"ti vatvā 2\_

<sup>1.</sup> Am-Ţtha 1. 335; Visuddhi 1. 101 piṭṭhesu.

"Disvāna Taṇhaṁ Aratiṁ Ragañca<sup>1</sup>, Nāhosi chando api methunasmiṁ. Kimevidaṁ muttakarīsapuṇṇaṁ, Pādāpi naṁ samphusituṁ na icche"ti<sup>2</sup>—

Imam gāthamāha. Gāthāpariyosāne brāhmano ca brāhmanī ca anāgāmiphale patitthahimsu. Māgandiyāpi kho "sacassa mayā attho natthi, anatthikabhāvova vattabbo, ayam pana mam muttakarīsapunnam karoti, ("Pādāpi nam samphusitum na iccheti)<sup>3</sup>, hotu, attano jātikulapadesabhogayasavayasampattim āgamma tathārūpam bhattāram labhitvā samanassa Gotamassa kattabbayuttakam jānissāmī''ti<sup>4</sup> Satthari āghātam bandhi. Kim pana Satthā tāya attani āghātuppattim jānāti, noti? Jānātiyeva. Jānanto kasmā gāthamāhāti? Itaresam dvinnam vasena. Buddhā hi āghātam aganetvā maggaphalādhigamārahānam vasena dhammam desentiyeva. Mātāpitaro tam netvā Cūlamāgandiyam kanittham paticchāpetvā<sup>5</sup> pabbajitvā arahattam pāpunimsu. Cūlamāgandiyopi cintesi "mama dhītā omakasattassa na anucchavikā, ekassa raññova anucchavikā"ti. Tam ādāya Kosambim gantvā sabbālankārehi alankaritvā "imam itthiratanam devassa anucchavikan"ti Utenassa rañño adāsi. So tam disvāva uppannabalavasineho abhisekam katvā pañcasatamātugāmaparivāram datvā aggamahesitthāne thapesi. Ayam Māgandiyāya uppatti.

Evamassa diyaddhasahassanāṭakitthiparivārā tisso aggamahesiyo ahesum. Tasmim kho pana samaye Ghosakaseṭṭhi Kukkuṭaseṭṭhi Pāvārikaseṭṭhīti Kosambiyam tayo seṭṭhino honti. Te upakaṭṭhāya vassūpanāyikāya pañcasatatāpase Himavantato āgantvā nagare bhikkhāya carante disvā pasīditvā nisīdāpetvā bhojetvā paṭiññam gahetvā cattāro māse attano santike vasāpetvā puna vassāratte<sup>6</sup> āgamanatthāya paṭijānāpetvā uyyojesum. Tāpasāpi tato paṭṭhāya aṭṭha māse Himavante vasitvā cattāro māse tesam

- 1. Aratiñca rāgam (Syā)
- 3. ( ) Natthi Sī-Syā-potthakesu.
- 5. Paticchāpetvā Satthu santikam gantvā ubhopi (Syā)
- 2. Khu 1. 409 pitthe.
- 4. Karissāmīti (Syā, Ka)
- 6. Vassāvāse (Syā, Ka)

santike vasimsu. Te aparabhāge Himavantato āgacchantā araññāyatane ekam mahānigrodham disvā<sup>1</sup> tassa mūle nisīdimsu. Tesu jetthakatāpaso cintesi "imasmim rukkhe adhivatthā devatā oramattikā na bhavissati, mahesakkhenevettha devarājena bhavitabbam, sādhu vata sacāyam isiganassa pānīyam dadeyyā"ti. Sopi pānīyam adāsi. Tāpaso nhānodakam cintesi, tampi adāsi. Tato bhojanam cintesi, tampi adāsi. Athassa etadahosi "ayam devarājā amhehi cintitam cintitam sabbam deti, aho vata nam passeyyāmā"ti. So rukkhakkhandham padāletvā attānam dassesi. Atha nam tāpasā "devarāja mahatī te sampatti, kim nu kho katvā ayam te laddhā"ti pucchimsu. Mā pucchatha ayyāti. Ācikkha devarājāti. So attanā katakammassa parittakattā lajjamāno kathetum na visahi. Tehi punappunam nippīlayamāno pana "tena hi sunāthā" ti vatvā kathesi.

So kireko duggatamanusso hutvā bhatim pariyesanto Anāthapindikassa santike bhatikammam labhitvā tam nissāya jīvikam kappesi. Athekasmim uposathadivase sampatte Anāthapindiko vihārato āgantvā pucchi "tassa bhatikassa ajjuposathadivasabhāvo kenaci kathito"ti. Na kathito sāmīti. Tena hissa sāyamāsam pacathāti. Athassa patthodanam pacimsu. So divasam araññe kammam katvā sāyam āgantvā bhatte vaddhetvā dinne "chātomhī"ti sahasā abhuñjitvāva "aññesu divasesu imasmim gehe 'bhattam detha, sūpam detha, byañjanam detha'ti mahakolahalam ahosi, ajja te sabbe nissadda nipajjimsu, mayhameva ekassāhāram vaddhayimsu, kim nu kho etan"ti cintetvā pucchi "avasesā bhuñjimsu, na bhuñjimsu"ti. Na bhuñjimsu tātāti. Kim kāranāti. Imasmim gehe uposathadivasesu sāyamāsam na bhuñjanti, sabbeva uposathikā honti, antamaso thanapāyinopi dārake mukham vikkhālāpetvā catumadhuram mukhe pakkhipāpetvā mahāsetthi uposathike kāreti. Gandhatelappadīpe jālante khuddakamahallakadārakā savanagatā dvattimsākāram sajjhāyanti. Tuyham pana uposathadivasabhāvam kathetum satim na karimhā. Tasmā taveva bhattam pakkam, nam bhuñjassūti. Sace idāni

uposathikena bhavitum vaṭṭati, ahampi bhaveyyanti. Idam seṭṭhi jānātīti<sup>1</sup>. Tena hi nam pucchathāti. Te gantvā seṭṭhim pucchimsu. So evamāha "idāni pana abhuñjitvā mukham vikkhāletvā uposathangāni adhiṭṭhahanto upaḍḍham uposathakammam labhissatī"ti. Itaro tam sutvā tathā akāsi.

Tassa sakaladivasam kammam katvā chātassa sarīre vātā kuppimsu. So yottena uram bandhitvā<sup>2</sup> yottakoṭiyam gahetvā parivattati. Seṭṭhi tam pavattim sutvā ukkāhi dhāriyamānāhi catumadhuram gāhāpetvā tassa santikam āgantvā "kim tātā"ti pucchi. Sāmi vātā me kuppitāti. Tena hi uṭṭhāya idam bhesajjam khādāhīti. Tumhepi khādatha sāmīti. Amhākam aphāsukam natthi, tvam khādāhīti. Sāmi aham uposathakammam karonto sakalam kātum nāsakkhim, upaḍḍhakammampi me vikalam mā ahosīti na icchi. "Mā evam kari tātā"ti vuccamānopi anicchitvā aruņe uṭṭhahante milātamālā viya kālam katvā tasmim nigrodharukkhe devatā hutvā nibbatti. Tasmā imamattham kathetvā "so seṭṭhi Buddhamāmako dhammamāmako saṃghamāmako, tam nissāya katassa upaḍḍhuposathakammassa nissandenesā sampatti mayā laddhā"ti āha.

"Buddho"ti vacanam sutvāva pañcasatā tāpasā uṭṭhāya devatāya añjalim paggayha "Buddhoti vadesi, Buddhoti vadesī"ti pucchitvā "Buddhoti vadāmi, Buddhoti vadāmī"ti tikkhattum paṭijānāpetvā "ghosopi kho eso dullabho lokasmin"ti udānam udānetvā "devate anekesu kappasatasahassesu asutapubbam saddam tayā suṇāpitamhā"ti āhamsu. Atha antevāsino ācariyam etadavocum "tena hi Satthu santikam gacchāmā"ti. Tātā tayo seṭṭhino amhākam bahūpakārā, sve tesam nivesane bhikkham gaṇhitvā tesampi ācikkhitvā gamissāma, adhivāsetha tātāti. Te adhivāsayimsu. Punadivase seṭṭhino yāgubhattam sampādetvā āsanāni paññāpetvā "ajja no ayyānam āgamanadivaso"ti ñatvā paccuggamanam katvā te ādāya nivesanam gantvā nisīdāpetvā bhikkham adamsu. Te katabhattakiccā mahā seṭṭhino "mayam gamissāmā"ti vadimsu. Nanu bhante tumhehi cattāro vassike māse amhākam gahitāva paṭiññā, idāni kuhim gacchathāti.

loke kira Buddho uppanno, dhammo uppanno, saṁgho uppanno, tasmā Satthu santikaṁ gamissāmāti. Kiṁ pana tassa Satthuno santikaṁ tumhākaññeva gantuṁ vaṭṭatīti. Aññesampi avāritaṁ āvusoti. Tena hi bhante āgametha, mayampi gamanaparivacchaṁ¹ katvā gacchāmāti. "Tumhesu parivacchaṁ karontesu amhākaṁ papañco hoti, mayaṁ purato gacchāma, tumhe pacchā āgaccheyyāthā"ti vatvā te puretaraṁ gantvā Sammāsambuddhaṁ disvā abhitthavitvā vanditvā ekamantaṁ nisīdiṁsu. Atha nesaṁ Satthā anupubbiṁ kathaṁ kathetvā dhammaṁ desesi. Desanāpariyosāne sabbepi saha paṭisambhidāhi arahattaṁ patvā pabbajjaṁ yācitvā "etha bhikkhavo"ti vacanasamanantaraṁyeva iddhimayapattacīvaradharā ehibhikkhū ahesuṁ².

Tepi kho tayo setthino pañcahi pañcahi sakatasatehi bhattacchādanasappimadhuphānitādīni dānūpakaranāni ādāya Sāvatthim patvā Satthāram vanditvā dhammakatham sutvā kathāpariyosāne<sup>3</sup> sotāpattiphale patitthāya addhamāsamattampi dānam dadamānā Satthu santike vasitvā Kosambim āgamanatthāya Satthāram yācitvā Satthārā patiññam dadantena "suññagare kho gahapatayo Tathagata abhiramanti"ti vutte "aññātam bhante, amhehi pahitasāsanena āgantum vattatī"ti vatvā Kosambim gantvā Ghosakasetthi Ghositārāmam, Kukkutasetthi Kukkutārāmam, Pāvārikasetthi Pāvārikārāmanti tayo mahāvihāre kāretvā Satthu āgamanatthāya sāsanam pahinimsu. Satthā tesam sāsanam sutvā tattha agamāsi. Te paccuggantvā Satthāram vihāram pavesetvā vārena vārena patijagganti. Satthā devasikam ekekasmim vihāre vasati. Yassa vihāre vuttho hoti, tasseva gharadvāre piņdāya carati. Tesam pana tiņņam setthīnam upatthāko Sumano nāma mālākāro ahosi, so te setthino evamāha "aham tumhākam dīgharattam upakārako, Satthāram bhojetukāmomhi, mayhampi ekadivasam Satthāram dethā"ti. Tena hi bhane sve bhojehīti. "Sādhu sāmī"ti so Satthāram nimantetvā sakkāram patiyādesi.

<sup>1.</sup> Gamanaparisajjam (Ka)

<sup>2.</sup> Iddhimayapattacīvaradharā vassasatikattherā viya ahesum (Syā)

<sup>3.</sup> Gāthāpariyosāne (Ka)

Tadā rājā Sāmāvatiyā devasikam pupphamūle attha kahāpane deti. Tassā Khujjuttarā nāma dāsī Sumanamālākārassa santikam gantvā nibaddham pupphāni ganhāti. Atha nam tasmim divase āgatam mālākāro āha "mayā Satthā nimantito, ajja pupphehi<sup>1</sup> Satthāram pūjessāmi, tittha tāva, tvam parivesanāya sahāyikā hutvā dhammam sutvā avasesāni pupphāni gahetvā gamissasī"ti. Sā "sādhū"ti adhivāsesi. Sumano Buddhappamukham bhikkhusamgham parivisitvā anumodanakaranatthāya pattam aggahesi. Satthā anumodanadhammadesanam ārabhi. Khujjuttarāpi Satthu dhammakatham sunantīyeva sotāpattiphale patitthahi. Sā añnesu divasesu cattaro kahapane attano gahetva catuhi pupphani gahetva gacchati, tam divasam atthahipi pupphāni gahetvā gatā. Atha nam Sāmāvatī āha "kim nu kho amma ajja amhākam raññā dvigunam pupphamūlam dinnan"ti. No ayyeti. Atha kasmā bahūni pupphānīti. Aññesu divasesu aham cattāro kahāpane attano gahetvā catūhi pupphāni āharāmīti. Ajja kasmā na ganhīti. Sammāsambuddhassa dhammakatham sutvā dhammassa adhigatattāti. Atha nam "are dutthadāsi ettakam kālam tayā gahitakahāpane me dehī"ti atajjetvā "amma tayā pivitam amatam amhepi pāyehī"ti vatvā "tena hi mam nhāpehī"ti vutte solasahi gandhodakaghatehi nhāpetvā dve matthasātake dāpesi. Sā ekam nivāsetvā ekam ekamsam pārupitvā āsanam paññāpetvā ekam bījanim āharāpetvā āsane nisīditvā citrabījanim ādāya pañca mātugāmasatāni āmantetvā tāsam Satthārā desitaniyāmeneva dhammam desesi, tassā dhammakatham sutvā tā sabbāpi sotāpattiphale patitthahimsu.

Tā sabbāpi Khujjuttaram vanditvā "amma ajjato paṭṭhāya tvam kiliṭṭhakammam mā kari, amhākam mātuṭṭhāne ca ācariyaṭṭhāne ca ṭhatvā Satthu santikam gantvā Satthārā desitam dhammam sutvā amhākam kathehī"ti vadimsu. Sā tathā karontī aparabhāve tipiṭakadharā jātā. Atha nam Satthā "etadaggam bhikkhave mama sāvikānam upāsikānam bahussutānam dhammakathikānam yadidam Khujjuttarā"ti etadagge ṭhapesi. Tāpi kho pañcasatā itthiyo tam evamāhamsu "amma Satthāram daṭṭhukāmāmhā, tam no dassehi,

\_\_\_\_\_

gandhamālādīhi taṁ pūjessāmā"ti. Ayye rājakulaṁ nāma bhāriyaṁ, tumhe gahetvā bahi gantuṁ na sakkāti. Amma no mā nāsehi, dasseheva amhākaṁ Satthāranti. Tena hi tumhākaṁ vasanagabbhānaṁ bhittīsu yattakena oloketuṁ sakkā hoti, tattakaṁ chiddaṁ katvā gandhamālādīni āharāpetvā Satthāraṁ tiṇṇaṁ seṭṭhīnaṁ gharadvāraṁ gacchantaṁ tumhe tesu tesu ṭhānesu ṭhatvā oloketha ceva, hatthe ca pasāretvā vandatha, pūjetha cāti. Tā tathā katvā Satthāraṁ gacchantañca āgacchantañca oloketvā¹ vandiṁsu ceva pūjesuṁ ca.

Athekadivasam Māgandiyā attano pāsādatalato nikkhamitvā cankamamānā tāsam vasanatthānam gantvā gabbhesu chiddam disvā "idam kin''ti, pucchitvā tāhi tassā Satthari āghātabaddhabhāvam'<sup>2</sup> ajānantīhi "Satthā imam nagaram āgato, mayam ettha thatvā Satthāram vandāma<sup>3</sup> ceva pūjema cā"ti vutte "āgato nāma imam nagaram samano Gotamo, idānissa kattabbam jānissāmi, imāpi tassa upatthāyikā, imāsampi kattabbam jānissāmī"ti cintetvā gantvā rañño ārocesi "mahārāja Sāmāvatimissikānam bahiddhā patthanā atthi, katipāheneva te jīvitam māressantī"ti<sup>4</sup>. Rājā "na tā evarūpam karissantī"ti na saddahi. Punappunam vuttepi na saddahi eva. Atha nam evam tikkhattum vuttepi asaddahantam "sace me na saddahasi, tāsam vasanatthānam gantvā upadhārehi mahārājā"ti āha. Rājā gantvā gabbhesu chiddam disvā "idam kin"ti pucchitvā tasmim atthe ārocite tāsam akujihitvā kiñci avatvāva chiddāni pidahāpetvā sabbagabbhesu uddhacchiddakavātapānāni<sup>5</sup> kāresi. Uddhacchiddakavātapānāni kira tasmim kāle uppannāni. Māgandiyā tāsam kiñci kātum asakkunitvā "samanassa Gotamasseva kattabbam karissāmī"ti nāgarānam lanjam<sup>6</sup> datvā "samanam Gotamam antonagaram pavisitvā vicarantam dāsakammakaraporisehi akkosetvā paribhāsetvā<sup>7</sup> palāpethā"ti ānāpesi. Micchādiṭṭhikā tīsu ratanesu appasannā antonagaram pavittham Satthāram

<sup>1.</sup> Olokentā (Sī, Ka)

<sup>2.</sup> Baddhāghātaṁ (Sī, Syā), baddhāghātataṁ (Aṁ-Ttha 1. 338 pitthe)

<sup>3.</sup> Passāma (Sī, Ka)

<sup>4.</sup> Harissantīti (Sī), na bhavissatīti (Syā)

<sup>5.</sup> Uddhacchikavātapānāni (Sī), khuddacchiddakavātapānāni (Syā)

<sup>6.</sup> Lañcam (Syā)

<sup>7.</sup> Saddhim akkositvā paribhāsitvā (Sī, Syā)

anubandhitvā "corosi, bālosi, mūļhosi, oṭṭhosi, goṇosi, gadrabhosi, nerayikosi, tiracchānagatosi, natthi tuyhaṁ sugati, duggatiyeva tuyhaṁ pātikaṅkhā"ti dasahi akkosavatthūhi akkosanti paribhāsanti.

Taṁ sutvā āyasmā Ānando Satthāraṁ etadavoca "bhante ime nāgarā amhe akkosanti paribhāsanti, ito aññattha gacchāmā"ti. Kuhiṁ Ānandāti. Aññaṁ nagaraṁ bhanteti. Tattha manussesu akkosantesu puna kattha gamissāma Ānandāti. Tatopi aññaṁ nagaraṁ bhanteti. Tatthāpi manussesu akkosantesu kuhiṁ gamissāmāti. Tatopi aññaṁ nagaraṁ bhanteti. Ānanda evaṁ kātuṁ na vaṭṭati. Yattha adhikaraṇaṁ uppannaṁ, tattheva tasmiṁ vūpasante aññattha gantuṁ vaṭṭati. Ke pana te Ānanda akkosantīti. Bhante dāsakammakare upādāya sabbe akkosantīti. "Ahaṁ Ānanda saṅgāmaṁ otiṇṇahatthisadiso, saṅgāmaṁ otiṇṇahatthino hi catūhi disāhi āgate sare sahituṁ bhāro, tatheva bahūhi dussīlehi kathitakathānaṁ sahanaṁ nāma mayhaṁ bhāro"ti vatvā attānaṁ ārabbha dhammaṁ desento imā Nāgavagge tisso gāthā abhāsi—

"Aham nāgova sangāme, cāpato patitam saram. Ativākyam titikkhissam, dussīlo hi bahujjano.

Dantam nayanti samitim, dantam rājābhirūhati. Danto seṭṭho manussesu, yo'tivākyam titikkhati.

Varamassatarā dantā, ājānīyā ca sindhavā. Kuñjarā ca mahānāgā, attadanto tato varan"ti<sup>1</sup>.

Dhammakathā sampattamahājanassa sātthikā ahosi. Evam dhammam desetvā mā cintayi Ānanda, ete sattāhamattameva akkosissanti, aṭṭhame divase tuṇhī bhavissanti, Buddhānam hi uppannam adhikaraṇam sattāhato uttari na gacchati, Māgaṇḍiyā Satthāram akkosāpetvā palāpetum asakkontī "kim nu kho karissāmī"ti cintetvā "imā etassa upatthambhabhūtā, etāsampi byasanam karissāmī"ti ekadivasam rañño surāpānaṭṭhāne upaṭṭhānam karontī cūļapitu sāsanam pahiṇi "attho me kira

kukkutehi, attha matakukkute, attha sajīvakukkute ca gahetvā āgacchatu, āgantvā ca sopānamatthake thatvā āgatabhāvam nivedetvā 'pavisatū'ti vuttepi apavisitvā pathamam attha sajīvakukkute pahinatu, pacchā itare'ti. Cūlupatthākassa ca "mama vacanam kareyyāsī"ti lañjam adāsi. Māgandiyo āgantvā rañño nivedāpetvā "pavisatū"ti vutte "rañño āpānabhūmim na pavisissāmī"ti āha. Itarā cūlupatthākam pahini "gaccha tāta mama cūlapitu santikan"ti. So gantvā tena dinne attha sajīvakukkute ānetvā "deva purohitena pannākāro pahito"ti āha. Rājā "bhaddako vata no uttaribhango uppanno, ko nu kho paceyyā"ti āha. Māgandiyā "mahārāja Sāmāvatippamukhā pañcasatā itthiyo nikkammikā<sup>1</sup> vicaranti, tāsam pesehi, tā pacitvā āharissantī"ti āha. Rājā "gaccha, tāsam datvā aññassa kira hatthe adatvā sayameva māretvā pacantū"ti pesesi. Cūlupatthāko "sādhu devā"ti gantvā tathā vatvā tāhi "mayam pānātipātam na karomā" ti patikkhitto agantvā tamattham rañño ārocesi. Māgaņdiyā "dittham te mahārāja, idāni tāsam pānātipātassa karanam vā akaranam vā jānissasi, 'samanassa Gotamassa pacitvā pesentū'ti vadehi devā"ti āha. Rājā tathā vatvā pesesi. Itaro te gahetvā gacchanto viya hutvā gantvā te kukkute purohitassa datvā matakukkute tāsam santikam netvā "ime kira kukkute pacitvā Satthu santikam pahinatha"ti aha. Ta "sami ahara, idam nama amhakam kiccan"ti paccuggantvā ganhimsu. So rañño santikam gantvā "kim tātā" ti puttho "samaņassa Gotamassa pacitvā pesethāti vuttamatteyeva paţimaggam āgantvā ganhimsū"ti ācikkhi. Māgandiyā "passa mahārāja, na tā tumhādisānam karonti. Bahiddhā patthanā tāsam atthīti vutte na saddahasī"ti āha. Rājā tam sutvāpi adhivāsetvā tunhīyeva ahosi. Māgandiyā "kim nu kho karissāmī"ti cintesi.

Tadā pana rājā "Sāmāvatiyā Vāsuladattāya Māgaṇḍiyāya cā"ti tissannampi etāsam pāsādatale vārena vārena sattāham sattāham

vītināmeti. Atha naṁ "sve vā parasuve vā Sāmāvatiyā pāsādatalaṁ gamissatī"ti ñatvā Māgaṇḍiyā cūļapitu sāsanaṁ pahiṇi "agadena kira dāṭhā dhovitvā¹ ekaṁ sappaṁ pesetū"ti. So tathā katvā pesesi. Rājā attano gamanaṭṭhānaṁ hatthikantavīṇaṁ ādāyayeva gacchati, tassā pokkhare ekaṁ chiddaṁ atthi. Māgaṇḍiyā tena chiddena sappaṁ pavesetvā chiddaṁ mālāguļena thakesi. Sappo dvīhatīhaṁ antovīṇāyameva ahosi. Māgaṇḍiyā rañño gamanadivase "ajja katarissitthiyā pāsādaṁ gamissasi devā"ti pucchitvā "Sāmāvatiyā"ti vutte "ajja mayā mahārāja amanāpo supino diṭṭho. Na sakkā tattha gantuṁ devā"ti. Gacchāmevāti. Sā yāva tatiyaṁ vāretvā "evaṁ sante ahampi tumhehi saddhiṁ gamissāmi devā"ti vatvā nivattiyamānāpi anivattitvā "na jānāmi, kiṁ bhavissasi² devā"ti raññā saddhiṁyeva agamāsi.

Rājā Sāmāvatimissikāhi dinnāni vatthapupphagandhābharaṇāni dhāretvā subhojanam bhuñjitvā vīṇam ussīsake thapetvā sayane nipajji. Māgaṇḍiyā aparāparam vicarantī viya hutvā vīṇāchiddato pupphaguļam apanesi. Sappo dvīhatīham nirāhāro tena chiddena nikkhamitvā passasanto³ phaṇam katvā sayanapitthe nipajji. Māgaṇḍiyā tam disvā "dhī dhī deva sappo"ti mahāsaddam katvā rājānam ca tā ca akkosantī "ayam andhabālarājā⁴ alakkhiko mayham vacanam na suṇāti, imāpi nissirīkā dubbinītā kim nāma rañño santikā na labhanti, kim nu tumhe imasmim mateyeva sukham jīvissatha, jīvante dukkham jīvatha, 'ajja mayā pāpasupino diṭṭho, Sāmāvatiyā pāsādam gantumna vaṭṭatī'ti vārentiyāpi me vacanam na suṇasi devā"ti⁵ āha. Rājā sappam disvā maraṇabhayatajjito "evarūpampi nāma imā karissanti, aho pāpā, aham imāsam pāpabhāvam ācikkhantiyāpi imissā vacanam na saddahim, paṭhamam attano gabbhesu chiddāni katvā nisinnā, puna mayā pesite kukkuṭe paṭipahiṇimsu, ajja sayane sappam vissajjimsū"ti kodhena sampajjalito viya ahosi.

<sup>1.</sup> Alagaddena kira me attho, dāṭhā uddaritvā (Syā)

<sup>3.</sup> Assasanto (Syā)

<sup>5.</sup> Viravantiyāpi me tayā saddo na suto devāti (Sī, Syā)

<sup>2.</sup> Kim bhavissati (Sī)

<sup>4.</sup> Dandharājā (Sī)

Sāmāvatīpi pañcannam itthisatānam ovādam adāsi "ammā amhākam aññam paṭisaraṇam natthi, Narinde ca deviyā ca attani ca samameva mettacittam pavattetha, mā kassaci kopam karitthā"ti. Rājā sahassathāmam siṅgadhanum ādāya jiyam pothetvā visapītam saram sannayhitvā Sāmāvatim dhure¹ katvā sabbā tā paṭipāṭiyā ṭhapāpetvā Sāmāvatiyā ure saram vissajjesi. So tassā mettānubhāvena paṭinivattitvā āgatamaggābhimukhova hutvā rañño hadayam pavisanto viya aṭṭhāsi. Rājā cintesi "mayā khitto saro silampi vinivijjhitvā gacchati, ākāse paṭihananakaṭṭhānam² natthi, atha ca panesa nivattitvā mama hadayābhimukho jāto, ayañhi nāma nissatto nijjīvo saropi etissā guṇam jānāti, aham manussabhūtopi na jānāmī"ti, so dhanum chaḍḍetvā añjalim paggayha Sāmāvatiyā pādamūle ukkuṭikam nisīditvā imam gāthamāha—

"Sammuyhāmi pamuyhāmi, sabbā muyhanti me disā. Sāmāvati maṁ tāyassu, tvañca me saranaṁ bhavā"ti.

Sā tassa vacanam sutvā "sādhu deva mam saraṇam gacchā"ti avatvā "yamaham mahārāja saraṇam gatā, tameva tvampi saraṇam gacchāhī"ti idam vatvā Sāmāvatī Sammāsambuddhasāvikā—

"Mā maṁ tvaṁ saraṇaṁ gaccha, yamahaṁ saraṇaṁ gatā. Esa Buddho mahārāja, esa Buddho Anuttaro. Saranaṁ gaccha taṁ Buddhaṁ, tvañca me saranaṁ bhavā"ti—

Āha. Rājā tassā vacanam sutvā "idānāham atirekataram bhāyāmī"ti vatvā imam gāthamāha—

"Esa bhiyyo pamuyhāmi, sabbā muyhanti me disā. Sāmāvati mam tāyassu, tvañca me saraṇam bhavā"ti.

Atha nam sā purimanayeneva puna paṭikkhipitvā "tena hi tvañca saraṇam gacchāmi, Satthārañca saraṇam gacchāmi, varañca te dammī"ti vutte "varo gahito hotu mahārājā"ti āha. So Satthāram upasaṅkamitvā saraṇam gantvā nimantetvā Buddhappamukhassa bhikkhusamghassa sattāham mahādānam

datvā Sāmāvatim āmantetvā "uṭṭhehi, varam gaṇhā"ti āha. Mahārāja mayham hiraññādīhi attho natthi, imam pana me varam dehi, tathā karohi, yathā Satthā nibaddham pañcahi bhikkhusatehi saddhim idhāgacchati, dhammam suṇissāmīti. Rājā Satthāram vanditvā "bhante pañcahi bhikkhusatehi saddhim nibaddham idhāgacchatha, Sāmāvatimissikā 'dhammam suṇissāmā'ti vadantī"ti āha. Mahārāja Buddhānam nāma ekasmim ṭhāne nibaddham gantum na vaṭṭati, mahājano Satthāram āgamanatthāya paccāsīsatīti. Tena hi bhante ekam bhikkhum āṇāpethāti. Satthā Ānandattheram āṇāpesi. So tato paṭṭhāya pañca bhikkhusatāni ādāya nibaddham rājakulam gacchati. Tāpi deviyo nibaddham theram saparivāram bhojenti, dhammam suṇanti. Tā ekadivasam therassa dhammakatham sutvā pasīditvā pañcahi uttarāsangasatehi dhammapūjam akamsu. Ekeko uttarāsango pañca satāni pañca satāni agghati.

Tā ekavatthā disvā<sup>1</sup> rājā pucchi "kuhim vo uttarāsangā"ti. Ayyassa no dinnāti. Tena sabbe gahitāti. Āma gahitāti. Rājā theram upasankamitvā vanditvā tāhi uttarāsangānam dinnabhāvam pucchitvā tāhi dinnabhāvanca therena gahitabhāvañca sutvā "nanu bhante atibahūni vatthāni, ettakehi kimkarissathā"ti pucchi. Amhākam pahonakāni vatthāni ganhitvā sesāni jinnacīvarikānam bhikkhūnam dassāmi mahārājāti. Te attano jinnacīvarāni kim karissantīti. Jinnataracīvarikānam dassantīti. Te attano jinnataracīvarāni kim karissantīti. Paccattharaṇāni karissantīti. Purāṇapaccattharaṇāni kim karissantīti. Bhūmattharaṇāni karissantīti, purāṇabhūmattharaṇāni kim karissantīti. Pādapuñchanāni karissanti mahārājāti. Purānapādapuñchanāni kim karissantīti. Khandākhandikam kottetvā mattikāya madditvā bhittim limpissantīti. Bhante etthakāni katvāpi ayyānam dinnāni na nassantīti. Āma mahārājāti. Rājā pasanno aparānipi pañca vatthasatāni āharāpetvā therassa pādamūle thapāpesi. Thero kira pañcasatagghanakāneva vatthāni pañcasatabhāgena pādamūle thapetvā dinnāni pañcasatakkhattum labhi, sahassagghanakāni sahassabhāgena pādamūle thapetvā dinnāni sahassakkhattum labhi, satasahassagghanakani satasahassabhagena pādamūle thapetvā

<sup>1.</sup> Tāsam ekam vatthampi adisvā (Syā), tāsam santike ekam vattham adisvā (Ka)

dinnāni satasahassakkhattum labhi. Ekam dve tīņi cattāri pañca dasāti-ādinā nayena laddhānam pana gaṇanā nāma natthi. Tathāgate kira parinibbute thero sakalajambudīpam vicaritvā sabbavihāresu bhikkhūnam attano santakāneva pattacīvarāni adāsi.

Tadā Māgandiyāpi "yamaham karomi, tam tathā ahutvā aññathāva hoti, idāni kim nu kho karissāmī"ti cintetvā "attheso upāyo"ti raññe uyyānakīlam gacchante<sup>1</sup> cūlapitu sāsanam pahini "Sāmāvatiyā pāsādam gantvā dussakotthāgārāni ca telakotthāgārāni ca vivarāpetvā dussāni telacātīsu temetvā temetvā thambhe vethetvā tā sabbāpi ekato katvā dvāram pidahitvā bahi yantakam datvā dandadīpikāhi gehe aggim dadamāno otaritvā gacchatū"ti. So pāsādam abhiruyha kotthāgārāni vivaritvā vatthāni telacātīsu temetvā temetvā thambhe vethetum ārabhi. Atha nam Sāmāvatippamukhā itthiyo "kim etam culapita"ti vadantiyo upasankamimsu. "Amma raja dalhikammatthāya ime thambhe telapilotikāhi vethāpeti, rājagehe nāma suyuttam duyuttam dujjānam, mā me santike hotha ammā"ti evam vatvā tā āgatā gabbhe pavesetvā dvārāni pidahitvā bahi yantakam datvā ādito patthāya aggim dento otari. Sāmāvatī tāsam ovādam adāsi "amhākam anamatagge samsare vicarantīnam evameva aggina jhayamanam attabhāvānam paricchedo Buddhañānenapi na sukaro, appamattā hothā"ti. Tā gehe jhāyante vedanāpariggahakammatthānam manasikarontiyo kāci dutiyaphalam, kāci tatiyaphalam pāpunimsu. Tena vuttam "atha kho sambahulā bhikkhū pacchābhattam pindapātapatikkantā yena Bhagavā tenupasankamimsu, upasankamitvā Bhagavantam abhivādetvā ekamantam nisīdimsu, ekamantam nisinnā kho te bhikkhū Bhagavantam etadavocum 'idha bhante rañño Utenassa uyyānagatassa antepuram daddham, pañca ca itthisatāni kālakatāni Sāmāvatippamukhāni, tāsam bhante upāsikānam kā gati, ko abhisamparāyo'ti. Santettha bhikkhave upāsikāyo sotāpannā, santi sakadāgāminiyo, santi anāgāminiyo, sabbā tā

bhikkhave upāsikāyo anipphalā kālakatāti. Atha kho Bhagavā etamattham viditvā tāyam velāyam imam udānam udānesi—

"Mohasambandhano loko, bhabbarūpova dissati. Upadhībandhano bālo, tamasā parivārito. Sassatoriva khāyati, passato natthi kiñcanan'ti"<sup>1</sup>.

Evañca pana vatvā "bhikkhave sattā nāma vaṭṭe vicarantā niccakālaṁ appamattā hutvā puññakammameva na karonti, pamādino hutvā pāpakammampi karonti. Tasmā vaṭṭe vicarantā sukhampi dukkhampi anubhavantī"ti dhammaṁ desesi.

Rājā "Sāmāvativā geham kira ihāvatī" ti sutvā vegenāgacchantopi adaddhe sampāpunitum nāsakkhi. Āgantvā pana geham nibbāpento uppannabalavadomanasso amaccaganaparivuto nisīditvā Sāmāvatiyā gune anussaranto "kassa nu kho idam kamman"ti cintetvā "Māgandiyāya kāritam bhavissatī"ti ñatvā "tāsetvā pucchiyamānā na kathessati, saņikam upāyena pucchissāmī"ti cintetvā amacce āha "ambho aham ito pubbe utthāya samutthāya āsankitaparisankitova homi, Sāmāvatī me niccam otārameva gavesati, idāni pana me cittam nibbutam bhavissati, sukhena ca vasitum<sup>2</sup> labhissāmī"ti, te "kena nu kho deva idam katan"ti āhamsu. Mayi sinehena kenaci katam bhavissatīti. Māgandiyāpi samīpe thitā tam sutvā "nāñno koci kātum<sup>3</sup> sakkhissati, mayā katam deva, aham cūlapitaram ānāpetvā kāresin"ti āha. Tam thapetvā añño mayi sineho satto nāma natthi, pasannosmi, varam te dammi attano ñātiganam pakkosāpehīti. Sā ñātakānam sāsanam pahiņi "rājā me pasanno varam deti, sīgham āgacchantū"ti. Rājā āgatāgatānam mahantam sakkāram kāresi. Tam disvā<sup>4</sup> tassā aññātakāpi lañjam datvā "mayam Māgandiyāya ñātakā" ti āgacchimsu. Rājā te sabbe gāhāpetvā rājangane nābhippamāne āvāte khanāpetvā te tattha nisīdāpetvā pamsūhi pūretvā upari palāle vikirāpetvā aggim dāpesi. Cammassa daddhakāle ayanangalena kasapetva khandakhandam hirahiram karesi, Magandiyaya sarīratopi

tikhinena satthena ghanaghanaṭṭhānesu maṁsaṁ uppāṭetvā telakapālaṁ uddhanaṁ āropetvā pūve viya pacāpetvā<sup>1</sup> tameva khādāpesi.

Dhammasabhāyampi bhikkhū katham samuṭṭhāpesum "ananucchavikam vata āvuso evarūpāya saddhāya pasannāya² upāsikāya evarūpam maraṇan"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave imasmim attabhāve Sāmāvatippamukhānam itthīnam etam ayuttam sampattam, pubbe katakammassa pana yuttameva etāhi laddhan"ti vatvā "kim bhante etāhi pubbe katam, tam ācikkhathā"ti tehi yācito atītam āhari—

Atīte Bārānasiyam Brahmadatte rajjam kārente rājagehe nibaddham attha Paccekabuddhā bhuñjanti. Pañcasatā itthiyo te upatthahanti. Tesu satta Paccekabuddhā Himavantam gacchanti, eko nadītīre ekam tinagahanam atthi, tattha jhānam samāpajjitvā nisīdi. Athekadivasam rājā Paccekabuddhesu gatesu tā itthiyo ādāya nadiyam udakakīlam kīlitum gato. Tattha tā itthiyo divasabhāgam udake kīlitvā uttaritvā sītapīlitā aggim visibbetukāmā "amhākam aggikaranatthānam olokethā" ti aparāparam vicarantiyo tam tinagahanam disvā "tinarāsī"ti saññāya tam parivāretvā thitā aggim adamsu. Tinesu jhāyitvā patantesu Paccekabuddham disvā "natthāmhā, amhākam rañno Paccekabuddho jhāyati. Rājā natvā amhe nāsessati, sudaddham nam karissāmā"ti sabbā tā itthiyo ito cito ca dārūni āharitvā tassa upari dārurāsim karimsu. Mahādārurāsi ahosi. Atha nam ālimpetvā "idāni jhāyissatī"ti pakkamimsu. Tā pathamam asañcetanikā hutvā kammunā na bajjhimsu, idāni pacchā sancetanāva kammunā bajjhimsu. Paccekabuddham pana antosamāpattiyam sakatasahassehi dārūni<sup>3</sup> āharitvā ālimpentāpi<sup>4</sup> usmākāramattampi gahetum na sakkonti. Tasmā so sattame divase utthāya yathāsukham agamāsi. Tā tassa kammassa katattā bahūni vassasatasahassāni niraye paccitvā tasseva kammassa vipākāvasesena attabhāvasate imināva niyāmena gehe jhāyamāne jhāyimsu. Idam etāsam pubbakammanti.

<sup>1.</sup> Bhajjāpetvā (Sī)

<sup>3.</sup> Sakatasahassa dārūnaṁ (Sī)

<sup>2.</sup> Saddhāsampannāya (Sī, Syā)

<sup>4.</sup> Ālimpetvāpi (Sī)

Evam vutte bhikkhū Satthāram patipucchimsu "Khujjuttarā pana bhante kena kammena khujjā jātā, kena kammena mahāpaññā, kena kammena sotāpattiphalam adhigatā, kena kammena paresam pesanakārikā jatā"ti. Bhikkhave tasseva rañño Bārānasiyam rajjam karanakāle sveva Paccekabuddho thokam khujjadhātuko ahosi. Athekā upatthāyikā itthī kambalam pārupitvā suvannasarakam gahetvā "amhākam Paccekabuddho evañca evañca vicaratī"ti khujjā hutvā tassa vicaranākāram dassesi. Tassa nissandena khujjā jātā. Te pana Paccekabuddhe pathamadivase rājagehe<sup>1</sup> nisīdāpetvā patte gāhāpetvā pāyāsassa pūretvā dāpesi. Unhapāyāsassa pūre patte Paccekabuddhā parivattetvā parivattetvā ganhanti. Sā itthī te tathā karonte disvā attano santakāni attha dantavalayāni datvā "idha thapetvā ganhathā"ti āha. Tesu tathā katvā tam oloketvā thitesu tesam adhippāyam ñatvā "natthi bhante amhākam etehi attho, tumhākaññeva etāni pariccattāni, gahetvā gacchathā"ti āha. Te gahetvā Nandamūlakapabbhāram agamamsu. Ajjatanāpi tāni valayāni arogāneva. Sā tassa kammassa nissandena idāni tipitakadharā mahāpaññā jātā. Paccekabuddhānam kata-upatthānassa nissandena pana sotāpattiphalam pattā. Idamassā Buddhantare pubbakammam.

Kassapasammāsambuddhakāle pana ekā bārāṇasiseṭṭhino dhītā vaḍḍhamānakacchāyāya ādāsaṁ gahetvā attānaṁ alaṅkarontī nisīdi. Athassā vissāsikā ekā khīṇāsavā bhikkhunī taṁ daṭṭhuṁ agamāsi. Bhikkhuniyo hi khīṇāsavāpi sāyanhasamaye upaṭṭhākakulāni daṭṭhukāmā honti. Tasmiṁ pana khaṇe seṭṭhidhītāya santike kāci pesanakārikā natthi, sā "vandāmi ayye, etaṁ tāva me pasādhanapeļakaṁ² gahetvā dethā"ti āha. Therī cintesi "sacassā imaṁ gaṇhitvā na dassāmi, mayi āghātaṁ katvā niraye nibbattissati. Sace pana dassāmi, parassa pesanākārikā hutvā nibbattissati. Nirayasantāpato kho pana parassa pesanabhāvova seyyo"ti. Sā anudayaṁ paṭicca taṁ gahetvā tassā adāsi. Tassa kammassa nissandena paresaṁ pesanākārikā jātāti.

Atha punekadivasam bhikkhū dhammasabhāyam katham samuṭṭhāpesum "Sāmāvatippamukhā pañcasatā itthiyo gehe agginā jhāyimsu, Māgaṇḍiyāya ñātakā upari palālaggim datvā ayanaṅgalehi bhinnā, Māgaṇḍiyā pakkuthitatele¹ pakkā, ke nu kho ettha jīvanti nāma, ke matā nāmā"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave ye keci pamattā, te vassasatam jīvantāpi matāyeva nāma. Ye appamattā, te matāpi jīvantiyeva. Tasmā Māgaṇḍiyā jīvantīpi² matāyeva nāma, Sāmāvatippamukhā pañcasatā itthiyo matāpi jīvantiyeva nāma. Na hi bhikkhave appamattā maranti nāmā"ti vatvā imā gāthā abhāsi—

- 21. "Appamādo amatapadam, pamādo maccuno padam. Appamattā na mīyanti, ye pamattā yathā matā.
- 22. Evam visesato ñatvā, appamādamhi paṇḍitā. Appamāde pamodanti, ariyānam gocare ratā.
- 23. Te jhāyino sātatikā, niccam daļhaparakkamā. Phusanti dhīrā nibbānam, yogakhemam anuttaran"ti.

Tattha **appamādo**tipadam mahantam attham dīpeti, mahantam attham gahetvā tiṭṭhati. Sakalampi hi tepiṭakam Buddhavacanam āharitvā kathiyamānam appamādapadameva otarati. Tena vuttam—

"Seyyathāpi bhikkhave yāni kānici jaṅgalānaṁ pāṇānaṁ padajātāni, sabbāni tāni hatthipade samodhānaṁ gacchanti, hatthipadaṁ tesaṁ aggamakkhāyati yadidaṁ mahantattena. Evameva kho bhikkhave ye keci kusalā dhammā. Sabbete appamādamūlakā appamādasamosaraṇā, appamādo tesaṁ dhammānaṁ aggamakkhāyatī"ti³.

So panesa atthato satiyā avippavāso nāma. Niccam upaṭṭhitāya satiyā cetam nāmam. **Amatapadan**ti amatam vuccati nibbānam. Tañhi ajātattā na jīyati na mīyati, tasmā amatanti vuccati. Pajjanti imināti padam,

amatam pāpunantīti attho. Amatassa padam amatapadam, amatassa adhigamūpāyoti vuttam hoti, pamādoti pamajjanabhāvo, mutthassatisankhātassa satiyā vosaggassetam nāmam. Maccunoti maranassa. Padanti upāyo maggo. Pamatto hi jātim nātivattati, jāto jīyati ceva mīyati cāti pamādo maccuno padam nāma hoti, maranam upeti. Appamattā na mīyantīti satiyā samannāgatā hi appamattā na maranti. Ajarā amarā hontīti na sallakkhetabbam. Na hi koci satto ajaro amaro nāma atthi, pamattassa pana vattam nāma aparicchinnam, appamattassa paricchinnam. Tasmā pamattā jāti-ādīhi aparimuttattā jīvantāpi matāyeva nāma. Appamattā pana appamādalakkhanam vaddhetvā khippam maggaphalāni sacchikatvā dutiyatatiya-attabhāvesu na nibbattanti. Tasmā te jīvantāpi matāpi na mīyantiyeva nāma. Ye pamattā yathā matāti ye pana sattā pamattā, te pamādamaranena matattā, yathā hi jīvitindriyupacchedena matā dārukkhandhasadisā apagataviññānā, tatheva honti. Tesampi hi matānam viya gahatthānam tāva "dānam dassāma, sīlam rakkhissāma, uposathakammam karissāmā"ti ekacittampi na uppajjati, pabbajitānampi "ācariyupajjhāyavattādīni pūressāma, dhutangāni samādiyissāma, bhāvanam vaddhessāmā"ti na uppajjatīti matena te kim nānākaranāva honti. Tena vuttam "ye pamattā yathā matā"ti.

Evam visesato ñatvāti pamattassa vaṭṭato nissaraṇam natthi, appamattassa atthīti evam visesatova jānitvā. Ke panetam¹ visesam jānantīti? Appamādamhi paṇḍitāti ye paṇḍitā medhāvino sappaññā attano appamāde ṭhatvā appamādam vaḍḍhenti, te evam visesakāraṇam jānanti. Appamāde pamodantīti te evam ñatvā tasmim attano appamāde pamodanti, pahamsitamukhā tuṭṭhapahaṭṭhā honti. Ariyānam gocare ratāti te evam appamāde pamodantā tam appamādam vaḍḍhetvā ariyānam Buddhapaccekabuddhabuddhasāvakānam gocarasaṅkhāte catusatipaṭṭhānādibhede sattatimsa bodhipakkhiyadhamme navavidhalokuttaradhamme ca ratā niratā, abhiratā hontīti attho.

Te jhāyinoti te appamattā paṇḍitā aṭṭhasamāpattisaṅkhātena ārammaṇūpanijjhānena vipassanāmaggaphalasaṅkhātena lakkhaṇūpanijjhānena cāti duvidhenapi jhānena jhāyino. Sātatikāti abhinikkhamanakālato paṭṭhāya yāva arahattamaggā¹ satataṁ pavattakāyikacetasikavīriyā. Niccaṁ daṭhaparakkamāti yaṁ taṁ purisathāmenapurisavīriyena purisaparakkamena pattabbaṁ, na taṁ apāpuṇitvā vīriyassa saṇṭhānaṁ bhavissatīti evarūpena vīriyena antarā anosakkitvā niccappavattena daṭhaparakkamena samannāgatā. Phusantīti ettha dve phusanā ñāṇaphusanā ca vipākaphusanā ca. Tattha cattāro maggā ñāṇaphusanā nāma, cattāri phalāni vipākaphusanā nāma. Tesu idha vipākaphusanā adhippetā. Ariyaphalena nibbānaṁ sacchikaronto dhīrā paṇḍitā tāya vipākaphusanāya phusanti, nibbānaṁ sacchikaronti. Yogakkhemaṁ anuttaranti ye cattāro yogā mahājanaṁ vaṭṭe osīdāpenti, tehi khemaṁ nibbhayaṁ sabbehi lokiyalokuttaradhammehi seṭṭhattā anuttaranti.

Desanāpariyosāne bahū sotāpannādayo ahesum. Desanā mahājanassa sātthikā jātāti.

Sāmāvatīvatthu paṭhamam.

# $2.\ Kumbhaghosakas ett hivatthu$

Uṭṭhānavatoti imam dhammadesanam Satthā Veļuvane viharanto Kumbhaghosakam ārabbha kathesi. Rājagahanagarasmim hi rājagahaseṭṭhino gehe ahivātarogo uppajji, tasmim uppanne makkhikā ādim katvā yāva gāvā paṭhamam tiracchānagatā maranti, tato dāsakammakarā, sabbapacchā gehasāmikā, tasmā so rogo sabbapacchā seṭṭhim ca jāyañca gaṇhi. Te rogena phuṭṭhā puttam santike ṭhitam oloketvā assupuṇṇehi nettehi tam āhamsu "tāta imasmim kira roge uppanne bhittim bhinditvā palāyantāva² jīvitam labhanti, tvam amhe anoloketvā palāyitvā jīvanto punāgantvā amhākam asukaṭṭhāne nāma cattālīsa

dhanakoṭiyo nidahitvā ṭhapitā, tā uddharitvā jīvikaṁ kappeyyāsī"ti. So tesaṁ vacanaṁ sutvā rudamāno mātāpitaro vanditvā maraṇabhayabhīto bhittiṁ bhinditvā palāyitvā pabbatagahanaṁ gantvā dvādasa vassāni tattha vasitvā mātāpituvasanatthānaṁ paccāgañchi.

Atha naṁ daharakāle gantvā parūļhakesamassukāle āgatattā na koci sañjāni. So mātāpitūhi dinnasaññāvasena dhanaṭṭhānaṁ gantvā dhanassa arogabhāvaṁ ñatvā cintesi "maṁ na koci sañjānāti, sacāhaṁ dhanaṁ uddharitvā valañjissāmi, 'ekena duggatena nidhi uddhaṭo'ti maṁ gahetvā viheṭheyyuṁ, yannūnāhaṁ bhatiṁ katvā jīveyyan'ti. Athekaṁ pilotikaṁ nivāsetvā "atthi koci bhatakena¹ atthiko'ti pucchanto bhatakavīthiṁ pāpuṇi. Atha naṁ bhatakā disvā "sace amhākaṁ ekaṁ kammaṁ karissasi, bhattavetanaṁ te dassāmā'ti āhaṁsu. Kiṁ kammaṁ nāmāti. Pabodhanacodanakammaṁ. Sace ussahasi, pātova uṭṭhāya "tātā uṭṭhahatha, sakaṭāni sannayhatha², goṇe yojetha, hatthi-assānaṁ tiṇatthāya gamanavelā, ammā tumhepi uṭṭhahatha, yāguṁ pacatha, bhattaṁ pacathā'ti vicaritvā ārocehīti. So "sādhū"ti sampaṭicchi. Athassa vasanatthāya ekaṁ gharaṁ adaṁsu. So devasikaṁ taṁ kammaṁ akāsi.

Athassa ekadivasam rājā Bimbisāro saddamassosi. So pana sabbaravaññū³ ahosi. Tasmā "mahādhanassa purisassesa saddo"ti āha. Athassa santike ṭhitā ekā paricārikā "rājā yam vā tam vā na kathessati, idam mayā ñātum vaṭṭatī"ti cintetvā "gaccha tāta, etam jānāhī"ti ekam purisam pahiṇi. So vegena gantvā tam disvā āgantvā "eko bhatakānam bhatikārako kapaṇamanusso eso"ti ārocesi. Rājā tassa vacanam sutvā tuṇhī hutvā dutiyadivasepi tatiya divasepi tam tassa saddam sutvā tatheva āha. Sāpi paricārikā tatheva cintetvā punappunam pesetvā "kapaṇamanusso eso"ti vutte cintesi "rājā 'kapaṇamanusso eso'ti vacanam sutvāpi na saddahati, punappunam 'mahādhanassa purisassesa saddo'ti vadati, bhavitabbamettha kāraṇena, yathāsabhāvato etam ñātum vaṭṭatī"ti. Sā rājānam āha

"Deva aham sahassam labhamānā dhītaram ādāya gantvā etam dhanam rājakulam pavesessāmī"ti. Rājā tassā sahassam dāpesi.

Sā tam gahetvā dhītaram ekam malinadhātukam vattham nivāsāpetvā tāya saddhim rājagehato nikkhamitvā maggapatipannā viya bhatakavīthim gantvā ekam gharam pavisitvā "amma mayam maggapatipannā, ekāhadvīham idha vissamitvā gamissāmā"ti āha. Amma bahūni gharamānusakāni, na sakkā idha vasitum, etam Kumbhaghosakassa geham tuccham, tattha gacchathati. Sa tattha gantva "sami mayam maggapatipannakā, ekāhadvīham idha vasissāmā"ti vatvā tena punappunam patikkhittāpi "sāmi ajjekadivasamattam vasitvā pātova gamissāmā"ti nikkhamitum na icchi. Sā tattheva vasitvā punadivase tassa araññagamanavelāya "sāmi tava nivāpam datvā yāhi, āhāram te pacissāmī"ti vatvā "alam amma, ahameva pacitvā bhuñjissāmī"ti vutte punappunam nibandhitvā tena dinne gahitamattakeyeva katvā antarāpanato bhājanāni ceva parisuddhatandulādīni ca āharāpetvā rājakule pacananiyāmena suparisuddham odanam, sādhurasāni ca dve tīni sūpabyanjanāni pacitvā tassa araññato agatassa adasi. Atha nam bhuñjitva muducittatam apannam ñatvā "sāmi kilantamha, ekāhadvīham idheva homā"ti āha. So "sādhū"ti sampaticchi.

Athassa sāyampi punadivasepi madhurabhattam pacitvā adāsi. Atha muducittatam tassa ñatvā sāmi katipāham idheva vasissāmāti. Tattha vasamānā tikhiņena satthena tassa mañcavāṇam¹ heṭṭhā-aṭaniyam taham taham chindi. Mañco tasmim āgantvā nisinnamatteyeva heṭṭhā olambi. So "kasmā ayam mañco evam chijjitvā gato"ti āha. Sāmi daharadārake vāretum na sakkomi, ettheva sannipatantīti. Amma idam me dukkham tumhe nissāya jātam. Aham hi pubbe katthaci gacchanto dvāram pidahitvā gacchāmīti. Kim karomi tāta, vāretum na sakkomīti. Sā imināva niyāmena dve tayo divase chinditvā tena ujjhāyitvā khīyitvā niyāmena dve tayo divase chinditvā tena ujjhāyitvā khīyitvā vuccamānāpi tatheva vatvā puna ekam dve rajjuke ṭhapetvā sese chindi. Tam divasam tasmim nisinnamatteyeva sabbam vāṇam bhūmiyam pati, sīsam jaṇṇukehi saddhim ekato ahosi, so utthāya "kim karomi, idāni kuhim

gamissāmi, nipajjanamañcassapi tumhehi asāmiko viya katomhī'ti āha. "Tāta kiṁ karomi, paṭivissakadārake vāretuṁ na sakkomi, hotu, mā cintayi, imāya nāma velāya kuhiṁ gamissasī'ti dhītaraṁ āmantetvā "amma tava bhātikassa nipajjanokāsaṁ karohī''ti āha. Sā ekapasse sayitvā "idhāgaccha sāmī''ti āha. Itarāpi naṁ "gaccha tāta, bhaginiyā saddhiṁ nipajjā''ti vadesi. So tāya saddhiṁ ekamañce nipajjitvā taṁ divasaññeva santhavaṁ akāsi, kumārikā parodi. Atha naṁ mātā pucchi "kiṁ amma rodasī''ti. Amma idaṁ nāma jātanti. "Hotu amma, kiṁ sakkā kātuṁ, tayāpi ekaṁ bhattāraṁ, imināpekaṁ pādaparicārikaṁ laddhuṁ vaṭṭatī''ti taṁ jāmātaraṁ akāsi. Te samaggavāsaṁ¹ vasiṁsu.

Sā katipāhaccayena rañño sāsanam pesesi "tatakavīthiyam chanam karontu, yassa pana ghare chano na karīyati, tassa ettako nāma dandoti ghosanam kāretū"ti. Rājā tathā kāresi. Atha nam sassu āha "tāta bhatakavīthiyam rājānāya chano kattabbo jāto, kim karomā"ti. Amma aham bhatim karontopi jīvitum na sakkomi, kim karissāmīti. "Tāta gharāvāsam vasantā nāma inampi ganhanti, rañño ānā akātum na labbhā. Inato nāma yena kenaci upāyena muccitum sakkā, gaccha, kutoci ekam vā dve vā kahāpaņe āharā"ti āha. So ujjhāyanto khīyanto gantvā cattālīsakotidhanatthānato ekameva kahāpanam āhari. Sā tam kahāpanam rañño pesetvā attano kahāpanena chanam katvā puna katipāhaccayena tatheva sāsanam pahini. Puna rājā tatheva "chanam karontu, akarontānam ettato dando"ti ānāpesi. Punapi so tāya tatheva vatvā nippīliyamāno gantvā tayo kahāpane āhari. Sā tepi kahāpane rañño pesetvā puna katipāhaccayena tatheva sāsanam pahini "idāni purise pesetvā imam pakkosāpetū"ti. Rājā pesesi. Purisā gantvā "Kumbhaghosako nāma kataro"ti pucchitvā pariyesantā tam disvā "ehi bho, rājā tam pakkosatī"ti āhamsu. So bhīto "na mam rājā jānātī"ti-ādīni vatvā gantum na icchi. Atha nam balakkārena hatthādīsu

gahetvā ākaḍḍhiṁsu. Sā itthī te disvā "are dubbinītā tumhe mama jāmātaraṁ hatthādīsu gahetuṁ ananucchavikā"ti tajjetvā "ehi tāta, mā bhāyi, rājānaṁ disvā tava hatthādigāhakānaṁ hattheyeva chindāpessāmī"ti dhītaraṁ ādāya purato hutvā rājagehaṁ patvā vesaṁ parivattetvā sabbālaṅkārapaṭimaṇḍitā ekamantaṁ aṭṭhāsi. Itarampi parikaḍḍhitvā ānayiṁsuyeva.

Atha nam vanditvā thitam rājā āha "tvam Kumbhaghosako nāmā"ti. Āma devāti. Kim kāranā mahādhanam vañcetvā khādasīti. Kuto me deva dhanam bhatim katvā jīvantassāti<sup>1</sup>. Mā evam kari, kim amhe vancesīti. Na vañcemi deva, natthi me dhananti. Athassa rājā te kahāpane dassetvā "ime kassa kahāpanā"ti āha. So sañjānitvā "aho bālomhi<sup>2</sup>, katham nu kho ime rañño hattham patta"ti ito cito ca olokento ta dvepi patimanditapasadhana gabbhadvāramūle thitā disvā "bhāriyam vatidam kammam, imāhi raññā payojitāhi bhavitabban"ti cintesi. Atha nam rājā "vadehi bho, kasmā evam karosī"ti āha. Nissayo me natthi devāti. Mādiso nissayo bhavitum na vattatīti. Kalyānam deva, sace me devo avassayo hotīti. Homi bho, kittakam te dhananti. Cattālīsakotiyo devāti. Kim laddhum vattatīti. Sakatāni devāti. Rājā anekasatāni sakatāni yojāpetvā pahinitvā tam dhanam āharāpetvā rājangane rāsim kārāpetvā Rājagahavāsino sannipātāpetvā "atthi kassaci imasmim nagare ettakam dhanan"ti pucchitvā natthi devāti. Kim panassa kātum vaṭṭatīti. "Sakkāram devā"ti vutte mahantena sakkārena tam setthitthane thapetva dhītaram tasseva datva tena saddhim Satthu santikam gantvā vanditvā "bhante passathimam purisam, evarūpo dhitimā nāma natthi, cattālīsakotivibhavo hontopi uppilāvitākāram vā asmimānamattam vā na karoti, kapano viya pilotikam nivāsetvā bhatakavīthiyam bhatim katvā jīvanto mayā iminā nāma upāyena ñāto. Jānitvā ca pana pakkosāpetvā sadhanabhāvam sampaticchāpetvā tam dhanam

āharāpetvā seṭṭhiṭṭhāne ṭhapito, dhītā cassa mayā dinnā. Bhante mayā ca evarūpo dhitimā na diṭṭhapubbo"ti āha.

Tam sutvā Satthā "evam jīvantassa jīvikam dhammikajīvikam nāma, mahārāja corikādikammam pana idhaloke ceva pīļeti himseti, paraloke ca, tatonidānam sukham nāma natthi. Purisassa hi dhanapārijuññakāle kasim vā bhatim vā katvā jīvikameva dhammikajīvikam nāma. Evarūpassa hi vīriyasampannassa satisampannassa kāyavācāhi parisuddhakammassa paññāya nisammakārino kāyādīhi saññatassa dhammajīvikam jīvantassa satiavippavāse thitassa issariyam vaḍḍhatiyevā"ti vatvā imam gāthamāha—

24. "Uṭṭhānavato satīmato,

Sucikammassa nisammakārino.

Saññatassa dhammajīvino,

Appamattassa yasobhivaddhatī"ti.

Tattha uṭṭhānavatoti uṭṭhānavīriyavantassa. Satīmatoti satisampannassa. Sucikammassāti niddosehi niraparādhehi kāyakammādīhi samannāgatassa. Nisammakārinoti evañce bhavissati, evaṁ karissāmīti vā, imasmiṁ kamme evaṁ kate idaṁ nāma bhavissasīti vā evaṁ nidānaṁ sallakkhetvā rogatikicchanaṁ viya sabbakammāni nisāmetvā upadhāretvā karontassa. Saññatassāti kāyādīhi saññatassa nicchiddassa. Dhammajīvinoti agārikassa tulākūṭādīni vajjetvā kasigorakkhādīhi, anagārikassa vejjakammadūtakammādīni vajjetvā dhammena samena bhikkhācariyāya jīvikaṁ kappentassa. Appamattassāti avippavutthasatino. Yasobhivaḍḍhatīti issariyabhogasampannasaṅkhāto¹ ceva kittivaṇṇabhaṇanasaṅkhāto ca yaso abhivaḍḍhatīti.

Gāthāpariyosāne Kumbhaghosako sotāpattiphale patiṭṭhahi. Aññepi bahū sotāpattiphalādīni pāpuṇimsu. Evam mahājanassa sātthikā dhammadesanā jātāti.

Kumbhaghosakasetthivatthu dutiyam.

#### 3. Cūļapanthakattheravatthu

**Uṭṭhānena'ppamādenā**ti imaṁ dhammadesanaṁ Satthā Veļuvane viharanto Cūļapanthakattheraṁ ārabbha kathesi.

Rājagahe kira Dhanasetthikulassa dhītā vayappattakāle mātāpitūhi sattabhūmikassa pāsādassa uparimatale ativiya rakkhiyamānā yobbanamadamattatāya purisalolā hutvā attano dāseneva saddhim santhavam katvā "aññepi me idam kammam jāneyyun"ti bhītā evamāha "amhehi imasmim thāne na sakkā vasitum. Sace me mātāpitaro imam dosam jānissanti, khandākhandikam mam karissanti, videsam gantvā vasissāmā"ti. Te hatthasāram gahetvā aggadvārena<sup>1</sup> nikkhamitvā "yattha vā tattha vā aññehi ajānanatthānam gantvā vasissāmā"ti ubhopi agamamsu. Tesam ekasmim thāne vasantānam samvāsamanvāva tassā kucchismim gabbho patitthāsi. Sā gabbhaparipākam āgamma tena saddhim mantesi "gabbho me paripākam gato, ñātibandhuvirahite thāne gabbhavutthānam nāma ubhinnampi amhākam dukkhāvaham, kulagehameva gacchāmā"ti. So "sacāham tattha gamissāmi, jīvitam me natthī"ti bhayena "ajja gacchāma, sve gacchāmā"ti divase atikkāmesi. Sā cintesi "ayam bālo attano dosamahantatāya gantum na ussahati, mātāpitaro nāma ekantahitāva<sup>2</sup>, ayam gacchatu vā, mā vā, aham gamissāmī"ti. Sā tasmim gehā nikkhante gehaparikkhāram patisāmetvā attano kulagharam gatabhāvam anantaragehavāsīnam ārocetvā maggam patipajji.

Sopi gharam āgantvā tam adisvā paṭivissake pucchitvā "sā kulagharam gatā"ti sutvā vegena anubandhitvā antarāmagge sampāpuṇi. Tassāpi tattheva gabbhavuṭṭhānam ahosi. So "kim idam bhadde"ti pucchi. Sāmi me eko putto jātoti. Idāni kim karissāmāti. "Yassatthāya mayam kulagharam gaccheyyāma, tam kammam antarāmaggeva nipphannam, tattha gantvā kim karissāma, nivattissāmā"ti dvepi ekacittā hutvā nivattimsu. Tassa ca dārakassa panthe jātattā **Panthako**ti nāmam karimsu. Tassā na cirasseva aparopi gabbho patiṭṭhahi. Sabbam

purimanayeneva vitthāretabbam. Tassapi dārakassa panthe jātattā pathamajātassa **Mahāpanthako**ti nāmam katvā itarassa<sup>1</sup> **Cūlapanthako**ti nāmam karimsu. Te dvepi dārake gahetvā attano vasanatthānameva gatā. Tesam tattha vasantānam Mahāpanthakadārako aññe dārake "cūlapitā mahāpitāti, ayyako ayyikā"ti ca vadante sutvā mātaram pucchi "amma aññe dārakā 'avvako avvikā'tipi, mahāpitā cūlapitā'tipi vadanti, kacci amhākaññeva ñātakā natthī"ti. Āma tāta, amhākam2 ettha ñātakā natthi. Rājagahanagare pana vo Dhanasetthi nāma ayyako, tattha amhākam bahū ñātakāti. Kasmā tattha na gacchatha<sup>3</sup> ammāti. Sā attano agamanakāranam puttassa akathetvā puttesu punappunam kathentesu sāmikam āha "ime dārakā mam ativiya kilamenti, kim no mātāpitaro disvā mamsam khādissanti, ehi, dārakānam ayyakakulam dassessāmā"ti. Aham sammukhā bhavitum na sakkhissāmi, te pana nayissāmīti. Sādhu yena kenaci upāyena dārakānam ayyakakulameva datthum vattatīti. Dvepi janā dārake ādāya anupubbena Rājagaham patvā nagaradvāre ekissā sālāya pavisitvā dārakamātā dve dārake gahetvā attano āgatabhāvam mātāpitūnam ārocāpesi. Te tam sāsanam sutvā "samsāre vicarantānam na putto na dhītā bhūtapubbā nāma natthi, te amhākam mahāparādhikā, na sakkā tehi amhākam cakkhupathe thātum, ettakam nāma dhanam gahetvā dvepi janā phāsukatthānam gantvā jīvantu, dārake pana idha pesentū"ti dhanam datvā dūtam pāhesum.

Tehi pesitam dhanam gahetvā dārake āgatadūtānaññeva hatthe datvā pahiņimsu. Dārakā ayyakakule vaḍḍhanti. Tesu Cūļapanthako atidaharo. Mahāpanthako pana ayyakena saddhim Dasabalassa dhammakatham sotum gacchati. Tassa niccam Satthu santikam gacchantassa pabbajjāya cittam nami. So ayyakam āha "sace mam anujāneyyātha, aham pabbajeyyan"ti. Kim vadesi tāta, sakalassa lokassapi<sup>4</sup> me pabbajjāto tava pabbajjā bhaddikā<sup>4</sup>. Sace sakkosi, pabbajāhīti.

<sup>1.</sup> Pacchājātassa (Syā)

<sup>2.</sup> Tumhākam (Sī, Ka)

<sup>3.</sup> Na gacchāma (Sī, Syā)

<sup>4-4.</sup> Me pabbajjā avāritā, tasmā tava pabbajjā bhaddakā (Ka)

tam Satthu santikam netvā "kim gahapati dārako te laddho"ti vutte "āma bhante, ayam me nattā tumhākam santike pabbajitukāmo"ti āha. Satthā aññataram viņḍapātacārikam bhikkhum imam dārakam pabbājehī"ti āṇāpesi. Thero tassa tacapañcakakammaṭṭhānam ācikkhitvā pabbājesi. So bahum Buddhavacanam uggaṇhitvā paripuṇṇavasso upasampadam labhitvā yonisomanasikārena kammaṭṭhānam karonto arahattam pāpuṇi. So jhānasukhena phalasukhena vītināmento cintesi "sakkā nu kho idam sukham Cūļapanthakassa dātun"ti. Tato ayyakaseṭṭhissa santikam gantvā evamāha "mahāseṭṭhi sace anujāneyyātha, aham Cūļapanthakam pabbājeyyan"ti. Pabbājetha bhanteti. Seṭṭhi kira sāsane ca suppasanno, "kataradhītāya vo ete puttā"ti pucchiyamāno ca "palātadhītāyā"ti vattum lajjati. Tasmā sukheneva tesam pabbajjam anujāni. Thero Cūļapanthakam pabbājetvā sīletu patiṭṭhāpesi. So pabbajitvāva dandho ahosi.

"Padmam yathā kokanadam sugandham, Pāto siyā phullamavītagandham. Angīrasam passa virocamānam, Tapantamādiccamivantalikkhe"ti<sup>1</sup>—

Imam ekam gātham catūhi māsehi uggaņhitum nāsakkhi. So kira Kassapasammāsambuddhakāle pabbajitvā paññavā hutvā aññatarassa dandhabhikkhuno uddesaggahaṇakāle parihāsakeļim akāsi. So bhikkhu tena parihāsena lajjito neva uddesam gaṇhi, na sajjhāyamakāsi. Tena kammena ayam pabbajitvāva dandho jāto, gahitagahitam padam uparūparipadam gaṇhantassa nassati. Tassa imameva gātham uggahetum vā yamantassa cattāro māsā atikkantā. Atha nam Mahāpanthako "Cūļapanthaka tvam imasmim sāsane abhabbo, catūhi māsehi ekam gāthampi gaṇhitum na sakkosi, pabbajitakiccam pana katham matthakam pāpessasi, nikkhama ito"ti vihārā nikkaḍḍhi. Cūļapanthako Buddhasāsane sinehena gihibhāvam na pattheti.

Tasmim ca kāle Mahāpanthako bhattuddesako ahosi, Jīvako Komārabhacco bahum mālāgandhavilepanam ādāya attano

Ambavanam gantvā Satthāram pūjetvā dhammam sutvā uṭṭhāyāsanā Dasabalam vanditvā Mahāpanthakam upasankamitvā "kittakā bhante Satthu santike bhikkhū"ti pucchi. Pañcamattāni bhikkhusatānīti. Sve bhante Buddhappamukhāni pañca bhikkhusatāni ādāya amhākam nivesane bhikkham gaṇhathāti. "Upāsaka Cūļapanthako nāma bhikkhu dandho aviruļhidhammo, tam ṭhapetvā sesānam nimantanam sampaṭicchāmī"ti thero āha. Tam sutvā Cūļapanthako cintesi "thero ettakānam bhikkhūnam nimantanam sampaṭicchanto mam bāhiram katvā sampaṭicchati, nissamsayam mayham bhātikassa mayi cittam bhinnam bhavissati, kim dāni mayham iminā sāsanena, gihī hutvā dānādīni puññāni karonto jīvissāmī"ti. So punadivase pātova vibbhamitum pāyāsi.

Satthā paccūsakāleyeva lokam volokento imam kāranam disvā pathamataram gantvā Cūlapanthakassa gamanamagge dvārakotthake cankamanto atthāsi. Cūlapanthako gacchanto Satthāram disvā upasankamitvā vanditvā atthāsi. Atha nam Satthā "kuhim pana tvam Cūlapanthaka imāya velāya gacchasī"ti āha. Bhātā mam bhante nikkaddhati, tenāham vibbhamitum gacchāmīti. Cūlapanthaka tava pabbajjā nāma mama santakā<sup>1</sup>, bhātarā nikkaddhito kasmā mama santikam nāgañchi, ehi, kim te gihibhāvena, mama santike bhavissasī"ti cakkaṅkitatalena pāninā taṁ sirasi<sup>2</sup> parāmasitvā ādāya gantvā Gandhakutippamukhe nisīdāpetvā "Cūļapanthaka puratthābhimukho hutvā imam pilotikam 'rajoharanam rajoharanan'ti parimajjanto idheva hohī"ti iddhiyā abhisankhatam parisuddham pilotikam datvā kāle ārocite bhikkhusamghaparivuto Jīvakassa geham gantvā paññattāsane nisīdi. Cūļapanthakopi sūriyam olokento tam pilitikam "rajoharanam rajoharanan"ti parimajjanto nisīdi. Tassa tam pilotikakhandam parimajjantassa kilittham ahosi. Tato cintesi "idam pilotikakhandam ativiya parisuddham. Imam pana attatāvam nissāya purimapakatim vijahitvā evam kilittham jātam, aniccā vata sankhārā"ti khayavayam patthapento vipassanam vaddhesi. Satthā Cūlapanthakassa cittam vipassanam ārulhan"ti ñatvā "Cūļapanthaka tvam pilotikakhandameva samkilitham 'rajam rajan'ti mā saññam kari, abbhantare pana te rājarajādayo atthi, te

harāhī"ti vatvā obhāsam vissajjetvā purato nisinno viya paññāyamānarūpo hutvā imā gāthā abhāsi—

"Rāgo rajo na ca pana reņu vuccati, Rāgassetam adhivacanam rajoti. Etam rajam vippajahitva bhikkhavo, Viharanti te vigatarajassa sāsane.

Doso rajo na ca pana reņu vuccati, Dosassetam adhivacanam rajoti. Etam rajam vippajahitva bhikkhavo, Viharanti te vigaharajassa sāsane.

Moho rajo na ca pana reņu vuccati, Mohassetam adhivacanam rajoti, Etam rajam vippajahitva bhikkhavo, Viharanti te vigatarajassa sāsane"ti<sup>1</sup>.

Gāthāpariyosāne Cūļapanthako saha paṭisambhidāhi arahattaṁ pāpuṇi. Saha patisambhidāhiyevassa tīni pitakāni āgamiṁsu.

So kira pubbe rājā hutvā nagaram padakkhiņam karonto nalāṭato sede muccante parisuddhena sāṭakena nalāṭantam puñchi, sāṭako kiliṭṭho ahosi. So "imam sarīram nissāya evarūpo parisuddho sāṭako pakatim jahitvā kiliṭṭho jāto, aniccā vata sankhārā"ti aniccasaññam paṭilabhi. Tena kāraṇenassa rajoharaṇameva paccayo jāto.

Jīvakopi kho Komārabhacco Dasabalassa dakkhiņodakam upanāmesi. Satthā "nanu Jīvaka vihāre bhikkhū atthī"ti hatthena pattam pidahi. Mahāpanthako "nanu bhante vihāre bhikkhū natthī"ti āha. Satthā "atthi Jīvakā"ti āha. Jīvako "tena hi bhaņe gaccha, vihāre bhikkhūnam atthibhāvam vā natthibhāvam vā tvaññeva jānāhī"ti purisam pesesi. Tasmim khane Cūlapanthako "mayham bhātiko vihāre bhikkhū natthīti

bhaṇati, vihāre bhikkhūnam atthibhāvamassa pakāsessāmī"ti sakalam ambavanam bhikkhūnameva pūresi. Ekacce bhikkhū cīvarakammam karonti, ekacce rajanakammam karonti, ekacce sajjhāyam karonti. Evam amamama-asadisam bhikkhusahassam māpesi. So puriso vihāre bahū bhikkhū disvā nivattitvā "ayya sakalam Ambavanam bhikkhūhi paripuṇṇan"ti Jīvakassa ārocesi. Theropi kho tattheva—

Sahassakkhattumattānam, nimminitvāna Panthako. Nisīdambavane ramme, yāva kālappavedanāti.

Atha Satthā tam purisam āha "vihāram gantvā 'Satthā Cūļapanthakam nāma pakkosatī'ti vadehī''ti. Tena gantvā tathā vutte "aham Cūlapanthako, aham Culapanthako"ti mukhasahassam utthahi. So puriso puna gantva "sabbepi kira bhante Cūlapanthakāyeva nāmā"ti āha. Tena hi gantvā yo "aham Cūlapanthako"ti pathamam vadati, tam hatthe ganha, avasesā antaradhāyissantīti. So tathā akāsi. Tāvadeva sahassamattā bhikkhū antaradhāyimsu. Theropi tena purisena saddhim agamāsi. Satthā bhattakiccapariyosāne Jīvakam āmantesi "Jīvaka Cūlapanthakassa pattam ganhāhi, ayam te anumodanam karissatī"ti. Jīvako tathā akāsi. Thero sīhanādam nadanto tarunasīho viya tīhi pitakehi<sup>1</sup> sankhobhetvā anumodanamakāsi. Satthā utthāyāsanā bhikkhusamghaparivuto vihāram gantvā bhikkhūhi vatte dassite Gandhakutippamukhe thatvā bhikkhusamghassa Sugatovādam datvā kammatthānam kathetvā bhikkhusamgham uyyojetvā surabhigandhavāsitam Gandhakutim pavisitvā dakkhinena passena sīhaseyyam upagato. Atha sāyanhasamaye bhikkhū ito cito ca samosaritvā rattakambalasāniyā parikkhittā viya<sup>2</sup> nisīditvā Satthu gunakatham ārabhimsu "āvuso Mahāpanthako Cūlapanthakassa ajjhāsayam ajānanto catūhi māsehi ekam gātham ugganhāpetum na sakkoti, 'dandho ayan'ti vihārā nikkaddhi, Sammāsambuddho pana attano anuttaradhammarājatāya ekasmim yevassa antarabhatte saha patisambhidāhi arahattam adāsi, tīni pitakāni saha patisambhidāhiyeva āgatāni, aho Buddhānam balam nāma mahantan"ti.

Atha Bhagavā dhammasabhāyam imam kathāpavattim ñatvā "ajja mayā gantum vattatī"ti Buddhaseyyāya utthāya surattadupattam nivāsetvā vijjulatam viya kayabandhanam bandhitva rattakambalasadisam Sugatamahācīvaram pārupitvā surabhigandhakutito nikkhamma mattavaravāranasīhavijambhita<sup>1</sup> vilāsena anantāya Buddhalīlāya dhammasabham gantvā alankatamandalamālamajihe<sup>2</sup> supaññattavarabuddhāsanam abhiruyha chabbannabuddharamsiyo vissajjento annavakucchim khobhayamano yugandharamatthake balasuriyo viya āsanamajihe nisīdi. Sammāsambuddhe pana āgatamatte bhikkhusamgho katham pacchinditvā tunhī ahosi. Satthā mudukena mettacittena parisam oloketvā "ayam parisā ativiya sobhati, ekassapi hatthakukkuccam vā pādakukkuccam vā ukkāsitasaddo vā khipitasaddo vā natthi, sabbepi ime Buddhagāravena sagāravā, Buddhatejena tajjitā. Mayi āyukappampi akathetvā nisinne pathamam katham samutthāpetvā na kathessanti. Kathāsamutthāpanavattam nāma mayāva jānitabbam, ahameva pathamam kathessāmī"ti madhurena brahmassarena bhikkhū āmantetvā "kāya nuttha bhikkhave etarahi kathāya sannisinnā, kā ca pana vo antarākathā vippakathā"ti pucchitvā "imāya nāmā"ti vutte "na bhikkhave Cūļapanthako idāneva dandho, pubbepi dandhoyeva. Na kevalañcassāham idāneva avassayo jato, pubbepi avassayo ahosimeva. Pubbe panaham imam lokiyakutumbassa sāmikam akāsim, idāni lokuttarakutumbassā"ti vatvā tamattam vittharato sotukamehi bhikkhuhi ayacito atītam ahari—

Atīte bhikkhave Bārāṇasinagaravāsī eko māṇavo Takkasilaṁ gantvā sippuggahaṇatthāya disāpāmokkhassa ācariyassa dhammante vāsiko hutvā pañcannaṁ māṇavakasatānaṁ antare ativiya ācariyassa upakārako ahosi, pādaparikammādīni sabbakiccāni karoti. Dandhatāya pana kiñci uggaṇhituṁ na sakkoti. Ācariyo "ayaṁ mama bahūpakāro, sikkhāpessāmi nan"ti vāyamantopi kiñci sikkhāpetuṁ na sakkoti. So ciraṁ vasitvā ekagāthampi uggaṇhituṁ asakkonto ukkaṇṭhitvā "gamissāmī"ti ācariyaṁ āpucchi. Ācariyo cintesi "ayaṁ mayhaṁ upakārako, paṇḍitabhāvamassa paccāsīsāmi, na naṁ kātuṁ

sakkomi, avassam mayā imassa paccupakāro kātabbo, ekamassa mantam bandhitvā dassāmī"ti so tam araññam netvā "ghaṭṭesi ghaṭṭesi¹, kim kāraṇā ghaṭṭesi, ahampi tam jānāmi jānāmī"ti imam mantam bandhitvā uggaṇhāpento anekasatakkhattum parivattāpetvā "paññāyati te"ti pucchitvā "āma paññāyatī"ti vutte "dandhena nāma vāyāmam katvā paguṇam katam sippam na palāyatī"ti cintetvā maggaparibbayam datvā "gaccha, imam mantam nissāya jīvissasi, apalāyanatthāya panassa niccam sajjhāyam kareyyāsī"ti vatvā tam uyyojesi. Athassa mātā Bārāṇasiyam sampattakāle "putto me sippam sikkhitvā āgato"ti mahāsakkārasammānam akāsi.

Tadā Bārāṇasirājā "atthi nu kho me kāyakammādīsu koci doso"ti paccavekkhanto attano aruccanakam kiñci kammam adisvā "attano vajjam nāma attano na paññāyati, paresam paññāyati, nāgarānam² pariggaṇhissāmī"ti cintetvā sāyam aññātakavesena nikkhamitvā "sāyamāsam bhuñjitvā nisinnamanussānam kathāsallāpo nāma nānappakārako hoti, 'sacāham adhammena rajjam kāremi, pāpena adhammikena raññā daṇḍabali-ādīhi hatamhā'ti vakkhanti. 'Sace dhammena rajjam kāremi, dīghāyuko hotu no rājā'ti-ādīni vatvā mama guṇam kathessantī"ti tesam tesam gehānam bhitti-anusāreneva vicarati.

Tasmim khaņe umangacorā dvinnam gehānam antare umangam bhindanti eka-umangeneva dve gehāni pavisanatthāya. Rājā te disvā gehacchāyāya aṭṭhāsi. Tesam umangam bhinditvā geham pavisitvā bhaṇḍakam olokitakāle³ māṇavo pabujjhitvā tam mantam sajjhāyanto "ghaṭṭesi ghaṭṭesi, kim kāraṇā ghaṭṭesi, ahampi tam jānāmi jānāmī"ti āha. Te tam sutvā "iminā kiramhā ñātā, idāni no nāsessatī"ti nivatthavatthānipi chaḍḍetvā bhītā sammukhasammukhaṭṭhāneneva palāyimsu. Rājā te palāyante disvā itarassa ca mantasajjhāyanasaddam sutvā gehañneva vavatthapetvā nāgarānam pariggaṇhitvā nivesanam pāvisi. So vibhātāya pana rattiyā pātovekam purisam pakkositvā āha "gaccha bhaṇe, asukavīthiyam nāma yasmim gehe umango bhinno, tattha takkasilato sippam ugganhitvā āgatamānavo atthi, tam ānehī"ti.

so gantvā "rājā taṁ pakkosatī"ti vatvā māṇavaṁ ānesi. Atha naṁ rājā āha "tvaṁ tāta Takkasilato sippaṁ uggaṇhitvā āgatamāṇavo"ti. Āma devāti. Amhākampi taṁ sippaṁ dehīti. Sādhu deva, samānāsane nisīditvā gaṇhāhīti. Rājāpi tathā katvā mantaṁ gahetvā "ayaṁ te ācariyabhāgo"ti sahassaṁ adāsi.

Tadā senāpati rañño kappakam āha "kadā rañño massum karissasī"ti. Sve vā parasuve vāti. So tassa sahassam datvā "kiccam me atthī" ti vatvā "kim sāmī"ti vutte rañño massukammam karonto viya hutvā khuram ativiya pahamsitvā galanālim chinda, tvam senāpati bhavissasi, aham rājāti. So "sādhū"ti sampaticchitvā rañño massukammakaranadivase gandhodakena massum temetvā khuram pahamsitvā<sup>1</sup> nalātante gahetvā "khuro thokam kunthadhāro, ekappahāreneva galanālim chinditum vattatī"ti puna ekamantam thatvā khuram pahamsi. Tasmim khane rājā attano mantam saritvā sajjhāyam karonto "ghattesi ghattesi, kim kāranā ghattesi, ahampi tam jānāmi jānāmī"ti āha. Nhāpitassa nalātato sedā muccimsu. So "jānāti mama kāranam<sup>3</sup> rājā"ti bhīto khuram bhūmiyam khipitvā pādamūle urena nipajji. Rājāno nāma chekā honti, tena tam evamāha "are duttha nhāpita 'na mam rājā jānātī'ti saññam karosī"ti. Abhayam me dehi devāti. Hotu, mā bhāyi, kathehīti. Senāpati me deva sahassam datvā "rañño massum karonto viya galanālim chinda, aham rājā hutvā tam senāpatim karissāmī"ti āhāti. Rājā tam sutvā "ācariyam me nissāya jīvitam laddhan"ti cintetvā senāpatim pakkosāpetvā "ambho senāpati kim nāma tayā mama santikā na laddham, idāni tam datthum na sakkomi, mama ratthā nikkhamāhī"ti tam ratthā pabbājetvā ācariyam pakkosāpetvā "ācariya tam nissāya mayā jīvitam laddhan"ti vatvā mahantam sakkāram karitvā tassa senāpatitthānam adāsi. So tadā Cūlapanthako ahosi, Satthā disāpāmokkho ācariyoti.

Satthā imam atītam āharitvā "evam bhikkhave pubbepi Cūļapanthako dandhoyeva ahosi, tadāpissāham avassayo hutvā tam lokiya

kuṭumbe patiṭṭhāpesin"ti vatvā puna ekadivasaṁ "aho Satthā Cuḷapanthakassa avassayo jāto"ti kathāya samuṭṭhitāya Cūḷaseṭṭhijātake atīṭayatthuṁ kathetyā—

"Appakenāpi medhāvī, pābhatena vicakkhaņo.
Samutthāpeti attānam, anum aggimva sandhaman"ti<sup>1</sup>—

Gātham vatvā "na bhikkhave idānevāham imassa avassayo jāto, pubbepi avassayo ahosimeva. Pubbe panāham imam lokiyakuṭumbassa sāmikam akāsim, idāni lokuttarakuṭumbassa. Tadā hi² cūļantevāsiko Cūļapanthako ahosi, Cūļaseṭṭhi pana paṇḍito byatto nakkhattakovido ahamevā"ti jātakam samodhānesi.

Punekadivasam dhammasabhāyam katham samuṭṭhāpesum "āvuso Cūļapanthako catūhi māsehi catuppadam gātham gahetum asakkontopi vīriyam anossajjitvāva arahatte patiṭṭhito, idāni lokuttaradhammakuṭumbassa sāmiko jāto"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave mama sāsane āraddhavīriyo bhikkhu lokuttaradhammassa sāmiko hotiyevā"ti vatvā imam gāthamāha—

25. "Uṭṭhānena'ppamādena, samyamena damena ca. Dīpam kayirātha medhāvī, yam ogho nābhikīratī''ti.

Tattha dīpaṁ kayirāthāti vīriyasaṅkhātena uṭṭhānena, satiyā avippavāsākārasaṅkhātena appamādena, catupārisuddhisīlasaṅkhātena saṁyamena, indriyadamena cāti imehi kāraṇabhūtehi catūhi dhammehi dhammojapaññāya samannāgato medhāvī imasmiṁ ativiya dullabhapatiṭṭhatāya atigambhīre saṁsārasāgare attano patiṭṭhānabhūtaṁ arahattaphalaṁ dīpaṁ kayi rātha kareyya, kātuṁ sakkuṇeyyāti attho. Kīdisaṁ? Yaṁ ogho nābhikīratīti yaṁ catubbidhopi kilesogho abhikirituṁ viddhaṁsetuṁ na sakkoti. Na hi sakkā arahattaṁ oghena abhikiritunti.

Gāthāpariyosāne bahū sotāpannādayo ahesum. Evam desanā sampattaparisāya sātthikā jātāti.

Cūļapanthakattheravatthu tatiyam.

#### 4. Bālanakkhattasanghutthavatthu

**Pamādamanuyuñjantī**ti imam dhammadesanam Satthā Jetavane viharanto Bālanakkhattam ārabbha kathesi.

Ekasmim hi samaye Sāvatthiyam Bālanakkhattam nāma sanghuttham. Tasmim nakkhatte bālā dummedhino janā chārikāya ceva gomayena ca sarīram makkhetvā sattāham asabbham¹ bhanantā vicaranti. Kiñci ñāti² suhajjam vā pabbajitam vā disvā lajjantā nāma natthi. Dvāre dvāre thatvā asabbham bhananti. Manussā tesam asabbham sotum asakkontā yathābalam addham vā pādam vā kahāpanam vā pesenti. Te tesam dvāre laddham laddham gahetvā pakkamanti. Tadā pana Sāvatthiyam pañca kotimattā ariyasāvakā vasanti, te Satthu santikam sāsanam pesayimsu "Bhagavā bhante sattāham bhikkhusamghena saddhim nagaram appavisitvā vihāreyeva hotū"ti. Tañca pana sattāham bhikkhusamghassa vihāreyeva yāgubhattādīni sampādetvā pahinimsu, sayampi gehā na nikkhamimsu. Te nakkhatte pana pariyosite atthame divase Buddhappamukham bhikkhusamgham nimantetvā nagaram pavesetvā mahādānam datvā ekamantam nisinnā "bhante atidukkhena no satta divasāni atikkantāni, bālānam asabbhāni sunantānam kannā bhijjanākārappattā honti, koci kassaci na lajjati, tena mayam tumhākam antonagaram pavisitum nādamha, mayampi gehato na nikkhamimhā"ti āhamsu. Satthā tesam katham sutvā "bālānam dummedhānam kiriyā, nāma evarūpā hoti, medhāvino pana dhanasāram viya appamādam rakkhitvā amatamahānibbānasampattim pāpunantī"ti vatvā imā gāthā abhāsi—

26. "Pamādamanuyuñjanti, bālā dummedhino janā. Appamādañca medhāvī, dhanam seṭṭhamva rakkhati.

27. Mā pamādamanuyuñjetha, mā kāmaratisanthavam. Appamatto hi jhāyanto, pappoti vipulam sukhan''ti.

Tattha bālāti bālyena¹ samannāgatā idhalokaparalokattham ajānantā. Dummedhinoti nippaññā. Te pamāde ādīnavam apassantā pamādam anuyuñjanti pavattenti, pamādena kālam vītināmenti. Medhāvīti dhammojapaññāya samannāgato pana paṇḍito kulavamsāgatam² seṭṭham uttamam sattaratanadhanam viya appamādam rakkhati. Yathā hi uttamam dhanam nissāya "kāmaguṇasampattim pāpuṇissāma, puttadāram posessāma, paralokagamanamaggam sodhessāmā"ti dhane ānisamsam passantā tam rakkhanti, evam paṇḍitopi appamatto "paṭhamajjhānādīni paṭilabhissāmi, maggaphalādīni pāpuṇissāmi, tisso vijjā cha abhiññā sampādessāmī"ti appamāde ānisamsam passanto dhanam seṭṭhamva appamādam rakkhatīti attho. Mā pamādanti tasmā tumhe mā pamādamanuyuñjetha mā pamādena kālam vītināmayittha. Mā kāmaratisanthavanti vatthukāmakilesakāmesu ratisankhātam taṇhāsanthavampi mā anuyuñjetha mā cintayittha mā paṭilabhittha. Appamatto hīti upaṭṭhitassatitāya hi appamatto jhāyanto puggalo vipulam uļāram nibbānasukham pāpuṇātīti.

Gāthāpariyosāne bahū sotāpannādayo ahesum. Mahājanassa sātthikā dhammadesanā jātāti.

Bālanakkhattasaṅghuṭṭhavatthu catutthaṁ.

## 5. Mahākassapattheravatthu

**Pamādaṁ appamādenā**ti imaṁ dhammadesanaṁ Satthā Jetavane viharanto Mahākassapattheraṁ ārabbha kathesi.

Ekasmim hi divase thero Pipphaliguhāyam viharanto Rājagahe piṇḍāya caritvā pacchābhattam piṇḍapātapaṭikkanto ālokam vaḍḍhetvā pamatte ca appamatte ca udakapathavīpabbatādīsu cavanake upapajjanake ca

satte dibbena cakkhunā olokento nisīdi. Satthā Jetavane nisinnakova "kena nu kho vihārena ajja mama putto Kassapo viharatī"ti dibbena cakkhunā upadhārento "sattānaṁ cutūpapātaṁ olokento viharatī"ti ñatvā "sattānaṁ cutūpapāto nāma Buddhañāṇenapi aparicchinno, mātukucchiyaṁ paṭisandhiṁ gahetvā mātāpitaro ajānāpetvā cavanasattānaṁ paricchedo kātuṁ na sakkā, te jānituṁ tava avisayo, Kassapa appamattako tava visayo, sabbaso pana cavante ca upapajjante ca jānituṁ passituṁ Buddhānameva visayo"ti vatvā obhāsaṁ pharitvā sammukhe nisinno viya hutvā imaṁ gāthamāha—

28. "Pamādam appamādena, yadā nudati paṇḍito. Paññāpāsādamāruyha, asoko sokinim pajam. Pabbatatthova bhūmatthe, dhīro bāle avekkhatī"ti.

Tattha nudatīti yathā nāma pokkharaṇim pavisantam navodakam purāṇodakam khobhetvā tassokāsam adatvā tam attano matthakamatthakena palāyantam nudati nīharati, evameva paṇḍito appamādalakkhaṇam brūhento pamādassokāsam adatvā yadā appamādavegena tam nudati nīharati, atha so panunnapamādo¹ accuggatatthena parisuddham dibbacakkhusankhātam paññāpāsādam tassa anucchavikam paṭipadam pūrento tāya paṭipadāya nisseṇiyā pāsādam viya āruyha pahīnasokasallatāya asoko, appahīnasokasallatāya sokinim pajam sattanikāyam cavamānanceva upapajjamānanca dibbacakkhunā avekkhati passati. Yathākim? Pabbataṭṭhova bhūmaṭṭheti pabbatamuddhani ṭhito bhūmiyam ṭhite, uparipāsāde vā pana ṭhito pāsādapariveṇe ṭhite akicchena avekkhati, tathā sopi dhīro paṇḍito mahākhīṇāsavo asamucchinnavaṭṭabīje bāle cavante ca upapajjante ca akicchena avekkhatīti.

Gāthāpariyosāne bahū sotāpattiphalādīni sacchikarimsūti.

Mahākassapattheravatthu pañcamam.

<sup>1.</sup> Panunnapamādo (Sī), panudapamādo (Ka)

#### 6. Pamattāpamattadvesahāyakavatthu

**Appamatto pamattesū**ti imam dhammadesanam Satthā Jetavane viharanto dve sahāyake bhikkhū ārabbha kathesi.

Te kira Satthu santike kammatthānam gahetvā āraññakavihāram pavisimsu. Tesu eko kira kālasseva dārūni āharitvā aṅgārakapallam sajjetvā daharasāmanerehi saddhim sallapanto pathamayāmam visibbamāno nisīdati. Eko appamatto samanadhammam karonto itaram ovadati "āvuso mā evam kari, pamattassa hi cattāro apāyā sakagharasadisā<sup>1</sup>. Buddhā nāma sātheyyena ārādhetum na sakkā"ti so tassovādam na sunāti. Itaro "nāyam vacanakkhamo"ti tam avatvā<sup>2</sup> appamattova samanadhammamakāsi. Alasattheropi pathamayāme visibbetvā itarassa cankamitvā gabbham pavitthakāle pavisitvā "mahākusīta tvam nipajjitvā sayanatthāya araññam pavitthosi, kim Buddhānam santike kammatthānam gahetvā utthāya samanadhammam kātum vattatī"ti vatvā attano vasanatthānam pavisitvā nipajjitvā supati. Itaropi majjhimayāme vissamitvā pacchimayāme paccutthāya samanadhammam karoti. So evam appamatto viharanto na cirasseva saha patisambhidāhi arahattam pāpuni. Itaro pamādeneva kālam vītināmesi. Te vutthavassā Satthu santikam gantvā Satthāram vanditvā ekamantam nisīdimsu. Satthā tehi saddhim patisanthāram katvā "kacci bhikkhave appamattā samanadhammam karittha, kacci vo pabbajitakiccam matthakam pattan"ti pucchi. Pathamam pamatto bhikkhu āha "kuto bhante etassa appamādo, gatakālato patthāya nipajjitvā niddāyanto kālam vītināmesī"ti. Tvam pana bhikkhūti. Aham bhante kālasseva dārūni āharitvā aṅgārakapallaṁ sajjetvā pathamayāme visibbento nisīditvā aniddāyantova kālam vītināmesinti. Atha nam Satthā "tvam pamatto kālam vītināmetvā 'appamattomhī'ti vadasi, appamattam pana pamattam karosī"ti āha. Puna pamāde dose, appamāde ānisamse pakāsetum "tvam mama puttassa santike javacchinno dubbalasso viya, esa pana tava santike sīghajavasso viyā"ti vatvā imam gāthamāha29. "Appamatto pamattesu. Suttesu bahujāgaro. Abalassamva sīghasso, hitvā yāti sumedhaso"ti.

Tattha appamattoti sativepullappattatāya appamādasampanno khīņāsavo. Pamattesūti sativosagge thitesu sattesu. Suttesūti satijāgariyābhāvena sabbiriyāpathesu niddāyantesu. Bahujāgaroti mahante sativepulle jāgariye thito. Abalassamvāti kuṇṭhapādam chinnajavam dubbalassam sīghajavo sindhavājānīyo viya. Sumedhasoti uttamapañño. Tathārūpam puggalam āgamenapi adhigamenapi hitvā yāti. Mandapaññasmim hi ekam suttam gahetum vāyamanteyeva sumedhaso ekam vaggam gaṇhāti, evam tāva āgamena hitvā yāti. Mandapaññe pana rattiṭṭhānadivāṭṭhānāni kātum vāyamanteyeva kammaṭṭhānam uggahetvā sajjhāyanteyeva ca sumedhaso pubbabhāgepi parena katam rattiṭṭhānam vā divāṭṭhānam vā pavisitvā kammaṭṭhānam sammasanto sabbakilese khepetvā nava lokuttaradhamme hatthagate karoti, evam adhigamenapi hitvā yāti. Vatte pana nam hitvā¹ chaddetvā vattato nissaranto yātiyevāti.

Gāthāpariyosāne bahū sotāpattiphalādīni pāpuņimsūti.

Pamattāpamattadvesahāyakavatthu chaṭṭhaṁ.

## 7. Maghavatthu

**Appamādena Maghavā**ti imam dhammadesanam Satthā Vesāliyam upanissāya Kūṭāgārasālāyam viharanto Sakkam devarājānam ārabbha kathesi.

Vesāliyam hi Mahāli nāma Licchavī vasati, so Tathāgatassa Sakkapañhasuttantadesanam² sutvā "Sammāsambuddho Sakkasampattim mahatim katvā kathesi, 'disvā nu kho kathesi, udāhu adisvā. Jānāti nu kho Sakkam, udāhu no'ti pucchissāmi nan"ti cintesi. Atha kho Mahāli Licchavī yena Bhagavā tenupasankami, upasankamitvā Bhagavantam abhivādetvā ekamantam nisīdi, ekamantam nisīnno kho Mahāli Licchavī Bhagavantam etadavoca

<sup>1.</sup> Vaṭṭapadaṁ jahitvā (Sī), vaṭṭe pana naṁ mandapaññaṁ hitvā (Syā)

<sup>2.</sup> Dī 2. 211 pitthādīsu.

"Dittho kho bhante Bhagavatā Sakko Devānamindo"ti. Dittho kho me Mahāli Sakko Devānamindoti. So hi nuna bhante Sakkapatirūpako bhayissati. Duddaso hi bhante Sakko Devānamindoti. Sakkañca khyāham Mahāli pajānāmi Sakkakarane ca dhamme, yesam dhammānam samādinnattā Sakko Sakkattam ajjhagā, tañca pajānāmi.

Sakko Mahāli Devānamindo pubbe manussabhūto samāno Magho nāma mānavo ahosi, tasmā "Maghavā"ti vuccati.

Sakko Mahāli Devānamindo pubbe manussabhūto samāno pure<sup>1</sup> dānam adāsi, tasmā "Purindado"ti vuccati.

Sakko Mahāli Devānamindo pubbe manussabhūto samāno sakkaccam, dānam adāsi, tasmā "Sakko"ti vuccati.

Sakko Mahāli Devānamindo pubbe manussabhūto samāno āvasatham adāsi, tasmā "Vāsavo"ti vuccati.

Sakko Mahāli Devānamindo sahassampi attham muhuttena cinteti, tasmā "Sahassakkho"ti vuccati.

Sakkassa Mahāli Devānamindassa Sujā nāma asurakaññā pajāpati, tasmā "Sujampatī"ti vuccati.

Sakko Mahāli Devānamindo devānam Tāvatimsānam issariyādhipaccam rajjam kāreti, tasmā "Devānamindo"ti vuccati.

Sakkassa Mahāli Devānamindassa pubbe manussabhūtassa satta vatapadāni samattāni samādinnāni ahesum, yesam samādinnattā Sakko Sakkattam ajjhagā. Katamāni satta vatapadāni, yāvajīvam mātāpettibharo assam, yāvajīvam kule jetthāpacāyī assam, yāvajīvam sanhavāco assam yāvajīvam apisunavāco assam, yāvajīvam vigatamalamaccherena cetasā, agāram ajjhāvaseyyam, muttacāgo payatapāni vosaggarato yācayogo dānasamvibhāgarato assam, yāvajīvam saccavāco assam yāvajīvam akkodhano assam "sacepi me kodho uppajjeyya khippameva na pativineyyan"ti. Sakkassa Mahāli devānamibbassa pubbe manussabhūtassa

imāni satta vatapadāni samattāni samādinnāni ahesum, yesam samādinnattā Sakko Sakkattam ajjhagāti.

"Mātāpettibharam jantum, kule jeṭṭhāpacāyinam. Saṇham sakhilasambhāsam, pesuṇeyyappahāyinam.

Maccheravinaye yuttam, saccam kodhābhibhum naram. Tam ve devā Tāvatimsā, āhu sappuriso itī''ti—

Idam Mahāli Sakkena Maghamāṇavakāle katakammanti vatvā puna tena "katham bhante Maghamāṇavo paṭipajjī"ti. Tassa paṭipattim vitthārato sotukāmena puṭṭho "tena hi Mahāli suṇāhī"ti vatvā atītam āhari—

Atīte Magadharaṭṭhe Macalagāme<sup>1</sup> Magho nāma mānavo gāmakammakaranatthānam gantvā attano thitatthānam pādantena<sup>2</sup> pamsum viyūhitvā ramanīyam katvā atthāsi. Aparo tam bāhunā paharitvā tato apanetvā sayam tattha atthāsi. So tassa akujjhitvāva aññam thānam ramanīyam katvā thito. Tatopi nam añño āgantvā bāhunā paharitvā apanetvā sayam atthāsi. So tassapi akujjhitvāva aññam thānam ramanīyam katvā thito, iti tam gehato nikkhantā nikkhantā purisā bāhunā paharitvā thitathitatthānato<sup>3</sup> apanesum. So "sabbepete mam nissāya sukhitā jātā, iminā kammena mayham sukhadāyakena puññakammena bhavitabban"ti cintetvā punadivase kudālam ādāya khalamandalamattam thānam ramanīyam akāsi. Sabbe gantvā tattheva atthamsu. Atha nesam sītasamaye aggim katvā adāsi, gimhakāle udakam. Tato "ramanīyam thānam nāma sabbesam piyam, kassaci appiyam nāma natthi, ito patthāya mayā maggam samam karontena vicaritum vattatī"ti cintetvā pātova nikkhamitvā maggam samam karonto chinditvā haritabbayuttakā rukkhasākhā haranto vicarati. Atha nam aparo disvā āha "samma kim karosī"ti. Mayham saggagāminam maggam karomi sammāti. Tena hi ahampi te sahāyo homīti. Hoti samma, saggo nāma bahūnampi manāpo sukhabahuloti. Tato patthāya dve janā ahesum. Te disvā tatheva pucchitvā ca sutvā ca

aparopi tesam sahāyo jāto, evam aparopi aparopīti sabbepi tettimsa janā jātā. Te sabbepi kudālādihatthā maggam samam karontā ekayojanadviyojanamattatthānam gacchanti.

Te disvā gāmabhojako cintesi "ime manussā ayoge yuttā, sace ime araññato macchamamsādīni vā āhareyyum, suram vā katvā piveyyum, aññam vā tādisam kammam kareyyum, ahampi kiñci kiñci labheyyan"ti. Atha ne pakkosāpetvā pucchi "kim karontā vicarathā" ti. Saggamaggam sāmīti. Gharāvāsam vasantehi nāma evam kātum na vattati, araññato macchamamsādīni āharitum, suram katvā pātum, nānappakāre ca kammante kātum vattatīti. Te tassa vacanam patikkhipimsu, evam punappunam vuccamānāpi patikkhipimsuyeva. So kujihitvā "nāsessāmi ne"ti rañño santikam gantvā "core te deva vaggabandhanena<sup>1</sup> vicarante passāmī"ti vatvā "gaccha, te gahetvā ānehī"ti vutte tathā katvā sabbe te bandhitvā ānetvā rañño dassesi. Rājā avīmamsitvāva "hatthinā maddāpethā" ti ānāpesi. Magho sesānam ovādamadāsi "sammā thapetvā mettam añño amhākam avassayo natthi, tumhe katthaci kopam akatvā raññe ca gāmabhojake ca maddanahatthimhi ca attani ca mettacittena<sup>2</sup> samacittāva hothā"ti. Te tathā karimsu. Atha nesam mettānubhāvena hatthī upasankamitumpi na visahi. Rājā tamattham sutvā bahū manusse disvā madditum na visahissati. "Gacchatha, ne kilañjena<sup>3</sup> paticchādetvā maddāpethā"ti āha. Te kilañjena paticchādetvā madditum pesiyamānepi hatthī dūratova patikkami.

Rājā tam pavattim sutvā "kāraņenettha bhavitabban"ti te pakkosāpetvā pucchi "tātā mam nissāya tumhe kim na labhathā"ti. Kim nāmetam devāti. Tumhe kira vaggabandhanena corā hutvā araññe vicarathāti. Ko evamāha devāti. Gāmabhojako tātāti. Na mayam deva corā, mayam pana attano saggamaggam sodhentā idañcidañca karoma, gāmabhojako amhe akusalakiriyāya niyojetvā attano vacanam akaronte nāsetukāmo kujjhitvā evamāhāti. Atha rājā tesam katham sutvā somanassappatto hutvā "tātā ayam tiracchāno

tumhākam guņe jānāti, aham manussabhūto jānitum nāsakkhim, khamatha me"ti. Evanca pana vatvā saputtadāram gāmabhojakam tesam dāsam, hatthim ārohaniyam, tanca gāmam yathāsukham paribhogam katvā adāsi. Te "idheva no katapunnassānisamso diṭṭho"ti bhiyyoso mattāya pasannamānasā hutvā tam hatthim vārena vārena abhiruyha gacchantā mantayimsu "idāni amhehi atirekataram punnam kātabbam, kim karoma. Catumahāpathe thāvaram katvā mahājanassa vissamanasālam karissāmā"ti. Te vaḍḍhakim pakkosāpetvā sālam paṭṭhapesum. Mātugāmesu pana vigatacchandatāya tassā sālāya mātugāmānam pattim nādamsu.

Maghassa pana gehe Nandā Cittā Sudhammā Sujāti¹ catasso itthiyo honti. Tāsu **Sudhammā** vaḍḍhakinā saddhiṁ ekato hutvā "bhātika imissā sālāya maṁ jeṭṭhikaṁ karohī"ti vatvā lañjaṁ adāsi. So "sādhū"ti sampaṭicchitvā paṭhamameva kaṇṇikatthāya rukkhaṁ sukkhāpetvā tacchetvā vijjhitvā kaṇṇikaṁ niṭṭhāpetvā "Sudhammā nāma ayaṁ sālā"ti akkharāni chinditvā vatthena paliveṭhetvā ṭhapesi. Atha ne vaḍḍhakī sālaṁ niṭṭhāpetvā kaṇṇikāropanadivase² "aho ayyā ekaṁ karaṇīyaṁ na sarimhā"ti āha. Kiṁ nāma bhoti. Kaṇṇikanti. Hotu, taṁ āharissāmāti. Idāni chinnarukkhena kātuṁ na sakkā, pubbeyeva taṁ chinditvā tacchetvā vijjhitvā ṭhapitakaṇṇikā laddhuṁ vaṭṭatīti. Idāni kiṁ kātabbanti. Sace kassaci gehe niṭṭhāpetvā ṭhapitā vikkāyikakaṇṇikā atthi, sā pariyesitabbāti. Te pariyesantā Sudhammāya gehe disvā sahassaṁ datvāpi mūlena na labhiṁsu. "Sace maṁ sālāya pattiṁ karotha, dassāmī"ti vutte pana "mayaṁ mātugāmānaṁ pattiṁ na dammā"ti āhaṁsu.

Atha ne vaḍḍhakī āha "ayyā tumhe kiṁ kathetha, ṭhapetvā brahmalokaṁ aññaṁ mātugāmarahitaṭṭhānaṁ nāma natthi, gaṇhatha kaṇṇikaṁ, evaṁ sante amhākaṁ kammaṁ niṭṭhaṁ gamissatī"ti. Te "sādhū"ti kaṇṇikaṁ gahetvā sālaṁ niṭṭhāpetvā tidhā vibhajiṁsu. Ekasmiṁ koṭṭhāse issarānaṁ vasanaṭṭhānaṁ kariṁsu, ekasmiṁ duggatānaṁ, ekasmiṁ gilānānaṁ. Tettiṁsa janā tettiṁsa phalakāni paññapetvā hatthissa saññaṁ adaṁsu "āgantuko āgantvā yassa atthataphalake nisīdati, taṁ gahetvā

phalakasāmikasseva gehe patitthapeti, tassa pādaparikammapitthiparikammapānīyakhādanīyabhojanīyasayanāni sabbāni phalakasāmikasseva bhāro bhavissatī"ti. Hatthī āgatāgatam gahetvā phalakasāmikasseva gharam neti. So tassa tam divasam kattabbam karoti. Magho sālāya avidūre kovilārarukkham ropetvā tassa mūle pāsānaphalakam atthari. Sālam pavitthapavitthā janā kannikam oloketvā akkharāni vācetvā "Sudhammā nāmesā sālā"ti vadanti. Tettimsajanānam nāmam na paññāyati. Nandā cintesi "ime sālam karontā amhe apattikā karimsu, Sudhammā pana attano byattatāya kannikam katvā pattikā jātā, mayāpi kiñci kātum vattati, kim nu kho karissāmī"ti. Athassā etadahosi "sālam āgatāgatānam pānīyañceva nhānodakañca laddhum vattati pokkharanim khanāpessāmī"ti. Sā pokkharanim kāresi. **Cittā** cintesi "Sudhammāya kannikā dinnā, Nandāya pokkharanī kāritā, mayāpi kiñci kātum vattati, kim nu kho karissāmī"ti. Athassā etadahosi "sālam āgatāgatehi pānīyam pivitvā nhatvā gamanakālepi mālam pilandhitvā gantum vattati, pupphārāmam kārāpessāmī"ti. Sā ramanīyam pupphārāmam kāresi. Yebhuyyena tasmim ārāme "asuko nāma pupphūpagaphalūpagarukkho natthī"ti nāhosi.

Sujā pana "ahaṁ Maghassa mātuladhītā ceva pādaparicārikā ca, etena kataṁ kammaṁ mayhameva, mayā kataṁ etassevā"ti cintetvā kiñci akatvā attabhāvameva maṇḍayamānā kālaṁ vītināmesi. Maghopi mātāpitu-upaṭṭhānaṁ kule jeṭṭhāpacāyanakammaṁ¹ saccavācaṁ apharusavācaṁ apisuṇavācaṁ maccheravinayaṁ akkodhananti imāni satta vatapadāni pūretvā—

"Mātāpettibharam jantum, kule jeṭṭhāpacāyinam. Saṇham sakhilasambhāsam, pesuṇeyyappahāyinam.

Maccheravinaye yuttam, saccam kodhābhibhum naram. Tam ve devā Tāvatimsā, āhu 'sappuriso' itī"ti<sup>2</sup>—

Evam pasamsiyabhāvam āpajjitvā jīvitapariyosāne Tāvatimsabhavane Sakko devarājā hutvā nibbatti, tepissa sahāyakā<sup>3</sup>

<sup>1.</sup> Jetthāpacāvikakammam (Syā)

<sup>3.</sup> Tettimsa sahāyakāpissa (Ka)

<sup>2.</sup> Sam 1. 230 pitthe.

tattheva nibbattimsu, vaḍḍhakī Vissakammadevaputto hutvā nibbatti. Tadā Tāvatimsabhavane asurā vasanti, te "abhinavā devaputtā nibbattā"ti dibbapānam sajjayimsu. Sakko attano parisāya kassaci apivanatthāya saññamadāsi. Asurā dibbapānam pivitvā majjimsu. Sakko "kim me imehi sādhāraṇena rajjenā"ti attano parisāya saññam datvā te pādesu gāhāpetvā mahāsamudde khipāpesi. Te avamsirā samudde patimsu. Atha nesam puññānubhāvena Sineruno heṭṭhimatale asuravimānam nāma nibbatti, Cittapāṭali nāma nibbatti.

Devāsurasangāme pana asuresu parājitesu dasayojanasahassam Tāvatimsadevanagaram nāma nibbatti. Tassa pana nagarassa pācīnapacchimadvārānam antarā dasayojanasahassam hoti, tathā dakkhinuttaradvārānam. Tam kho pana nagaram dvārasahassayuttam ahosi ārāmapokkharanipatimanditam. Tassa majihe sālāya nissandena tiyojanasatubbedhehi dhajehi patimandito sattaratanamayo sattayojanasatubbedho Vejayanto nāma pāsādo uggañchi. Suvannayatthīsu maņidhajā ahesum, maņiyatthīsu suvannadhajā. Pavāļayatthīsu muttadhajā, muttayatthīsu pavāladhajā. Sattaratana mayāsu yatthīsu sattaratanadhajā, (majjhe thito dhajo tiyojanasatubbedho ahosi.)<sup>1</sup> Iti sālāya nissandena yojanasahassubbedho pāsādo sattaratanamayova hutvā nibbatti, kovilāra rukkhassa nissandena samantā tiyojanasataparimandalo pāricchattako nibbatti, pāsānaphalakassa nissandena pāricchattakamūle dīghato satthiyojanā puthulato pannāsayojanā bahalato pancadasayojanā jayasumanarattakambalavannā<sup>2</sup> pandukambalasilā nibbatti. Tattha nisinnakāle upaddhakāyo pavisati, utthitakāle ūnam paripūrati<sup>3</sup>.

Hatthī pana Erāvaņo nāma devaputto hutvā nibbatti. Devalokasmim hi tiracchānagatā na honti. Tasmā so uyyānakīļāya nikkhamanakāle attabhāvam vijahitvā diyaḍḍhayojanasatiko Erāvaņo nāma hatthī ahosi. So tettimsajanānam atthāya tettimsa kumbhe

<sup>1. ( )</sup> Sīhala-potthake natthi.

<sup>2.</sup> Jayasumanālattakapātalavannā (Sī), jayasumanālattakapātalivannā (Syā)

<sup>3.</sup> Unnameti paripūreti (Syā)

māpesi āvaṭṭena tigāvuta-aḍḍhayojanappamāṇe, sabbesaṁ majjhe Sakkassa atthāya Sudassanaṁ nāma tiṁsayojanikaṁ kumbhaṁ māpesi. Tassa upari dvādasayojaniko ratanamaṇḍapo hoti. Tattha antarantarā sattaratanamayā yojanubbedhā dhajā uṭṭhahanti. Pariyante kiṅkiṇikajālaṁ olambati. Yassa mandavāteritassa pañcaṅgikatūriyasaddasaṁmisso dibbagītasaddo viya ravo niccharati. Maṇḍapamajjhe Sakkassatthāya yojaniko maṇipallaṅko paññatto hoti, tattha Sakko nisīdi. Tettiṁsa devaputtā attano kumbhe ratanapallaṅke nisīdiṁsu. Tettiṁsāya kumbhānaṁ ekekasmiṁ kumbhe satta satta dante māpesi. Tesu ekeko paṇṇāsayojanāyāmo, ekekasmiṁ cettha dante satta satta pokkharaṇiyo honti, ekekāya pokkharaṇiyā satta satta paduminīgacchāni, ekekasmiṁ gacche satta satta pupphāni honti, ekekasmiṁ pupphe satta satta pattāni, ekekasmiṁ patte satta satta devadhītaro naccanti. Evaṁ samantā paṇṇāsayojanaṭhānesu hatthidantesuyeva naṭasamajjā honti. Evaṁ mahantaṁ yasaṁ anubhavanto Sakko devarājā vicarati.

Sudhammāpi kālam katvā gantvā tattheva nibbatti, tassā Sudhammā nāma navayojanasatikā¹ devasabhā nibbatti, tato ramaṇīyataram kira aññam ṭhānam nāma natthi, māsassa aṭṭha² divase dhammassavanam tattheva hoti. Yāvajjatanā aññataram ramaṇīyam ṭhānam disvā "Sudhammā devasabhā viyā"ti vadanti. Nandāpi kālam katvā gantvā tattheva nibbatti, tassā pañcayojanasatikā Nandā nāma pokkharaṇī nibbatti. Cittāpi kālam katvā gantvā tattheva nibbatti, tassāpi pañcayojanasatikam Cittalatāvanam nāma nibbatti, tattha uppannapubbanimitte devaputte netvā mohayamānā³ vicaranti. Sujā pana kālam katvā ekissā girikandarāya ekā bakasakuṇikā hutvā nibbatti. Sakko attano paricārikā olokento "Sudhammā idheva nibbattā, tathā Nandā ca Cittā ca, Sujā nu kho kuhim nibbattā'ti cintento tam tattha nibbattam disvā "bālā kiñci puññam akatvā idāni tiracchānayoniyam nibbattā, idāni pana tam puññam kāretvā idhānetum vaṭṭatī'ti attabhāvam vijahitvā aññātakavesena

<sup>1.</sup> Pañcayojanasatikā (Syā) 2. Atthamī (Syā), atthame (Ka) 3. Modayamānā (Ka)

tassā santikam gantvā "kim karontī idha vicarasī"ti pucchi. Ko pana tvam sāmīti. Aham te sāmiko Maghoti. Kuhim nibbattosi sāmīti. Aham Tāvatimsadevaloke nibbatto, tava sahāyikānam pana nibbattaṭṭhānam jānāsīti. Na jānāmi sāmīti. Tāpi mameva santike nibbattā, passissasi tā sahāyikāti. Kathāham tattha gamissāmīti. Sakko "aham tam tattha nessāmī"ti vatvā tam hatthatale ṭhapetvā devalokam netvā Nandāya pokkharaṇiyā tīre vissajjetvā itarāsam tissannam ārocesi "tumhākam sahāyikam Sujam passissathā"ti. Kuhim sā devāti. "Nandāya pokkharaṇiyā tīre ṭhitā"ti āha. Tā tissopi gantvā "aho ayyāya evarūpam attabhāvamaṇḍanassa phalam¹, idānissā tuṇḍam passatha, pāde passatha, jaṅghā passatha, sobhati vatassā attabhāvo"ti keļim katvā pakkamimsu.

Puna Sakko tassā santikam gantvā "ditthā te sahāyikā"ti vatvā "ditthā mam uppandetvā gatā, tattheva mam nehī"ti vutte tam tattheva netvā udake vissajjetvā "ditthā te tāsam sampattī"ti pucchi. Ditthā devāti. Tayāpi tattha nibbattanūpāyam kātum vattatīti. Kim karomi devāti. Mayā dinnam ovādam rakkhissasīti. Rakkhissāmi devāti. Athassā pañca sīlāni datvā "appamattā rakkhāhī"ti vatvā pakkāmi. Sā tato patthāya sayammatamacchakeyeva pariyesitvā khādati. Sakko katipāhaccayena tassā vīmamsanatthāya gantvā vālukāpitthe matamacchako viya hutvā uttāno nipajji. Sā tam disvā "matamacchako"ti saññāya aggahesi. Maccho gilanakāle naṅgutthaṁ cālesi. Sā "sajīvamacchako"ti udake vissajjesi. So thokam vītināmetvā puna tassā purato uttāno hutvā nipajji. Puna sā "matamacchako"ti saññāya gahetvā gilanakāle aggananguttham cālesi. Tam disvā "sajīvamaccho"ti vissajjesi. Evam tikkhattum vīmamsitvā "sādhukam sīlam rakkhatī"ti attānam jānāpetvā "aham tava vīmamsanatthāya āgato, sādhukam sīlam rakkhasi evam rakkhamānā na cirasseva mama santike nibbattissasi, appamattā hohī''ti vatvā pakkāmi.

<sup>1.</sup> Aho ayyāya rūpam, aho attabhāvamandanassa phalam (Syā, Ka)

Sā tato patthāya pana sayammatamaccham labhati vā, na vā. Alabhamānā katipāhaccayeneva sussitvā kālam katvā tassa sīlassa phalena<sup>1</sup> Bārānasiyam kumbhakārassa dhītā hutvā nibbatti. Athassā pannarasasolasavassuddesikakāle Sakko "kuhim nu kho sā nibbattā"ti āvajjento disvā "idāni mayā tattha gantum vattatī"ti eļālukavaņņena paññayamanehi sattahi ratanehi yanakam puretva tam pajento Baranasim pavisitvā "ammatātā elālukāni ganhatha ganhathā"ti ugghosento vīthim patipajji. Muggamāsādīni gahetvā āgate pana "mūlena na demī"ti vatvā "katham desī"ti vutte "sīlarakkhikāya itthiyā dammī"ti āha. Sīlam nāma sāmi kīdisam kim kālam, udāhu nīlādivannanti. Tumhe "sīlam kīdisan"tipi na jānātha, kimeva nam rakkhissatha, sīlarakkhikāya pana dassāmīti. Sāmi esā kumbhakārassa dhītā "sīlam rakkhāmī"ti vicarati, etissā dehīti. Sāpi nam "tena hi mayham dehi sāmī"ti āha. Kāsi tvanti. Aham avijahitapañcasīlāti. "Tuyhamevetāni mayā ānītānī"ti yānakam pājento tassā gharam gantvā aññehi anāhariyam<sup>2</sup> katvā elālukavannena devadattiyam dhanam datvā attānam jānāpetvā "idam te jīvitavuttiyā dhanam, pañcasīlāni akhandādīni katvā rakkhāhī"ti vatvā pakkāmi.

Sāpi tato cavitvā Asurabhavane asurajeṭṭhakassa dhītā hutvā Sakkassa verighare nibbatti. Dvīsu pana attabhāvesu sīlassa surakkhitattā abhirūpā ahosi suvaṇṇavaṇṇā asādhāraṇāya rūpasiriyā samannāgatā. Vepacitti-asurindo āgatāgatānam asurānam "tumhe mama dhītu anucchavikā na hothā"ti tam kassaci adatvā "mama dhītā attanāva attano anuccha vikam sāmikam gahessatī"ti³ asurabalam sannipātāpetvā "tuyham anucchavikam sāmikam gaṇhā"ti tassa hatthe pupphadāmam adāsi. Tasmim khaṇe Sakko tassā nibbattaṭṭhānam olokento tam pavattim ñatvā "idāni mayā gantvā tam ānetum vaṭṭatī"ti mahallaka-asuravaṇṇam nimminitvā gantvā parisapariyante aṭṭhāsi. Sāpi ito cito ca olokentī tam diṭṭhamattāva pubbasannivāsavasena uppannena pemena mahogheneva ajjhotthaṭahadayā hutvā "eso me sāmiko"ti tassa upari pupphadāmam

khipi. Asurā "amhākam rājā ettakam kālam dhītu anucchavikam alabhitvā idāni labhi, ayamevassa dhītu pitāmahato mahallako anucchaviko"ti lajjamānā apakkamimsu. Sakkopi tam hatthe gahetvā "Sakkohamasmī"ti naditvā ākāse pakkhandi. Asurā "vañcitamhā jarasakkenā"ti tam anubandhimsu. Mātali saṅgāhako Vejayantaratham āharitvā antarāmagge aṭṭhāsi. Sakko tam tattha āropetvā devanagarābhimukho pāyāsi. Athassa Sippalivanam¹ sampattakāle rathasaddam sutvā bhītā garuļapotakā viravimsu. Tesam saddam sutvā Sakko Mātalim pucchi "ke ete viravantī"ti. Garuļapotakā devāti. Kim kāraṇāti. Rathasaddam sutvā maraṇabhayenāti. Mam ekam nissāya ettako dijo rathavegena vicuṇṇito mā nassi, nivattehi rathanti. Sopi sindhavasahassassa daṇḍakasaññam datvā ratham nivattesi. Tam disvā asurā "jarasakko asurapurato paṭṭhāya palāyanto idāni ratham nivattesi, addhā tena upatthambho laddho bhavissatī"ti nivattetvā āgamanamaggeneva asurapuram pavisitvā puna sīsam na ukkhipimsu.

Sakkopi Sujam asurakaññam devanagaram netvā addhateyyānam accharākotimnam jetthikatthāne thapesi. Sā Sakkam varam yāci "mahārāja mama imasmim devaloke mātāpitaro vā bhātikabhaginiyo vā natthi, yattha yattha gacchasi, tattha tattha mam gahetvāva gaccheyyāsī"ti. So "sādhū"ti tassā patiññam adāsi. Tato patthāya cittapātaliyā pupphitāya asurā "amhākam nibbattatthāne dibbapāriccha ttakassa pupphanakālo"ti yuddhatthāya saggam abhiruhanti<sup>2</sup>. Sakko hetthāsamudde nāgānam ārakkham adāsi, tato supannānam, tato kumbhandānam, tato yakkhānam. Tato catunnam mahārājānam. Sabbūpari pana upaddavanivattanatthāya devanagaradvāresu vajirahatthā indapatimā thapesi. Asurā nāgādayo jinitvā āgatāpi indapatimā dūrato disvā "Sakko nikkhanto"ti palāyanti. Evam Mahāli Magho mānavo appamādapatipadam patipajji, evam appamatto panesa evarūpam issariyam patvā dvīsu devalokesu rajjam kāresi. Appamādo nāmesa Buddhādīhi pasattho. Appamādam hi nissāya sambesampi lokiyalokuttarānam visesānam adhigamo hotīti vatvā imam gāthamāha30. "Appamādena Maghavā, devānam setthatam gato. Appamādam pasamsanti, pamādo garahito sadā"ti.

Tattha appamādenāti Macalagāme bhūmippadesasodhanam ādim katvā katena appamādena. Maghavāti idāni "Maghavā"ti paññāto Magho māṇavo dvinnam devalokānam rājabhāvena devānam seṭṭhatam gato. Pasamsantīti Buddhādayo paṇḍitā appamādameva thomenti vaṇṇayanti. Kim kāraṇā? Sabbesam lokiyalokuttarānam visesānam paṭilābhakāraṇattā. Pamādo garahito sadāti pamādo pana tehi ariyehi niccam garahito nindito. Kim kāraṇā? Sabbavipattīnam mūlabhāvato. Manussadobhaggam vā hi apāyuppatti vā sabbā pamādamūlikāyevāti.

Gāthāpariyosāne Mahāli Licchavī sotāpattiphale patiṭṭhahi, sampattaparisāyapi bahū sotāpannādayo jātāti.

Maghavatthu sattamam.

#### 8. Aññatarabhikkhuvatthu

**Appamādarato bhikkhū**ti imam dhammadesanam Satthā Jetavane viharanto aññataram bhikkhum ārabbha kathesi.

So kira Satthu santike yāva arahattā<sup>1</sup> kammaṭṭhānaṁ kathāpetvā araññaṁ pavisitvā ghaṭento vāyamanto arahattaṁ pattuṁ nāsakkhi. So "visesetvā kammaṭṭhānaṁ kathāpessāmī"ti tato nikkhamitvā Satthu santikaṁ āgacchanto antarāmagge mahantaṁ dāvaggiṁ uṭṭhitaṁ disvā vegena ekaṁ muṇḍapabbatamatthakaṁ abhiruyha nisinno araññaṁ ḍayhamānaṁ aggiṁ disvā ārammaṇaṁ gaṇhi "yathā ayaṁ aggi mahantāni ca khuddakāni ca upādānāni ḍahanto gacchati, evaṁ ariyamaggañāṇaggināpi mahantāni ca khuddakāni ca saṁyojanāni ḍahantena gantabbaṁ bhavissatī"ti. Satthā Gandhakuṭiyaṁ nisinnova tassa cittācāraṁ ñatvā "evameva bhikkhu mahantānipi khuddakānipi upādānāni viya imesaṁ sattānaṁ abbhantare uppajjamānāni aṇuṁthūlāni saṁyojanāni,

tāni ñāṇagginā jhāpetvā abhabbuppattikāni kātum vaṭṭatī"ti vatvā obhāsam vissajjetvā tassa bhikkhuno abhimukhe nisinno viya paññāyamāno imam obhāsagāthamāha—

31. "Appamādarato bhikkhu, pamāde bhayadassi vā. Samyojanam aņum thūlam, ḍaham aggīva gacchatī"ti.

Tattha appamādaratoti appamāde rato abhirato, appamādena vītināmentoti attho. Pamāde bhayadassi vāti nirayuppatti-ādikam pamāde bhayam bhayato passanto, tāsam vā uppattīnam mūlattā pamādam bhayato passanto. Samyojananti vaṭṭadukkhena saddhim yojanam bandhanam pajānam vaṭṭe osīdāpanasamattham dasavidham samyojanam. Aṇum thūlanti mahantañca khuddakañca. Daham aggīva gacchatīti yathā ayam aggī etam mahantañca khuddakañca upādānam ḍahantova gacchati, evameso appamādarato bhikkhu appamādādhigatena ñāṇagginā etam samyojanam ḍahanto abhabbuppattikam karonto gacchatīti attho.

Gāthāpariyosāne so bhikkhu yathānisinnova sabbasamyojanāni jhāpetvā saha paṭisambhidāhi arahattam patvā ākāsenāgantvā Tathāgatassa suvannavannam sarīram thometvā vannetvā vandamānova pakkāmīti.

Aññatarabhikkhuvatthu atthamam.

# 9. Nigamavāsitissattheravatthu

**Appamādarato**ti imam dhammadesanam Satthā Jetavane viharanto Nigamavāsitissattheram nāma ārabbha kathesi.

Ekasmim hi Sāvatthito avidūre Nigamagāme jātasamvaḍḍho¹ eko kulaputto Satthu sāsane pabbajitvā laddhūpasampado "Nigamavāsitissatthero nāma appiccho santuṭṭho pavivitto āraddhavīriyo"ti paññāyi, so nibaddham ñātigāmeyeva piṇḍāya vicarati. Anāthapiṇḍikādīsu mahādānāni karontesu, Pasenadikosale asadisadānam

karontepi Sāvatthim nāgacchati. Bhikkhū "ayam Nigamavāsitissatthero uṭṭhāya samuṭṭhāya ñātisamsaṭṭho viharati, Anāthapiṇḍikādīsu mahādānādīni karontesu, Pasenadikosale asadisadānam karontepi neva āgacchatī"ti katham samuṭṭhāpetvā Satthu ārocayimsu. Satthā tam pakkosāpetvā "saccam kira tvam bhikkhu evam karosī"ti pucchitvā "natthi bhante mayham ñātisamsaggo, aham ete manusse nissāya ajjhoharaṇīyamattam āhāram labhāmi lūkhe vā paṇīte vā, yāpanamatte laddhe puna kim āhārapariyesanenāti na gacchāmi, ñātīhi pana me samsaggo nāma natthi bhante"ti vutte Satthā pakatiyāpi tassa ajjhāsayam vijānanto "sādhu sādhu bhikkhū"ti tassa sādhukāram datvā "anacchariyam kho panetam bhikkhu, yam tvam mādisam ācariyam labhitvā appiccho ahosi. Ayañhi appicchatā nāma mama tanti, mama paveṇī"ti vatvā bhikkhūhi yācito atītam āhari—

Atīte Himavante Gaṅgātīre ekasmim Udumbaravane anekasahassā suvā<sup>1</sup> vasimsu. Tatreko Suvarājā attano nivāsarukkhassa phalesu khīņesu yam yadeva avasiṭṭham hoti aṅkuro vā pattam vā taco vā, tam tam khāditvā Gaṅgāyam pānīyam pivitvā paramappiccho santuṭṭho hutvā aññattha na gacchati. Tassa appicchasantuṭṭhabhāvaguṇena Sakkassa bhavanam kampi. Sakko āvajjamāno tam disvā tassa vīmamsanattham attano ānubhāvena tam rukkham sukkhāpesi. Rukkho obhaggo khāṇumatto chiddāvachiddova hutvā vāte paharante ākoṭito viya saddam nicchārento aṭṭhāsi. Tassa chiddehi cuṇṇāni nikkhamanti. Suvarājā tāni khāditvā Gaṅgāyam pānīyam pivitvā aññattha agantvā vātātapam agaṇetvā udumbarakhāṇumatthake nisīdati. Sakko tassa paramappicchabhāvam ñatvā "mittadhammaguṇam kathāpetvā varamassa datvā udumbaram amataphalam katvā āgamissāmī"ti eko hamsarājā hutvā Sujam asurakaññam purato katvā Udumbaravanam gantvā avidūre ekassa rukkhassa sākhāya nisīditvā tena saddhim kathento imam gāthamāha—

"Santi rukkhā haripattā<sup>2</sup>, dumānekaphalā bahū. Kasmā nu sukkhe koļāpe, suvassa nirato mano"ti<sup>3</sup>. Sabbam Suvajātakam Navakanipāte āgatanayeneva vitthāretabbam. Aṭṭhuppattiyeva hi tattha ca idha ca nānā, sesam tādisameva. Satthā imam dhammadesanam āharitvā "tadā Sakko Ānando ahosi, Suvarājā ahamevā"ti vatvā "evam bhikkhave appicchatā nāmesā mama tanti, mama paveṇī, anacchariyā mama puttassa Nigamavāsitissassa mādisam ācariyam labhitvā appicchatā, bhikkhunā nāma Nigamavāsitissena viya appiccheneva bhavitabbam. Evarūpo hi bhikkhu abhabbo samathavipassanādhammehi vā maggaphalehi vā parihānāya, aññadatthu nibbānasseva santike hotī"ti vatvā imam gāthamāha—

32. "Appamādarato bhikkhu, pamāde bhayadassi vā. Abhabbo parihānāya, nibbānasseva santike"ti.

Tattha **abhabbo parihānāyā**ti so evarūpo bhikkhu samathavipassanādhammehi vā maggaphalehi vā parihānāya abhabbo, nāpi pattehi parihāyati, na appattāni na pāpuṇāti. **Nibbānasseva santike**ti kilesaparinibbānassāpi anupādāparinibbānassāpi santikeyevāti.

Gāthāpariyosāne Nigamavāsitissatthero saha paṭisambhidāhi arahattam pāpuṇi, aññepi bahū sotāpannādayo ahesum, mahājanassa sātthikā<sup>1</sup> dhammadesanā jātāti.

Nigamavāsitissattheravatthu navamam.

# Appamādavaggavaņņanā niţţhitā.

Dutiyo vaggo.

# 3. Cittavagga

#### 1. Meghiyattheravattha

**Phandanam capalam cittan**ti imam dhammadesanam Satthā Cālikāya pabbate viharanto āyasmantam Meghiyam ārabbha kathesi.

Tassa vatthum vibhāvanattham¹ sabbam Meghiyasuttantam² vitthāretabbam. Satthā pana tīhi vitakkehi anvāsattatāya tasmim ambavane padhānam anuyuñjitum asakkunitvā āgatam Meghiyattheram āmantetvā "atibhāriyam te Meghiya katam 'āgamehi tāva Meghiya, ekakomhi yāva aññopi koci bhikkhu āgacchatī'ti³ mam yācantam ekakam pahāya gacchantena bhikkhunā nāma evam cittavasikena bhavitum na vaṭṭati, cittam nāmetam lahukam, tam attano vase vattetum vaṭṭatī"ti vatvā imā dve gāthā abhāsi—

- 33. "Phandanam capalam cittam, dūrakkham dunnivārayam. Ujum karoti medhāvī, usukārova tejanam.
- 34. Vārijova thale khitto, okamokata-ubbhato. Paripphandatidam cittam, māradheyyam pahātave"ti.

Tattha **phandanan**ti rūpādīsu ārammaņesu vipphandamānam. **Capalan**ti eka-iriyāpathena asaṇṭhahanto gāmadārako viya ekasmim ārammaņe asaṇṭhahanato capalam. **Cittan**ti viññāṇam, bhūmivatthu-ārammaṇakiriyādivicittatāya panetam "cittan"ti vuttam. **Dūrakkhan**ti kiṭṭhasambādhe ṭhāne kiṭṭhakhādakagoṇam viya ekekasmim sappāyārammaṇeyeva duṭṭhapanato dūrakkham. **Dunni vārayan**ti visabhāgārammaṇam gacchantam paṭisedhetum dukkhattā<sup>4</sup> dunnivārayam. **Usukārova tejanan**ti yathā nāma usukāro araññato ekam vaṅkadaṇḍakam āharitvā nittacam katvā kañjiyatelena makkhetvā aṅgārakapalle tāpetvā rukkhālake uppīletvā nivaṅkam ujum vālavijjhanayoggam karoti, katvā ca pana rājarājamahāmattānam sippam dassetvā mahantam sakkārasammānam labhati.

<sup>1.</sup> Vatthu-āvibhāvatthaṁ (Sī, Syā)

<sup>3.</sup> Dissatīti (Sī, Syā)

<sup>2.</sup> Khu 1. 116 pitthe.

<sup>4.</sup> Dukkhanti (Sī), durakkhattā (Syā)

evameva medhāvī paṇḍito viññū puriso phandanādisabhāvametaṁ cittaṁ dhutaṅgāraññāvāsavasena nittacaṁ apagata-oṭārikakilesaṁ katvā saddhāsinehena temetvā kāyikacetasikavīriyena tāpetvā samathavipassanālake uppīṭetvā ujuṁ akuṭilaṁ nibbisevanaṁ karoti, katvā ca pana saṅkhāre sammasitvā mahantaṁ avijjakkhandhaṁ padāletvā "tisso vijjā cha abhiññā nava lokuttaradhamme"ti imaṁ visesaṁ hatthagatameva katvā aggadakkhiṇeyyabhāvaṁ labhati.

Vārijovāti maccho viya. Thale khittoti hatthena vā pādena vā jālādīnam vā aññatarena thale chaḍḍito. Okamokata-ubbhatoti "okapuṇṇehi cīvarehī"ti ettha¹ udakam okam, "okam pahāya aniketasārī"ti ettha² ālayo, ettha ubhayampi labbhati. "Okamokata-ubbhato"ti hi ettha okamokatoti udakasankhātā ālayāti ayamattho. Ubbhatoti uddhaṭo. Paripphandatidam cittanti yathā so udakālayato ubbhato thale khitto maccho udakam alabhanto paripphandati, evamidam pañcakāmaguṇālayābhiratam cittam tato uddharitvā māradheyyasankhātam vaṭṭam pahātum vipassanākammaṭṭhāne khittam kāyikacetasikavīriyena santāpiyamānam paripphandati, saṇṭhātum na sakkoti. Evam santepi dhuram anikkhipitvā medhāvī puggalo tam vuttanayeneva ujum kammaniyam karotīti attho. Aparo nayo—idam māradheyyam kilesavaṭṭam avijahitvā ṭhitam cittam so vārijo viya paripphandati, tasmā māradheyyam pahātave, yena kilesavaṭṭasaṅkhātena māradheyyeneva paripphandati, tam pahātabbanti.

Gāthāpariyosāne Meghiyatthero sotāpattiphale patiṭṭhito, aññepi bahū sotāpannādayo jātāti.

Meghiyattheravatthu pathamam.

#### 2. Aññatarabhikkhuvatthu

**Dunniggahassa lahuno**ti imam dhammadesanam Satthā Sāvatthiyam Jetavane viharanto aññataram bhikkhum ārabbha kathesi.

Kosalarañño kira vijite pabbatapāde Mātikagāmo nāma eko ghanavāso gāmo ahosi. Athekadivasaṁ saṭṭhimattā bhikkhū Satthu santike yāva arahattā kammaṭṭhānaṁ kathāpetvā taṁ gāmaṁ gantvā piṇḍāya pavisiṁsu. Atha ne yo tassa gāmassa sāmiko Mātiko nāma, tassa mātā disvā gehe nisīdāpetvā nānaggarasena yāgubhattena parivisitvā "bhante kattha gantukāmā"ti pucchi. Yathā phāsukaṭṭhānaṁ mahā-upāsiketi. Sā "vassāvāsaṭṭhānaṁ ayyā pariyesanti maññe"ti ñatvā pādamūle nipajjitvā "sace ayyā imaṁ temāsaṁ idha vasissanti, ahaṁ tīṇi saraṇāni pañca sīlāni gahetvā uposathakammaṁ karissāmī"ti āha. Bhikkhū "mayaṁ imaṁ nissāya bhikkhāya akilamantā bhavanissaraṇaṁ kātuṁ sakkhissāmā"ti adhivāsayiṁsu. Sā tesaṁ vasanaṭṭhānaṁ vihāraṁ paṭijaggitvā adāsi.

Te tattheva vasantā ekadivasam sannipatitvā aññamaññam ovadimsu "āvuso amhehi pamādacāram caritum na vaṭṭati. Amhākañhi sakageham viya aṭṭha mahānirayā vivaṭadvārāyeva, dharamānakabuddhassa kho pana santike kammaṭṭhānam gahetvā mayam āgatā, Buddhā ca nāma padānupadikam vicarantenāpi saṭhena ārādhetum na sakkā, yathājjhāsayeneva ārādhetum sakkā, appamattā hotha, dvīhi ekaṭṭhāne na ṭhātabbam, na nisīditabbam, sāyam kho pana therūpaṭṭhānakāle pātova bhikkhācārakāle ekato bhavissāma, sesakāle dve ekato na bhavissāma, apica kho pana aphāsukena bhikkhunā āgantvā vihāramajjhe ghaṇḍiyā¹ pahatāya ghaṇḍisaññāya āgantvā tassa bhesajjam karissāmā"ti.

Tesu evam katikam katvā viharantesu ekadivasam sā upāsikā sappitelaphāṇitādīni gāhāpetvā dāsadāsikammakarādīhi parivutā sāyanhasamaye tam vihāram gantvā vihāramajjhe bhikkhū adisvā "kaham nu kho ayyā gatā"ti purise pucchitvā "attano attano rattiṭṭhānadivāṭṭhānesu nisinnā bhavissanti ayye"ti vutte "kim nu kho katvā

datthum sakkhissāmī"ti āha. Atha nam bhikkhusamghassa katikavattam jānanamanussā āhamsu "ghandiyā pahatāya sannipatissanti ayve"ti. Sā ca ghandim paharāpesi. Bhikkhū ghandisaddam sutvā "kassaci aphāsukam bhavissatī"ti sakasakatthānehi nikkhamitvā vihāramajjhe sannipatimsu. Dvepi janā ekamaggenāgatā nāma natthi. Upāsikā ekekatthānato ekekameva āgacchantam disvā "mama puttehi aññamaññam kalaho kato bhavissatī"ti cintetvā bhikkhusamgham vanditvā pucchi "kalaham nu kho bhante karitthā"ti. Na karoma mahā-upāsiketi. Sace vo bhante kalaho natthi, atha kasmā yathā amhākam geham āgacchantā sabbe ekatova āgacchatha, evam anāgantvā ekekatthānato ekekāva āgatāti. Mahā-upāsike ekekasmim thāne nisīditvā samanadhammam karimhāti. Ko esa bhante samanadhammo nāmāti. Dvattimsākāre sajihāvam karoma, attabhāve ca khavavavam patthapema mahā-upāsiketi. Kim pana bhante dvattimsākāre sajjhāyam kātum, attabhāve ca khayayam patthapetum tumhākameva vattati, udāhu amhākampīti. Kassacipi avārito esa dhammo mahā-upāsiketi. Tena hi bhante mayhampi dvattimsākāram detha, attabhāve ca khayavayapatthapanam ācikkhathāti. "Tena hi ugganha mahā-upāsike"ti sabbam ugganhāpesum.

Sā tato paṭṭhāya dvattiṁsākāre sajjhāyaṁ katvā attani khayavayaṁ paṭṭhapetvā tehi bhikkhūhi puretarameva tayo magge, tīṇi ca phalāni pāpuṇi. Maggeneva cassā catasso paṭisambhidā lokiya-abhiññā ca āgamiṁsu. Sā maggaphalasukhato vuṭṭhāya dibbacakkhunā oloketvā "kadā nu kho mama puttehi ayaṁ dhammo adhigato"ti upadhārentī sabbepime sarāgā sadosā samohā jhānavipassanāmattampi tesaṁ natthi, "kiṁ nu kho mayhaṁ puttānaṁ arahattassa upanissayo atthi, natthī"ti āvajjetvā "atthī"ti disvā "senāsanasappāyaṁ nu kho atthi, natthī"ti āvajjetvā tampi disvā "puggalasappāyaṁ nu kho labhanti, na labhantī"ti āvajjesi, puggalasappāyaṁ disvā "āhārasappāyaṁ nu kho labhanti, na labhantī"ti upadhārentī "āhārasappāyaṁ nesaṁ natthī"ti disvā tato paṭṭhāya nānāvidhaṁ yāguṁ, anekappakāraṁ khajjakaṁ, nānaggarasañca bhojanaṁ sampādetvā gehe bhikkhū nisīdāpetvā dakkhiṇodakaṁ datvā

"Bhante tumhākam yam yam ruccati, tam tam gahetvā paribhuñjathā"ti niyyādesi. Te yathāruci<sup>1</sup> yāgu-ādīni gahetvā paribhuñjanti. Tesam sappāyāhāram labhantānam cittam ekaggam ahosi.

Te ekaggena cittena vipassanam vaḍḍhetvā na cirasseva saha paṭisambhidāhi arahattam patvā cintayimsu "aho mahā-upāsikā amhākam patiṭṭhā jātā, sace mayam sappāyāhāram na labhimha, na no maggaphalapaṭivedho abhavissa, idāni vuṭṭhavassā pavāretvā Satthu santikam gamissāmā"ti. Te "Satthāram daṭṭhukāmamhā"ti mahā-upāsikam āpucchimsu. Mahā-upāsikā sādhu ayyāti. Te anugantvā punapi "bhante amhe olokeyyathā"ti bahūni piyavacanāni vatvā paṭinivatti. Tepi kho bhikkhū Sāvatthim gantvā Satthāram vanditvā ekamantam nisinnā "kacci bhikkhave khamanīyam, kacci yāpanīyam, na ca piṇḍakena kilamitthā"ti vutte "khamanīyam bhante, yāpanīyam bhante, piṇḍakena pana neva kilamimha. Amhākañhi Mātikamātā nāmekā upāsikā cittācāram ñatvā 'aho vata no evarūpam nāma āhāram paṭiyādeyyā'ti cintite yathācintitam āhāram paṭiyādetvā adāsī"ti tassā guṇakatham kathayimsu.

Aññataro bhikkhu tassā guṇakathaṁ sutvā tattha gantukāmo hutvā Satthu santike kammaṭṭhānaṁ gahetvā "bhante taṁ gāmaṁ gamissāmī"ti Satthāraṁ āpucchitvā Jetavanato nikkhamitvā anupubbena taṁ gāmaṁ patvā vihāraṁ pavisanadivaseyeva cintesi "ayaṁ kira upāsikā cintitacintitaṁ jānāti, ahañca maggakilanto² vihāraṁ paṭijaggituṁ na sakkhissāmi, aho vata me vihārapaṭijaggakaṁ manussaṁ peseyyā"ti. Upāsikā gehe nisinnāva āvajjentī tamatthaṁ ñatvā "gaccha, vihāraṁ paṭijaggitvā ehī"ti manussaṁ pesesi. Itaropi pānīyaṁ pivitukāmo "aho vata me sakkharapānakaṁ katvā peseyyā"ti cintesi. Upāsikā tampi pesesi. So punadivase "pātova siniddhayāguṁ me sa-uttaribhaṅgaṁ pesetū"ti cintesi. Upāsikā tathā akāsi. So yāguṁ pivitvā "aho vata me evarūpaṁ khajjakaṁ peseyyā"ti cintesi. Upāsikā tampi pesesi. So cintesi "ayaṁ upāsikā mayā sabbaṁ cintitacintitaṁ pesesi,

aham etam datthukamo, aho vata me nanaggarasabhojanam gahapetva sayameva āgaccheyyā"ti. Upāsikā "mama putto mam datthukāmo, āgamanam me paccāsīsatī"ti bhojanam gāhāpetvā vihāram gantvā tassa adāsi. So katabhattakicco "Mātikamātā nāma tvam mahā-upāsike"ti pucchi. Āma tātāti. Tvam paracittam jānāsīti. Kim mam pucchasi tātāti. Mayā cintitacintitam sabbamakāsi, tena tam pucchāmīti. Paracittajānanakabhikkhū bahū tātāti. Nāham aññe pucchāmi, tuvam pucchāmi upāsiketi. Evam santepi upāsikā "paracittam jānāmī"ti avatvā "paracittam jānantā1 nāma evam karonti putta"ti āha. So "bhāriyam vatidam kammam, puthujjanā nāma sobhanampi asobhanampi cintenti, sacāham kiñci ayuttam cintayissāmi, saha bhandakena coram cūlāya ganhantī viya mam vippakāram pāpeyya, mayā ito palāyitum vattatī"ti cintetvā "upāsike aham gamissāmī"ti āha. Kaham ayyāti. Satthu santikam upāsiketi. Vasatha tāva bhante idhāti. "Na vasissāmi upāsike, gamissāmevā"ti nikkhamitvā Satthu santikam agamāsi. Atha nam Satthā "kim bhikkhu na tvam tattha vasasī"ti pucchi. Āma bhante na sakkā tattha vasitunti. Kim kāranā bhikkhūti. "Bhante sā upāsikā cintitacintitam sabbam jānāti, puthujjanā ca nāma sobhanampi asobhanampi cintenti, sacāham kiñci ayuttam cintessāmi, saha bhandakena coram cūlāya ganhantī viya mam vippakāram pāpessatī"ti cintetvā āgatomhīti. Bhikkhu tattheva tavā vasitum<sup>2</sup> vattatīti. Na sakkomi bhante, nāham tattha vasissāmīti. "Tenahi tvam bhikkhu ekameva rakkhitum sakkhissasīti. Kim bhanteti. "Tava cittameva rakkha, cittam nāmetam durakkham, tvam attano cittameva nigganha, mā aññam kiñci cintayi, cittam nāmetam dunniggahan"ti vatvā imam gāthamāha—

35. "Dunniggahassa lahuno, yatthakāmanipātino. Cittassa damatho sādhu, cittaṁ dantaṁ sukhāvahan"ti.

Tattha cittam nāmetam dukkhena niggayhatīti dunniggaham. Lahum uppajjati ca nirujjhati cāti lahu. Tassa dunniggahassa lahuno. Yatthakāmanipātinoti yattha katthacideva nipatanasīlassa. Etañhi labhitabbaṭṭhānam vā alabhitabbaṭṭhānam vā yuttaṭṭhānam vā ayuttaṭṭhānam vā na jānāti, neva

jātim oloketi, na gottam, na vayam. Yattha yattha icchati, tattha tattheva nipatatīti "yattha kāmanipātī"ti vuccati. Tassa evarūpassa cittassa damatho sādhu catūhi ariyamaggehi dantabhāvo yathā nibbisevanam hoti. Tathā katabhāvo sādhu. Kim kāraṇā? Idam hi cittam dantam sukhāvaham nibbisevanam katam maggaphalasukham paramatthanibbānasukhamca āvahatīti.

Desanāpariyosāne sampattaparisāya bahū sotāpannādayo ahesum, mahājanassa sātthikā dhammadesanā jātāti.

Satthā tassa bhikkhuno imam ovādam datvā "gaccha bhikkhu, aññam kiñci acintayitvā tattheva vasāhī"ti pahiņi. So bhikkhu Satthu santikā ovādam labhitvā tattha agamāsi. Kiñci bahiddhā cintanam nāma na cintesi. Mahā-upāsikāpi dibbena cakkhunā olokentī theram disvā "idāni ovādadāyakam ācariyam labhitvā punāgato mama putto"ti attano ñāņeneva paricchinditvā tassa sappāyāhāram paṭiyādetvā adāsi. So sappāyabhojanam sevitvā katipāheneva arahattam patvā maggaphalasukhena vītināmento "aho mahā-upāsikā mayham patiṭṭhā jātā, aham imam nissāya bhavanissaraṇam pattomhī"ti cintetvā "imasmim tāva me attabhāve patiṭṭhā jātā, samsāre pana me samsarantassa añnesupi attabhāvesu ayam patiṭṭhā bhūtapubbā, no"ti upadhārento ekūna-attabhāvasatam anussari. Sāpi ekūna-attabhāvasate tassa pādaparicārikā añnesu paṭibaddhacittā hutvā tam jīvitā voropesi. Thero tassā ettakam aguṇam¹ disvā "aho ayam mahā-upāsikā bhāriyam kammam akāsī"ti cintesi.

Mahā-upāsikāpi gehe nisinnāva "kim nu kho mayham puttassa pabbajitakiccam mattakam pattam, no"ti upadhārayamānā tassa arahattappattim ñatvā uttari upadhāriyamānā "mama putto arahattam patvā aho vata me ayam upāsikā mahatī patiṭṭhā jātā"ti cintetvā "atītepi nu kho me ayam patiṭṭhā bhūtapubbā, no"ti upadhārento ekūna-attabhāvasatam anussari "aham kho pana ekūna-attabhāvasate aññehi saddhim

ekato hutvā etam jīvitā voropesim, ayam me ettakam aguņam disvā 'aho bhāriyam kammam katam upāsikāyā'ti cintesi, atthi nu kho evam samsāre samsarantiyā mama puttassa upakāro katapubbo"ti upadhārayamānā tato uttarim satamam attabhāvam anussaritvā satame attabhāve mayā etassa pādaparicārikāya hutvā etasmim jīvitā voropanaṭṭhāne jīvitadānam dinnam, aho mayā mama puttassa mahā-upakāro katapubbo"ti gehe nisinnāva uttarim visesetvā "upadhārethā"ti āha. So dibbāya sotadhātuyā saddam sutvā visesetvā satamam attabhāvam anussaritvā tattha tāya attano jīvitassa dinnabhāvam disvā "aho mama imāya mahā-upāsikāya upakāro katapubbo"ti attamano hutvā tassā tattheva catūsu maggaphalesu pañham kathetvā anupādisesāya nibbānadhātuyā parinibbāyīti.

Aññatarabhikkhuvatthu dutiyam.

## 3. Aññatara-ukkandhitabhikkhuvatthu

**Sududdasan**ti imam dhammadesanam Satthā Sāvatthiyam viharanto aññataram Ukkanthitabhikkhum ārabbha kathesi.

Satthari kira Sāvatthiyam viharante eko seṭṭhiputto attano kulūpagattheram upasankamitvā "bhante aham dukkhā muccitukāmo, ekam me dukkhato muccanakāraṇam kathethā"ti āha. "Sādhāvuso, sacesi dukkhā mucchitukāmo, salākabhattam dehi, pakkhikabhattam dehi, vassāvāsikam dehi, cīvarādayo paccaye dehi, attano sāpateyyam tayo koṭṭhāse katvā ekena kammantam payojehi, ekena puttadāram posehi, ekam Buddhasāsane dehī"ti āha. So "sādhu bhante"ti vuttapaṭipāṭiyā sabbam katvā puna theram pucchi "tato uttarim añām kim karomi bhante"ti. Āvuso tīṇi saraṇāni gaṇha, pañca sīlāni gaṇhāhīti. Tānipi paṭiggahetvā tato uttarim pucchi. Tena hi dasa sīlāni gaṇhāhīti. "Sādhu bhante"ti gaṇhi. So evam anupubbena puñāakammassa katattā Anupubbaseṭṭhiputto nāma jāto. Tato "uttarimpi kattabbam atthi bhante"ti puna pucchitvā "tena hi pabbajāhī"ti

vutto nikkhamitvā pabbaji. Tasseko ābhidhammikabhikkhu ācariyo ahosi, eko vinayadharo upajjhāyo. Tassa laddhūpasampadassa ācariyo attano santikam āgatakāle abhidhamme pañham kathesi "Buddhasāsane nāma idam kātum vaṭṭati, idam na vaṭṭatī"ti. Upajjhāyopissa attano santikam āgatakāle vinaye pañham kathesi "Buddhasāsane nāma idam kātum vaṭṭati, idam na vaṭṭati, idam kappati, idam na kappatī"ti. So cintesi "aho bhāriyam idam kammam, aham dukkhā muccitukāmo pabbajito, idha ca mama hatthapasāraṇaṭṭhānampi na paññāyati. Gehe ṭhatvāva dukkhā muccitum sakkā, mayā gihinā bhavitum vaṭṭatī"ti. So tato paṭṭhāya ukkaṇṭhito anabhirato dvattimsākāre sajjhāyam na karoti, uddesam na gaṇhāti, kiso lūkho dhamanisanthatagatto ālassiyābhibhūto kacchuparikiṇṇo ahosi.

Atha nam daharasāmaņerā "āvuso kim tvam thitaṭṭhāne thitova nisinnaṭṭhāne nisinnova ahosi, paṇḍurogābhibhūto kiso lūkho dhamanisanthatagatto ālassiyābhibhūto kacchuparikiṇṇo, kimte katan"ti pucchimsu. Ukkaṇṭhitomhi āvusoti. Kim kāraṇāti. So tam pavattim ārocesi. Te tassa ācariyupajjhāyānam ācikkhimsu. Ācariyupajjhāyā tam ādāya Satthu santikam agamamsu. Satthā "kimbhikkhave āgatatthā"ti āha. Bhante ayam bhikkhu tumhākam sāsane ukkaṇṭhitoti. Evam kira bhikkhūti. Āma bhanteti. Kim kāraṇāti. "Aham bhante dukkhā muccitukāmova pabbajito, tassa me ācariyo abhidhammakatham kathesi, upajjhāyo vinayakatham kathesi, svāham idha me hatthapasāraṇaṭṭhānampi natthi, gihinā hutvā sakkā dukkhā muccitum, gihi bhavissāmī"ti sanniṭṭhānamakāsim bhanteti. Sace tvam bhikkhu ekameva rakkhitum sakkhissasi, avasesānam rakkhaṇakiccam natthīti. Kim bhanteti, tava cittameva rakkhitum sakkhissatīti. Sakkhissāmi bhanteti. "Tena hi attano cittameva rakkhāhi, sakkā dukkhā muccitun"ti imam ovādam datvā imam gāthamāha—

36. "Sududdasam sunipuṇam, yatthakāmanipātinam. Cittam rakkhetha medhāvī, cittam guttam sukhāvahan"ti. Tattha sududdasanti suṭṭhu duddasaṁ. Sunipuṇanti suṭṭhu nipuṇaṁ paramasaṇhaṁ. Yatthakāmanipātinanti jāti-ādīni anoloketvā labhitabbālabhitabbayuttāyuttaṭṭhānesu yattha katthaci nipatanasīlaṁ. Cīttaṁ rakkhetha medhāvīti andhabālo dummedho attano cittaṁ rakkhituṁ samattho nāma natthi, cittavasiko hutvā anayabyasanaṁ pāpuṇāti. Medhāvī pana paṇḍitova cittaṁ rakkhituṁ sakkoti, tasmā tvampi cittaṁeva gopehi. Idañhi cittaṁ guttaṁ sukhāvahaṁ maggaphalanibbānasukhāni āvahatīti.

Desanāpariyosāne so bhikkhu sotāpattiphalam pāpuņi, aññepi bahū sotāpannādayo ahesum, desanā mahājanassa sātthikā ahosīti.

Aññatara-ukkanthitabhikkhuvatthu tatiyam.

## 4. Samgharakkhitabhāgineyyattheravatthu

**Dūraṅgama**nti imaṁ dhammadesanaṁ Satthā Sāvatthiyaṁ viharanto Saṁgharakkhitaṁ nāma bhikkhuṁ ārabbha kathesi.

Sāvatthiyam kireko kulaputto Satthu dhammadesanam sutvā nikkhamitvā pabbajito laddhūpasampado Samgharakkhitatthero nāma hutvā katipāheneva arahattam pāpuņi. Tassa kaniṭṭhabhaginī puttam¹ labhitvā therassa nāmam akāsi. So Bhāgineyyasamgharakkhito nāma hutvā vayappatto therasseva santike pabbajitvā laddhūpasampado aññatarasmim gāmakārāme vassam upagantvā "ekam sattahattham, ekam aṭṭhahatthan"ti dve vassāvāsikasāṭake labhitvā aṭṭhahattham "upajjhāyassa me bhavissatī"ti sallakkhetvā "sattahattham mayham bhavissatī"ti cintetvā vuṭṭhavasso "upajjhāyam passissāmī"ti āgacchanto antarāmagge piṇḍāya caranto āgantvā there vihāram anāgateyeva vihāram pavisitvā therassa divāṭṭhānam sammajjitvā pādodakam upaṭṭhapetvā āsanam paññāpetvā āgamanamaggam olokento nisīdi. Athassāgamanabhāvam disvā paccuggamanam katvā

pattacīvaram paṭiggahetvā "nisīdatha bhante"ti theram nisīdāpetvā tālavaṇṭam ādāya bījitvā pānīyam datvā pāde dhovitvā tam sāṭakam ānetvā pādamūle ṭhapetvā "bhante imam paribhuñjathā"ti vatvā bījayamāno aṭṭhāsi.

Atha nam thero āha "Samgharakkhita mayham cīvaram paripuṇṇam, tvameva paribhuñjā"ti. Bhante mayā laddhakālato paṭṭhāya ayam tumhākameva sallakkhito, paribhogam karothāti. Hotu Samgharakkhita, paripuṇṇam me cīvaram, tvameva paribhuñjāti. Bhante mā evam karotha, tumhehi paribhutte mayham mahapphalam bhavissatīti. Atha nam tassa punappunam kathentassapi thero na icchiyeva.

Evam so bījayamāno thitova cintesi "aham therassa gihikāle bhāgineyyo, pabbajitakāle saddhivihāriko, evampi mayā saddhim upajjhāyo paribhogam na kattukāmo, imasmim mayā saddhim paribhogam akaronte kim me samanabhāvena, gihi bhavissāmī"ti. Athassa etadahosi "dussanthāpito gharāvāso, kim nu kho katvā gihibhūto jīvissāmī"ti. Tato cintesi "atthahatthasātakam vikkinitvā ekam elikam ganhissāmi, elikā nāma khippam vijāyati, svāham vijātam vijātam vikkinitvā mūlam karissāmi, mūle bahū katvā ekam pajāpatim ānessāmi, sā ekam puttam vijāyissati, athassa mama mātulassa nāmam katvā cūļayānake nisīdāpetvā mama puttañca bhariyañca ādāya mātulam vanditum āgamissāmi, āgacchante antarāmagge mama bhariyam evam vakkhāmi 'ānehi tāva me puttam, vahissāmi nan'ti, sā 'kim te puttena<sup>2</sup>, ehi, imam yānakam pājehī'ti vatvā puttam gahetvā 'aham nessāmi nan'ti netvā sandhāretum asakkontī cakkapathe<sup>3</sup> chaddessati, athassa sarīram abhiruhitvā cakkam gamissati, atha nam 'tvam mama puttam neva mayham adasi, nam sandharetum nasakkhi nasitosmi taya'ti vatvā patodayatthiyā pitthiyam paharissāmī"ti.

So evam cintentova ṭhatvā bījayamāno therassa sīse tālavaṇṭena pahari. Thero "kim nu kho aham Samgharakkhitena sīse

<sup>1.</sup> Dussanthāpiyo (Sī) 2. Kim tena puttena gahitena (Sī) 3. Cakkapāde (Sī, Syā)

pahato"ti upadhārento tena cintitacintitam sabbam ñatvā "Samgharakkhita mātugāmassa pahāram dātum nāsakkhi, ko ettha mahallakattherassa doso"ti āha. So "aho naṭṭhomhi, ñātam kira me upajjhāyena cintitacintitam, kim me samanabhāvenā"ti tālavantam chaddetvā palāyitum āraddho.

Atha nam daharā ca sāmaņerā ca anubaddhitvā ādāya Satthu santikam agamamsu. Satthā te bhikkhū disvāva "kim bhikkhave āgatattha, eko vo bhikkhu laddho"ti pucchi. Āma bhante, imam daharam ukkaṇṭhitvā palāyantam gahetvā tumhākam santikam āgatamhāti. Evam kira bhikkhūti. Āma bhanteti. Kimattham te bhikkhu evam bhāriyam kammam katam, nanu tvam āraddhavīriyassa ekassa Buddhassa putto, mādisassa nāma Buddhassa sāsane pabbajitvā attānam dametvā sotāpannoti vā sakadāgāmīti vā anāgāmīti vā arahāti vā vadāpetum nāsakkhi, kimattham evam bhāriyam kammamakāsīti. Ukkaṇṭhitosmi bhanteti. Kim kāraṇā ukkaṇṭhitosīti. So evam vassāvāsikasāṭakānam laddhadivasato paṭṭhāya yāva therassa tālavaṇṭena pahārā sabbam tam pavattim ārocetvā "iminā kāraṇena palātosmi bhante"ti āha. Atha nam Satthā "ehi bhikkhu, mā cintayi, cittam nāmetam dūre hontampi ārammaṇam sampaṭicchanakajātikam, rāgadosamohabandhanā muccanatthāya vāyamitum vaṭṭatī"ti vatvā imam gāthamāha—

37. "Dūraṅgamaṁ ekacaraṁ, asarīraṁ guhāsayaṁ. Ye cittaṁ saṁyamessanti, mokkhanti mārabandhanā"ti.

Tattha dūraṅgamanti cittassa hi makkaṭasuttamattakampi puratthimādidisābhāgena gamanāgamanam nāma natthi, dūre santampi pana ārammaṇam sampaṭicchatīti dūraṅgamam nāma jātam. Sattaṭṭhacittāni pana ekato kaṇṇikabaddhāni ekakkhaṇe uppajjitum samatthāni nāma natthi, uppattikāle ekekameva cittam uppajjati, tasmim niruddhe puna ekekameva uppajjatīti¹ ekacaram nāma jātam. Cittassa sarīrasaṇṭhānam vā nīlādippakāro vaṇṇabhedo vā natthīti asarīram nāma jātam. Guhā nāma catumahābhūtaguhā, idañca hadayarūpam nissāya pavattatīti

guhāsayam nāma jātam. Ye cittanti ye keci purisā vā itthiyo vā gahaṭṭhā vā pabbajitā vā anuppajjanakakilesassa uppajjitum adentā satisammosena uppannakilesam pajahantā cittam samyamessanti samyatam avikkhittam karissanti. Mokkhanti mārabandhanāti sabbete kilesabandhanābhāvena mārabandhanasankhātā tebhūmakavaṭṭā muccissantīti.

Desanāpariyosāne Bhāgineyyasamgharakkhitatthero sotāpattiphalam pāpuņi, aññepi bahū sotāpannādayo jātā, mahājanassa sātthikā dhammadesanā ahosīti.

Samgharakkhitabhāgineyyattheravatthu catuttham.

#### 5. Cittahatthattheravatthu

Anavaṭṭhitacittassāti imaṁ dhammadesanaṁ Satthā Sāvatthiyaṁ viharanto Cittahatthattheraṁ¹ ārabbha kathesi.

Eko kira Sāvatthivāsī kulaputto naṭṭhagoṇaṁ pariyesanto araññaṁ pavisitvā majjhanhike kāle goṇaṁ disvā goyūthe vissajjetvā "avassaṁ ayyānaṁ santike āhāramattaṁ labhissāmī"ti khuppipāsāpīlito vihāraṁ pavisitvā bhikkhūnaṁ santikaṁ gantvā vanditvā ekamantaṁ nisīdi. Tasmiṁ kho pana samaye bhikkhūnaṁ avakkārapātiyaṁ bhuttāvasesakaṁ bhattaṁ hoti, te taṁ chātakapīlitaṁ disvā "ito² bhattaṁ gahetvā bhuñjāhī"ti vadiṁsu. Buddhakāle ca pana anekasūpabyañjanaṁ bhattaṁ uppajjati, so tato yāpanamattaṁ gahetvā bhuñjitvā pānīyaṁ pivitvā hatthedhovitvā bhikkhū vanditvā "kiṁ bhante ajja ayyā nimantanaṭṭhānaṁ agamaṁsū"ti pucchi. Natthi upāsaka, bhikkhū imināva nīhārena nibaddhaṁ labhantīti. So "mayaṁ uṭṭhāya samuṭṭhāya rattindivaṁ nibaddhaṁ kammaṁ karontāpi evaṁ madhurabyañjanaṁ bhattaṁ na labhāma, ime kira nibaddaṁ bhuñjanti, kiṁ me gihibhāvena, bhikkhu bhavissāmī"ti cintetvā bhikkhū upasaṅkamitvā pabbajjaṁ yāci. Atha naṁ bhikkhū "sādhu upāsakā"ti pabbājesuṁ.

So laddhūpasampado sabbappakāram vattapaṭivattam akāsi, so Buddhānam uppannena lābhasakkārena katipāhaccayena thūlasarīro ahosi. Tato cintesi "kim me bhikkhāya caritvā jīvitena, gihī bhavissāmī"ti. So vibbhamitvā geham pāvisi. Tassa gehe kammam karontassa katipāheneva sarīram milāyi. Tato "kim me iminā dukkhena, samaņo bhavissāmī"ti cintetvā puna gantvā pabbaji. So katipāham vītināmetvā puna ukkaṇṭhitvā vibbhami, pabbajitakāle pana bhikkhūnam upakārako hoti. So katipāheneva punapi ukkaṇṭhitvā "kim me gihibhāvena, pabbajissāmī"ti gantvā bhikkhū vanditvā pabbajjam yāci. Atha nam bhikkhū upakāravasena puna pabbājayimsu. Evam so iminā niyāmeneva chakkhattum pabbajitvā uppabbajito. Tassa bhikkhū "esa cittavasiko hutvā vicaratī"ti Cittahatthattheroti nāmam karimsu.

Tassevam aparāparam vicarantasseva bhariyā gabbhinī ahosi. So sattame vāre araññato kasibhaṇḍamādāya geham gantvā bhaṇḍakam ṭhapetvā "attano kāsāvam gaṇhissāmī"ti gabbham pāvisi. Tasmim khaṇe tassa bhariyā nipajjitvā niddāyati, tassā nivatthasāṭako apagato hoti, mukhato ca lālā paggharati, nāsā ghuraghurāyati, mukham vivaṭam, dantam ghamsati, sā tassa¹ uddhumātakasarīram viya upaṭṭhāsi. So "aniccam dukkham idan"ti saññam labhitvā "aham ettakam kālam pabbajitvā imam nissāya bhikkhubhāve saṇṭhātum nāsakkhin"ti kāsāyakoṭiyam gahetvā udare bandhitvā gehā nikkhami.

Athassa anantaragehe thitā sassu taṁ tathā gacchantaṁ disvā "ayaṁ paṭi-ukkaṇṭhito bhavissati², idāneva araññato āgantvā kāsāvaṁ udare bandhitvāva gehā nikkhanto vihārābhimukho gacchati, kiṁ nu kho"ti gehaṁ pavisitvā niddāyamānaṁ dhītaraṁ passitvā "imaṁ disvā so vippaṭisārī hutvā gato"ti ñatvā dhītaraṁ paharitvā "uṭṭhehi kāṭakaṇṇi, sāmiko te taṁ niddāyamānaṁ disvā vippaṭisārī hutvā gato, natthi so ito paṭṭhāya tuyhan"ti āha. "Apehi apehi amma, kuto tassa gamanaṁ atthi, katipāheneva punāgamissatī"ti āha. Sopi "aniccaṁ dukkhan"ti vatvā gacchanto gacchantova sotāpattiphalaṁ pāpuṇi.

so gantvā bhikkhū vanditvā pabbajjam yāci. Na sakkhissāma mayam tam pabbājetum, kuto tuyham samaṇabhāvo, satthakanisānapāsāṇasadisam¹ tava sīsanti. Bhante idāni mam anukampāya ekavāram pabbājethāti. Te tam upakāravasena pabbājayimsu. So katipāheneva saha paṭisambhidāhi arahattam pāpuṇi.

Tepi nam āhamsu "āvuso Cittahattha tava gamanasamayam tvameva jāneyyāsi, imasmim vāre te cirāyitan"ti. Bhante samsaggassa atthibhāvakāle gatamhā, so no samsaggo chinno, idāni agamanadhammā jātamhāti. Bhikkhū Satthu santikam gantvā "bhante ayam bhikkhū amhehi evam vutto evam nāma kathesi, aññam byākaroti, abhūtam vadatī"ti āhamsu. Satthā "āma bhikkhave mama putto attano anavaṭṭhitacittakāle saddhammam ajānanakāle gamanāgamanam akāsi, idānissa puññañca pāpañca pahīnan"ti vatvā imā dve gāthā āha—

- 38. "Anavaṭṭhitacittassa, saddhammaṁ avijānato. Pariplavapasādassa, paññā na paripūrati.
- "Anavassutacittassa, ananvāhatacetaso.
   Puññapāpapahīnassa, natthi jāgarato bhayan"ti.

Tattha anavaṭṭhitacittassāti cittaṁ nāmetaṁ kassaci nibaddhaṁ vā thāvaraṁ vā natthi. Yo pana puggalo assapiṭṭhe ṭhapitakumbhaṇḍaṁ viya ca thusarāsimhi koṭṭitakhāṇuko viya ca khallāṭasīse ṭhapitakadambapupphaṁ viya ca na katthaci saṇḍhāti², kadāci Buddhasāvako hoti, kadāci Ājīvako, kadāci Nigaṇṭho, kadāci tāpaso. Evarūpo puggalo anavaṭṭhitacitto nāma. Tassa anavaṭṭhitacittassa. Saddhammaṁ avijānatoti sattatiṁsabodhipakkhiyadhammabhedaṁ imaṁ saddhammaṁ avijānantassa parittasaddhatāya vā uplavasaddhatāya vā pariplavapasādassa kāmāvacararūpāvacarādibhedā paññā na paripūrati. Kāmāvacarāyapi aparipūrayamānāya kutova rūpāvacarārūpāvacaralokuttarapaññā paripūrissatīti dīpeti. Anavassutacittassāti rāgena atintacittassa.

khilajāto"ti¹ āgataṭṭhāne dosena cittassa pahatabhāvo vutto, idha pana dosena appaṭihatacittassāti attho. **Puññapāpapahīnassā**ti catutthamaggena pahīnapuññassa ceva pahīnapāpassa ca khīṇāsavassa. **Natthi jāgarato bhayan**ti khīṇāsavassa jāgarantasseva abhayabhāvo kathito viya, so pana saddhādīhi pañcahi jāgaradhammehi samannāgatattā jāgaro nāma. Tasmā tassa jāgarantassāpi ajāgarantassāpi kilesabhayaṁ natthi kilesānaṁ apacchāvattanato. Na hi taṁ kilesā anubandhanti tena tena maggena pahīnānaṁ kilesānaṁ puna anupagamanato. Tenevāha "sotāpattimaggena ye kilesā pahīnā, te kilese na puneti na pacceti na paccāgacchati, sakadāgāmi-anāgāmi-arahattamaggena ye kilesā pahīnā, te kilese na puneti na pacceti na paccāgacchatī"ti².

Desanā mahājanassa sātthikā saphalā ahosi.

Athekadivasam bhikkhū dhammasabhāyam katham samuṭṭhāpesum "bhāriyā vatime āvuso kilesā nāma, evarūpassa arahattassa upanissayasampanno kulaputto kilesehi āloļito sattavāre gihī hutvā sattavāre pabbajito"ti. Satthā tesam tam kathāpavattim sutvā tankhaṇānurūpena gamanena dhammasabham gantvā Buddhāsane nisinno "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte evameva bhikkhave kilesā nāma bhāriyā, sace ete rūpino hutvā katthaci pakkhipitum sakkā bhaveyyum, cakkavāļam atisambādham, brahmaloko atinīcakoti okāso nesam na bhaveyya, mādisampi nāmete paññāsampannam purisājāneyyam āloļenti, avasesesu kā kathā. Aham hi aḍḍhanāļimattam varakacorakam kuṇṭhakudālañca nissāya cha vāre pabbajitvā uppabbajitapubboti. Kadā bhante, kadā Sugatāti. Suṇissatha bhikkhaveti. Āma bhanteti. "Tena hi sunāthā"ti atītam āhari—

Atīte Bārāṇasiyam Brahmadatte rajjam kārente Kudālapaṇḍito nāma bāhirakapabbajjam pabbajitvā aṭṭha māse Himavante vasitvā vassārattasamaye bhūmiyā tintāya "gehe me aḍḍhanāļimatto varakacorako ca

kuṇṭhakudālako ca atthi, varakacorakabījam mā nassī"ti uppabbajitvā ekam ṭhānam kudālena kasitvā tam bījam vapitvā vatim katvā pakkakāle uddharitvā nāļimattabījam ṭhapetvā sesam khādi, so "kim me dāni gehena, puna aṭṭha māse pabbajissāmī"ti cintetvā nikkhamitvā pabbaji. Imināva nīhārena nāļimattam varakacorakañca kuṇṭhakudālañca nissāya sattavāre gihī hutvā sattavāre pabbajitvā sattame pana vāre cintesi "aham cha vāre¹ imam kuṇṭhakudālam nissāya gihī hutvā pabbajito, katthacideva nam chaḍḍessāmī"ti. So Gaṅgāya tīram gantvā "patitaṭṭhānam passanto otaritvā gaṇheyyam, yathāssa patitaṭṭhānam na passāmi, tathā nam chaḍḍessāmī"ti cintetvā nāļimattam bījam pilotikāya bandhitvā pilotikam kudālaphalake bandhitvā kudālam aggadaṇḍake gahetvā Gaṅgāya tīre ṭhito akkhīni nimīletvā uparisīse tikkhattum āvijjhitvā² Gaṅgāyam khipitvā nivattitvā olokento patitaṭṭhānam adisvā "jitam me, jitam me"ti tikkhattum saddamakāsi.

Tasmim khaņe Bārāṇasirājā paccantam vūpasametvā āgantvā nadītīre khandhāvāram nivāsetvā nhānatthāya nadim otiņņo tam saddam assosi. Rājūnañca nāma "jitam me"ti saddo amanāpo hoti, so tassa santikam gantvā "aham idāni amittamaddanam³ katvā 'jitam me'ti āgato, tvam pana 'jitam me, jitam me'ti viravasi, kim nāmetan"ti pucchi. Kudālapaṇḍito "tvam bāhirakacore jini, tayā jitam puna avajitameva hoti, mayā pana ajjhattiko lobhacoro jito, so puna mam na jinissati, tasseva jayo sādhū"ti vatvā imam gāthamāha—

"Na tam jitam sādhu jitam, yam jitam avajīyati. Tam kho jitam sādhu jitam, yam jitam nāvajīyatī"ti<sup>4</sup>.

Tam khaṇamyeva ca Gaṅgam olokento āpokasiṇam nibbattetvā adhigataviseso ākāse pallaṅkena nisīdi. Rājā mahāpurisassa dhammakatham sutvā vanditvā pabbajjam yācitvā saddhim balakāyena pabbaji. Yojanamattā parisā ahosi. Aparopi sāmantarājā tassa pabbajitabhāvam sutvā "tassa rajjam ganhissāmī"ti āgantvā tathā samiddham

<sup>1.</sup> Sattavāre (Sī)

<sup>2.</sup> Āvajjetvā (Sī), āviñchitvā (Ka)

<sup>3.</sup> Amittamathanam (Sī), amittadamanam (Ka)

<sup>4.</sup> Khu 5. 16 pitthe.

nagaram suññam disvā "evarūpam nagaram chaḍḍetvā pabbajito rājā orake ṭhāne na pabbajissati, mayāpi pabbajitum vaṭṭatī"ti cintetvā tattha gantvā mahāpurisam upasamkamitvā pabbajjam yācitvā saparivāro pabbaji, eteneva nīhārena satta rājāno pabbajimsu. Sattayojaniko assamo ahosi. Satta rājāno bhoge chaḍḍetvā¹ ettakam janam gahetvā pabbajimsu. Mahāpuriso brahmacariyavāsam vasitvā brahmalokūpago ahosi.

Satthā imam dhammadesanam āharitvā "aham bhikkhave tadā Kudālapaṇḍito ahosim, kilesā nāmete evam bhāriyā"ti āha.

Cittahattattheravatthu pañcamam.

#### 6. Pañcasatabhikkhuvatthu

**Kumbhūpaman**ti imam dhammadesanam Satthā Sāvatthiyam viharanto āraddhavipassake bhikkhū ārabbha kathesi.

Sāvatthiyam kira pañcasatā bhikkhū Satthu santike yāva arahattā kammaṭṭhānam gahetvā "samaṇadhammam karissāmā"ti yojanasatamaggam gantvā ekam Mahāvāsagāmam agamamsu. Atha te manussā disvā paññattāsane nisīdāpetvā paṇītehi yāgubhattādīhi parivisitvā "kaham bhante gacchathā"ti pucchitvā "yathāphāsukaṭṭhānan"ti vutte "bhante imam temāsam idheva vasatha, mayampi tumhākam santike saraṇesu patiṭṭhāya pañca sīlāni rakkhissāmā"ti yācitvā tesam adhivāsanam viditvā "avidūre ṭhāne mahanto vanasaṇḍo atthi, ettha vasatha bhante"ti vatvā uyyojesum. Bhikkhū tam vanasaṇḍam pavisimsu. Tasmim vanasaṇḍe adhivatthā devatā "sīlavanto ayyā imam vanasaṇḍam anuppattā, ayuttam kho pana asmākam ayyesu idha vasantesu puttadāre gahetvā rukkhe abhiruyha vasitun"ti rukkhato otaritvā bhūmiyam nisīditvā cintayimsu "ayyā imasmim ṭhāne ajjekarattim vasitvā addhā sve gamissantī"ti. Bhikkhūpi punadivase antogāme piṇḍāya caritvā puna tameva vanasaṇḍam āgamimsu. Devatā "bhikkhusaṃgho svātanāya kenaci nimantito bhavissati, tasmā

punāgacchati, ajja gamanam na bhavissati, sve gamissati maññe''ti iminā upāyena aḍḍhamāsamattam bhūmiyameva acchimsu.

Tato cintayimsu "bhadantā imam temāsam idheva maññe vasissanti, idheva kho pana imesu vasantesu amhākam rukkhe abhiruhitvā nisīditumpi na yuttam, temāsam puttadāre gahetvā bhūmiyam nisīdanaṭṭhānānipi dukkhāni, kiñci katvā ime bhikkhū palāpetum vaṭṭatī"ti. Tā tesu tesu rattiṭṭhānadivāṭṭhānesu ceva caṅkamanakoṭīsu ca chinnasīsāni kabandhāni dassetum, amanussasaddañca sāvetum ārabhimsu. Bhikkhūnam khipitakāsādayo rogā pavattimsu. Te aññamaññam "tuyham āvuso kim rujjatī"ti pucchantā "mayham khipitarogo, mayham kāso"ti vatvā "āvuso aham ajja caṅkamanakoṭiyam chinnasīsam addasam, aham rattiṭṭhāne kabandham addasam, aham divāṭṭhāne amanussasaddam assosim, parivajjetabbayuttakamidam ṭhānam, amhākam idha aphāsukam ahosi, Satthu santikam gamissāmā"ti nikkhamitvā anupubbena Satthu santikam gantvā vanditvā ekamantam nisīdimsu.

Atha ne Satthā āha "kim bhikkhave tasmim ṭhāne vasitum na sakkhissathā"ti. Āma bhante, amhākam tasmim ṭhāne vasantānam evarūpāni bheravārammaṇāni upaṭṭhahanti, evarūpam aphāsukam hoti, tena mayam "vajjetabbayuttakamidam ṭhānan"ti tam chaḍḍetvā tumhākam santikam āgatāti. Bhikkhave tattheva tumhākam gantum vaṭṭatīti. Na sakkā bhanteti. Bhikkhave tumhe āvudham aggahetvā gatā, idāni āvudham gahetvā gacchathāti. Katarāvudham bhanteti. Satthā "aham āvudham vo dassāmi, mayā dinnam āvudham gahetvā gacchathā"ti vatvā—

"Karaṇīyamatthakusalena, yanta santam padam abhisamecca. Sakko ujū ca suhujū ca, suvaco cassa mudu anatimānī"ti—

Sakalam **Mettasuttam**<sup>1</sup> kathetvā "bhikkhave imam tumhe bahi vihārassa vanasaṇḍato paṭṭhāya sajjhāyantā antovihāram paviseyyāthā"ti uyyojesi. Te Satthāram vanditvā nikkhamitvā anupubbena tam ṭhānam patvā bahivihāre gaṇasajjhāyam katvā sajjhāyamānā vanasaṇḍam pavisimsu. Sakalavanasaṇḍe devatā mettacittam paṭilabhitvā tesam paccuggamanam katvā

pattacīvarapaṭiggahaṇaṁ āpucchiṁsu, hatthapādasambāhanaṁ¹ āpucchiṁsu, tesaṁ tattha tattha ārakkhaṁ saṁvidahiṁsu, pakkadhūpanatelaṁ² viya sannisinnā ahesuṁ. Katthaci amanussasaddo nāma nāhosi. Tesaṁ bhikkhūnaṁ cittaṁ ekaggaṁ ahosi. Te rattiṭṭhānadivāṭṭhānesu nisinnā vipassanāya cittaṁ otāretvā attani khayavayaṁ paṭṭhapetvā "ayaṁ attabhāvo nāma bhijjanakaṭṭhena athāvaraṭṭhena kulālabhājanasadiso"ti vipassanaṁ vaḍḍhayiṁsu. Sammāsambuddho Gandhakuṭiyā nisinnova tesaṁ vipassanāya āraddhabhāvaṁ ñatvā te bhikkhū āmantetvā "evameva bhikkhave ayaṁ attabhāvo nāma bhijjanakaṭṭhena athāvaraṭṭhena kulālabhājanasadiso evā"ti vatvā obhāsaṁ pharitvā yojanasate ṭhitopi abhimukhe nisinno viya chabbaṇṇaraṁsiyo vissajjetvā dissamānena rūpena imaṁ gāthamāha—

40. "Kumbhūpamam kāyamimam viditvā, Nagarūpamam cittamidam ṭhapetvā. Yodhetha māram paññāvudhena, Jitañca rakkhe anivesano siyā"ti.

Tattha **kumbhūpaman**ti abaladubbalatthena anaddhaniyatāvakālikatthena imam kesādisamūhasankhātam kāvam kumbhūpamam kulālabhājanasadisam viditvā. Nagarūpamam cittamidam thapetvāti nagaram nāma bahiddhā thiram hoti, gambhīraparikham pākāraparikkhittam dvārattālakayuttam, antosuvibhattavīthicatukkasinghātakasampannam antarāpanam, tam "vilumpissāmā"ti bahiddhā corā āgantvā pavisitum asakkontā pabbatam āsajja patihatā viya gacchanti, evameva pandito kulaputto attano vipassanācittam thiram nagarasadisam katvā thapetvā<sup>3</sup> nagare thito ekatodhārādinānappakārāvudhena coraganam viya vipassanāmayena ca ariyamaggamayena ca paññavudhena tamtammaggavajjham kilesamaram patibāhanto<sup>4</sup> tam tam kilesamāram yodhetha, pahareyyāthāti attho. **Jitañca** rakkheti jitañca uppāditam tarunavipassanam āvāsasappāyautusappāyabhojanasappāyapuggalasappāyadhammassavanasappāyādīni āsevanto antarantarā samāpattim samāpajjitvā tato vutthāya suddhacittena sankhāre sammasanto rakkheyya.

<sup>1.</sup> Gattasambāhanam (Sī, Syā)

<sup>3.</sup> Thaketvā (Syā)

<sup>2.</sup> Cakkadhūpanatelam (Syā)

<sup>4.</sup> Patidahanto (Ka)

Anivesano siyāti anālayo bhaveyya. Yathā nāma yodho saṅgāmasīse balakoṭṭhakaṁ katvā amittehi saddhiṁ yujjhanto chāto vā pipāsito vā hutvā sannāhe vā sithile āvudhe vā patite balakoṭṭhakaṁ pavisitvā vissamitvā bhuñjitvā pivitvā sannahitvā āvudhaṁ gahetvā puna nikkhamitvā yujjhanto parasenaṁ maddati, ajitaṁ jināti, jitaṁ rakkhati. So hi sace balakoṭṭhake ṭhito evaṁ vissamanto taṁ assādento accheyya, rajjaṁ parahatthagataṁ kareyya, evameva bhikkhu paṭiladdhaṁ taruṇavipassanaṁ punappunaṁ saṃāpattiṁ samāpajjitvā tato vuṭṭhāya suddhacittena saṅkhāre sammasanto rakkhituṁ sakkoti, uttarimaggaphalapaṭilābhena kilesamāraṁ jināti. Sace pana so samāpattimeva assādeti, suddhacittena punappunaṁ saṅkhāre na sammasati, maggaphalapaṭivedhaṁ kātuṁ na sakkoti. Tasmā rakkhitabbayuttakaṁ rakkhanto anivesano siyā, samāpattiṁ nivesanaṁ katvā tattha na niveseyya, ālayaṁ na kareyyāti attho. "Addhā tumhepi evaṁ karothā"ti evaṁ Satthā tesaṁ bhikkhūnaṁ dhammaṁ daseti.

Desanāvasāne pañcasatā bhikkhū nisinnaṭṭhāne nisinnāyeva saha paṭisambhidāhi arahattaṁ patvā Tathāgatassa suvaṇṇasuvaṇṇaṁ sarīraṁ vannayantā thomentā vandantāva āgacchiṁsūti.

Pañcasatabhikkhuvatthu chattham.

### 7. Pūtigattatissattheravatthu

Aciram vata'yam kāyoti imam dhammadesanam Satthā Sāvatthiyam viharanto Pūtigattatissattheram ārabbha kathesi.

Eko kira Sāvatthivāsī kulaputto Satthu santike dhammam sutvā sāsane uram datvā pabbajito, so laddhūpasampado Tissatthero nāma ahosi. Gacchante gacchante kāle tassa sarīre rogo udapādi. Sāsapamattiyo piļakā uṭṭhahimsu. Tā anupubbena muggamattā kalāyamattā kolaṭṭhimattā āmalakamattā beļuvasalāṭumattā beļuvamattā hutvā pabhijjimsu, sakalasarīram chiddāvachiddam ahosi. **Pūtigattatissatthero** tv'ev'assa nāmam udapādi. Ath'assa aparabhāge aṭṭhīni bhijjimsu. So

appaṭijaggiyo ahosi. Nivāsanapārupanam pubbalohitamakkhitam jālapūvasadisam ahosi. Saddhivihārikādayo paṭijaggitum asakkontā chaḍḍayimsu. So anātho hutvā nipajji.

Buddhānañca nāma dve vāre lokavolokanam avijahitam hoti. Paccūsakāle lokam volokentā cakkavālamukhavattito patthāya Gandhakutiabhimukham ñānam katvā olokenti, sāyam olokentā gandhakutito patthāya bāhirābhimukham ñānam katvā olokenti. Tasmim pana samaye Bhagavato ñānajālassa anto Pūtigattatissatthero paññāyi. Satthā tassa bhikkhuno Arahattassa upanissayam disvā "ayam saddhivihārikādīhi chaddito, idāni'ssa mam thapetvā aññam patisaranam n'atthī"ti Gandhakutito nikkhamitvā vihāracārikam caramāno viya aggisālam gantvā ukkhalim dhovitvā udakam datvā uddhanam āropetvā udakassa tattabhāvam āgamayamāno aggisālāyameva atthāsi, tattabhāvam jānitvā gantvā tassa bhikkhuno nipannamañcakotiyam ganhi, tadā bhikkhū "apetha bhante mayam ganhissāmā"ti mañcakam gahetvā aggisālam ānayimsu. Satthā ambanam<sup>1</sup> āharāpetvā unhodakam āsincitvā tehi bhikkhūhi tassa pārupanam gāhāpetvā unhodake maddapetva mandatape vissajjapesi, ath'assa santike thatva sarīram unhodakena temetvā ghamsitvā nhāpesi, tassa nahānapariyosāne pārupanam sukkhi. Atha nam tam nivāsāpetvā nivatthakāsāvam udake maddapetva atape vissajjapesi. Ath'assa gatte udake chinnamatte tampi sukkhi. So ekam kāsāvam nivāsetvā ekam pārupitvā sallahukasarīro ekaggacitto mañcake nipajji. Satthā tassa ussīsake thatvā "bhikkhu ayam tava kāyo apetaviññāno nirupakāro hutvā kalingaram viya pathaviyam sessatī"ti vatvā imam gāthamāha—

41. Aciram vat'ayam kāyo, pathavim adhisessati. Chuddho apetaviññāno, niratthamva kalingaran''ti.

Tattha aciram vatāti bhikkhu na cirass'eva ayam kāyo pathavim adhisessati, imissā pakatisayanena sayitāya pathaviyā upari

sayissati. **Chuddho**ti apaviddho, apagataviññāṇatāya tuccho hutvā sessatīti dasseti. Yathā kiṁ? **Niratthaṁva kaliṅgaraṁ** nirupakāraṁ niratthakaṁ kaṭṭhakhaṇḍaṁ viya. Dabbasambhāratthikā hi manussā araññaṁ pavisitvā ujukaṁ ujukasaṇṭhānena¹, vaṅkaṁ vaṅkasaṇṭhānena chinditvā dabbasambhāraṁ gaṇhanti, avasesaṁ pana susirañca pūtikañca asārakañca gaṇṭhijātañca chinditvā tatth'eva chaḍḍenti. Aññe dabbasambhāratthikā āgantvā taṁ gahetāro nāma² n'atthi, oloketvā attano upakārakameva gaṇhanti, itaraṁ pathavīgatameva hoti. Taṁ pana tena tena upāyena mañcapaṭipādakaṁ vā pādakathalikaṁ vā phalakapīṭhaṁ vā kātuṁ sakkāpi bhaveyya. Imasmiṁ pana attabhāve dvattiṁsāya koṭṭhāsesu ekakoṭṭhāsopi mañcapaṭipādakādivasena aññena vā upakāramukhena gayhūpago nāma n'atthi, kevalaṁ niratthaṁ 'va kaliṅgaraṁ ayaṁ kāyo apagataviññāṇo katipāhen'eva³ pathaviyaṁ sessatīti.

Desanāvasāne Pūtigattatissatthero saha paṭisambhidāhi arahattaṁ pāpuṇi, aññepi bahū sotāpannādayo ahesuṁ. Theropi arahattaṁ patvā'va parinibbāyi. Satthā tassa sarīrakiccaṁ kārāpetvā dhātuyo gahetvā cetiyaṁ kārāpesi. Bhikkhū Satthāraṁ pucchiṁsu—"bhante Pūtigattatissatthero kuhiṁ nibbatto"ti. Parinibbuto bhikkhaveti. Bhante evarūpassa pana arahattūpanissayasampannassa bhikkhuno kiṁ kāraṇā gattaṁ pūtikaṁ jātaṁ, kiṁ kāraṇā aṭṭhīni bhinnāni, kimassa kāraṇaṁ arahattassa upanissayabhāvaṁ pattanti? Bhikkhave sabbametaṁ etassa attanā katakammen'eva nibbattanti. Kiṁ pana tena bhante katanti? "Tena hi bhikkhave suṇāthā"ti atītaṁ āhari—

Ayam Kassapasammāsambuddhakāle sākuņiko hutvā bahū sakuņe vadhitvā issarajanam upaṭṭhahi, tesam dinnāvasese vikkiņāti, vikkitāvasesā "māretvā ṭhapitvā pūtikā bhavissantī"ti yathā uppatitum na sakkonti, tathā tesam jaṅghaṭṭhīni ca pakkhaṭṭhīni ca bhinditvā rāsim katvā ṭhapeti, te punadivase vikkiṇāti. Atibahūnam⁴ pana laddhakāle attanopi atthāya pacāpeti. Tass'ekadivasam rasabhojane pakke eko khīṇāsavo piṇḍāya caranto gehadvāre aṭṭhāsi. So Theram

<sup>1.</sup> Ujukasantānena (Sī, Ka)

<sup>2.</sup> Gahetvā ākaṅkhantā nāma (Syā)

<sup>3.</sup> Katipāhasseva (Sī, Syā)

<sup>4.</sup> Atibahum (Sī)

disvā cittam pasādetvā "mayā bahū pāṇā māretvā khāditā¹, ayyo ca me gehadvāre ṭhito, antogehe ca rasabhojanam samvijjati, piṇḍapātamassa dassāmī"ti tassa pattam ādāya pūretvā rasapiṇḍapātam datvā theram pañcapatiṭṭhitena vanditvā "bhante tumhehi diṭṭhadhammassa matthakam pāpuṇeyyan"ti āha. Thero "evam hotū"ti anumodanam akāsi. Bhikkhave tadā katakammavasen'etam Tissassa nipphannam, sakuṇānam aṭṭhibhedananissandena Tissassa gattam ca pūtikam jātam, aṭṭhīni ca bhinnāni, khīṇāsavassa rasapiṇḍapātadānanissandena arahattam pattoti.

Pūtigattatissattheravatthu sattamam.

### 8. Nandagopālakavatthu

**Diso disan**ti imam dhammadesanam Satthā Kosalajanapade Nandagopālakam ārabbha kathesi.

Sāvattiyam kira Anāthapindikassa gahapatino Nando nāma gopālako goyūtham rakkhati addho mahaddhano mahābhogo. So kira yathā Keniyo jatilo pabbajjāvesena, evam gopālakattena rājabalim<sup>2</sup> pariharanto attano kutumbam rakkhati, so kālena kālam<sup>3</sup> pañca gorase ādāya Anāthapindikassa santikam āgantvā Satthāram passati, dhammam sunāti, attano vasanatthānam āgamanatthāya Satthāram yācati. Satthā tassa ñānaparipākam āgamayamāno agantvā paripakkabhāvam natvā ekadivasam mahābhikkhusamghaparivuto cārikam caranto maggā okkamma tassa vasanatthānāsanne aññatarasmim rukkhamūle nisīdi. Nando Satthu santikam āgantvā vanditvā patisanthāram katvā Satthāram nimantetvā sattāham Buddhappamukhassa bhikkhusamghassa panītam pañcagorasadānam adāsi. Sattame divase Satthā anumodanam katvā dānakathādibhedam anupubbim katham kathesi. Kathāpariyosāne Nandagopālako sotāpakkiphale patitthāya Satthu pattam gahetvā Satthāram anugacchanto dūram gantvā "tittha upāsakā"ti nivattiyamāno vanditvā nivatti. Atha nam eko luddako vijihitvā māresi. Pacchato āgacchantā bhikkhū nam disvā gantvā

<sup>1.</sup> Pānā māritā (Syā)

Satthāram āhamsu "Nando bhante gopālako tumhākam idhāgatattā mahādānam datvā anugantvā nivattento mārito, sace tumhe nāgacchissatha, nāssa maraṇam abhavissā"ti. Satthā "bhikkhave mayi āgatepi anāgatepi tassa catasso disā catasso anudisā ca gacchantassāpi maraṇato muccanūpāyo nāma natthi. Yañhi neva corā, na verino karonti, tam imesam sattānam antopaduṭṭham¹ micchāpaṇihitam cittameva karotī"ti vatvā imam gāthamāha—

42. "Diso disam yam tam kayirā, verī vā pana verinam. Micchāpaņihitam cittam, pāpiyo nam tato kare"ti.

Tattha diso disanti coro coram. "Disvā"ti pāṭhaseso. Yam tam kayirāti yam tam tassa anayabyasanamkareyya. Dutiyapadepi eseva nayo. Idam vuttam hoti—eko ekassa mittadubbhī coro puttadārakhettavatthu gomahimsādīsu aparajjhanto yassa aparajjhati, tampi tatheva attani aparajjhantam coram disvā, verī vā pana kenacideva kāraņena baddhaveram verim disvā attano kakkhaļatāya dāruņatāya yam tam tassa anayabyasanam kareyya, puttadāram vā pīļeyya, khettādīni vā nāseyya, jīvitā vā pana nam voropeyya, dasasu akusalakammapathesu micchāṭhapitattā micchāpaṇihitam cittam pāpiyo nam tato kare tam purisam tato pāpataram kareyya.

Vuttappakārehi² diso disassa vā verī verino vā imasmim yeva attabhāve dukkham vā uppādeyya, jīvitakkhayam vā kareyya. Idam pana akusalakammapathesu micchāṭhapitam cittam diṭṭheva dhamme anayabyasanam pāpeti, attabhāvasatasahassesupi catūsu apāyesu khipitvā sīsam ukkhipitum na detīti.

Desanāpariyosāne bahū sotāpattiphalādīni pattā, mahājanassa sātthikā desanā jātā. Upāsakena pana bhavantare katakammam bhikkhūhi na pucchitam, tasmā Satthārā na kathitanti.

Nandagopālakavatthu aṭṭhamam.

### 9. Soreyyattheravatthu

Na taṁ mātā pitā kayirāti imaṁ dhammadesanaṁ Satthā Sāvatthiyaṁ Jetavane viharanto Soreyyattheraṁ ārabbha kathesi.

Vatthu Soreyyanagare samutthitam, Sāvatthiyam nitthāpesi. Sammāsambuddhe Sāvatthiyam viharante Soreyyanagare Soreyyasetthiputto ekena sahāyakena saddhim sukhayānake nisīditvā mahantena parivārena nhānatthāya nagarā nikkhami. Tasmim khane Mahākaccāyanatthero Soreyyanagaram pindāya pavisitukāmo hutvā bahinagare samghātim pārupati. Therassa ca suvannavannam sarīram. Soreyyasetthiputto tam disvā cintesi "aho vata ayam vā thero mama bhariyā bhaveyya, mama vā bhariyāya sarīravanno etassa sarīravanno viya bhaveyyā"ti. Tassa cintitamatteveva purisalingam antaradhāyi, itthilingam pāturahosi. So lajjamāno<sup>1</sup> yānakā oruyha palāyi. Parijano tam asañjānanto "kimetan"ti āha. Sāpi Takkasilamaggam patipajji. Sahāyakopissā ito cito ca vicaritvāpi nāddasa. Sabbe nhāyitvā geham agamimsu. "Kaham setthiputto"ti ca vutte "nhātvā āgato bhavissatīti maññimhā"ti vadimsu. Athassa mātāpitaro tattha tattha pariyesitvā apassantā roditvā paridevitvā "mato bhavissatī"ti matakabhattam adamsu. Sā ekam Takkasilagāmim satthavāham disvā yānakassa<sup>2</sup> pacchato pacchato anubandhi.

Atha nam manussā disvā "amhākam yānakassa pacchato pacchato anugacchati, mayam 'kassesā dārikā'ti tam na jānāmā'ti vadimsu. Sāpi "tumhe attano yānakam pājetha, aham padasā gamissāmī'ti gacchantī angulimuddikam datvā ekasmim yānake okāsam kāresi. Manussā cintayimsu "Takkasilanagare amhākam seṭṭhiputtassa bhariyā natthi, tassa ācikkhissāma, mahāpaṇṇākāro no bhavissatī'ti. Te geham gantvā "sāmi amhehi tumhākam ekam itthiratanam ānītan'ti āhamsu. So tam sutvā tam pakkosāpetvā attano gayānurūpam abhirūpam pāsādikam disvā uppannasineho gehe akāsi. Purisā hi itthiyo,

itthiyo vā purisā abhūtapubbā nāma natthi. Purisā hi parassa dāresu aticaritvā kālaṁ katvā bahūni vassasatasahassāni niraye paccitvā manussajātiṁ āgacchantā attabhāvasate itthibhāvaṁ āpajjanti.

Ānandattheropi kappasatasahassam pūritapāramī ariyasāvako samsāre samsaranto ekasmim attabhāve kammārakule nibbatto, paradārakammam katvā niraye paccitvā pakkāvasesena cuddasasu attabhāvesu purisassa pādaparicārikā itthī ahosi, sattasu attabhāvesu bījuddharaṇam pāpuṇi. Itthiyo pana dānādīni puññāni katvā itthibhāve chandam virājetvā "idam no puññam purisattabhāvapaṭilābhāya samvattatū"ti cittam adhiṭṭhahitvā kālam katvā purisattabhāvam paṭilabhanti, patidevatā hutvā sāmike sammāpaṭipattivasenāpi purisattabhāvam paṭilabhanteva.

Ayam pana setthiputto there ayoniso cittam uppādetvā imasmimyeva attabhāve itthibhāvam patilabhi. Takkasilāyam setthiputtena saddhim samvāsamanvāva pana tassā kucchiyam gabbho patitthāsi. Sā dasamāsaccayena puttam labhitvā tassa padasā gamanakāle aparampi puttam patilabhi. Evamassā kucchiyam vutthā dve, Soreyyanagare tam paticca nibbattā dveti cattāro puttā ahesum. Tasmimkāle Soreyyanagarato tassā sahāyako setthiputto pañcahi sakatasatehi Takkasilam gantvā sukhayānake nisinno nagaram pāvisi. Atha nam sā uparipāsādatale vātapānam vivaritvā antaravīthim olokayamānā thitā disvā sanjānitvā dāsim pesetvā pakkosāpetvā mahātale nisīdāpetvā mahantam sakkārasammānam akāsi. Atha nam so aha "bhadde tvam ito pubbe amhehi na ditthapubba, atha ca<sup>1</sup> pana no mahantam sakkāram karosi. Jānāsi tvam amhe"ti. Āma sāmi jānāmi, nanu tumhe Soreyyanagaravāsinoti. Āma bhaddeti. Sā mātāpitūnañca bhariyāya ca puttānañca arogabhāvam pucchi. Itaro "āma bhadde, arogā"ti vatvā "jānāsi tvam ete"ti āha. Āma sāmi jānāmi, tesam eko putto atthi, so kaham<sup>2</sup> sāmīti. Bhadde mā etam kathehi, mayam tena saddhim ekadivasam sukhayānake nisīditvā nhāyitum nikkhantā nevassa gatim jānāma, ito cito ca vicaritvā tam adisvā

mātāpitūnam ārocayimhā, tepissa roditvā kanditvā petakiccam kirimsūti. Aham so sāmīti. Apehi bhadde, kim kathesi, mayham sahāyo devakumāro viya eko purisoti. Hotu sāmi, aham soti. Atha idam kim nāmāti. Tam divasam te ayyo Mahākaccāyanatthero diṭṭhoti. Āma diṭṭhoti. Aham ayyam Mahākaccāyanattheram oloketvā "aho vata ayam vā thero mama bhariyā bhaveyya, etassa vā sarīravaṇṇo viya mama bhariyāya sarīravaṇṇo bhaveyyā"ti cintesim, cintitakkhaṇeyeva me purisalingam antaradhāyi, itthilingam pātubhavi. Athāham lajjamānā kassaci kiñci vattum asakkuṇitvā tato palāyitvā idhāgatā sāmīti.

Aho vata te bhāriyam kammam katam, kasmā mayham nācikkhi, apica pana te thero khamāpitoti. Na khamāpito sāmi. Jānāsi pana tvam kaham theroti. Imameva nagaram upanissāya viharatīti. Sace pindāya caranto idhāgaccheyya, aham mama ayyassa bhikkhāhāram dadeyyam sāmīti, "tena hi sīgham sakkāram karohi, amhākam ayyam khamāpessāmā"ti so therassa vasanatthānam gantvā vanditvā ekamantam nisinno "bhante sve mayham bhikkham ganhatha"ti aha. Nanu tvam setthiputta agantukosīti. Bhante mā amhākam āgantukabhāvam pucchatha, sve me bhikkham ganhathāti. Thero adhivāsesi. Gehepi therassa mahāsakkāro paṭiyatto. Thero punadivase tam gehadvāram agamāsi. Atha nam nisīdāpetvā panītenāhārena parivisitvā setthiputto tam itthim gahetvā therassa pādamūle nipajjāpetvā "bhante mayham sahāyikāya khamathā"ti āha. Kimetanti. Ayam bhante pubbe mayham piyasahāyako hutvā tumhe oloketvā evam nāma cintesi, athassa purisalingam antaradhāyi, itthilingam pātubhayi, khamatha bhanteti. Tena hi utthahatha, khamāmi vo ahanti. Therena "khamāmī"ti vuttamatteyeva itthilingam antaradhāyi purisalingam pātubhavi.

Purisalinge pātubhūtamatteyeva tam Takkasilāya setthiputto āha "samma sahāyaka ime dve dārakā tava kucchiyam vutthattā mam paticca nibbattattā ubhinnampino puttā eva, idheva vasissāma, mā ukkanthī"ti. "Samma aham ekenattabhāvena pathamam puriso hutvā itthibhāvam patvā

puna puriso jātoti vippakārappatto, paṭhamaṁ maṁ paṭicca dve puttā nibbattā, idāni me kucchito dve puttā nikkhantā, svāhaṁ ekenattabhāvena vippakārappatto, puna 'gehe vasissatī'ti sañāaṁ mā kari, ahaṁ mama ayyassa santike pabbajissāmi, ime dve dārakā tava bhārāti, imesu mā pamajjī"ti vatvā putte sīse paricumbitvā parimajjitvā ure nipajjāpetvā pitu niyyādetvā nikkhamitvā therassa santike pabbajjaṁ yāci. Theropi naṁ pabbājetvā upasampādetvā gaṇhitvāva cārikaṁ caramāno anupubbena Sāvatthiṁ agamāsi. Tassa Soreyyattheroti nāmaṁ ahosi. Janapadavāsino taṁ pavattiṁ ñatvā saṅkhubhitvā kotūhalajātā taṁ upasaṅkamitvā pucchiṁsu "evaṁ kira bhante"ti. Āma āvusoti. Bhante evarūpampi kāraṇaṁ nāma hoti. Tumhākaṁ kucchiyaṁ kira dve puttā nibbattā, tumhe paṭicca dve jātā, tesaṁ vo kataresu balavasineho hotīti. Kucchiyaṁ vutthakesu āvusoti. Āgatāgatā nibaddhaṁ tatheva pucchiṁsu.

Thero "kucchiyam vutthakesu eva sineho balavā"ti punappunam kathento harāyamāno ekova nisīdati, ekova tiṭṭhati. So evam ekattūpagato attabhāve khayavayam samuṭṭhāpetvā saha paṭisambhidāhi arahattam pāpuṇi. Atha nam āgatāgatā pucchanti "bhante evam kira nāma ahosī"ti. Āmāvusoti. Kataresu sineho balavāti. Mayham katthaci sineho nāma natthīti. Bhikkhū "ayam abhūtam kathesi, purimadivasesu 'kucchiyam vutthaputtesu sineho balavā'ti vatvā idāni 'mayham katthaci sineho natthī'ti vadati, aññam byākaroti bhante"ti āhamsu. Satthā "na bhikkhave mama putto aññam byākaroti, mama puttassa sammāpaṇihitena cittena maggassa diṭṭhakālato paṭṭhāya na katthaci sineho jāto, yam sampattim neva mātā, na pitā kātum sakkoti, tam imesam sattānam abbhantare pavattam sammāpaṇihitam cittameva detī"ti vatvā imam gāthamāha—

43. "Na taṁ mātā pitā kayirā, aññe vāpi ca ñātakā. Sammāpanihitaṁ cittaṁ, seyyaso naṁ tato kare"ti.

Tattha **na tan**ti tam kāraṇam neva mātā kareyya, na pitā, na aññe ñātakā. **Sammāpaṇihitan**ti dasasu kusalakammapathesu sammā ṭhapitam.

Seyyaso nam tato kareti tato kāraṇato seyyaso nam varataram uttaritaram kareyya, karotīti attho. Mātāpitaro hi puttānam dhanam dadamānā ekasmimyeva attabhāve kammam akatvā sukhena jīvikakappanam dhanam dātum sakkonti. Visākhāya mātāpitaropi tāva mahaddhanā mahābhogā, tassā ekasmimyeva attabhāve sukhena jīvikakappanam dhanam adamsu. Catūsu pana dīpesu cakkavattisirim dātum samatthā mātāpitaropi nāma puttānam natthi, pageva dibbasampattim vā paṭhamajjhānādisampattim vā, lokuttarasampattidāne kathāva natthi, sammāpaṇihitam pana cittam sabbempetam sampattim dātum sakkoti. Tena vuttam "seyyaso nam tato kare"ti.

Desanāvasāne bahū sotāpattiphalādīni pattā, desanā mahājanassa sātthikā jātāti.

Soreyyattheravatthu navamam.

# Cittavaggavannanā niţţhitā

Tatiyo vaggo.

# 4. Pupphavagga

#### 1. Pathavikathāpasutapañcasatabhikkhuvatthu

Ko imam pathavim vicessatīti imam dhammadesanam Satthā Sāvatthiyam viharanto pathavikathāpasute pañcasate bhikkhū ārabbha kathesi.

Te kira Bhagavatā saddhim janapadacārikam caritvā Jetavanam āgantvā sāyanhasamaye upaṭṭhānasālāyam sannisinnā attanā gatagataṭṭhānesu "asukagāmato asukagāmagamanaṭṭhāne samam visamam kaddamabahulam sakkharabahulam kāṭamattikam tambamattikam"ti pathavikatham kathesum. Satthā āgantvā "kāya nuttha bhikkhave etarahi kathāya sannisinnā"ti pucchitvā "bhante amhehi vicaritaṭṭhāne pathavikathāyā"ti vutte "bhikkhave esā bāhirapathavī nāma, tumhehi ajjhattikapathaviyam parikammam kātum vaṭṭatī"ti vatvā imā dve gāthā abhāsi—

- 44. "Ko imam pathavim vicessati<sup>1</sup>, Yamalokañca imam sadevakam. Ko dhammapadam sudesitam, Kusalo pupphamiva pacessati.
- 45. Sekho pathavim vicessati, Yamalokañca imam sadevakam. Sekho dhammapadam sudesitam, Kusalo pupphamiva pacessatī"ti.

Tattha ko imanti ko imam attabhāvasankhātam pathavim. Vicessatīti attano ñāṇena vicinissati vijānissati² paṭivijjhissati, sacchikarissatīti attho. Yamalokañcāti catubbidham apāyalokañca. Imam sadevakanti imam manussalokañca devalokena saddhim ko vicessati vicinissati vijānissati paṭivijjhissati sacchikarissatīti pucchi. Ko dhammapadam sudesitanti yathāsabhāvato kathitattā sudesitam sattatimsabodhipakkhiyadhammasankhātam dhammapadam kusalo mālākāro puppham vicinanto viya

ko pacessati vicinissati vijānissati upaparikkhissati paṭivijjhissati, sacchikarissatīti attho. Sekhoti adhisīlasikkhā adhicittasikkhā adhipaññāsikkhāti imā tisso sikkhā sikkhanato sotāpattimaggaṭṭhaṁ ādiṁ katvā yāva arahattamaggaṭṭhā sattavidho sekho imaṁ attabhāvasaṅkhātaṁ pathaviṁ arahattamaggena tato chandarāgaṁ apakaḍḍhanto vicessati vicinissati vijānissati paṭivijjhissati sacchikarissati. Yamalokañcāti taṁ yathāvuttappakāraṁ yamalokañca imaṁ manussalokañca saha devehi sadevakaṁ sveva vicessati vicinissati vijānissati paṭivijjhissati sacchikarissathi. Se khoti sveva sattavidho sekho, yathā nāma kusalo mālākāro pupphārāmaṁ pavisitvā taruṇamakuļāni ca pāṇakaviddhāni ca milātāni ca gaṇṭhikajātāni ca pupphāni vajjetvā sobhanāni sujātasujātāneva pupphāni vicināti, evameva imaṁ sukathitaṁ suniddiṭṭhaṁ bodhipakkhiyadhammapadampi paññāya pacessati vicinissati upaparikkhissati paṭivijjhissati sacchikarissatīti Satthā sayameva pañhaṁ vissajjesi.

Desanāvasāne pañcasatāpi bhikkhū saha paṭisambhidāhi arahattam pāpuṇimsu, sampattaparisāyapi sātthikā dhammadesanā ahosīti.

 $Pathavikath \overline{a} pasutapa \widetilde{n} casatabhikkhuvatthu\ pa\underline{t}hama\dot{m}.$ 

#### 2. Marīcikammaṭṭhānikattheravatthu

**Pheṇūpaman**ti imam dhammadesanam Satthā Sāvatthiyam viharanto aññataram marīcikammatthānikam bhikkhum ārabbha kathesi.

So kira bhikkhu Satthu santike kammaṭṭhānaṁ gahetvā "samaṇadhammaṁ karissāmī"ti araññaṁ pavisitvā ghaṭetvā¹ vāyamitvā arahattaṁ pattuṁ asakkonto "visesetvā kammaṭṭhānaṁ kathāpessāmī"ti Satthu santikaṁ āgacchanto antarāmagge marīciṁ ditvā "yathā ayaṁ gimhasamaye uṭṭhitā marīci dūre ṭhitānaṁ rūpagatā viya paññāyati, santikaṁ āgacchantānaṁ neva paññāyati, ayaṁ attabhāvopi uppādavayaṭṭhena evarūpo"ti marīcikammaṭṭhānaṁ bhāvento āgantvā maggakilanto Aciravatiyaṁ nhāyitvā

ekasmim caṇḍasotatīre rukkhachāyāya nisinno udakavegābhighātena uṭṭhahitvā mahante mahante pheṇapiṇḍe bhijjamāne disvā "ayam attabhāvopi uppajjitvā bhijjanaṭṭhena evarūpoyevā"ti ārammaṇam aggahesi. Satthā Gandhakuṭiyam ṭhitova tam theram disvā "evameva bhikkhu, evarūpovāyam attabhāvo pheṇapiṇḍo viya marīci viya uppajjanabhijjanasabhāvoyevā"ti vatvā imam gāthamāha—

46. "Pheṇūpamaṁ kāyamimaṁ viditvā, Marīcidhammaṁ abhisambudhāno. Chetvāna mārassa papupphakāni, Adassanaṁ maccurājassa gacche"ti.

Tattha pheṇūpamanti imam kesādisamūhasankhātam kāyam abaladubbalatthena anaddhaniyatāvakālikatthena¹ pheṇapiṇḍasarikkhakoti viditvā. Marīcidhammanti yathā marīci dūre thitānam rūpagatā viya gayhūpagā viya hoti, santike upagacchantānam rittā tucchā agayhūpagā sampajjati, evameva khaṇika-ittarapaccupaṭṭhānaṭṭhena ayam kāyopi marīcidhammoti abhisambudhāno bujjhanto, jānantoti attho. Mārassa papupphakānīti mārassa papupphakasankhātāni tebhūmakāni vaṭṭāni ariyamaggena chinditvā khīṇāsavo bhikkhu maccurājassa adassanam avisayam amatamahānibbānam gaccheyyāti.

Gāthāpariyosāne thero saha paṭisambhidāhi arahattaṁ patvā Satthu suvannavannaṁ sarīraṁ thomento vannento vandantova āgatoti.

Marīcikammaṭṭhānikattheravatthu dutiyam.

## 3. Viţaţūbhavatthu

**Pupphāniheva pacinantan**ti imam dhammadesanam Satthā Sāvatthiyam viharanto saparisam mahoghena ajjhottharitvā māritam Viṭaṭūbham² ārabbha kathesi.

Tatrāyam anupubbikathā—Sāvatthiyam hi Mahākosalarañño putto Pasenadikumāro nāma, Vesāliyam Licchavirañño putto Licchavikumāro Mahāli nāma, Kusinārāyam Mallarājaputto Bandhulo nāmāti ime tayo disāpāmokkhassācariyassa santike sippuggahanattham Takkasilam gantvā bahinagare sālāya samāgatā aññamaññassa āgatakāranañca kulañca nāmañca pucchitvā sahāyakā hutvā ekatova ācariyam upasankamitvā sippam sikkhantā na cirasseva uggahitasippā ācariyam āpucchitvā ekatova nikkhamitvā sakasakatthānāni agamamsu. Tesu Pasenadikumāro pitu sippam dassetvā pasannena pitarā rajje<sup>1</sup> abhisitto. **Mahālikumāro** licchavīnam sippam dassento mahantena ussāhena dassesi, tassa akkhīni bhijjitvā agamamsu. Licchavirājāno "aho vata amhākam āciriyo akkhivināsam patto, na nam pariccajissāma, upatthahissāma nan"ti tassa satasahassutthānakam ekam dvāram adamsu. So tam nissāya pañcasate licchavirājaputte sippam sikkhāpento vasi. **Bandhulakumāro** satthim satthim velū gahetvā majjhe ayasalākam pakkhipitvā satthikalāpe ussāpetvā thapite Mallarājakulehi "ime kappetū" ti vutto asītihattham ākāsam ullanghitvā asinā kappento agamāsi. So osānakalāpe ayasalākāya "kirī"ti<sup>2</sup> saddam sutvā "kim etan"ti pucchitvā sabbakalāpesu ayasalākānam thapitabhāvam natvā asim chaddetvā rodamāno "mayham ettakesu ñātisuhajjesu ekopi sasineho<sup>3</sup> hutvā imam kāranam nācikkhi. Sace hi aham jāneyyam, ayasalākāya saddam anutthāpentova chindeyyan"ti vatvā "sabbepime māretvā rajjam kareyyan"ti<sup>4</sup> mātāpitūnam kathesi. Tehi "pavenirajjam nāma tāta idam na labbhā evam kātun"ti nānappakārena vārito "tena hi mama sahāyakassa santikam gamissāmī"ti Sāvatthim agamāsi.

Pasenadi Kosalo rājā tassāgamanam sutvā paccuggantvā mahantena sakkārena tam nagaram pavesetvā senāpatiṭṭhāne ṭhapesi. So mātāpitaro pakkosāpetvā tattheva vāsam kappesi. Athekadivasam

rājā uparipāsāde thito antaravīthim olokavamānā "Anāthapindikassa Cūlaanāthapindikassa Visākhāya Suppavāsāyā"ti etesam gehe niccam bhattakiccatthāya gacchante anekasahasse bhikkhū disvā "kaham ayyā gacchantī''ti pucchitvā "deva Anāthapindikassa gehe niccabhattasalākabhattagilānabhattādīnam atthāya devasikam dve bhikkhusahassāni gacchanti, Cūla-anāthapindikassa gehe pañcasatāni, tathā Visākhāya, tathā Suppavāsāyā"ti vutte sayampi bhikkhusamgham upatthahitukāmo vihāram gantvā bhikkhusahassena saddhim Satthāram nimantetvā sattāham sahatthā dānam datvā sattame divase Satthāram vanditvā "bhante pañcahi me bhikkhusatehi saddhim nibaddham bhikkham ganhathā"ti āha. Mahārāja Buddhā nāma ekatthāne nibaddham bhikkham na ganhanti, bahū janā Buddhānam āgamanam paccāsīsantīti. "Tena hi ekam bhikkhum nibaddham pesethā"ti āha. Satthā Ānandattherassa bhāram akāsi. Rājā bhikkhusamghe āgate pattam gahetvā "ime nāma parivisantū"ti avicāretvāva sattāham sayameva parivisitvā atthame divase vikkhittacitto pamajjamakāsi<sup>1</sup>. Rājakule nāma anānattā āsanāni paññāpetvā bhikkhū nisīdāpetvā parivisitum na labhanti "na mayam idha thātum sakkhissāmā"ti bahū bhikkhū pakkamimsu. Rājā dutiyadivasepi pamajji, dutiyadivasepi bahū bhikkhū pakkamimsu. Tatiyadivasepi pamajji, tadā Ānandattheram ekakameva thapetvā avasesā pakkamimsu. Puññavantā nāma kāraṇavasikā honti, kulānam pasādam rakkhanti. Tathāgatassa ca Sāriputtatthero Mahāmoggallānattheroti dve aggasāvakā, Khemā Uppalavannāti dve aggasāvikā, upāsakesu Citto gahapati, hatthako Āļavakoti dve aggaupāsikā<sup>2</sup>, upāsikāsu Velukanthakī Nandamātā, Khujjuttarāti dve aggaupāsikā<sup>3</sup>, iti ime attha jane ādim katvā thānantarapattā sabbepi sāvakā ekadesena dasannam pāramīnam pūritattā mahāpuññā abhinīhārasampannā. Ānandattheropi kappasatasahassam pūritapāramī abhinīhārasampanno mahāpuñño attano kāraņavasikatāya kulassa pasādam rakkhanto atthāsi. Tam ekakameva nisīdāpetvā parivisimsu.

<sup>1.</sup> Papañcamakāsi (Sī, Syā)

<sup>3.</sup> Aggasāvikā upāsikā (Sī, Syā)

<sup>2.</sup> Aggasāvakā upāsakā (Sī, Syā)

Rājā bhikkhūnam gatakāle āgantvā khādanīyabhojanīyāni tatheva thitāni¹ disvā "kim ayyā nāgamimsū"ti pucchitvā "Ānandatthero ekakova āgato devā"ti sutvā "addhā ettakam me bhattacchedanamakamsū"ti bhikkhūnam kuddho Satthu santikam gantvā "bhante mayā pañcannam bhikkhūsatānam bhikkhā paṭiyattā, Ānandatthero kira ekakovāgato, paṭiyattā bhikkhā tatheva ṭhitā, pañcasatā bhikkhū mama gehe saññam na karimsu, kim nu kho kāraṇan"ti āha. Satthā bhikkhūnam dosam avatvā "mahārāja mama sāvakānam tumhehi saddhim vissāso natthi, tena na gatā² bhavissantī"ti vatvā kulānam anupagamanakāraṇañca upagamanakāraṇañca pakāsento bhikkhū āmantetvā imam suttamāha—

"Navahi bhikkhave aṅgehi samannāgataṁ kulaṁ anupagantvā vā nālaṁ upagantuṁ, upagantvā vā nālaṁ upanisīdituṁ. Katamehi navahi, na manāpena paccuṭṭhenti, na manāpena abhivādenti, na manāpena āsanaṁ denti, santamassa pariguhanti, bahukampi thokaṁ denti, paṇītampi lūkhaṁ denti, asakkaccaṁ denti no sakkaccaṁ, na upanisīdanti dhammassavanāya bhāsitamassa na sussūsanti. Imehi kho bhikkhave navahaṅgehi samannāgataṁ kulaṁ anupagantvā vā nālaṁ upagantuṁ, upagantvā vā nālaṁ upanisīdituṁ.

Navahi bhikkhave aṅgehi samannāgataṁ kulaṁ anupagantvā vā alaṁ upagantuṁ, upagantvā vā alaṁ upanisīdituṁ. Katamehi navahi, manāpena paccuṭṭhenti, manāpena abhivādenti manāpena āsanaṁ denti, santamassa na pariguhanti, bahukampi bahukaṁ denti, paṇītampi paṇītaṁ denti, sakkaccaṁ denti no asakkaccaṁ, upanisīdanti dhammassavanāya, bhāsitamassa sussūsanti. Imehi kho bhikkhave navahaṅgehi samannāgataṁ kulaṁ anupagantvā vā alaṁ upagantuṁ, upagantvā vā alaṁ upanisīditun"ti³.

Iti kho mahārāja mama sāvakā tumhākam santikā vissāsam alabhantā na gatā bhavissantīti. Porāṇakapaṇḍitāpi hi avissāsikaṭṭhāne sakkaccam upaṭṭhiyamānāpi māraṇantikam vedanam patvā vissāsikaṭṭhānameva agamimsūti. "Kadā bhante"ti raññā puṭṭho atītam āhari—

Atīte Bārāṇasiyam Brahmadatte rajjam kārente Kesavo nāma rājā rajjam pahāya isipabbajjam pabbaji. Tam pañca purisasatāni anupabbajimsu. So Kesavatāpaso nāma ahosi. Pasādhanakappako panassa anupabbajitvā Kappako nāma antevāsiko ahosi. Kesavatāpaso parisāya saddhim aṭṭha māse Himavante vasitvā vassārattasamaye loṇambilasevanatthāya Bārāṇasim patvā bhikkhāya pāvisi. Atha nam rājā disvā pasīditvā catumāsam attano santike vasanatthāya paṭiññam gahetvā uyyāneva vasāpento sayam sāyampātam assa upaṭṭhānam gacchati. Avasesā tāpasā katipāham vasitvā hatthisaddādīhi ubbāļā hutvā ukkaṇṭhitvā "ācariya ukkaṇṭhitamhā, gacchāmā"ti āhamsu. Kaham tātāti. Himavantam ācariyāti. Rājā amhākam āgatadivaseyeva catumāsam idha vasanatthāya paṭiññam gaṇhi. Katham gamissatha¹ tātāti. "Tumhehi amhākam anācikkhitvāva paṭiññā dinnā, mayam idha na sakkoma vasitum, ito avidūre tumhākam pavattissavanaṭṭhāne vasissāmā"ti vanditvā pakkamimsu. Kappantevāsikena saddhim ācariyo ohīyi.

Rājā upaṭṭhānaṁ āgato "kahaṁ ayyā"ti pucchi. "Sabbe ukkaṇṭhitamhāti vatvā Himavantaṁ gatā mahārājā"ti āha. Kappakopi na cirasseva ukkaṇṭhitvā ācariyena punappunaṁ vāriyamānopi "na sakkomī"ti vatvā pakkāmi. Itaresaṁ pana santikaṁ agantvā² ācariyassa pavattiṁ suṇanto avidūre ṭhāne vasi. Aparabhāge ācariyassa antevāsike anussarantassa kucchirogo uppajji. Rājā vejjehi tikicchāpesi, rogo na vūpasammati. Tāpaso āha "kiṁ mahārāja icchasi me rogavūpasaman"ti. Bhante sacāhaṁ sakkuṇeyyaṁ, idāneva vo phāsukaṁ kareyyanti. Mahārāja sace me phāsukaṁ icchasi, maṁ antevāsikānaṁ santikaṁ pesehīti. Rājā "sādhu bhante"ti taṁ mañcake nipajjāpetvā Nārada-amaccappamukhe cattāro amacce "mama ayyassa pavattiṁ ñatvā mayhaṁ sāsanaṁ pahiṇeyyāthā"ti uyyojesi. Kappantevāsiko ācariyassa āgamanaṁ sutvā paccuggamanaṁ katvā itare "kahan"ti vutte "asukaṭṭhāne kira vasantī"ti āha. Tepi ācariyassāgamanabhāvaṁ sutvā tattheva samosaritvā ācariyassa uṇhodakaṁ datvā phalāphalaṁ adaṁsu.

taṁ khaṇaññeva rogo vūpasammati. So katipāheneva suvaṇṇavaṇṇo ahosi. Atha naṁ Nārado pucchi—

Manussindam jahitvāna, sabbakāmasamiddhinam. Katham nu Bhagavā kesī, kappassa ramati assame.

Sādūni ramaṇīyāni, santi vakkhā<sup>1</sup>manoramā. Subhāsitāni kappassa, Nārada ramayanti mam.

Sālīnam odanam bhuñje, sucim mamsūpasecanam. Katham sāmākanīvāram, aloṇam chādayanti tam.

Sādum vā yadi vā 'sādum, appam vā yadi vā bahum. Vissattho yattha bhunjeyya, vissāsaparamā rasā''ti².

Satthā imam dhammadesanam āharitvā jātakam samodhānento "tadā rājā Moggallāno ahosi, Nārado Sāriputto, Kappantevāsiko Ānando, Kesavatāpaso ahamevā"ti vatvā "evam mahārāja pubbepi panditā māranantikam vedanam patvā vissāsikatthānam gamimsu, mama sāvakā tumhākam santike vissāsam na labhanti maññe"ti āha. Rājā "bhikkhusamghena saddhim mayā vissāsam kātum vattati, katham nu kho karissāmīti Sammāsambuddhassa ñātidhītaram mama gehe kātum vattati, evam sante 'daharā ca sāmaņerā ca Sammāsambuddhassa ñātirājā'ti mama santikam vissatthā<sup>3</sup> nibaddham āgamissantī''ti cintetvā "ekam me dhītaram dentū"ti sākiyānam santikam sāsanam pesesi. "Katarassa Sakyassa dhītā"ti ca pucchitvā "ñatvā āgaccheyyāthā" ti vatvā dūte āṇāpesi. Dūtā gantvā Sākiye dārikam yācimsu. Te sannipatitvā "pakkhantariko<sup>4</sup> rājā, sace na dassāma, vināsessati no, na kho pana amhehi kulena sadiso, kim nu kho kātabban"ti mantayimsu. Mahānāmo "mama dāsiyā kucchimhi jātā Vāsabhakhattiyā nāma dhītā rūpasobhaggappattā atthi, tam dassāmā"ti vatvā dūte āha "sādhu rañno dārikam dassāmā"ti. Sā kassa dhītāti. Sammāsambuddhassa cūļapituputtassa Mahānāmassa Sakkassa dhītā Vāsabhakhattiyā nāmāti.

<sup>1.</sup> Rukkhā (Sī, Syā, Ka)

<sup>3.</sup> Vissatthā (Syā)

<sup>2.</sup> Khu 5. 116 pitthe.

<sup>4.</sup> Pakkhuttariyo (Sī)

Te gantvā rañño ārocayimsu. Rājā "yadi evam, sādhu, sīgham ānetha, khattiyā ca nāma bahumāyā, dāsidhītarampi pahiņeyyum, pitarā saddhim ekabhājane bhuñjantim āneyyāthā"ti pesesi. Te gantvā "devatumhehi saddhim ekato bhuñjantim rājā icchatī"ti āhamsu. Mahānāmo "sādhu tātā"ti tam alankārāpetvā attano bhojanakāle pakkosāpetvā tāya saddhim ekato bhuñjanākāram dassetvā dūtānam niyyādesi. Te tam ādāya Sāvatthim gantvā tam pavattim rañño ārocesum. Rājā tuṭṭhamānaso tam pañcannam itthisatānam jeṭṭhikam katvā aggamahesiṭṭhāne abhisiñci. Sā na cirasseva suvaṇṇavaṇṇam puttam vijāyi.

Athassa nāmaggahaṇadivase rājā dārakassa ayyakassa¹ santikam pesesi "Sakyarājadhītā Vāsabhakhattiyā puttam vijātā, kimassa nāmam karomā"ti. Tam pana sāsanam gahetvā gato amacco thokam badhiradhātuko, so gantvā rañño ayyakassa ārocesi, sotam² sutvā "Vāsabhakhattiyā puttam avijāyitvāpi sabbajanam abhibhavi, idāni pana rañño ativiya vallabhā bhavissatī"ti āha. Badhiro amacco "vallabhā"ti vacanam dussutam sutvā "Viṭaṭūbho"ti sallakkhetvā rājānam upagantvā "devakumārassa kira 'Viṭaṭūbho'ti nāmam karothā"ti āha. Rājā "porāṇakam no kulasantakam nāmam bhavissatī"ti cintetvā tam nāmam akāsi. Athassa daharakāleyeva rājā "Satthu piyam karomī"ti senāpatiṭṭhānam adāsi.

So kumāraparihārena vaḍḍhanto sattavassikakāle aññesaṁ kumārānaṁ mātāmahakulato hatthirūpaka-assarūpakādīni āhariyamānāni disvā mātaraṁ pucchi "amma aññesaṁ mātāmahakulato paṇṇākāro āharīyati, mayhaṁ koci kiñci na pesesi, kiṁ tvaṁ nimātā nipitā"ti³. Atha naṁ sā "tāta tava Sakyarājāno mātāmahā dūre pana vasanti, tena te kiñci na pesentī"ti vañcesi. Soļasavassikakāle "amma tava mātāmahakulaṁ passitukāmomhī"ti vatvā "alaṁ tāta, kiṁ tattha gantvā karissatī"ti vāriyamānopi punappunaṁ yāci. Athassa mātā "tena hi gacchā"ti sampaṭicchi. So pitu ārocetvā mahantena parivārena nikkhami. Vāsabhakhattiyā puretaraṁ paṇṇaṁ pesesi

"aham idha sukham vasāmi, māssa kiñci sāmino antaram dassayimsū"ti. Sākiyā Viṭaṭūbhassa āgamanam ñatvā "vanditum na sakkomā"ti tassa daharadahare kumāre janapadam pahinitvā tasmim Kapilapuram sampatte santhāgāre sannipatimsu. Kumāro tattha gantvā atthāsi.

Atha nam "ayam te tāta mātāmaho, ayam mātulo"ti vatvā vandāpesum. So sabbe vandamāno vicaritvā ekampi attānam vandantam adisvā "kim nu kho mam vandantā<sup>1</sup> natthī"ti pucchi. Sākiyā "tāta te kanitthakumārā janapadam gatā"ti vatvā tassa mahantam sakkāram karimsu. So katipāham vasitvā mahantena parivārena nikkhami. Athekā dāsī santhāgāre tena nisinnaphalakam "idam Vāsabhakhattiyāya dāsiyā puttassa nisinnaphalakan''ti akkosityā paribhāsityā khīrodakena dhoyi. Eko puriso attano āvudham pamussitvā nivatto tam ganhanto Vitatūbhakumārassa akkosanasaddam sutvā tam kāranam pucchitvā "Vāsabhakhattiyā dāsiyā kucchimhi Mahānamasakkam paticca jātā"ti<sup>2</sup> ñatvā balakāvassa kathesi. "Vāsabhakhattiyā kira dāsidhītā"ti mahākolāhalam ahosi. Tam sutvā Vitatūbho "ete tāva mama nisinnaphalakam khīrodakena dhovantu<sup>3</sup>, aham pana rajje patitthitakāle etesam galalohitam gahetvā mama nisinnaphalakam dhovissāmī"ti cittam patthapesi. Tasmim Sāvatthim gate amaccā tam pavattim rañño ārocayimsu. Rājā "mayham dāsidhītaram adamsū"ti sākiyānam kujihitvā Vāsabhakhattiyāya ca puttassa ca dinnaparihāram acchinditvā dāsadāsīhi laddhabbamattameva dāpesi.

Tato katipāhaccayena Satthā rājanivesanam gantvā paññattāsane nisīdi. Rājā āgantvā vanditvā "bhante tumhākam kira ñātakehi dāsidhītā mayham dinnā, tenassā aham saputtāya parihāram acchinditvā dāsadāsīhi laddhabbamattameva dāpesin"ti āha. Satthā "ayuttam mahārāja Sākiyehi katam, dadantehi nāma samānajātikā dātabbā assa, tam pana mahārāja vadāmi, Vāsabhakhattiyā khattiyarājadhītā, khattiyarañño gehe abhisekam labhi. Vitatūbhopi khattiyarājānameva paticca jāto,

<sup>1.</sup> Vandakā (Ka)

<sup>2.</sup> Mahānāmasakkassa jātāti (Sī, Syā), Mahānāmasakkassa paṭicca jātāti (Ka)

<sup>3.</sup> Dhovanti (Sī)

mātugottam nāma kim karissati, pitu gottameva pamāṇanti. Porāṇakapaṇḍitā dalidditthiyā kaṭṭhahārikāya aggamahesiṭṭhānam adamsu, tassā ca kucchimhi jātakumāro dvādasayojanikāya Bārāṇasiyā rajjam patvā Kaṭṭhavāhanarājā nāma jāto"ti **Kaṭṭhahārijātakam**¹ kathesi. Rājā dhammakatham sutvā "pitugottameva kira pamāṇan"ti tussitvā Vāsabhakhattiyāya ca puttassa ca pakatiparihārameva dāpesi.

Bandhulasenāpatissapi kho Kusinārāyam Mallarājadhītā Mallikā nāma bhariyā dīgharattam puttam na vijāyi. Atha nam Bandhulo "attano kulagharameva gacchā"ti uyyojesi. Sā "Satthāram disvāva gamissāmī"ti Jetavanam pavisitvā Tathāgatam vanditvā thitā "kaham gacchasī"ti vuttā "sāmiko mam bhante kulagharam pesetī"ti āha. Kim kāranāti. Vañcyā kirasmi aputtikāti. Yadi evam, gamanakiccam natthi, nivattassūti. Sā tutthamānasā Satthāram vanditvā nivesanam gantvā "kasmā nivattāsī"ti vuttā "Dasabalena nivattitāmhī"ti āha. Bandhulo "dittham bhavissati dīghadassinā kāranan"ti sampaticchi. Sā na cirasseva gabbham patilabhitvā uppannadohalā "dohalo me uppanno"ti ārocesi. Kim dohaloti. Vesālinagare ganarājakulānam abhisekamangalapokkharaniyam otaritvā nhatvā pānīyam pātukāmāmhi sāmīti. Bandhulo "sādhū"ti vatvā sahassathāmadhanum gahetvā tam ratham āropetvā Sāvatthito nikkhamitvā ratham pājento<sup>2</sup> Mahālilicchavino dinnadvārena Vesālim pāvisi. Mahālilicchavino ca dvārasamīpe eva nivesanam hoti. So rathassa ummāre patighātasaddam sutvāva "Bandhulassa rathasaddo eso, ajja Licchavīnam bhayam uppajjissatī"ti āha.

Pokkharaṇiyā anto ca bahi ca ārakkhā balavatī, upari lohajālam patthaṭam, sakuṇānampi okāso natthi. Bandhulasenāpati pana rathā otaritvā ārakkhake manusse vettena³ paharanto palāpetvā lohajālam chinditvā antopokkharaṇiyam bhariyam nhāpetvā sayampi nhatvā puna tam ratham āropetvā nagarā nikkhamitvā āgatamaggeneva pāyāsi. Te ārakkhamanussā Licchavirājūnam ārocesum. Licchavirājāno kujjhitvā pañca rathasatāni āruyha Bandhulamallam⁴ gaṇhissāmā"ti nikkhamimsu. Tam

<sup>1.</sup> Khu 5. 2 pitthe.

<sup>3.</sup> Khaggena (Ka)

<sup>2.</sup> Vāhento (Sī)

<sup>4.</sup> Bandhulañca Mallikañca (Ka)

pavattim Mahālissa ārocesum. Mahāli "mā gamittha, so hi vo sabbe ghātessatī"ti āha. Tepi "mayam gamissāma evā"ti vadimsu. Tena hi tassa rathacakkassa yāva nābhito pathavim paviṭṭhaṭṭhānam disvā nivatteyyātha, tato anivattantā purato asanisaddam viya suṇissatha, tamhā ṭhānā nivatteyyātha. Tato anivattantā tumhākam rathadhuresu chiddam passissatha, tamhā ṭhānā nivatteyyātha, purato mā gamitthāti. Te tassa vacanena anivattitvā tam anubandhimsu eva. Mallikā disvā "rathā sāmi paññāyantī"ti āha. Tena hi ekasseva rathassa paññāyanakāle mam āroceyyāsīti. Sā yadā sabbe rathā eko viya hutvā paññāyimsu, tadā "ekameva sāmi rathasīsam paññāyatī"ti āha. Bandhulo "tena hi imā rasmiyo gaṇhāhī"ti tassā rasmiyo datvā rathe ṭhitova dhanum āropesi, rathacakkam yāva nābhito pathavim pāvisi.

Licchavino tam thānam disvāpi na nivattimsu. Itaro thokam gantvā jiyam pothesi<sup>1</sup>, asanisaddo viya ahosi. Te tatopi na nivattimsu, anubandhantā gacchanteva. Bandhulo rathe thitakova ekasaram khipi, so pañcannam rathasatānam rathasīse chiddam katvā pañca rājasatāni parikarabandhanatthāne<sup>2</sup> vinivijihitvā pathavim pāvisi. Te attano paviddhabhāvam ajānitvā "tiṭṭha re, tiṭṭha re"ti vadantā anubandhimsu eva. Bandhulo ratham thapetva<sup>3</sup> "tumhe mataka, matakehi saddhim mayham yuddham nāma natthī"ti āha. Matakā nāma amhādisā na hontīti. Tena hi sabbapacchimassa parikaram<sup>4</sup> mocethāti. Te mocayimsu. So muttamatte eva maritvā patito. Atha te sabbepi "tumhe evarūpā, attano gharāni gantvā samvidhātabbam samvidahitvā puttadāram anusāsitvā sannāham mocethā"ti āha. Te tathā katvā sabbepi jīvitakkhayam pattā. Bandhulopi Mallikam Sāvatthim ānesi. Sā solasakkhattum yamake yamake putte vijāyi. Sabbepi sūrā thāmasampannā ahesum, sabbasippānam nipphattim pāpunimsu. Ekekassa purisasahassam parivāro ahosi. Pitarā saddhim rājanivesanam gacchantehi teheva rājanganam paripūri.

<sup>1.</sup> Pothesi (Sī), potesi (Ka) 2. Parikkhārabandhanatthāne (Ka) 3. Pājetvā (Ka)

<sup>4.</sup> Sabbapurimassa parikaram (Sī), sabbam purimapacchi maparikkhāram (Ka)

Athekadivasam vinicchaye kūtattaparājitā<sup>1</sup> manussā Bandhulam āgacchantam disvā mahāviravam viravantā vinicchava-amaccānam kūtattakaranam tassa ārocesum. So vinicchayam gantvā tam attam vicāretvā<sup>2</sup> sāmikameva sāmikam akāsi. Mahājano mahāsaddena sādhukāram pavattesi. Rājā "kim idan" ti pucchitvā tamattham sutvā tussitvā sabbepi te amacce hāretvā<sup>3</sup> Bandhulasseva vinicchayam nivyādesi. So tato patthāya sammā vinicchayi. Tato te porānakavinicchayikā amaccā kiñci lañjam alabhantā appalābhā hutvā "Bandhulo rajjam patthetī"ti rājakule paribhindimsu. Rājā tesam katham saddahitvā<sup>4</sup> cittam niggahetum nāsakkhi. "Imasmim idheva ghātiyamāne garahā me uppajjissatī"ti puna cintetvā payuttapurisehi paccantam pahārāpetvā Bandhulam pakkosāpetvā "paccanto" kira kupito, tava puttehi saddhim gantvā core ganhāhī"ti pahinitvā "etthevassa dvattimsāva puttehi saddhim sīsam chinditvā āharathā" ti tehi saddhim aññepi samatthe mahāyodhe pesesi. Tasmim paccantam gacchanteyeva "senāpati kira āgacchatī"ti payuttacorā palāyimsu. So tam padesam āvāsāpetvā santhāpetvā nivatti.

Athassa nagarato avidūre ṭhāne te yodhā puttehi saddhim sīsam chindimsu. Tam divasam Mallikāya pañcahi bhikkhusatehi saddhim dve aggasāvakā nimantitā honti. Athassa pubbaņhe eva "sāmikassā te saddhim puttehi sīsam chinnan"ti paṇṇam āharitvā adamsu. Sā tam pavattim ñatvā kassaci kiñci avatvā paṇṇam ucchange ṭhapetvā bhikkhusamghameva parivisi. Athassā paricārikāyo bhikkhūnam bhattam datvā sappicāṭim āharantiyo therānam purato sappicāṭim bhindimsu. Dhammasenāpati "bhedanadhammam bhinnam, na cintitabban"ti āha. Sā ucchangato paṇṇam nīharitvā "dvattimsāya puttehi saddhim pitusīsam chinnanti me imam paṇṇam āharimsu, aham idam sutvāpi na cintemi, sappicāṭiyā bhinnāya kim cintayissāmi bhante"ti āha. Dhammasenāpati "animittamanaññātam, maccānam idha jīvitan"ti-ādīni<sup>5</sup> vatvā dhammam desetvā uṭṭhāyāsanā vihāram agamāsi. Sāpi dvattimsa suṇisāyo pakkosāpetvā "tumhākam sāmikā niraparādhā attano purimakammaphalam

<sup>1.</sup> Kūtaddaparājitā (Ka)

<sup>2.</sup> Tīretvā (Sī, Syā)

<sup>3.</sup> Hāpetvā (Ka)

<sup>4.</sup> Gahetvā (Sī, Syā)

<sup>5.</sup> Khu 1. 371 pitthe.

labhimsu, tumhe mā socayittha, mā paridevittha, rañño upari manopadosam mā karitthā"ti ovadi.

Rañño carapurisā tam katham sutvā gantvā tesam niddosabhāvam rañño kathayimsu. Rājā samvegappatto tassā nivesanam gantvā Mallikañca suņisāyo cassā khamāpetvā Mallikāya varam adāsi. Sā "varo gahito me hotū"ti vatvā tasmim gate matakabhattam datvā nhatvā rājānam upasankamitvā vanditvā "deva tumhehi mayham varo dinno, mayhañca aññena attho natthi, dvattimsāya me suņisānam mamañca kulagharagamanam anujānāthā"ti āha. Rājā sampaṭicchi. Sā dvattimsa suņisāyo yathāsakāni kulāni pesesi, sayampi Kusinārānagare attano kulagharam agamāsi.

Rājāpi Bandhulasenāpatino bhāgineyyassa Dīghakārāyanassa nāma senāpatiṭṭhānaṁ adāsi. So pana "mātulo me iminā mārito"ti rañño otāraṁ¹ gavesanto vicarati. Rājāpi niraparādhassa Bandhulassa māritakālato paṭṭhāya vippaṭisārī hutvā cittassādaṁ na labhati, rajjasukhaṁ nānubhoti. Tadā Satthā Sakyānaṁ Medāļupaṁ² nāma nigamaṁ upanissāya viharati. Rājā tattha gantvā ārāmato avidūre khandhāvāraṁ nivāsetvā "mandena parivārena Satthāraṁ vandissāmī"ti vihāraṁ gantvā pañcarājakakudhabhaṇḍāni Dīghakārāyanassa datvā ekakova Gandhakuṭiṁ pāvisi. Sabbaṁ Dhammacetiyasuttaniyāmena³ dīpetabbaṁ. Tasmiṁ Gandhakuṭiṁ paviṭṭhe Dīghakārāyano tāni pañca rājakakudhabhaṇḍāni gahetvā Viṭaṭūbhaṁ rājānaṁ katvā rañño ekaṁ assaṁ ekañca upaṭṭhānakārikaṁ mātugāmaṁ thapetvā nivattetvā Sāvatthiṁ agamāsi.

Rājā Satthārā saddhim piyakatham kathetvā Satthāram vanditvā nikkhanto senam adisvā tam mātugāmam pucchitvā tam pavattim sutvā "aham bhāgineyyam ādāya gantvā Viṭaṭūbham gahessāmī"ti Rājagahanagaram gacchanto vikāle dvāresu pidahitesu nagaram patvā ekissā sālāya nipajjitvā vātātapehi kilanto rattibhāge tattheva kālamakāsi. Vibhātāya rattiyā "deva Kosalanarinda anātho jātosī"ti

vippalapantiyā tassā itthiyā saddam sutvā rañño ārocesum. So mātulassa mahantena sakkārena sarīrakiccam kāresi.

Viṭaṭūbhopi rajjaṁ labhitvā taṁ veraṁ saritvā "sabbepi Sākiye māressāmī"ti mahatiyā senāya nikkhami. Taṁ divasaṁ Satthā paccūsakāle lokaṁ volokento ñātisaṁghassa vināsaṁ disvā "ñātisaṅgahaṁ kātuṁ vaṭṭatī"ti cintekvā pubbaḥhasamaye piṇḍāya caritvā piṇḍapātapaṭikkanto Gandhakuṭiyaṁ sīhaseyyaṁ kappetvā sāyanhasamaye ākāsena gantvā Kapilavatthusāmante ekasmiṁ kabaracchāye rukkhamūle nisīdi. Tato Viṭaṭūbhassa rajjasīmāya mahanto sandacchāyo nigrodho atthi. Viṭaṭūbho Satthāraṁ disvā upasaṅkamitvā vanditvā "bhante kiṁ kāraṇā evarūpāya uṇhavelāya imasmiṁ kabaracchāye rukkhamūle nisīdatha, etasmiṁ sandacchāye nigrodhamūle nisīdatha bhante"ti vatvā "hotu mahārāja, ñātakānaṁ chāyā nāma sītalā"ti vutte "ñātakānurakkhanatthāya Satthā āgato bhavissatī"ti cintetvā Satthāraṁ vanditvā nivattitvā Sāvatthiṁyeva paccāgami. Satthāpi uppatitvā Jetavanameva gato.

Rājā Sākiyānam dosam saritvā dutiyampi nikkhamitvā tatheva <sup>1</sup> Satthāram passitvā puna nivatti. Tatiyavārepi nikkhamitvā tatheva Satthāram passitvā puna nivatti. Catutthavāre pana tasmim nikkhante Satthā Sākiyānam pubbakammam oloketvā tesam ekadivasam nadiyam visapakkhipanapāpakammassa appaṭibāhiyabhāvam ñatvā catutthavāre nāgamāsi. Viṭaṭūbho "Sākiye ghātessāmī"ti mahantena balakāyena nikkhami. Sammāsambuddhassa pana ñātakā asattaghātakā nāma, attanā marantāpi paresam jīvitam na voropenti. Te cintayimsu "mayam susikkhitā katahatthā katūpāsanā mahissāsā, na kho pana sakkā amhehi param jīvitā voropetum, attano kammam dassetvā palāpessāmā"ti. Te katasannāhā nikkhamitvā yuddham ārabhimsu. Tehi khittā sarā Viṭaṭūbhassa purisānam antarantarena gacchanti, phalakantarakaṇṇachiddantarādīhi nikkhamanti. Viṭaṭūbho disvā nanu bhaṇe "sākiyā asattaghātakāmhā"ti vadanti, atha ca pana me purise nāsentīti.

Atha nam eko puriso āha "kim sāmi nivattitvā olokesī"ti. Sākiyā me purise nāsentīti. Tumhākam koci puriso mato nāma natthi. Ingha te gaņhāpethāti. Gaņāpento ekassapi khayam na passi. So tato nivattitvā "ye ye pana bhaņe 'Sākiyamhā'ti bhaṇanti, sabbe māretha, mātāmahassa pana Mahānāmasakkassa santike ṭhitānam jīvitam dethā"ti āha. Sākiyā gahetabbagahaṇam apassantā ekacce tiṇam ḍamsitvā, ekacce naļam gahetvā aṭṭhamsu. "Tumhe Sākiyā, no"ti pucchitā yasmā te marantāpi musāvādam na bhaṇanti, tasmā tiṇam ḍamsitvā ṭhitā "no sāko¹, tiṇan"ti vadanti. Naļam gahetvā ṭhitā "no sāko, naļo"ti vadanti. Ye ca Mahānāmassa santike ṭhitā, te ca jīvitam labhimsu. Tesu tiṇam ḍamsitvā ṭhitā Tiṇasākiyā nāma, naļam gahetvā ṭhitā Naļasākiyā nāma jātāti, Viṭaṭūbho avasese khīrapakepi² dārake avissajjetvā ghātāpento lohitanadim pavattetvā tesam galalohitena phalakam dhovāpesi. Evam Sākiyavamso Viṭaṭūbhena upacchinno.

So Mahānāmasakkam gāhāpetvā nivatto "pātarāsavelāya pātarāsam karissāmī"ti ekasmim ṭhāne otaritvā bhojane upanīte "ekatova bhuñjissāmā"ti ayyakam pakkosāpesi. Khattiyā pana jīvitam cajantāpi dāsiputtehi saddhim na bhuñjanti. Tasmā Mahānāmo ekam saram oloketvā "kiliṭṭhagattomhi, nhāyissāmi tātā"ti³ āha. Sādhu ayyaka nhāyathāti. So "ayam mam ekato abhuñjantam ghātessati, sayameva me matam seyyo"ti kese muñcitvā agge gaṇṭhim katvā kesesu⁴ pādaṅguṭṭhake pavesetvā udake nimujji. Tassa guṇatejena nāgabhavanam uṇhākāram dassesi. Nāgarājā kim nu kho"ti upadhārento tam ñatvā tassa santikam āgantvā tam attano phaṇe nisīdāpetvā nāgabhavanam pavesesi. So dvādasa vassāni tattheva vasi. Viṭaṭūbhopi "mayham ayyako idāni āgamissati, idāni āgamissatī"ti āgamayamānova nisīdi, tasmim aticirāyante saram⁵ vicināpetvā dīpālokena purisabbhantarānipi6 oloketvā adisvā "gato bhavissatī"ti pakkāmi,

<sup>1.</sup> Sākiyā (Ka)

<sup>2.</sup> Khīrapāyakepi (Sī, Ka)

<sup>3.</sup> Tāvāti (Sī)

<sup>4.</sup> Kese (Sī)

<sup>5.</sup> Gharam (Sī)

<sup>6.</sup> Paresam vatthantarānipi (Sī, Ka)

so rattibhāge Aciravatim patvā khandhāvāram nivāsesi. Ekacce antonadiyam vālukāpuline nipajjimsu, ekacce bahithale, antonipannesupi pubbe akatapāpakammā atthi, bahinipannesupi pubbe katapāpakammā atthi, tesam nipannaṭṭhānesu kipillikā uṭṭhahimsu. Te "mayham nipannaṭṭhāne kipillikā, mayham nipannaṭṭhāne kipillikā"ti uṭṭhahitvā akatapāpakammā uttaritvā thale nipajjimsu, katapāpakammā otaritvā vālukāpuline nipajjimsu. Tasmim khaņe mahāmegho uṭṭhahitvā ghanavassam¹ vassi. Nadiyā ogho āgantvā Viṭaṭūbham saddhim parisāya samuddameva pāpesi. Sabbe tattha macchakacchapabhakkhā ahesum.

Mahājano kathaṁ samuṭṭhāpesi "sākiyānaṁ maraṇaṁ ayuttaṁ, 'evaṁ nāma koṭṭetvā koṭṭetvā sākiyā māretabbā'ti² ananucchavikametan"ti. Satthā taṁ kathaṁ sutvā "bhikkhave imasmiṁ attabhāve kiñcāpi sākiyānaṁ evaṁ maraṇaṁ ayuttaṁ, pubbe katapāpakammavasena pana yuttamevetehi laddhan"ti āha. Kiṁ pana bhante ete pubbe akaṁsūti. Sabbe ekato hutvā nadiyaṁ visaṁ pakkhipiṁsūti. Punekadivasaṁ dhammasabhāyaṁ bhikkhū kathaṁ samuṭṭhāpesuṁ "Viṭaṭūbho ettake sākiye māretvā āgacchanto attano manorathe matthakaṁ appatteyeva ettakaṁ janaṁ ādāya mahāsamudde macchakacchapabhakkho jāto"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "imesaṁ sattānaṁ manorathe matthakaṁ appatteyeva maccurājā suttaṁ gāmaṁ ajjhottharanto mahogho viya jīvitindriyaṁ chinditvā catūsu apāyasamuddesu nimujjāpetī"ti vatvā imaṁ gāthamāha—

47. "Pupphāni heva pacinantam, byāsattamanasam³ naram. Suttam gāmam mahoghova, maccu ādāya gacchatī"ti.

Tattha **byāsattamanasaṁ naran**ti sampatte vā asampatte vā laggamānasaṁ. Idaṁ vuttaṁ hoti—yathā mālākāro pupphārāmaṁ pavisitvā "pupphāni pacinissāmī"ti tato pupphāni gahetvā<sup>4</sup> aññamaññaṁ vā gacchaṁ patthento sakale pupphārāme manaṁ peseti, "ito cito ca pupphāni pacinissāmī"ti tato pupphāni aggahetvā aññattha manaṁ pesesi, tameva gacchaṁ

<sup>1.</sup> Ghanakarakavassam (Sī)

<sup>3.</sup> Byāsattamānasaṁ (Syā, Ka)

<sup>2.</sup> Māritā (?)

<sup>4.</sup> Agahetvā (Syā, Ka)

pacinanto pamādamāpajjati, evameva ekacco pupphārāmasadisam pañcakāmaguṇamajjham otaritvā manoramam rūpam labhitvā manoramānam saddagandharasaphoṭṭhabbānam aññataram pattheti. Añño tesu vā aññataram labhitvā aññataram pattheti, rūpameva vā labhitvā aññam apatthento¹ tameva assādeti, saddādīsu vā aññataram. Eseva nayo gomahimsadāsidāsakhettavatthugāmanigamajanapadādīsu, pabbajitānampi pariveṇavihārapattacīvarādīsūti evam pañcakāmaguṇasaṅkhātāni pupphāni eva pacinantam sampatte vā asampatte vā kāmaguṇe byāsattamanasam naram. Suttam gāmanti gāmassa gehabhitti-ādīnam pana supanavasena supanam nāma natthi, sattānam pana suttapamattatam upādāya sutto nāma hoti. Evam suttam gāmam dve tīṇi yojanāni āyatagambhīro mahoghova maccu ādāya gacchati. Yathā so mahogho itthipurisagomahimsakukkuṭādīsu kiñci anavasesetvā sabbam tam gāmam samuddam pāpetvā macchakacchapabhakkham karoti, evameva byāsattamanasam naram maccu ādāya jīvitindriyamassa chinditvā catūsu apāyasamuddesu nimujjāpetīti.

Desanāvasāne bahū sotāpattiphalādīni pattā, mahājanassa sātthikā desanā jātāti.

Viṭaṭūbhavatthu tatiyam.

## 4. Patipūjikakumārivatthu

**Pupphāni hevā**ti imam dhammadesanam Satthā Sāvatthiyam viharanto Patipūjikam nāma kumārikam ārabbha kathesi. Vatthu Tāvatimsadevaloke samuṭṭhitam.

Tattha kira Mālabhārī nāma devaputto accharāsahassaparivuto uyyānam pāvisi. Pañcasatā devadhītaro rukkham āruyha pupphāni pātenti, pañcasatā patitāni<sup>2</sup> pupphāni gahetvā devaputtam alankaronti. Tāsu ekā devadhītā rukkhasākhāyameva cutā, sarīram dīpasikhā viya nibbāyi. Sā Sāvatthiyam ekasmim kulagehe paṭisandhim gahetvā

jātakāle jātissarā hutvā "Mālabhārīdevaputtassa bhariyāmhī"ti anussarantī vuḍḍhimanvāya gandhamālādīhi pūjam katvā sāmikassa santike abhinibbattim¹ patthesi. Sā soļasavassakāle parakulam gatāpi salākabhattapakkhikabhattavassāvāsikādīni datvā "ayam me sāmikassa santike nibbattanatthāya paccayo hotū"ti vadati. Athassā bhikkhū "ayam kumārikā uṭṭhāya samuṭṭhāya patimeva patthetīti patipūjikā"ti nāmam karimsu. Sāpi nibaddham āsanasālam paṭijaggati, pānīyam upaṭṭhapeti, āsanāni paññapeti. Aññepi manussā salākabhattādīni dātukāmā "amma imānipi bhikkhusamghassa paṭipādeyyāsī"ti² vatvā āharitvā denti. Sāpi etena niyāmena āgacchantī gacchantī ekapadavāre chapaññāsa kusaladhamme paṭilabhati. Tassā kucchiyam gabbho patiṭṭhahi, sā dasamāsaccayena puttam vijāyi, tassa padasā gamanakāle aññampi aññampīti cattāro putte paṭilabhi.

Sā ekadivasam dānam datvā pūjam katvā dhammam sutvā sikkhāpadāni rakkhitvā divasapariyosāne tam khanam nibbattena kenaci rogena kālam katvā attano sāmikasseva santike nibbatti. Itarāpi ettakam kālam devaputtam alankaronti eva. Devaputto tam disvā "tvam pātova patthāya na dissasi, kuhim gatāsī"ti āha. Cutāmhi sāmīti. Kim vadesīti. Evametam sāmīti. Kuhim nibbattāsīti. Sāvatthiyam kulageheti. Kittakam kālam tattha thitāsīti. Dasamāsaccayena mātu kucchito nikkhamitvā solasavassakāle parakulam gantvā cattāro putte vijāyitvā dānādīni puññāni katvā tumhe patthetvā āgantvā tumhākameva santike nibbattāmhi sāmīti. Manussānam kittakam āyūti. Vassasatamattanti. Ettakamevāti. Āma sāmīti. Ettakam āyum gahetvā nibbattamanussā kim nu kho suttapamattā kālam atikkāmenti, udāhu dānādīni puññāni karontīti. Kim vadetha sāmi, asankhyeyyam āyum gahetvā nibbattā viya ajarāmarā viya ca niccam pamattā manussāti. Mālabhārīdevaputtassa mahāsamvego udapādi "vassasatamattamāyum gahetvā nibbattamanussā kira pamattā nipajjitvā niddāyanti, kadā nu kho dukkhā muccissantī"ti.

<sup>1.</sup> Abhinibbattatūti (Ka)

<sup>2.</sup> Patiyādeyyāsīti (Sī)

<sup>3.</sup> Abhi 1. 17; Abhi-Ṭṭha 1. 177 piṭṭhesu dissanti.

manussānam pana vassasatam¹ Tāvatimsānam devānam eko rattindivo, tāya rattiyā timsarattiyo māso, tena māsena dvādasamāsiko samvaccharo, tena samvaccharena dibbavassasahassam āyuppamāṇam, tam manussagaṇanāya tisso vassakoṭiyo, saṭṭhi ca vassasatasahassāni honti. Tasmā tassa devaputtassa ekadivasopi nātikkanto muhuttasadisova kālo ahosi. Evam appāyukamanussānam pamādo nāma ativiya ayuttoti.

Punadiyase bhikkhū gāmam pavitthā āsanasālam apatijaggitam, āsanāni apaññattāni, pānīyam anutthapitam disvā "kaham patipūjikā"ti āhamsu. Bhante kaham tumhe tam dakkhissatha, hiyyo ayyesu bhuñjitvā gatesu sāyanhasamaye matāti. Tam sutvā puthujjanā bhikkhū tassā upakāram sarantā assūni sandhāretum nāsakkhimsu. Khīnāsavānam dhammasamvego udapādi. Te bhattakiccam katvā vihāram gantvā Satthāram vanditvā pucchimsu "bhante Patipūjikā nāma upāsikā utthāya samutthāya nānappakārāni puññāni katvā sāmikameva patthesi, sā idāni matā, kaham nu kho nibbattā"ti. Attano sāmikasseva santike bhikkhaveti. Natthi bhante sāmikassa santiketi. Na sā bhikkhave etam sāmikam pattheti, Tāvatimsabhavane tassā Mālabhārīdevaputto nāma sāmiko, sā tassa pupphapilandhanatthānato cavitvā puna gantvā tasseva santike nibbattāti. Evam kira bhanteti. Āma bhikkhaveti. Aho parittam bhante sattānam jīvitam, pātova amhe parivisitvā sāyam uppannabyādhinā matāti. Satthā "āma bhikkhave parittam sattānam jīvitam nāma, teneva ime satte vatthukāmehi ceva kilesakāmehi ca atitte eva antako attano vase vattetvā kandante paridevante gahetvā gacchatī"ti vatvā imam gāthamāha—

48. "Pupphāni heva pacinantam, byāsattamanasam naram. Atittamyeva kāmesu, antako kurute vasan"ti.

Tattha **pupphāni heva pacinantan**ti pupphārāme mālākāro nānāpupphāni viya attabhāvapaṭibaddhāni ceva upakaraṇapaṭibaddhāni ca kāmaguṇapupphāni

<sup>1.</sup> Amhākam pana vassasatam (Sī, Syā), amhākam pana manussānam vassasatam (Ka)

ocinantameva. **Byāsattamanasaṁ naran**ti asampattesu patthanāvasena, sampattesu gedhavasena vividhenākārena āsattacittaṁ. **Atittaṁyeva kāmesū**ti vatthukāmakilesakāmesu pariyesanenapi paṭilābhenapi paribhogenapi nidhānenapi atittaṁ eva samānaṁ. **Antako kurute vasan**ti maraṇasaṅkhāto antako kandantaṁ paridevantaṁ gahetvā gacchanto attano vasaṁ pāpetīti attho.

Desanāvasāne bahū sotāpattiphalādīni pattā, desanā mahājanassa sātthikā jātāti.

Patipūjikakumārivatthu catuttham.

#### 5. Macchariyakosiyasetthivatthu

Yathāpi bhamaro pupphanti imam dhammadesanam Satthā Sāvatthiyam viharanto Macchariyakosiyaseṭṭhim ārabbha kathesi. Tassa vatthu Rājagahe samuṭṭhitam.

Rājagahanagarassa kira avidūre Sakkāram¹¹ nāma nigamo ahosi. Tattheko Macchariyakosiyo nāma seṭṭhi asītikoṭivibhavo paṭivasati, so tiṇaggena telabindumpi paresaṁ na deti, na attanā paribhuñjati. Itissa taṁ vibhavajātaṁ neva puttadārādīnaṁ, na samaṇabrāhmaṇānaṁ atthaṁ anubhoti, rakkhasapariggahitā pokkharaṇī viya aparibhogaṁ tiṭṭhati. Satthā ekadivasaṁ paccūsasamaye mahākaruṇāsamāpattito vuṭṭhāya sakalalokadhātuyaṁ bodhaneyyabandhave olokento pañcacattālīsayojanamatthake vasantassa seṭṭhino sapajāpatikassa sotāpattiphalassa upanissayaṁ addasa. Tato purimadivase pana so rājānaṁ upaṭṭhātuṁ rājagehaṁ gantvā rājūpaṭṭhānaṁ katvā āgacchanto ekaṁ chātajjhattaṁ janapadamanussaṁ kummāsapūraṁ kapallakapūvaṁ² khādantaṁ disvā tattha pipāsaṁ uppādetvā attano gharaṁ gantvā cintesi "sacāhaṁ kapallakapūvaṁ khāditukāmomhīti vakkhāmi, bahū manussā mayā saddhiṁ khāditukāmā bhavissanti, evaṁ me bahūni tilataṇḍulasappiphāṇitādīni parikkhayaṁ gamissanti.

na kassaci kathessāmī"ti taṇhaṁ adhivāsento carati. So gacchante gacchante kāle uppaṇḍuppaṇḍukajāto dhamanisanthatagatto jāto. Tato taṇhaṁ adhivāsetuṁ asakkonto gabbhaṁ pavisitvā mañcake upagūhitvā nipajji. Evaṁ gatopi dhanahānibhayena na kassaci kiñci kathesi.

Atha nam bhariyā upasankamitvā pitthim parimajjitvā "kim te sāmi aphāsukam jātan"ti pucchi. Na me kiñci aphāsukam atthīti. Kim nu kho te rājā kupitoti. Rājāpi me na kuppatīti. Atha kim te puttadhītāhi vā dāsakammarādīhi vā kiñci amanāpam katam atthīti. Evarūpampi natthīti. Kismiñci pana te tanhā atthīti. Evam vuttepi dhanahānibhayena kiñci avatvā nissaddova nipajji, atha nam bhariyā "kathehi sāmi, kismiñci te tanhā atthī"ti āha. So vacanam parigilanto viya "atthi me tanhā"ti āha. Kim tanhā sāmīti. Kapallakapūvam khāditukāmomhīti. Atha kimattham me na kathesi, kim tvam daliddosi, idani sakalanigamavasinam pahonake kapallakapuve pacissāmīti. Kim te etehi, attano kammam katvā khādissantīti. Tena hi ekaracchavāsīnam pahonake pacissāmīti. Jānāmaham tava mahaddhanabhāvanti. Imasmim gehasāmante sabbesam pahonakam katvā pacāmīti. Jānāmaham tava mahajjhāsayabhāvanti. Tena hi te puttadāramattasseva pahonakam katvā pacāmīti. Kim te etehīti. Kim pana tuyhañca mayhañca pahonakam katvā pacāmīti. Tvam kim karissāsīti. Tena hi ekakasseva te pahonakam katvā pacāmīti. Imasmim thāne pacamāne bahū paccāsīsanti, sakalatandule thapetvā bhinnatandule ca uddhanakapallāni ca ādāya thokam khīrasappimadhuphānitañca gahetvā sattabhūmikassa pāsādassa uparimatalam āruyha paca, tatthāham ekakova nisīditvā khādissāmīti. Sā "sādhū"ti patissuņitvā gahetabbam gāhāpetvā pāsādam abhiruyha dāsiyo vissajjetvā setthim pakkosāpesi, so ādito patthāya dvārāni pidahanto sabbadvāresu sūcighatikam datvā sattamatalam abhiruhitvā tatthapi dvāram pidahitvā nisīdi. Bhariyāpissa uddhane aggim jāletvā kapallam āropetvā pūve pacitum ārabhi.

Atha Satthā pātova Mahāmoggallānattheram āmantesi "eso Moggallāna Rājagahassa avidūre Sakkāranigame Macchariyaseṭṭhi 'kapallakapūve khādissāmī'ti aññesam dassanabhayena sattabhūmike pāsāde kapallakapūve pacāpeti, tvam tattha gantvā seṭṭhim dametvā nibbisevanam katvā ubhopi jāyampatike pūve ca khīrasappimadhuphāṇitāni ca gāhāpetvā attano balena Jetavanam ānehi, ajjāham pañcahi bhikkhusatehi saddhim vihāre eva nisīdissāmi, pūveheva bhattakiccam karissāmī''ti.

Thero "sādhu bhante"ti Satthu vacanam sampaticchitvā tāvadeva iddhibalena tam nigamam gantvā tassa pāsādassa sīhapañjaradvāre sunivattho supāruto ākāse eva manirūpakam viya atthāsi. Mahāsetthino theram disvāva hadayamamsam kampi. So aham evarūpānamyeva dassanabhayena imam thānamāgato, ayam ca bhikkhu ā kāsenāgantvā vātapānadvāre thitoti. So gahetabbagahanam apassanto aggimhi pakkhittalonasakkharā viya dosena<sup>1</sup> tatatatāyanto evamāha "samana ākāse thatvāpi kim labhissasi, ākāse apade padam dassetvā cankamantopi neva labhissasī"ti. Thero tasmim eva thāne aparāparam cankami. Setthi "cankamanto kim labhissasi, ākāse pallankena nisīdantopi na labhissasiyevā"ti āha. Thero pallankam ābhujitvā nisīdi. Atha nam "ākāse nisinno kim labhissasi, agantva vatapanassa ummare thitopi na labhissasi"ti āha. Thero ummāre thito. "Ummāre thitopi kim labhissasi, dhūmāyantopi<sup>2</sup> na labhissasi eva"ti āha. Theropi dhūmāyi. Sakalapāsādo ekadhūmo ahosi. Setthino akkhīnam sūciyā vijihanakālo viya ahosi, gehajjhāyanabhayena pana "tvam pajjalantopi na labhissasī"ti avatvā "ayam samano sutthu laggo, aladdhā na gamissati, ekamassa pūvam dāpessāmī"ti bhariyam āha "bhadde ekam khuddakapūvam pacitvā samanassa pūvam datvā uyyojehi nan"ti. Sā thokam eva pittham kapallapātiyam pakkhipi, mahāpūvo hutvā sakalapātim pūretvā uddhumāto hutvā atthāsi.

Seṭṭhiṁ taṁ disvā "bahuṁ tayā piṭṭhaṁ gahitaṁ bhavissatī"ti sayameva dabbikaṇṇena thokaṁ piṭṭhaṁ gahetvā pakkhipi, pūvo purimapūvato mahantataro

jāto. Evam yam yam pacati, so so mahantamahantova hoti. So nibbinno bhariyam āha "bhadde imassa ekam pūvam dehī"ti. Tassā pacchito ekam pūvam gaṇhantiyā sabbe ekābaddhā allīyimsu. Sā seṭṭhim āha "sāmi sabbe pūvā ekato laggā, visum kātum na sakkomī"ti. "Aham karissāmī"ti sopi kātum nāsakkhi. Ubhopi janā koṭiyam gahetvā kaḍḍhantāpi viyojetum nāsakkhimsu eva. Athassa pūvehi saddhim vāyamantasseva sarīrato sedā muccimsu, pipāsā upacchijji. Tato bhariyam āha "bhadde na me pūvehi attho, pacchiyā saddhimyeva imassa dehī"ti. Sā pacchim ādāya theram upasankamitvā adāsi. Thero ubhinnampi dhammam desesi, tiṇṇam ratanānam guṇam kathesi, "atthi dinnam, atthi yiṭṭhan"ti dinnadānādīnam phalam gaganatale puṇṇacandam viya dassesi.

Tam sutvā pasannacitto hutvā seṭṭhi "bhante āgantvā imasmim pallanke nisīditvā paribhuñjathā"ti āha. Thero "mahāseṭṭhi Sammāsambuddho 'pūve khādissāmī'ti pañcahi bhikkhusatehi saddhim vihāre nisinno, tumhākam ruciyā sati aham vo nessāmi, seṭṭhibhariyam pūve ca khīrādīni ca gaṇhāpetha, Satthu santikam gamissāmā"ti āha. Kaham pana bhante etarahi Satthāti. Ito pañcacattālīsayojanamatthake Jetavanavihāre mahāseṭṭhīti. Bhante kālam anatikkamitvā ettakam addhānam katham gamissāmāti. Mahāseṭṭhi tumhākam ruciyā sati aham vo attano iddhibalena nessāmi, tumhākam pāsāde sopānasīsam attano ṭhāne eva bhavissati, sopānapariyosānam pana vo Jetavanadvārakoṭṭhake bhavissati, uparipāsādā heṭṭhāpāsādam otaraṇakālamatteneva Jetavanam nessāmīti. So "sādhu bhante"ti sampaṭicchi.

Thero sopānasīsam tattheva katvā "sopānapādamūlam Jetavanadvārakoṭṭhake hotū"ti adhiṭṭhāsi. Tatheva ahosi. Iti thero seṭṭhim ca seṭṭhibhariyañca uparipāsādā heṭṭhāpāsādam otaraṇakālato khippataram Jetavanam sampāpesi. Te ubhopi Satthāram upasaṅkamitvā kālam ārocesum. Satthā bhattaggam pavisitvā paññattavarabuddhāsane nisīdi saddhim bhikkhusamghena. Mahāseṭṭhi Buddhappamukhassa bhikkhusamghassa dakkhiṇodakam adāsi. Bhariyāpissa Tathāgatassa patte pūvam patiṭṭhāpesi. Satthā

attano yāpanamattam, gaņhi, pañcasatā bhikkhūpi yāpanamattam gaņhimsu. Seṭṭhi khīrasappimadhusakkharādīni dadamāno na khayam agamāsi. Satthā pañjahi bhikkhusatehi saddhim bhattakiccam niṭṭhāpesi. Mahāseṭṭhipi saddhim bhariyāya yāvadattham khādi. Pūvānam pariyosānameva na paññāyati. Sakalavihāre bhikkhūnañca vighāsādānañca dinnesupi pariyanto na paññāyateva. "Bhante pūvā parikkhayam na gacchantī"ti Bhagavato ārocesum. Tena hi Jetavanadvārakoṭṭhake chaḍḍethāti. Atha ne dvārakoṭṭhakassa avidūre pabbhāraṭṭhāne chaḍḍayimsu. Yāvajjatanāpi¹ tam ṭhānam kapallakapūvapabbhāranteva paññāyati. Mahāseṭṭhi saha bhariyāya Bhagavantam upasaṅkamitvā vanditvā ekamantam aṭṭhāsi. Bhagavā anumodanamakāsi. Anumodanāvasāne ubhopi sotāpattiphale patiṭṭhāya Satthāram vanditvā dvārakoṭṭhake sopānam āruyha attano pāsādeyeva patiṭṭhahimsu.

Tato paṭṭhāya seṭṭhi asītikoṭidhanam Buddhasāsaneyeva vikkiri. Punadivase sāyanhasamaye dhammasabhāyam sannisinnā bhikkhū "passathāvuso Mahāmoggallānattherassa ānubhāvam, anupahacca nāma saddham, anupahacca bhoge Macchariyaseṭṭhim muhutteneva dametvā nibbisevanam katvā pūve gāhāpetvā Jetavanam ānetvā Satthu sammukham katvā sotāpattiphale patiṭṭhāpesi, aho mahānubhāvo thero"ti therassa guṇam kathentā nisīdimsu. Satthā dibbāya sotadhātuyā katham sutvā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave kuladamakena nāma bhikkhunā anupahacca saddham, anupahacca bhoge, kulam akilametvā aviheṭhetvā pupphato reṇum gaṇhantena bhamarena viya upasaṅkamitvā Buddhaguṇam jānāpetabbam, tādiso mama putto Moggallāno"ti theram pasamsitvā imam gāthamāha—

49. "Yathāpi bhamaro puppham, vaṇṇagandhamaheṭhayam. Paleti rasamādāya, evam gāme Munī care"ti.

Tattha **bhamaro**ti yā kāci madhukarajāti. **Pupphan**ti pupphārāme caranto pupphañca vaṇṇañca gandhañca aheṭhayanto avināsento vicaratīti attho. **Paletī**ti evaṁ caritvā yāvadatthaṁ rasaṁ pivitvā aparampi madhukaraṇatthāya

ādāya paleti, so evam vanagahanam ajjhogāhetvā ekasmim rukkhasusire tam rajamissakam rasam thapetvā anupubbena madhurarasam madhum karoti, na tassa pupphārāme vicaritapaccayā puppham vā vaṇṇagandham vāssa vigacchati, atha kho sabbam pākatikameva hoti. Evam gāme Munī careti evam sekhāsekhabhedo¹ anāgāriyamuni kulapaṭipāṭiyā gāme bhikkham gaṇhanto vicaratīti attho. Na hi tassa gāme caraṇapaccayā kulānam saddhāhāni vā bhogahāni vā honti. Saddhāpi bhogāpi pākatikāva honti. Evam caritvā ca pana nikkhamitvā sekhamuni tāva bahigāme udakaphāsukaṭṭhāne saṃghāṭim paññāpetvā nisinno akkhabhañjanavaṇapaṭicchādanaputtamamsūpamādivasena paccavekkhanto piṇḍapātam paribhuñjitvā tathārūpam vanasaṇḍam anupavisitvā ajjhattikakammaṭṭhānam sammasanto cattāro magge, cattāri ca sāmañāphalāni hatthagatāneva karoti. Asekhamuni pana diṭṭhidhammasukhavihāramanuyuñjati. Ayamassa bhamarena saddhim madhukaraṇasarikkhatā veditabbā. Idha pana khīṇāsavova adhippeto.

Desanāvasāne bahū sotāpattiphalādīni pāpuņimsūti.

Satthā imam dhammadesanam vatvā uttaripi therassa guṇam pakāsetum "na bhikkhave idāneva Moggallānena Macchariyaseṭṭhi damito, pubbepi nam dametvā kammaphalasambandham jānāpesi evā"ti vatvā imamattham pakāsento atītam āharitvā—

"Ubho khañjā ubho kuṇī, ubho visamacakkhukā. Ubhinnam pilakā jātā, nāham passāmi Illisan"ti—

Imam **Illisajātakam**² kathesīti.

Macchariyakosiyaseṭṭhivatthu pañcamam.

### 6. Pāveyyakājīvakavatthu

Na paresam vilomānīti imam dhammadesanam Satthā Sāvatthiyam viharanto Pāveyyam³ nāma ājīvakam ārabbha kathesi.

Sāvatthiyam kirekā gahapatānī puttatthāne thapetvā Pāveyyam nāma ājīvakam patijaggi. Tassānantaragharesu manussā Satthu dhammadesanam sutvā āgantvā "aho acchariyā Buddhānam dhammadesanā" ti nānappakārehi Buddhagune vannenti. Sā Buddhānam gunakatham sutvā vihāram gantvā dhammam sotukāmā ājīvakassa etamattham kathetvā "gacchissāmi aham Buddhasantikam ayyā"ti āha. So "mā gacchāhī"ti nivāretvā tam punappunam yācamānampi nivāresi eva. Sā "ayam mama vihāram gantvā dhammam sotum na deti, Sattharam nimantetva idheva dhammam sunissāmī"ti sāyanhasamaye puttam pakkositvā "gaccha tāta, svātanāya Satthāram nimantehīti pesesi. So gacchanto pathamataram ājīvakassa vasanatthānam gantvā tam vanditvā nisīdi. Atha nam so "kahamgacchasī"ti āha. "Mātu vacanena Satthāram nimantetum gacchāmī"ti āha. Mā tassa santikam gacchāhī''ti. Alam ayya, mama mātu bhāyāmi, gacchissāmahanti. Etassa katasakkāram ubhopi khādissāma, mā gacchāhīti. Alam ayya, mātā me tajjessatīti. Tena hi gaccha, gantvā pana nimantetvā "amhākam geham asukatthāne vā asukavīthiyam vā asukamaggena vā gantabban"ti mā ācikkhi. Santike thito viya aññena maggena gacchanto viya palāyitvā ehīti. So ājīvakassa vacanam sutvā Satthu santikam gantvā nimantetvā ājīvakena vuttaniyāmeneva sabbam katvā tassa santikam gantvā "kim te katan"ti puttho "sabbam katam ayya"ti aha. "Bhaddakam te katam, tassa sakkāram ubhopi khādissāmā"ti vatvā punadivase ājīvako pātova tam geham agamāsi. Tam gahetvā pacchāgabbhe nisīdāpetum.

Paṭivissakamanussā taṁ gehaṁ allagomayena upalimpitvā lājapañcamāni pupphāni vikiritvā Satthu nisīdanatthāya mahārahaṁ āsanaṁ paññāpesuṁ. Buddhehi saddhiṁ aparicitamanussā hi āsanapaññattiṁ na jānanti, Buddhānañca maggadesakena kiccaṁ nāma natthi, bodhimūle dasasahassilokadhātuṁ kampetvā sambodhiṁ pattadivaseyeva hi nesaṁ "ayaṁ maggo nirayaṁ gacchati, ayaṁ tiracchānayoniṁ, ayaṁ pettivisayaṁ, ayaṁ manussalokaṁ, ayaṁ devalokaṁ, ayaṁ amatamahānibbānan"ti sabbe maggā āvibhūtā. Gāmanigamādīnaṁ pana magge vattabbameva natthi. Tasmā Satthā pātova pattacīvaramādāya mahā-upāsikāya gehadvāraṁ gato. Sā gehā nikkhamitvā

Satthāram pañcapatiṭṭhitena vanditvā antonivesanam pavesetvā āsane nisīdāpetvā dakkhiṇodakam datvā paṇītena khādanīyena bhojanīyena parivisi. Upāsikā katabhattakiccassa Satthuno anumodanam kāretukāmā pattam gaṇhi. Satthā madhurassarena anumodanadhammakatham ārabhi. Upāsikā "sādhu sādhū"ti sādhukāram dadamānā dhammam suṇi. Ājīva kopi pacchāgabhe nisinnova tassā sādhukāram datvā dhammam suṇantiyā saddam sutvā sandhāretum nāsakkhi. "Na idānesā mayhan"ti nikkhamitvā "naṭṭhā'si kāļakaṇṇi, etassa evam sakkāram karotī"ti nānappakārena upāsikañca Satthārañca akkosanto palāyi. Upāsikā tassa kathāya lajjitā aññathattam gatam cittam desanānusārena ñāṇam pesetum nāsakkhi. Atha nam Satthā kim upāsike cittam desanānugatam kātum na sakkosīti. Bhante etassa me kathāya cittam aññathattam upagatanti. Satthā "evarūpassa visabhāgajanassa kathitam katham nāma āvajjitum na vaṭṭatī, evarūpam asamannāharitvā attano katākatameva oloketum vaṭṭatī"ti vatvā imam gāthamāha—

50. "Na paresam vilomāni, na paresam katākatam. Attanova avekkheyya, katāni akatāni cā"ti.

Tattha na paresamvilomānīti paresam vilomāni pharusāni mammacchedakavacanāni¹ na manasikātabbāni. Na paresam katākatanti "asuko upāsako assaddho appasanno, nāpissa gehe kaṭacchubhikkhādīni diyyanti, na salākabhattādīni, na cīvarādipaccayadānam etassa atthi, tathā asukā upāsikā assaddhā appasannā, nāpissā gehe kaṭacchubhikkhādīni diyyanti, na salākabhattādīni, na cīvarādipaccayadānam etissā atthi, tathā asuko bhikkhu assaddho appasanno, nāpi upajjhāyavattam karoti, na ācariyavattam, na āgantukavattam, na gamikavattam, na cetiyangaṇavattam, na uposathāgāravattam, na bhojanasālāvattam, na jantāgharavattādīni, nāpissa kiñci dhutangam atthi, na bhāvanārāmatāya ussāhamattampī"ti evam paresam katākatam nāma na oloketabbam. Attanova avekkheyyāti "katham bhūtassa me rattindivā vītivattantīti pabbajitena abhiṇham paccavekkhitabban"ti² imam ovādam anussaranto saddhāpabbajito kulaputto "kim nu kho aham

'Aniccam dukkham anattā'ti tilakkhanam āropetvā yoge kammam¹ kātum sakkhim, nāsakkhin''ti evam attano katākatāni olokeyyāti.

Desanāvasāne sā upāsikā sotāpattiphale patiṭṭhitā, desanā mahājanassa sātthikā jātāti.

Pāveyyakājīvakavatthu chaṭṭham.

#### 7. Chattapāņi-upāsakavatthu

Yathāpi ruciram pupphanti imam dhammadesanam Satthā Sāvatthiyam viharanto Chattapāṇi-upāsakam ārabbha kathesi.

Sāvatthiyam hi Chattapāni nāma upāsako tipitakadharo anagāmī, so pātova uposathiko hutvā Satthu upatthānam agamāsi. Anāgāmiariyasāvakānam hi samādānavasena uposathakammam nāma natthi, maggeneva tesam brahmacariyañca ekabhattikañca āgatam. Tenevāha "ghatikāro kho mahārāja kumbhakāro ekabhattiko brahmacārī sīlavā kalyānadhammo"ti<sup>2</sup>. Evam anāgāmino pakatiyāva ekabhattikā ca brahmacārino ca honti. Sopi tatheva uposathiko hutvā Satthāram upasankamitvā vanditvā dhammakatham sunanto nisīdi. Tasmim samaye rājā pasenadi Kosalo Satthu upatthānam agamāsi. Chattapāni upāsako tam āgacchantam disvā "utthātabbam nu kho, no"ti cintetvā "aham aggarājassa santike nisinno, tassa me padesarājānam disvā utthātum na yuttam, rājā kho pana me anutthahantassa kujihissati etasmim kujihantepi neva utthahissāmi. Rājānam disvā utthahantena hi rājā garukato hoti, no Satthā, tasmā neva utthahissāmī"ti na utthahi. Panditapurisā nāma garutarānam santike nisīditvā anutthahantam disvā na kujihanti. Rājā pana tam anutthahantam disvā kupitamānaso Satthāram vanditvā ekamantam nisīdi. Satthā kupitabhāvam ñatvā "mahārāja ayam Chattapāņi upāsako paņdito ditthadhammo tipiṭakadharo atthanatthakusalo"ti upasakassa guṇam kathesi. Rañño tassa guņakatham suņantasseva cittam mudukam jātam.

Athekadivasam rājā uparipāsāde thito Chattapānim upāsakam katabhattakiccam chattamādāya upāhanamāruyha rājanganena gacchantam disvā pakkosāpesi. So chattupāhanam apanetvā rājānamupasankamitvā vandityā ekamantam atthāsi. Atha nam rājā āha "bho upāsaka kinte chattupāhanam apanītan"ti. "Rājā pakkosatī"ti sutvā apanetvā āgatomhīti. Ajja amhākam rājabhāvo tumhehi ñāto bhavissatīti. Sadāpi mayam deva tumhākam rājabhāvam jānāmāti. Yadi evam kasmā purimadivase Satthu santike nisinno mam disvā na utthahīti. Mahārāja aham aggarājassa santike nisinno, padesarājānam disvā utthahanto Satthari agāravam pavedeyyam, tasmā na utthahinti. Hotu bho, titthatetam. Tumhe kira ditthadhammikasamparāyikānam atthānatthānam kusalā tipitakadharā amhākam antepure dhammam vācethāti. Na sakkomi devāti. Kim kāranāti. Rājageham nāma mahāsāvajjam, duyuttasuyuttakāni garukānettha devāti. Mā evam vadetha, "purimadivase mam disvā na utthitomhī"ti mā kukkuccam karothāti. Deva gihīnam vicaranatthānam nāma mahāsāvajjam, ekam pabbajitam pakkosāpetvā dhammam vācāpethāti. Rājā "sādhu bho, gacchatha tumhe"ti tam uyyojetvā Satthu santikam gantvā Satthāram yāci "bhante Mallikā ca devī Vāsabhakhattiyā ca dhammam pariyāpunissāmāti vadanti, pañcahi bhikkhusatehi saddhim nibaddham mama geham gantvā tāsam dhammam uddisathā"ti. Buddhānam nibaddham ekatthānagamanam nāma natthi mahārājāti. Tena hi bhante aññam ekam bhikkhum dethāti. Satthā Ānandattherassa bhāramakāsi. Thero nibaddham gantvā tāsam uddesam uddisati. Tāsu Mallikā sakkaccam gahetvā sajihāyitvā uddesam paticchāpesi. Vāsabhakhattivā pana neva sakkaccam ganhāti, na sajjhāyati, na uddesam paticchāpetum sakkoti.

Athekadivasam Satthā theram pucchi "kimānanda upāsikā dhammam pariyāpuṇantī"ti. Āma bhanteti. Kā sakkaccam gaṇhātīti. Mallikā bhante sakkaccam gaṇhāti, sakkaccam sajjhāyati, sakkaccam uddesam paṭicchāpetum sakkoti. Tumhākam pana ñātidhītā neva sakkaccam gaṇhāti, na sajjhāyati, na uddesam paṭicchāpetum sakkotīti. Satthā therassa vacanam sutvā "Ānanda mayā kathitadhammo nāma sakkaccamasuṇantassa aggaṇhantassa asajjhāyantassa adesentassa vaṇṇasampannam agandhakapuppham viya aphalo hoti, sakkaccam

pana savanādīni karontassa mahapphalo hoti mahānisamso"ti vatvā imā dve gāthā abhāsi—

- 51. "Yathāpi ruciram puppham, vaṇṇavantam agandhakam. Evam subhāsitā vācā, aphalā hoti akubbato.
- 52. Yathāpi ruciram puppham, vannavantam sagandhakam. Evam subhāsisā vācā, saphalā hoti kubbato"ti<sup>1</sup>.

Tattha **ruciran**ti sobhanam. **Vaṇṇavantan**ti vaṇṇasaṇṭhānasampannam, **agandhakan**ti gandhavirahitam

pālibhaddakagirikaṇṇikajayasumanādibhedaṁ. **Evaṁ subhāsitā vācā**ti subhāsitā vācā nāma tepiṭakaṁ Buddhavacanaṁ, taṁ vaṇṇasaṇṭhānasampannaṁ agandhakapupphasadisaṁ. Yathā pana agandhakapupphaṁ yo naṁ dhāreti, tassa sarīre gandhaṁ na pharati, evaṁ etampi yo naṁ sakkaccaṁ savanādīhi na samācarati, tassa sakkaccaṁ asamācarantassa yaṁ tattha kattabbaṁ, taṁ akubbato sutagandhañca² vācāgandhañca³ paṭipattigandhañca na āvahati aphalā hoti. Tena vuttaṁ "evaṁ subhāsitā vācā, aphalā hoti akubbato"ti. **Sagandhakan**ti campakanīluppalādibhedaṁ. **Evan**ti yathā taṁ pupphaṁ dhārentassa sarīre gandho pharati, evaṁ Tepiṭakabuddhavacanasaṅkhātā subhāsitā vācāpi. **Kubbato**ti¹ yo sakkaccaṁ savanādīhi tattha kattabbaṁ karoti, sā assa puggalassa saphalā hoti, sutagandhavācāgandhapaṭipattigandhānaṁ āvahanato mahapphalā hoti, mahānisaṁsāti attho.

Desanāvasāne bahū sotāpattiphalādīni pattā, desanā mahājanassa sātthikā jātāti.

Chattapāṇi-upāsakavatthu sattamam.

#### 8. Visākhāvatthu

Yathāpi puppharāsimhāti imam dhammadesanam Satthā Sāvatthiyam upanisssāya Pubbārāme viharanto Visākham upāsikam ārabbha kathesi.

<sup>1.</sup> Pakubbatoti (Sī), sukubbatoti (Syā), sakubbatoti (Ka)

<sup>2.</sup> Sutagandham (Sī)

<sup>3.</sup> Cāgagandhañca (Sī), dhāraṇagandhañca (Syā)

Sā kira Aṅgaraṭṭhe Bhaddiyanagare Meṇḍakaseṭṭhiputtassa Dhanañcayaseṭṭhino aggamahesiyā Sumanadeviyā kucchismiṁ nibbatti, tassā sattavassikakāle Satthā selabrāhmaṇādīnaṁ bodhaneyyabandhavānaṁ upanissayasampadaṁ disvā mahābhikkhusaṁghaparivāro cārikaṁ caramāno taṁ nagaraṁ pāpuṇi.

Tasmim ca samaye Mendako gahapati tasmim nagare pañcannam mahāpuññānam jetthako hutvā setthitthānam karoti<sup>1</sup>. **Pañca mahāpuññā** nāma Mendako setthi, Candapadumā nāma tasseva jetthakabhariyā, tasseva jetthakaputto Dhanañcayo nāma, tassa bhariyā Sumanadevī nāma, Mendakasetthino dāso Punno nāmāti. Na kevalañca Mendakasetthiyeva, Bimbisārarañño pana vijite **pañca amitabhogā** nāma ahesum Jotiko Jatilo Mendako Punnako Kākavaliyoti. Tesu ayam Mendakasetthi Dasabalassa attano nagaram sampattabhāvam natvā puttassa Dhanancayasetthino dhītaram Visākham dārikam pakkosāpetvā āha "amma tuyhampi mangalam, amhākampi mangalam, tava parivārehi pancahi dārikāsatehi saddhim panca rathasatāni āruyha pañcahi dāsisatehi parivutā Dasabalassa paccuggamanam karohī"ti. Sā "sādhū"ti paţissuņitvā tathā akāsi. Kāraņākāraņesu pana kusalattā yāvatikā yānassa bhūmi, yānena gantvā yānā paccorohitvā pattikāva Satthāram upasankamitvā vanditvā ekamantam atthāsi. Athassā cariyāvasena<sup>2</sup> Satthā dhammam desesi. Sā desanāvasāne pañcahi dārikāsatehi saddhim sotāpattiphale patitthahi. Mendakasetthipi kho Satthāramupasankamitvā dhammakatham sutvā sotāpattiphale patitthāya svātanāya nimantetvā punadivase attano nivesane paņītena khādanīyena bhojanīvena Buddhappamukham bhikkhusamgham parivisitvā eteneva upāyena addhamāsam³ mahādānamadāsi. Satthā Bhaddiyanagare yathābhirantam viharitvā pakkāmi.

Tena kho pana samayena Bimbisāro ca pasenadi Kosalo ca aññamaññam bhaginipatikā honti. Athekadivasam Kosalarājā cintesi "Bimbisārassa vijite pañca amitabhogā mahāpuññā vasanti, mayham vijite ekopi tādiso natthi, yamnūnāham Bimbisārassa santikam gantvā ekam mahāpuññam yāceyyan"ti. So tattha gantvā raññā katapaṭisanthāro "kimkāraṇā

<sup>1.</sup> Kāreti (Syā, Ka)

<sup>2.</sup> Pubbacariyavasena (Ka)

<sup>3.</sup> Atthamāsam (Sī)

āgatosī"ti puttho "tumhākam vijite pañca amitabhogā mahāpuññā vasanti, tato ekam gahetvā gamissāmīti āgatomhi, tesu me ekam dethā"ti āha. "Mahākulāni amhehi cāletum na sakkā"ti āha. "Aham aladdhā na gamissāmī"ti āha. Rājā amaccehi saddhim mantetvā "jotikādīnam mahākulānam cālanam nāma mahāpathaviyā cālanasadisam, Mendakamahāsetthissa putto Dhanañcayasetthi nāma atthi, tena saddhim mantetvā pativacanam te dassāmī"ti vatvā tam pakkosāpetvā tāta Kosalarājā "ekam dhanasetthim gahetvā gamissāmī"ti vadati, tvam tena saddhim gacchāhīti. Tumhesu pahinantesu gamissāmi devāti. Tena hi parivaccham<sup>1</sup> katvā gaccha tātāti. So attano kattabbayuttakamakāsi. Rājāpissa mahantam sakkāram katvā "imam ādāya gacchathā" ti Pasenadirājānam uyyojesi. So tam ādāya sabbattha ekarattivāsena gacchanto ekam phāsukatthānam patvā nivāsam ganhi. Atha nam Dhanancayasetthi pucchi "idam kassa vijitan"ti. Mayham setthīti. Kīva dūro ito Sāvatthīti. Sattayojanamatthaketi<sup>2</sup>. Antonagaram sambādham, amhākam parijano mahanto, sace rocetha, idheva vaseyyāma devāti. Rājā "sādhū"ti sampaticchitvā tasmim thāne nagaram māpetvā tassa datvā agamāsi. Tasmim padese sayam³ vasanatthānassa gahitattā nagarassa Sāketantveva nāmam ahosi.

Sāvatthiyampi kho Migāraseṭṭhino putto Puṇṇavaḍḍhanakumāro nāma vayappatto ahosi. Atha naṁ mātāpitaro vadiṁsu "tāta tava ruccanaṭṭhāne ekaṁ dārikaṁ upadhārehī"ti. Mayhaṁ evarūpāya bhariyāya<sup>4</sup> kiccaṁ natthīti. Putta mā evaṁ kari, kulaṁ nāma aputtakaṁ na tiṭṭhatīti. So punappunaṁ vuccamāno "tena hi pañcakalyāṇasamannāgataṁ dārikaṁ labhamāno tumhākaṁ vacanaṁ karissāmī"ti āha. Kāni panetāni pañca kalyāṇāni nāma tātāti. Kesakalyāṇaṁ maṁsakalyāṇaṁ aṭṭhikalyāṇaṁ chavikalyāṇaṁ vayakalyāṇanti. Mahāpuññāya hi itthiyā kesā morakalāpasadisā hutvā muñcitvā vissaṭṭhā nivāsanantaṁ paharitvā nivattitvā uddhaggā tiṭṭhanti, idaṁ kesakalyāṇaṁ nāma, dantāvaraṇaṁ bimbaphalasadisaṁ vaṇṇasampannaṁ samaṁ suphusitaṁ

<sup>1.</sup> Parisajjam (Ka)

<sup>2.</sup> Chayojanamatthaketi (Ka) Am-Ttha 1. 312 pitthe pana passitabbam.

<sup>3.</sup> Sāyam (Sī, Syā)

<sup>4.</sup> Jaṭāya (Sī), jāyāya (Ka)

hoti, idam mamsakalyāṇam nāma, dantā sukkā samā aviraļā ussāpetvā thapitavajirapanti viya samacchinnasankhapanti viya ca sobhanti, idam aṭṭhikalyāṇam nāma, kāṭiyā cuṇṇakādīhi¹ avilitto eva chavivaṇṇo siniddho nīluppaladāmasadiso hoti, odātāya ca kaṇikārapupphadāmasadiso hoti, idam chavikalyāṇam nāma, dasakkhattum vijātāpi kho pana sakim vijātā viya avigatayobbanāyeva hoti, idam vayakalyāṇam nāma hoti. Athassa mātāpitaro aṭṭhuttarasatabrāhmaṇe nimantetvā bhojetvā "pañcakalyāṇasamannāgatā itthiyo nāma hontī"ti pucchimsu. Āma hontīti. "Tena hi evarūpam dārikam pariyesitum aṭṭha janā gacchantū"ti bahum dhanam datvā "āgatakāle vo kattabbam jānissāma, gacchatha, evarūpam dārikam pariyesatha, diṭṭhakāle ca imam pilandhanam dadeyyāthā"ti satasahassagghanikam suvaṇṇamālam datvā uyyojesum.

Te mahantamahantani nagarani gantva pariyesamana pañcakalyānasamannāgatam dārikam adisvā nivattitvā āgacchantā vivatanakkhattadivase Sāketam anuppattā "ajja amhākam kammam nipphajjissatī"ti cintayimsu. Tasmim pana nagare anusamvaccharam vivatanakkhattam nāma hoti. Tadā bahi anikkhamanakulānipi parivārena saddhim gehā nikkhamitvā appaticchannena sarīrena padasāva nadītīram gacchanti. Tasmim divase khattiyamahāsālādīnam puttāpi "attano samānajātikam manāpam kuladārikam disvā mālāguļena parikkhipissāmā"ti tam tam maggam nissāya titthanti. Tepi kho brāhmanā nadītīre ekam sālam pavisitvā atthamsu. Tasmim khane Visākhā pannarasasolasavassuddesikā hutvā sabbābharanapatimanditā pañcahi kumārikāsatehi parivutā "nadim gantvā nhāyissāmī"ti tam padesam pattā, atha kho megho utthahitvā pāvassi. Pañcasatā kumārikāyo vegena gantvā sālam pavisimsu. Brāhmanā olokentā tāsu ekampi pañcakalyānasamannāgatam na passimsu. Atha Visākhā pakatigamaneneva sālam pāvisi. Vatthābharanāni temimsu. Brāhmanā tassā cattāri kalyānāni disvā dante passitukāmā "alasajātikā amhākam dhītā, etissā sāmiko kañcikamattampi na labhissati maññe"ti aññamaññam kathayimsu. Atha

ne Visākhā āha "kaṁ vadetha tumhe"ti. Taṁ kathema ammāti. Madhurā hi tassā saddo kaṁsatāļasaro viya niccharati. Atha ne puna madhurasaddena "kiṁ kāraṇā bhaṇathā"ti pucchi. Tava parivāritthiyo vatthālaṅkāre atemetvā vegena sālaṁ paviṭṭhā, tuyhaṁ ettakaṁ ṭhānaṁ vegena āgamanamattampi natthi, vatthābharaṇāni temetvā āgatāsi, tasmā kathema ammāti.

Tātā evam mā vadetha, aham etāhi balavatarā, kāraṇam pana sallakkhetvā javena nāgatāmhīti. Kim ammāti. Tātā cattāro janā javamānā na sobhanti, aparampi kāranam atthīti. Katame cattāro janā javamānā na sobhanti ammāti. Tātā abhisittarājā tāva sabbābharanapatimandito kaccham bandhitvā rājangaņe javamāno na sobhati, "kim ayam rājā gahapatiko viya dhāvatī"ti aññadatthu garaham labhati, sanikam gacchantova sobhati. Rañño mangalahatthīpi alankato javamāno na sobhati, vāranalīlāya gacchantova sobhati. Pabbajito javamāno na sobhati, "kim ayam samano gihī viya dhāvatī"ti kevalam garahameva labhati, samitagamanena<sup>1</sup> pana sobhati. **Itthī** javamānā na sobhati, "kim esā itthī puriso viya dhāvatī"ti garahitabbāva hoti, ime cattāro janā javamānā na sobhanti tātāti. Katamam pana aparam kāranam ammāti. Tātā mātāpitaro nāma dhītaram angapaccangāni santhāpetvā posenti. Mayam hi vikkineyyabhandam nāma, amhe parakulapesanatthāya posenti. Sace javamānānam nivatthadussakanne vā<sup>2</sup> akkamitvā bhūmiyam vā pakkhalitvā patitakāle hattho vā pādo vā bhijjeyya, kulasseva bhāro bhaveyya, pasādhanabhandam pana me temetvā sussissati. Imam kāranam sallakkhetvā na dhāvitāmhi tātāti.

Brāhmaṇā tassā kathanakāle dantasampattim disvā "evarūpā no dantasampatti na diṭṭhapubbā"ti tassā sādhukāram datvā "amma tuyhamevesā anucchavikā"ti vatvā tam suvaṇṇamālam pilandhayimsu³. Atha ne pucchi "kataranagarato āgatā'ttha tātā"ti. Sāvatthito ammāti. Seṭṭhikulam kataram nāmāti. Migāraseṭṭhi nāma ammāti. Ayyaputto

ko nāmāti. Puṇṇavaḍḍhanakumāro nāma ammāti. Sā "samānajātikaṁ no kulan"ti adhivāsetvā pitu sāsanaṁ pahiṇi "amhākaṁ rathaṁ pesetū"ti. Kiñcāpi hi sā āgamanakāle padasā āgatā, suvaṇṇamālāya pana pilandhanakālato paṭṭhāya tathā gantuṁ na labhati, issaradārikā rathādīhi gacchanti, itarā pakatiyānakaṁ vā abhiruhanti, chattaṁ vā tālapaṇṇaṁ vā upari karonti, tasmimpi asati nivatthasāṭakassa dasantaṁ ukkhipitvā aṁse khipantā gacchanti eva. Tassā pana pitā pañca rathasatāni pesesi. Sā saparivārā rathaṁ āruyha gatā. Brāhmaṇāpi ekatova agamaṁsu. Atha ne seṭṭhi pucchi "kuto āgatātthā"ti. Sāvatthito mahāseṭṭhīti. Seṭṭhi kataro nāmāti. Migāraseṭṭhi nāmāti. Putto ko nāmāti. Puṇṇavaḍḍhanakumāro nāma mahāseṭṭhīti. Dhanaṁ kittakanti. Cattālīsakoṭiyo mahāseṭṭhīti. "Dhanaṁ tāva amhākaṁ dhanaṁ upādāya kākaṇikamattaṁ, dārikāya pana ārakkhamattāya¹ laddhakālato paṭṭhāya kiṁ aññena kāraṇenā"ti adhivāsesi. So tesaṁ sakkāraṁ katvā ekāhadvīhaṁ vasāpetvā uyyojesi.

Te Sāvatthim gantvā Migāraseṭṭhissa "laddhā no dārikā"ti ārocayimsu. Kassa dhītāti, Dhanañcayaseṭṭhinoti. So "mahākulassa me dārikā laddhā, khippameva nam ānetum vaṭṭatī"ti tattha gamanattham rañño ārocesi. Rājā "mahākulam etam mayā Bimbisārassa santikā ānetvā Sākete nivesitam, tassa sammānam kātum vaṭṭatīti ahampi āgamissāmī"ti āha. So "sādhu devā"ti vatvā Dhanañcayaseṭṭhino sāsanam pesesi "mayi āgacchante rājāpi āgamissati, mahantam rājabalam ettakassa janassa kattabbayuttakam kātum sakkhissasi, na sakkhissasī"ti. Itaropi "sacepi dasa rājāno āgacchanti, āgacchantū"ti paṭisāsanam pesesi. Migāraseṭṭhi tāva mahante nagare gehagopakamattam ṭhapetvā sesajanam ādāya gantvā aḍḍhayojanamatte ṭhāne ṭhatvā "āgatāmhā"ti sāsanam pahiṇi. Dhanañcayaseṭṭhi bahupaṇṇākāram pesetvā dhītarā saddhim mantesi "amma sasuro kira te Kosalaraññā saddhim āgato, tassa kataram geham paṭijaggitabbam, rañño

kataram, uparājādīnam katarānī"ti. Paṇḍitā seṭṭhidhītā vajiraggatikhiṇañāṇā kappasatasahassam patthitapatthanā abhinīhārasampannā "sasurassa me asukageham paṭijaggatha, rañño asukageham, uparājādīnam asukānī"ti samvidahitvā dāsakammakare pakkosāpetvā "ettakā rañño kattabbakiccam karotha, ettakā uparājādīnam, hatthi-assādayopi tumheyeva paṭijaggatha, assabandhādayopi āgantvā maṅgalachaṇam anubhavissantī"ti samvidahi. Kim kāraṇā? "Mayam Visākhāya maṅgalaṭṭhānam gantvā na kiñci labhimha, assarakkhaṇādīni karontā sukham na vicarimhā"ti¹ keci vattum mā labhimsūti.

Tam divasameva Visākhāya pitā pañcasate suvannakāre pakkosāpetvā "dhītu me **mahālatāpasādhanam** nāma karothā"ti rattasuvannassa nikkhasahassam, tadanurūpāni ca rajatamanimuttāpavālavajirādīni dāpesi. Rājā katipāham vasitvāva Dhanancayasetthissa sāsanam pahini "na sakkā setthinā amhākam ciram posanam nāma kātum, dāni dārikāya gamanakālam jānātū"ti. Sopi rañño sāsanam pesesi "idāni vassakālo āgato, na sakkā catumāsam vicaritum, tumhākam balakāyassa yam yam laddhum vattati, sabbam tam mama bhāro, mayā pesitakāle devo gamissatī"ti. Tato patthāya Sāketanagaram niccanakkhattam viya ahosi. Rājānam ādim katvā sabbesam mālāgandhavatthādīni patiyattāneva honti. Tato te janā cintayimsu "setthi amhākameva sakkāram karotī'ti, evam tayo māsā atikkantā, pasādhanam pana tāva na nitthāti. Kammantādhitthāvakā āgantvā setthino ārocesum "aññam asantam nāma natthi, balakāyassa pana bhattapacanadārūni nappahontī"ti. Gacchatha tātā, imasmim nagare parijinnā hatthisālādayo ceva parijinnakāni ca gehāni gahetvā pacathāti. Evam pacantānampi addhamāso atikkanto. Tato punapi "dārūni natthī"ti ārocayimsu. Imasmim kāle na sakkā dārūni laddhum, dussakotthāgārāni vivaritvā thūlasātakehi vattiyo katvā telacātīsu temetvā bhattam pacathāti. Te addhamāsam tathā akamsu. Evam cattāro māsā atikkantā, pasādhanampi nitthitam.

Tasmim pasādhane catasso vajiranāļiyo upayogam agamamsu, muttānam ekādasa nāliyo, pavālassa bāvīsati nāliyo, manīnam tettimsa nāļiyo. Iti etehi ca aññehi ca ratanehi niṭṭhānam agamāsi. Asuttamayam pasādhanam rajatena suttakiccam karimsu. Tam sīse paṭimukkam pādapiṭṭhim¹ gacchati. Tasmim tasmim ṭhāne muddikā yojetvā katā suvaṇṇamayā gaṇṭhikā honti, rajatamayā pāsakā, matthakamajjhe ekā muddikā, dvīsu kaṇṇapiṭṭhīsu dve, galavāṭake ekā, dvīsu jattūsu dve, dvīsu kapparesu dve, dvīsu kaṭipassesu dveti. Tasmim kho pana pasādhane ekam moram karimsu, tassa dakkhiṇapakkhe rattasuvaṇṇamayāni pañca pattasatāni ahesum, vāmapakkhe pañca pattasatāni, tuṇḍam pavāṭamayam, akkhīni maṇimayāni, tathā gīvā ca piñchāni ca, pattanāṭiyo rajatamayā, tathā jaṅghāyo. So Visākhāya matthakamajjhe pabbatakūṭe ṭhatvā naccanamayūro viya khāyati. Pattanāṭisahassassa saddo dibbasaṅgītam viya pañcaṅgikatūriyaghoso viya ca pavattati. Santikam upagatāyeva tassā² amorabhāvam jānanti. Pasādhanam navakoṭi-agghanakam ahosi, satasahassam hatthakammamūlam dīyittha.

Kissa pana nissandena tāyetam pasādhanam laddhanti? Sā kira Kassapasammāsambuddhakāle vīsatiyā bhikkhusahassānam cīvarasāṭakam datvā suttampi sūciyopi rajanampi attano santakameva adāsi. Tassa cīvaradānassa nissandena imam mahālatāpasādhanam labhi. Itthīnam hi cīvaradānam mahālatāpasādhanabhaṇḍena matthakam pappoti, purisānam iddhimayapattacīvarenāti. Evam mahāseṭṭhi catūhi māsehi dhītu parivaccham katvā tassā deyyadhammam dadamāno kahāpaṇapūrāni pañca sakaṭasatāni adāsi. Suvaṇṇabhājanapūrāni pañca, rajatabhājanapūrāni pañca, tambabhājanapūrāni pañca, pattuṇṇavatthakoseyyavatthapūrāni³ pañca, sappipūrāni pañca, telapūrāni pañca, sālitaṇḍulapūrāni pañca, naṅgalaphālādi-upakaraṇapūrāni pañcasakaṭasatāni adāsi. Evam kirassa ahosi "mama dhītu gataṭṭhāne 'asukena nāma me attho'ti mā parassa gehadvāram pahiṇī"ti. Tasmā⁴ sabbūpakaraṇāni dāpesi. Ekekasmim rathe sabbālaṅkārapaṭimaṇḍitā tisso tisso vaṇṇadāsiyo ṭhapetvā pañca rathasatāni adāsi. "Etam⁵ nhāpentiyo bhojentiyo alaṅkarontiyo vicarathā"ti

<sup>1.</sup> Yāva pādapitthim (Ka) 2. Tassa (Syā) 3. Pattavattha... (Sī), suttavattha... (Syā)

<sup>4.</sup> Pahinī"ti tassā (Sī)

<sup>5.</sup> Ettikā (Syā)

diyaḍḍhasahassaparicārikāyo adāsi. Athassa etadahosi "mama dhītu gāvo dassāmī"ti. So purise āṇāpesi "gacchatha bhaṇe cūḷavajassa dvāraṁ vivaritvā tīsu gāvutesu tisso bheriyo gahetvā tiṭṭhatha, puthulato usabhamatte ṭhāne ubhosu passesu tiṭṭhatha, gāvīnaṁ tato paraṁ gantuṁ mā adattha, evaṁ ṭhitakāle bherisaññaṁ kareyyāthā"ti. Te tathā akaṁsu. Te gāvīnaṁ vajato nikkhamitvā gāvutaṁ gatakāle bherisaññaṁ akaṁsu, puna aḍḍhayojanaṁ gatakāle akaṁsu. Punapi tigāvutaṁ gatakāle bherisaññaṁ akaṁsu, puthulato gamanañca nivāresuṁ. Evaṁ dīghato tigāvute, puthulato usabhamatte ṭhāne gāviyo aññamaññaṁ nighaṁsantiyo aṭṭhaṁsu.

Mahāsetthi "mama dhītu ettakā gāvo alam, dvāram pidahathā"ti vajadvāram pidahāpesi. Dvārasmim pidahite Visākhāya puññabalena balavagāvo ca dhenuyo ca uppatitvā uppatitvā nikkhamimsu. Manussānam vārentānam vārentānameva satthisahassā balavagāvo ca satthisahassā dhenuyo ca nikkhantā, tattakā balavavacchā tāsam dhenūnam usabhā uppatitvā anubandhā ahesum<sup>1</sup>. Kissa pana nissandena evam gāvo gatāti? Nivārentānam nivārentānam dinnadānassa. Sā kira Kassapasammāsambuddhakāle Kikissa rañño sattannam dhītānam kanitthā Saṅghadāsī nāma hutvā vīsatiyā bhikkhusahassānam pañcagorasadānam dadamānā therānañca daharānañca sāmanerānañca pattam pidahitvā "alam alan"ti nivārentānampi "idam madhuram, idam manāpan"ti adāsi. Evam tassa nissandena vāriyamānāpi gāvo nikkhamimsu. Setthinā ettakassa dhanassa dinnakāle setthibhariyā āha "tumhehi mayham dhītu sabbam samvidahitam, veyyāvaccakarā pana dāsadāsiyo na samvidahitā, kim kāranā"ti. "Mama dhītari sasinehanissinehānam jānanattham. Aham hi tāya saddhim agacchamānake gīvāya gahetvā na pahināmi, yānam āruyha gamanakāleyeva etāya saddhim gantukāmā gacchantu, mā agantukāmāti vakkhāmī"ti āha.

Atha "sve mama dhītā gamissatī"ti gabbhe nisinno dhītaram samīpe nisīdāpetvā "amma patikule vasantiyā nāma imañca imañca ācāram

rakkhitum vaṭṭatī"ti ovādamadāsi. Ayampi Migāraseṭṭhi anantaragabbhe nisinno Dhanañcayaseṭṭhino ovādam assosi. Sopi seṭṭhi dhītaram evam ovadi—

Amma sasurakule vasantiyā nāma anto-aggi bahi na nīharitabbo, bahi-aggi anto na pavesetabbo, dadantasseva dātabbam, adadantassa na dātabbam, dadantassāpi adadantassāpi dātabbam, sukham nisīditabbam, sukham bhuñjitabbam, sukham nipajjitabbam, aggi paricaritabbo, antodevatā namassitabbāti.

Imam dasavidham ovādam datvā punadivase sabbā seniyo sannipātetvā rājasenāya majjhe aṭṭha kuṭumbike pāṭibhoge gahetvā "sace me gataṭṭhāne dhītu doso uppajjati, tumhehi sodhetabbo"ti vatvā navakoṭi-agghanakena mahālatāpasādhanena dhītaram pasādhetvā nhānacuṇṇamūlakam catupaṇṇāsakoṭidhanam datvā yānam āropetvā Sāketassa sāmantā attano santakesu Anurādhapuramattesu cuddasasu bhattagāmesu bherim carāpesi "mama dhītarā saddhim gantukāmā gacchantū"ti te saddam sutvāva "amhākam ayyāya gamanakāle kim amhākam idhā"ti cuddasa gāmakā kiñci asesetvā nikkhamimsu. Dhanañcayaseṭṭhipi rañño ca Migāraseṭṭhino ca sakkāram katvā thokam anugantvā tehi saddhim dhītaram uyyojesi.

Migāraseṭṭhipi sabbapacchato yānake nisīditvā gacchanto balakāyam disvā "ke nāmete"ti pucchi. Suṇisāya vo veyyāvaccakarā dāsidāsāti. Ettake ko posessati, pothetvā te palāpetha, apalāyante ito daṇḍam karothāti. Visākhā pana "apetha, mā vāretha, balameva balassa bhattam dassatī"ti¹āha. Seṭṭhi evam vuttepi "amma natthi amhākam etehi attho. Ko ete posessatī"ti leḍḍudaṇḍādīhi pothetvā palāpetvā sesake "alam amhākam ettakehī"ti gahetvā pāyāsi. Atha Visākhā Sāvatthinagaradvāram sampattakāle cintesi "paṭicchannayānasmim nu kho nisīditvā pavisissāmi, udāhu rathe ṭhatvā"ti. Athassā etadahosi "paṭicchannayānena me pavisantiyā mahālatāpasādhanassa viseso na paññāyissatī"ti.

sā sakalanagarassa attānam dassentī rathe ṭhatvā nagaram pāvisi.
Sāvatthivāsino Visākhāya sampattim disvā "eso kira Visākhā nāma, evarūpā ayam sampatti etissāva anucchavikā"ti āhamsu. Iti sā mahāsampattiyā seṭṭhino geham pāvisi. Gatadivase cassā sakalanagaravāsino "amhākam Dhanañcayaseṭṭhi attano nagaram sampattānam mahāsakkāram akāsī"ti "yathāsatti yathābalam paṇṇākāram pahiṇimsu. Visākhā pahitapahitam paṇṇākāram tasmimyeva nagare aññamañnesu kulesu sabbatthakameva dāpesi. Iti sā "idam mayham mātu detha, idam mayham pitu detha, idam mayham bhātu detha, idam mayham bhaginiyā dethā"ti tesam tesam vayānurūpam piyavacanam vatvā paṇṇākāram pesentī sakalanagaravāsino ñātake viya akāsi. Athassā rattibhāgasamanantare ājaññavaļavāya gabbhavuṭṭhānam ahosi. Sā dāsīhi daṇḍadīpikā gāhāpetvā tattha gantvā vaļavam uṇhodakena nhāpetvā telena makkhāpetvā attano vasanaṭṭhānameva agamāsi.

Migāraseṭṭhipi puttassa āvāhamaṅgalaṁ karonto dhuravihāre vasantampi Tathāgataṁ amanasikaritvā dīgharattaṁ naggasamaṇakesu patiṭṭhitena pemena codiyamāno "mayhaṁ ayyānampi sakkāraṁ karissāmī"ti ekadivasaṁ anekasatesu navabhājanesu nirūdakapāyāsaṁ pacāpetvā pañcasate acelake nimantāpetvā antogehaṁ pavesetvā "āgacchatu me suṇisā, arahante vandatū"ti Visākhāya sāsanaṁ pahiṇi. Sā "arahanto"ti vacanaṁ sutvā sotāpannā ariyasāvikā haṭṭhatuṭṭhā hutvā tesaṁ bhojanaṭṭhānaṁ āgantvā te oloketvā "evarūpā hirottappavirahitā arahantā nāma na honti, kasmā maṁ sasuro pakkosāpesī"ti "dhī dhī"ti seṭṭhiṁ garahitvā attanovasanaṭṭhānameva gatā. Acelakā taṁ disvā sabbe ekappahāreneva seṭṭhiṁ garahiṁsu "kiṁ tvaṁ gahapati aññaṁ nālattha, samaṇassa Gotamassa sāvikaṁ Mahākāļakaṇṇiṁ idha pavesesi, vegena naṁ imasmā gehā nikkaḍḍhāpetī"ti. So "na sakkā mayā imesaṁ vacanamatteneva nikkaḍḍhāpetuṁ, mahākulassa sā dhītā"ti cintetvā "ayyā daharā nāma jānitvā vā ajānitvā vā kareyyuṁ, tumhe tuṇhī hothā"ti te

uyyojetvā sayam mahārahe āsane nisīditvā suvaņņapātiyam nirudakam madhupāyāsam paribhuñji.

Tasmim samaye eko pindapātikatthero<sup>1</sup> pindāya caranto tam nivesanam pāvisi. Visākhā sasuram bījayamānā thitā tam disvā "sasurassa ācikkhitum ayuttan''ti yathā so theram passati, evam apagantvā atthāsi. So pana bālo theram disvāpi apassanto viya hutvā adhomukho bhunjateva. Visākhā "theram disvāpi me sasuro saññam na karotī"ti ñatvā "aticchatha bhante, mayham sasuro purānam khādatī"ti āha. So niganthehi kathitakāle adhivāsetvāpi "purānam khādatī"ti vuttakkhaneyeva hattham apanetvā "imam pāyāsam ito nīharatha, etam imasmā gehā nikkaddhatha, ayam mam evarūpe mangalakāle asucikhādakam nāma karotī"ti āha. Tasmim kho pana nivesane sabbepi dāsakammakarā Visākhāya santakāva, ( )² ko naṁ hatthe vā pāde vā ganhissati, mukhena kathetum samatthopi natthi. Visākhā sasurassa katham sutvā āha "tāta na ettakeneva mayam nikkhamāma, nāham tumhehi udakatitthato kumbhadāsī viya ānītā, dharamānakamātāpitūnam dhītaro nāma na ettakeneva nikkhamanti, eteneva me kāraņena pitā idhāgamanakāle attha kutumbike pakkosāpetvā 'sace me dhītu doso uppajjati, sodheyyāthā'ti vatvā mam tesam hatthe thapesi, te pakkosāpetvā mayham dosādosam sodhāpethā"ti.

Seṭṭhi "kalyāṇaṁ esā kathetī"ti aṭṭha kuṭumbike pakkosāpetvā "ayaṁ dārikā maṅgalakāle nisīditvā suvaṇṇapātiyaṁ nirudakapāyāsaṁ paribhuñjantaṁ maṁ 'asucikhādako'ti vadatī"ti āha, imissā dosaṁ āropetvā imaṁ gehato nikkaḍḍhathāti. Evaṁ kira ammāti. Nāhaṁ evaṁ vadāmi, ekasmiṁ pana piṇḍapātikatthere gharadvāre ṭhite sasuro me appodakaṁ madhupāyāsaṁ paribhuñjanto taṁ na manasi karoti, ahaṁ "mayhaṁ sasuro imasmiṁ attabhāve puññaṁ na karoti, purāṇapuññameva khādatī"ti cintetvā "aticchatha bhante, mayhaṁ sasuro purāṇaṁ khādatī"ti avacaṁ, ettha me ko dosoti. Ayya idha doso natthi, amhākaṁ dhītā yuttaṁ katheti, tvaṁ kasmā kujjhasīti. Ayyā esa tāva

doso mā hotu, ayam pana ekadivasam majjhimayāme dāsīparivutā pacchāgeham agamāsīti. Evam kira ammāti. "Tātā nāham añnena kāraņena gatā, imasmim pana gehe ājāneyyavaļavāya vijātāya sañnampi akatvā nisīditum nāma ayuttan"ti daņḍadīpikā gāhāpetvā uņhodakādīnipi gāhāpetvā dāsīhi saddhim gantvā vaļavāya vijātaparihāram kārāpesim, ettha me ko dosoti. Ayya idha doso natthi, amhākam dhītā tava gehe dāsīhipi akattabbayuttakam kammam karoti, tvam kim ettha dosam passasīti.

Ayyā idhāpi tāva doso mā hotu, imissā pana pitā idhāgamanakāle imam ovadanto guyhe paṭicchanne dasa ovāde adāsi, tesam attham na jānāmi, tesam me attham kathetu. Imissā pana pitā "anto-aggi bahi na nīharitabbo" ti āha, sakkā nu kho amhehi ubhato paṭivissakagehānam aggim adatvā vasitunti. Evam kira ammāti. Tātā mayham pitā na etam sandhāya kathesi. Idam pana sandhāya kathesi—amma tava sassusasurasāmikānam aguņam disvā bahi tasmim tasmim gehe ṭhatvā mā kathesi. Evarūpo hi aggisadiso aggi nāma natthīti.

Ayyā etam tāva evam hotu, imissā pana pitā "bāhirato aggi na anto pavesetabbo"ti āha, kim sakkā amhehi anto aggimhi nibbute bāhirato aggim anāharitunti. Evam kira ammāti. Tātā mayham pitā na etam sandhāya kathesi, idam pana sandhāya kathesi—sace paṭivissakagehesu itthiyo vā puriso vā sassusasurasāmi kānam aguṇam kathenti, tehi kathitam āharitvā "asuko nāma tumhākam evanca evanca aguṇam kathetī"ti puna mā katheyyāsi. Etena hi agginā sadiso aggi nāma natthīti. Evam imasmimpi kāraṇe sā niddosāva ahosi. Yathā ca ettha. Evam sesesupi. Tesu pana ayamadhippāyo—yampi hi tassā pitarā "ye dadanti, tesamyeva dātabbanti vuttam. Tam "yācitakam upakaraṇam gahetvā ye paṭidenti, te sañneva dātabban"ti sandhāya vuttam.

"Ye na denti, tesam na dātabban"ti idampi ye yācitakam gahetvā na patidenti, tesam na dātabbanti sandhāya vuttam.

"Dadantassāpi adadantassāpi dātabban"ti idam pana daliddesu ñātimittesu sampattesu te paṭidātum sakkontu vā mā vā, tesam dātumeva vaṭṭatīti sandhāya vuttam.

"Sukham nisīditabban"ti idampi sassusasurasāmike disvā vutthātabbatthāne nisīditum na vattatīti sandhāya vuttam.

"Sukham bhuñjitabban"ti idam pana sassusasurasāmikehi puretaram abhuñjitvā te parivisitvā sabbehi laddhāladdham ñatvā pacchā sayam bhuñjitum vaṭṭatīti sandhāya vuttam.

"Sukham nipajjitabban"ti idampi sassusasurasāmikehi puretaram sayanam āruyha na nipajjitabbam, tesam kattabbayuttakam vattapaṭivattam katvā pacchā sayam nipajjitum yuttanti sandhāya vuttam.

"Aggi paricaritabbo"ti idam pana sassumpi sasurampi sāmikampi aggikkhandham viya uragarājānam viya ca katvā passitum vaṭṭatīti sandhāya vuttam.

"Antodevatā namassitabbā"ti idampi sassum ca sasuranca sāmikanca devatā viya katvā daṭṭhum vaṭṭatīti sandhāya vuttam. Evam seṭṭhi imesam dasa-ovādānam attham sutvā paṭivacanam apassanto adhomukho nisīdi.

Atha naṁ kuṭumbikā "kiṁ seṭṭhi aññopi amhākaṁ dhītu doso atthī"ti pucchiṁsu. Natthi ayyāti. "Atha kasmā naṁ niddosaṁ akāraṇena gehā nikkaḍḍhāpesī"ti evaṁ vutte Visākhā āha "tātā kiñcāpi mayhaṁ sasurassa vacanena paṭhamameva gamanaṁ na yuttaṁ, pitā pana me āgamanakāle mama dosasodhanatthāya maṁ tumhākaṁ hatthe ṭhapesi, tumhehi ca me niddosabhāvo ñāto, idāni ca mayhaṁ gantuṁ yuttan"ti dāsidāse "yānādīhi sajjāpethā"ti āṇāpesi. Atha naṁ seṭṭhi kuṭumbike gahetvā "amma mayā ajānitvāva kathitaṁ, khamāhi me"ti āha. Tāta tumhākaṁ khamitabbaṁ tāva khamāmi, ahaṁ pana Buddhasāsane aveccappasannassa kulassa dhītā, na mayaṁ vinā bhikkhusaṁghena vattāma, sace mama ruciyā bhikkhusaṁghaṁ paṭijaggituṁ labhāmi, vasissāmīti. "Amma tvaṁ yathāruciyā tava samaṇe paṭijaggā"ti āha.

Visākhā Dasabalam nimantāpetvā punadivase nivesanam pavesesi. Naggasamanāpi Satthu Migārasetthino geham gamanabhāvam sutvā gantvā geham parivāretvā nisīdimsu. Visākhā dakkhinodakam datvā "sabbo sakkāro patiyādito, sasuro me āgantvā Dasabalam parivisatū"ti sāsanam pesesi. Atha nam gantukāmam ājīvakā "mā kho tvam gahapati samanassa Gotamassa santikam gacchā"ti nivāresum. So "sunhā me sayameva parivisatū"ti sāsanam pahini. Sā Buddhappamukham bhikkhusamgham parivisitvā nitthite bhattakicce puna sāsanam pesesi "sasuro me āgantvā dhammakatham sunātū"ti. Atha nam "idāni agamanam nāma ativiya ayuttan"ti dhammam sotukāmatāya gacchantam puna te āhamsu "tena hi samanassa Gotamassa dhammam sunanto bahisaniya nisiditva sunahi"ti. Puretaramevassa gantvā sānim parikkhipimsu. So gantvā bahisāniyam nisīdi. Satthā "tvam bahisāniyam vā nisīda, parakutte vā parasele vā paracakkavāle vā pana nisīda, aham Buddho nāma sakkomi tam mama saddam sāvetun"ti mahājambum khandhe gahetvā cālento viya amatavassam vassento viya ca dhammam desetum anupubbim katham ārabhi.

Sammāsambuddhe ca pana dhammam desente purato thitāpi pacchato thitāpi cakkavāļasatam cakkavāļasahassam atikkamitvā thitāpi akaniṭṭhabhavane ṭhitāpi "Satthā mamaññeva oloketi, mayhameva dhammam desetī"ti vadanti. Satthā hi tam tam olokento viya tena tena saddhim sallapanto viya ca ahosi. Candasamā kira Buddhā. Yathā cando gaganamajjhe ṭhito¹ "mayham upari cando, mayham upari cando"ti sabbasattānam khāyati, evameva yattha katthaci ṭhitānam abhimukhe ṭhitā viya khāyanti. Idam kira tesam alankatasīsam chinditvā añjita-akkhīni uppāṭetvā hadayamamsam uppāṭetvā parassa dāsatthāya Jālisadise putte Kaṇhājināsadisā dhītaro Maddīsadisā pajāpatiyo pariccajitvā dinnadānassa phalam. Migāraseṭṭhipi kho Tathāgate dhammadesanam vinivattente bahisāṇiyam nisinnova sahassanayapaṭimaṇḍite sotāpattiphale patiṭṭhāya acalāya saddhāya samannāgato tīsu ratanesu² nikkaṅkho hutvā sāṇikaṇṇam ukkhipitvā āgantvā suṇhāya thanam mukhena gahetvā "tvam me ajjato paṭṭhāya

mātā"ti taṁ mātuṭṭhāne¹ ṭhapesi. Tato paṭṭhāya **Migāramātā** nāma jātā. Pacchābhāge puttaṁ labhitvāpi Migārotissa nāmamakāsi.

Mahāseṭṭhi suṇhāya thanaṁ vissajjetvā gantvā Bhagavato dvīsu pādesu sirasā nipatitvā pāde pāṇīhi ca parisambāhanto mukhena ca paricumbanto "Migāro ahaṁ bhante, Migāro ahaṁ bhante"ti tikkhattuṁ nāmaṁ sāvetvā "ahaṁ bhante ettakaṁ kālaṁ yattha nāma² dinnaṁ mahapphalanti na jānāmi, idāni ca me suṇisaṁ nissāya ñātaṁ, sabbā apāyadukkhā muttomhi, suṇisā me imaṁ gehaṁ āgacchantī mama atthāya hitāya sukhāya āgatā"ti vatvā imaṁ gāthamāha—

"Soham ajja pajānāmi, yattha dinnam mahapphalam. Atthāya vata me bhaddā, suņisā gharamāgatā"ti.

Visākhā punadivasatthāyapi Satthāram nimantesi. Athassā punadivasepi sassu sotāpattiphalam pattā. Tato patthāya tam geham sāsanassa vivatadvāram ahosi. Tato setthi cintesi "bahūpakārā me sunisā pasannākāramassā<sup>3</sup> karissāmi, etissā bhāriyam pasādhanam niccakālam pasādhetum na sakkā, sallahukamassā divā ca ratto ca sabba-irivāpathesu pasādhanayoggam pasādhanam kāressāmī"ti satasahassagghanakam ghanamatthakam nāma pasādhanam kāretvā tasmim nitthite Buddhappamukham bhikkhusamgham nimantetvā sakkaccam bhojetvā Visākham solasahi gandhodakaghatehi nhāpetvā Satthu sammukhe thapetvā pasādhetvā Satthāram vandāpesi. Satthā anumodanam katvā vihārameva gato. Visākhāpi tato patthāya dānādīni puññāni karontī Satthu santikā attha vare<sup>4</sup> labhitvā gaganatale candalekhā viya paññāyamānā puttadhītāhi vuddhim pāpuni. Tassā kira dasa puttā dasa dhītaro ahesum. Tesu ekekassa puttā dasa dasa dhītaro cāti evamassā puttanattapanattasantānavasena pavattāni vīsādhikāni cattāri satāni attha ca pāṇasahassāni ahesum. Tenāhu porāṇā—

<sup>1.</sup> Mātitthāne (Sī, Syā)

<sup>3.</sup> Paṇṇākāramassā (Syā)

<sup>2.</sup> Ettha nāma (Ka)

<sup>4.</sup> Vi 3. 406 pitthe.

"Visākhā vīsati puttā, nattā ca caturo satā. Panattā atthasahassā, jambudīpe supākatā"ti.

Āvu vīsavassasatam ahosi, sīse ekampi palitam nāma nāhosi, niccam solasavassuddesikā viya ahosi. Tam puttanattapanattaparivāram<sup>1</sup> vihāram gacchantim disvā "katamā ettha Visākhā"ti paripucchitāro honti. Ye nam gacchantim passanti, "idani thokam gacchatu, gacchamanava no ayya sobhatī"ti cintenti. Ye nam thitam nisinnam nipannam passanti, "idani thokam nipajjatu, nipannāva no ayyā sobhatī"ti cintenti. Iti sā catūsu iriyāpathesu asuka-iriyāpathena nāma na sobhatīti vattabbā na hoti. Pañcannam kho pana hatthīnam balam dhāreti. Rājā "Visākhā kira pañcannam hatthīnam balam dhāretī"ti sutvā tassā vihāram gantvā dhammam sutvā āgamanavelāya thāmam vīmamsitukāmo hatthim vissajjāpesi, so sondam ukkhipitvā Visākhābhimukho agamāsi. Tassā parivāritthiyo pañcasatā ekaccā palāyimsu, ekaccā na parissajjitvā "kim idan"ti vutte "rājā kira te ayye balam vīmamsitukāmo hatthim vissajjāpesī"ti vadimsu. Visākhā imam disvā "kim palāyitena, katham nu kho tam ganhissāmī"ti cintetvā "sace tam daļham ganhissāmi, vinasseyyā"ti dvīhi angulīhi sondāya gahetvā patipanāmesi. Hatthī attānam sandhāretvā thātum nāsakkhi, rājangaņe ukkuţiko hutvā patito. Mahājano sādhukāram adāsi. Sāpi saparivārā sotthinā geham agamāsi.

Tena kho pana samayena Sāvatthiyam Visākhā Migāramātā bahuputtā hoti bahunattā arogaputtā aroganattā abhimangalasammatā, tāvatakesu puttanattesu² ekopi antarā maraṇam patto nāma nāhosi. Sāvatthivāsino mangalesu chaṇesu Visākham paṭhamam nimantetvā bhojenti. Athekasmim ussavadigase mahājane maṇḍitapasādhite dhammassavanāya vihāram gacchante Visākhāpi nimantitaṭṭhāne bhuñjitvā mahālatāpasādhanam pasādhetvā mahājanena saddhim vihāram gantvā ābharaṇāni omuñcitvā uttarāsangena bhaṇḍikam bandhitvā dāsiyā adāsi. Yam sandhāya vuttam—

<sup>1.</sup> Puttanattaparivāram (Sī, Syā)

<sup>2.</sup> Puttanattasahassesu (Sī, Syā) Vi 1. 285 pitthe passitabbam.

"Tena kho pana samayena Sāvatthiyam ussavo hoti, manussā alankatapaṭiyattā ārāmam gacchanti, Visākhāpi Migāramātā alankatapaṭiyattā vihāram gacchati. Atha kho Visākhā Migāramātā ābharaṇāni omuñcitvā uttarāsangena bhaṇḍikam bandhitvā dāsiyā adāsi 'handa je imam bhaṇḍikam gaṇhāhī'ti".

Sā kira vihāram gacchantī cintesi "evarūpam mahaggham pasādhanam sīse paṭimukkam yāva pādapiṭṭhim alaṅkāram alaṅkaritvā vihāram pavisitum ayuttan"ti nam omuñcitvā bhaṇḍikam katvā attano puññeneva nibbattāya pañcahatthithāmadharāya dāsiyā hatthe adāsi. Sā eva kira tam gaṇhitum sakkoti. Tena nam āha "amma imam pasādhanam gaṇha, Satthusantikā nivattanakāle pasādhessāmi nan"ti. Tam pana datvā ghanamaṭṭhakam pasādhanam pasādhetvā Satthāram upasaṅkamitvā dhammam assosi, dhammassavanāvasāne Bhagavantam vanditvā uṭṭhāya pakkāmi. Sāpissā dāsī tam pasādhanam pamuṭṭhā. Dhammam sutvā pana pakkantāya parisāya sace kiñci pamuṭṭham hoti, tam Ānandatthero paṭisāmeti. Iti so tam divasam mahālatāpasādhanam disvā Satthu ārocesi. Bhante Visākhā pasādhanam pamussitvā gatāti. Ekamantam ṭhapehi Ānandāti. Thero tam ukkhipitvā sopānapasse laggetvā ṭhapesi.

Visākhāpi Suppiyāya saddhim "āgantukagamikagilānādīnam kattabbayuttakam jānissāmī"ti antovihāre vicari. Tā pana upāsikāyo anto—vihāre disvā sappimadhutelādīhi atthikā pakatiyāva daharā ca sāmaņerā ca thālakādīni gahetvā upasankamanti. Tasmimpi divase tatheva karimsu. Athekam gilānam bhikkhum disvā Suppiyā<sup>2</sup> "kenattho ayyassā"ti pucchitvā "paṭicchādanīyenā"ti vutte hotu ayya, pesessāmīti dutiyadivase kappiyamamsam alabhantī attano ūrumamsena kattabbakiccam katvā puna Satthari pasādena pākatikasarīrāva ahosi. Visākhāpi gilāne ca dahare ca sāmaņere ca oloketvā aññena dvārena nikkhamitvā vihārūpacāre ṭhitā "amma pasādhanam āhara pasādhessāmī"ti āha. Tasmim khaņe sā dāsī pamussitvā nikkhantabhāvam ñatvā "ayye pamuṭṭhāmhī"ti āha. Tena hi gantvā gaṇhitvā ehi, sace

pana mayham ayyena Ānandattherena ukkhipitvā aññasmim thāne thapitam hoti, mā āharevyāsi, ayvasseva tam mayā pariccattanti, jānāti kira sā "kulamanussānam pamutthabhandakam thero patisāmetī"ti. Tasmā evamāha. Theropi tam dāsim disvāva "kimattham āgatāsī"ti pucchitvā "ayyāya me pasādhanam pamussitvā āgatāmhī"ti vutte "etasmim me sopānapasse thapitam, gaccha nam ganhāhī"ti āha. Sā "ayya tumhākam hatthena āmatthabhandakam mayham ayyāya anāhāriyam katan"ti vatvā tucchahatthāva gantvā "kim ammā"ti Visākhāya putthā tamattham ārocesi. Amma nāham mama ayyena āmatthabhandam pilandhissāmi, pariccattam mayā. Ayyānam pana patijaggitum dukkham, tam vissajjetvā kappiyabhandam upanessāmi, gaccha, tam āharāhīti. Sā gantvā āhari. Visākhā tam apilandhitvāva kammāre pakkosāpetvā agghāpesi. Tehi "nava kotiyo agghati, hatthakārāpaniyam panassa satasahassan"ti vutte pasādhanam yāne thapāpetvā "tena hi tam vikkinathā" ti āha. Tattakam dhanam datvā ganhitum na koci sakkhissati. Tañhi pasādhanam pasādhetum anucchavikā itthiyo nāma dullabhā. Pathavimandalasmim hi tissova itthiyo mahālatāpasādhanam labhimsu Visākhā mahā-upāsikā, Bandhulamallasenāpatissa bhariyā Mallikā, Bārānasīsetthino dhītāti.

Tasmā Visākhā sayameva tassa mūlaṁ datvā satasahassādhikā nava koṭiyo sakaṭe āropetvā vihāraṁ netvā Satthāraṁ vanditvā "bhante mayhaṁ ayyena Ānandattherena mama pasādhanaṁ hatthena āmaṭṭhaṁ, tena āmaṭṭhakālato paṭṭhāya na sakkā taṁ mayā pilandhiṇi. Taṁ pana vissajjetvā kappiyaṁ upanessāmīti vikkiṇāpentī aññaṁ taṁ gaṇhituṁ samatthaṁ adisvā ahameva tassa mūlaṁ gāhāpetvā āgatā, catūsu paccayesu katarapaccayena upanessāmi bhante"ti. Pācīnadvāre saṁghassa vasanaṭṭhānaṁ kātuṁ te yuttaṁ Visākheti "yuttaṁ bhante"ti Visākhā tuṭṭhamānasā navakoṭīhi bhūmimeva gaṇhi. Aparāhi navakoṭīhi vihāraṁ kātuṁ ārabhi.

Athekadivasam Satthā paccūsasamaye lokam volokento devalokā cavitvā Bhaddiyanagare seṭṭhikule nibbattassa Bhaddiyassa nāma seṭṭhiputtassa upanissayasampattim disvā Anāthapiṇḍikassa gehe

bhattakiccam katvā uttaradvārābhimukho ahosi. Pakatiyā hi Satthā Visākhāya gehe bhikkham ganhitvā dakkhinadvārena nikkhamitvā Jetavane vasati. Anāthapindikassa gehe bhikkham gahetvā pācīnadvārena nikkhamitvā Pubbārāme vasati. Uttaradvāram sandhāya gacchantamyeva Bhagavantam disvā "cārikam pakkamissatī"ti jānanti. Visākhāpi tam divasam "Satthā uttaradvārābhimukho gato"ti sutvā vegena gantvā vanditvā āha "cārikam gantukāmattha bhante"ti. Āma Visākheti. Bhante ettakam dhanam pariccajitvā tumhākam vihāram kāremi, nivattatha bhanteti. Anivattagamanam idam Visākheti. Sā "addhā hetusampannam kañci passissati Bhagavā"ti cintetvā "tena hi bhante mayham katākatavijānanakam ekam bhikkhum nivattetvā gacchathā"ti āha. "Yam ruccasi, tassa pattam ganha Visākhe"ti āha. Sā kiñcāpi Ānandattheram piyāyati, "Mahāmoggallānatthero iddhimā, etam me nissāya kammam lahum nipphajjissatī"ti pana cintetvā therassa pattam ganhi. Thero Satthāram olokesi. Satthā "tava parivāre pañcasate bhikkhū gahetvā nivatta Moggallānā"ti āha. So tathā akāsi. Tassānubhāvena paññāsasatthiyojanānipi rukkhatthāya ca pāsānatthāya ca gatā manussā mahante mahante rukkhe ca pāsāne ca gahetvā tam divasameva āgacchanti, neva sakate rukkhapāsāne āropentā kilamanti, na akkho bhijjati. Na cirasseva dvebhūmikam pāsādam karimsu. Hetthābhūmiyam pañca gabbhasatāni, uparibhūmiyam pañca gabbhasatānīti gabbhasahassapatimaņdito pāsādo ahosi. Atthakarīse parisuddhe bhūmibhāge pāsādam kārāpesi, "suddhapāsādo pana na sobhatī"ti tam parivāretvā pañca padhānavettagehasatāni pañca cūlapāsādasatāni pañca dīghamālakasatāni kārāpesi.

Atha Satthā navahi māsehi cārikaṁ caritvā puna Sāvatthiṁ agamāsi. Visākhāyapi pāsāde kammaṁ navahi māsehi niṭṭhitaṁ. Pāsādakūṭaṁ ghanakoṭṭitarattasuvaṇṇeneva saṭṭhi-udakaghaṭagaṇhanakaṁ kārāpesi. "Satthā Jetavanavihāraṁ gacchatī"ti ca sutvā paccuggamanaṁ katvā Satthāraṁ attano vihāraṁ netvā paṭiññaṁ gaṇhi "bhante imaṁ catumāsaṁ bhikkhusaṁghaṁ gahetvā idheva vasatha, pāsādamahaṁ karissāmī"ti. Satthā adhivāsesi.

sā tato patthāya Buddhappamukhassa bhikkhusamghassa vihāre eva dānam deti. Athassā ekā sahāyikā satasahassagghanakam<sup>1</sup> ekam vattham ādāya āgantvā "sahāyike aham imam vattham tava pāsāde bhūmattharanasankhepena attharitukāmā, attharanatthānam me ācikkhathā"ti āha. "Sādhu sahāyike, sace tyāham 'okāso natthī'ti vakkhāmi, tvam 'me okāsam adātukāmā'ti maññissasi, sayameva pāsādassa dve bhūmiyo gabbhasahassañca oloketvā attharanatthānam jānāhī"ti āha. Sā satasahassagghanakam vattham gahetvā tattha tattha vicarantī tato appataramūlam vattham adisvā "nāham imasmim pāsāde puññabhāgam labhāmī"ti domanassappattā ekasmim thāne rodantī atthāsi. Atha nam Ānandatthero disvā "kasmā rodasī"ti pucchi. Sā tamattham ārocesi. Thero "mā cintayi, aham te attharanatthānam ācikkhissāmī"ti vatvā "sopānapādamūle pādadhovanatthāne<sup>2</sup> imam pādapunchanakam katvā attharāhi, bhikkhū pāde dhovitvā pathamam ettha pādam puñchitvā anto pavisissanti, evam te mahapphalam bhavissatī"ti āha. Visākhāya kiretam asallakkhitatthanam.

Visākhā cattāro māse antovihāre Buddhappamukhassa bhikkhusamghassa dānam adāsi, avasānadivase bhikkhusamghassa cīvarasāṭake adāsi. Samghanavakena laddhacīvarasāṭakā sahassagghanakā honti. Sabbesam pattāni pūretvā bhesajjam adāsi. Dānapariccāge nava koṭiyo agamamsu. Iti vihārassa bhūmiggahaṇe nava koṭiyo, vihārassa kārāpane nava, vihāramahe navāti sabbāpi sattavīsati koṭiyo sā Buddhasāsane pariccaji. Itthibhāve ṭhatvā micchādiṭṭhikassa gehe vasamānāya evarūpo mahāpariccāgo nāma aññissā natthi. Sā vihāramahassa niṭṭhitadivase vaḍḍhamānakacchāyāya puttanattapanattaparivutā "yam yam mayā pubbe patthitam, sabbameva matthakam pattan"ti pāsādam anupariyāyantī pañcahi gāthāhi madhurasaddena imam udānam udānesi—

"Kadāham pāsādam rammam<sup>3</sup>, sudhāmattikalepanam. Vihāradānam dassāmi, sankappo mayha pūrito.

<sup>1.</sup> Sahassagghanikam (Sī, Syā)

<sup>2.</sup> Sopānapādadhovanantare (Sī), sopāne (Syā)

<sup>3.</sup> Navapāsādam (Syā)

Kadāham mañcapīṭhañca, bhisibimbohanāni ca. Senāsanabhaṇḍam dassāmi, saṅkappo mayha pūrito.

Kadāham salākabhattam, sucim mamsūpasecanam. Bhojanadānam dassāmi, sankappo mayha pūrito.

Kadāham kāsikam vattham, khomakappāsikāni ca. Cīvaradānam dassāmi, sankappo mayha pūrito.

Kadāham sappinavanītam, madhutelanca phānitam. Bhesajjadānam dassāmi, sankappo mayha pūrito"ti.

Bhikkhū tassā saddam sutvā Satthu ārocayimsu "bhante amhehi ettake addhāne Visākhāya gāyanam nāma na diṭṭhapubbam, sā ajja puttanattapanattaparivutā gāyamānā pāsādam anupariyāyati, kim nu khvassā pittam vā kupitam, udāhu ummattikā jātā"ti. Satthā "na bhikkhave mayham dhītā gāyati, attano panassā ajjhāsayo paripuṇṇo, sā 'patthitapatthanā me matthakam pattā'ti tuṭṭhamānasā udānam udānentī vicaratī"ti vatvā kadā pana bhante tāya patthanā patthitāti. Suṇissatha bhikkhaveti. "Suṇissāma bhante'ti vutte atītam āhari—

Atīte bhikkhave ito kappasatasahassamatthake Padumuttaro nāma Buddho loke nibbatti. Tassa vassasatasahassam āyu ahosi, khīṇāsavānam satasahassaparivāro, nagaram Hamsavatī nāma, pitā Sunando nāma rājā, mātā Sujātā nāma devī, tassa agga-upaṭṭhāyikā ekā upāsikā aṭṭha vare yācitvā mātuṭṭhāne ṭhatvā Satthāram catūhi paccayehi paṭijaggantī sāyampātam upaṭṭhānam gacchati. Tassā ekā sahāyikā tāya saddhim vihāram nibaddham gacchati. Sā tassā Satthārā saddhim vissāsena kathanamca vallabhabhāvamca disvā "kim nu kho katvā evam Buddhānam vallabhā hotī'ti cintetvā Satthāram pucchi "bhante esā itthī tumhākam kim hotī'ti. Upaṭṭhāyikānam aggāti. Bhante kim katvā upaṭṭhāyikānam aggā hotīti. Kappasatasahassam patthanam patthetvāti. Idāni patthetvā laddhum sakkā bhanteti. Āma sakkāti. "Tena hi bhante bhikkhusatasahassena saddhim sattāham mayham bhikkham gaṇhathā'ti āha. Satthā adhivāsesi. Sā sattāham dānam datvā osānadivase cīvarasāṭake datvā

Satthāram vanditvā pādamūle nipajjitvā "bhante nāham imassa dānassa phalena devissariyādīnam aññataram patthemi, tumhādisassa panekassa Buddhassa santike aṭṭha vare labhitvā mātuṭṭhāne ṭhatvā catūhi paccayehi paṭijaggitum samatthānam aggā bhaveyyan"ti patthanam paṭṭhapesi. Satthā "samajjhissati nu kho imissā patthanā"ti anāgatam āvajjento kappasatasahassam oloketvā "kappasatasahassapariyosāne Gotamo nāma Buddho uppajjissati, tadā tvam Visākhā nāma upāsikā hutvā tassa santike aṭṭha vare labhitvā mātuṭṭhāne ṭhatvā catūhi paccayehi paṭijaggantīnam upaṭṭhāyikānam aggā bhavissasī"ti āha. Tassā sā sampatti sveva laddhabbā viya ahosi.

Sā yāvatāyukam puññam katvā tato cutā devaloke nibbattitvā devamanussesu samsarantī Kassapasammāsambuddhakāle Kikissa Kāsirañño sattannam dhītānam kaniṭṭhā Samghadāsī nāma hutvā parakulam agantvā tāhi jeṭṭhabhaginīhi saddhim dīgharattam dānādīni puññāni katvā Kassapasammāsambuddhassa pādamūlepi "anāgate tumhādisassa Buddhassa mātuṭṭhāne ṭhatvā catupaccayadāyikānam aggā bhaveyyan"ti patthanam akāsi. Sā tato paṭṭhāya pana devamanussesu samsarantī imasmim attabhāve Meṇḍakaseṭṭhiputtassa Dhanañcayaseṭṭhino dhītā hutvā nibbattā. Mayham sāsane bahūni puññāni akāsi. Iti kho bhikkhave "na mayham dhītā gāyati, patthitapatthanāya pana nipphattim disvā udānam udānetī"ti vatvā Satthā dhammam desento "bhikkhave yathā nāma cheko mālākāro nānāpupphānam mahantam rāsim katvā nānappakāre mālāguņe karoti, evameva Visākhāya nānappakārāni puññāni kātum cittam namatī"ti vatvā imam gāthamāha—

53. "Yathāpi puppharāsimhā, kayirā mālāguņe bahū. Evam jātena maccena, kattabbam kusalam bahun"ti.

Tattha **puppharāsimhā**ti nānappakārānam pupphānam rāsimhā. **Kayirā**ti kareyya. **Mālāguņebahū**ti ekato vaṇṭikamālādibhedā nānappakārā bālāvikatiyo. **Maccenā**ti maritabbasabhāvatāya "macco"ti laddhanāmena sattena cīvaradānādibhedam **bahum kusalam kattabbam**. Tattha puppharāsiggahaṇam bahupupphadassanattham. Sace hi appāni pupphāni honti, mālākāro ca

cheko neva bahu mālāguņe kātum sakkoti, acheko pana appesu bahūsupi<sup>1</sup> pupphesu na sakkotiyeva. Bahūsu pana pupphesu sati cheko mālākāro dakkho kusalo bahū mālāguņe karoti, evameva sace ekaccassa saddhā mandā hoti, bhogā ca bahū samvijjanti, neva sakkoti bahūni kusalāni kātum, mandāya ca pana saddhāya mandesu ca pana bhogesu na sakkoti. Uļārāya ca pana saddhāya mandesu ca bhogesu na sakkotiyeva. Uļārāya ca pana saddhāya uļāresu ca bhogesu sati sakkoti. Tathārūpā ca Visākhā upāsikā. Tam sandhāyetam vuttam "yathāpi -pa- kattabbam kusalam bahun"ti.

Desanāvasāne bahū sotāpannādayo ahesum, mahājanassa sātthikā dhammadesanā jātāti.

Visākhāvatthu aṭṭhamam.

## 9. Ānandattherapañhāvatthu

Na pupphagandho paṭivātametīti imaṁ dhammadesanaṁ Satthā Sāvatthiyaṁ viharanto Ānandattherassa pañhaṁ vissajjento kathesi.

Thero kira sāyanhasamaye paṭisallīno cintesi "Bhagavatā mūlagandho sāragandho pupphagandhoti tayo uttamagandhā vuttā, tesaṁ anuvātameva gandho gacchati, no paṭivātaṁ. Atthi nu kho taṁ gandhajātaṁ, yassa paṭivātampi gandho gacchatī"ti. Athassa etadahosi "kiṁ mayhaṁ attanā vinicchitena, Satthāraṁyeva pucchissāmī"ti. So Satthāraṁ upasaṅkamitvā pucchi. Tena vuttaṁ—

"Atha kho āyasmā Ānando (sāyanhasamaye paṭisallānā vuṭṭhito)² yena Bhagavā tenupasaṅkami, upasaṅkamitvā Bhagavantaṁ abhivādetvā ekamantaṁ nisīdi, ekamantaṁ nisinno kho āyasmā Ānando Bhagavantaṁ etadavoca—

Tīṇimāni bhante gandhajātāni, yesam anuvātameva gandho gacchati, no pativātam. Katamāni tīni, mūlagandho sāragandho

pupphagandho, imāni kho bhante tīṇi gandhajātāni. Yesaṁ anuvātameva gandho gacchati, no paṭivātaṁ. Atthi nu kho bhante kiñci gandhajātaṁ, yassa anuvātampi gandho gacchati, paṭivātampi gandho gacchatīti¹.

#### Athassa Bhagavā pañham vissajjento—

"Atthānanda kiñci gandhajātam, yassa anuvātampi gandho gacchati, paṭivātampi gandho gacchati, anuvātapaṭivātampi gandho gacchatīti. Katamam pana tam bhante gandhajātam, yassa anuvātampi gandho gacchati, paṭivātampi gandho gacchati, anuvātapaṭivātampi gandho gacchatīti.

Idhānanda yasmim gāme vā nigame vā itthī vā puriso vā Buddham saraṇam gato hoti, dhammam saraṇam gato hoti, samgham saraṇam gato hoti, pāṇātipātā paṭivirato hoti, adinnādānā paṭivirato hoti, kāmesumicchācārā paṭivirato hoti, musāvādā paṭivirato hoti, surāmerayamajjapamādaṭṭhānā paṭivirato hoti, sīlavā hoti kalyāṇadhammo, vigatamalamaccherena cetasā agāram ajjhāvasati muttacāgo payatapāṇi vossaggarato yācayogo dānasamvibhāgarato.

Tassa disāsu samaṇabrāhmaṇā vaṇṇaṁ bhāsanti 'amukasmiṁ nāma gāme vā nigame vā itthī vā puriso vā Buddhaṁ saraṇaṁ gato hoti, dhammaṁ saraṇaṁ gato hoti, saṁghaṁ saraṇaṁ gato hoti -pa-dānasaṁvibhāgarato'ti.

Devatāpissa vaṇṇaṁ bhāsanti "amukasmiṁ nāma gāme vā nigame vā itthī vā puriso vā Buddhaṁ saraṇaṁ gato hoti, dhammaṁ saraṇaṁ gato hoti, saṁghaṁ saraṇaṁ gato hoti -pa- dānasaṁvibhāgarato'ti. Idaṁ kho taṁ Ānanda gandhajātaṁ, yassa anuvātampi gandho gacchati, paṭivātampi gandho

gacchati, anuvātapaṭivātampi gandho gacchatī"ti vatvā imā gāthā abhāsi—

- 54. "Na pupphagandho paṭivātameti, Na candanaṁ tagaramallikā vā. Satañca gandho paṭivātameti, Sabbā disā sappuriso pavāyati.
- 55. Candanam tagaram vāpi, uppalam atha vassikī. Etesam gandhajātānam, sīlagandho anuttaro''ti.

Tattha na pupphagandhoti Tāvatimsabhavane pāricchattakarukkho āyāmato ca vitthārato ca yojanasatiko, tassa pupphānam ābhā paññāsa yojanāni gacchati, gandho yojanasatam, sopi anuvātameva gacchati, paṭivātam pana aṭṭhaṅgulamattampi¹ gantumna sakkoti, evarūpopi na pupphagandho paṭivātameti. Candananti candanagandho. Tagaramallikā vāti imesampi gandho eva adhippeto. Sāragandhānam aggassa hi lohitacandanassāpi tagarassapi Mallikāyapi anuvātameva vāyati², no paṭivātam. Satañca gandhoti. Sappurisānam pana Buddhapaccekabuddhasāvakānam sīlagandho paṭivātameti. Kim kāraṇā? Sabbā disā sappuriso pavāyati yasmā pana sappuriso sīlagandhena sabbāpi disā ajjhottharitvāva gacchati, tasmā "tassa gandho na paṭivātametī"ti na vattabbo³. Tena vuttam "paṭivātametī"ti. Vassikīti jātisumanā. Etesanti imesam candanādīnam gandhajātānam gandhato sīlavantānam sappurisānam sīlagandhova anuttaro asadiso appaṭibhāgoti.

Desanāvasāne bahū sotāpattiphalādīni pattā, desanā mahājanassa sātthikā jātāti.

# $\bar{A}$ nandattherapañh $\bar{a}$ vatthu navama $\dot{m}$ .

<sup>1.</sup> Addhangulamattampi (Syā)

<sup>3.</sup> Gandho pativātametīti vattabbo (Sī, Syā)

<sup>2.</sup> Yāti (Sī, Syā)

### 10. Mahākassapattherapindapātadinnavatthu

**Appamatto ayaṁ gandho**ti imaṁ dhammadesanaṁ Satthā Veluvane viharanto Mahākassapattherassa pindapātadānaṁ ārabbha kathesi.

Ekasmim hi divase thero sattāhaccayena nirodhā vutthāya "Rājagahe sapadānam pindāya carissāmī"ti nikkhami. Tasmim pana samaye Sakkassa devarañño paricārikā kakutapādiniyo pañcasatā accharāyo "therassa pindapātam dassāmā"ti ussāhajātā pañca pindapātasatāni sajjetvā ādāya antarāmagge thatvā "bhante imam pindapātam ganhatha, sangaham no karothā"ti vadimsu. Gacchatha tumhe, aham duggatānam sangaham karissāmīti. Bhante mā no nāsetha, sangaham no karothāti. Thero ñatvā puna patikkhipitvā punapi apagantum anicchamānā yācantiyo "attano pamānam na jānātha, apagacchathā"ti accharam pahari. Tā therassa accharasaddam sutvā santhambhitvā sammukhā thātum asakkontiyo palāyitvā devalokameva gantvā Sakkena "kaham gatātthā" ti putthā "samāpattito vutthitassa therassa pindapātam dassāmā"ti gatāmhā devāti. Dinno pana voti. Ganhitum na icchatīti. Kim kathesīti. "Duggatānam sangaham karissāmī"ti āha devāti. Tumhe kenākārena gatāti. Imināva devāti. Sakko "tumhādisiyo therassa pindapātam kim dassantī"ti sayam dātukāmo hutvā jarājinno mahallako khandadanto palitakeso obhaggasarīro mahallakatantavāyo hutvā sujampi devadhītaram tathārūpameva mahallikam katvā ekam pesakāravīthim māpetvā tantam pasārento acchi.

Theropi "duggatānam saṅgaham karissāmī"ti nagarābhimukho gacchanto bahinagare eva taṁ vīthiṁ disvā olokento dve jane addasa. Tasmiṁ khaṇe Sakko tantaṁ pasāreti, Sujā tasaraṁ vaṭṭeti. Thero cintesi "ime mahallakakālepi kammaṁ karontiyeva, imasmiṁ nagare imehi duggatatarā natthi maññe, imehi dinnaṁ uļuṅkamattampi sākamattampi gahetvā imesaṁ saṅgahaṁ karissāmī"ti. So tesaṁ gehābhimukho ahosi. Sakko taṁ āgacchantaṁ disvā Sujaṁ āha "bhadde mayhaṁ ayyo ito āgacchati, tvaṁ apassantī viya tuṇhī hutvā nisīda, khaṇena theraṁ vañcetvā piṇḍapātaṁ dassāmā"ti. Thero āgantvā

gehadvāre aṭṭhāsi. Tepi apassantā viya attano kammameva karontā thokamāgamimsu.

Atha Sakko "gehadvāre eko thero viya ṭhito, upadhārehi tāvā"ti āha. Gantvā upadhāretha sāmīti. So gehā nikkhamitvā theram pañcapatiṭṭhitena vanditvā ubhohi hatthehi jaṇṇukāni olambitvā nitthunanto uṭṭhāya "kataro thero nu kho ayyo"ti thokam osakkitvā "akkhīni me dhūmāyantī"ti vatvā nalāṭe hattham ṭhapetvā uddham oloketvā "aho dukkham, ayyo no Mahākassapatthero cirassam me kuṭidvāram āgato, atthi nu kho kiñci gehe"ti āha. Sujā thokam ākulam viya hutvā "atthi sāmī"ti paṭivacanam adāsi. Sakko "bhante lūkham vā paṇītam vāti acintetvā saṅgaham no karothā"ti pattam gaṇhi. Thero "etehi dinnam sākam vā hotu kuṇḍakamuṭṭhi vā, saṅgaham nesam karissāmī"ti pattam adāsi. So antogharam pavisitvā ghaṭi-odanam nāma ghaṭiyā¹ uddharitvā pattam pūretvā therassa hattheṭhapesi. So ahosi piṇḍapāto anekasūpabyañjano, sakalam Rājagahanagaram gandhena ajjhotthari.

Tadā thero cintesi "ayam puriso appesakkho, piṇḍapāto mahesakkho, Sakkassa bhojanasadiso, ko nu kho eso"ti. Atha nam "Sakko"ti ñatvā āha "bhāriyam te kammam katam duggatānam sampattim vilumpantena, ajja mayham dānam datvā kocideva duggato senāpatiṭṭhānam vā seṭṭhiṭṭhānam vā labheyyā"ti. Mayā duggatataro natthi bhanteti. Kim kāraṇā tvam duggato devaloke rajjasirim anubhavantoti. Bhante evam nāmetam, mayā pana anuppanne Buddhe kalyāṇakammam katam, Buddhuppāde vattamāne kalyāṇakammam katvā Cūļarathadevaputto Mahārathadevaputto Anekavaṇṇadevaputtoti ime tayo samānadevaputtā mama āsannaṭṭhāne nibbattā, mayā tejavantatarā. Ahañhi tesu devaputtesu "nakkhattam kīļissāmā"ti paricārikāyo gahetvā antaravīthim otiṇṇesu palāyitvā geham pavisāmi. Tesañhi sarīrato tejo mama sarīram ottharati, mama sarīrato tejo tesam sarīram na ottharati, ko mayā duggatataro bhanteti. Evam santepi ito

paṭṭhāya mayhaṁ mā evaṁ vañcetvā dānamadāsīti. Vañcetvā tumhākaṁ dāne dinne mayhaṁ kusalaṁ atthi, na atthīti. Atthāvusoti. Evaṁ sante kusalakammakaraṇaṁ nāma mayhaṁ bhāro bhanteti. So evaṁ vatvā theraṁ vanditvā Sujaṁ gahetvā theraṁ padakkhiṇaṁ katvā vehāsaṁ abbhuggantvā "aho dānaṁ paramadānaṁ Kassape suppatiṭṭhitan"ti udānaṁ udānesi. Tena vuttaṁ—

Ekam samayam Bhagavā Rājagahe viharati Veļuvane Kalandakanivāpe. Tena kho pana samayena āyasmā Mahākassapo Pippaliguhāyam viharati, sattāham ekapallamkena nisinno hoti amātaram samādhim samāpajjitvā. Atha kho āyasmā Mahākassapo tassa sattāhassa accayena tamhā samādhimhā vuṭṭhāsi. Atha kho āyasmato Mahākassapassa tamhā samādhimhā vuṭṭhitassa etadahosi "yamnūnāham Rājagaham pindāya paviseyyan"ti.

Tena kho pana samayena pañcamattāni devatāsatāni ussukkam āpannāni honti āyasmato Mahākassapassa piņḍapātapaṭilābhāya. Atha kho āyasmā Mahākassapo tāni pañcamattāni devatāsatāni paṭikkhipitvā pubbaṇhasamayam nivāsetvā pattacīvaramādāya Rājagaham piṇḍāya pāvisi.

Tena kho pana samayena Sakko Devānamindo āyasmato Mahākassapassa piṇḍapātaṁ dātukāmo hoti. Pesakāravaṇṇaṁ abhinimminitvā tantaṁ vināti, Sujā asurakaññā tasaraṁ pūreti. Atha kho āyasmā Mahākassapo Rājagahe sapadānaṁ piṇḍāya caramāno yena Sakkassa Devānamindassa nivesanaṁ tenupasaṅkami, addasā kho Sakko Devānamindo āyasmantaṁ Mahākassapaṁ dūratova āgacchantaṁ, disvā gharā nikkhamitvā paccuggantvā hatthato pattaṁ gahetvā gharaṁ pavisitvā ghaṭiyā odanaṁ uddharitvā pattaṁ pūretvā āyasmato Mahākassapassa adāsi. So ahosi piṇḍapāto anekasūpo anekabyañjano anekarasabyañjano. Atha kho

āyasmato Mahākassapassa etadahosi "ko nu kho ayam satto, yassāyam evarūpo iddhānubhāvo"ti. Atha kho āyasmato Mahākassapassa etadahosi "Sakko kho ayam Devānamindo"ti viditvā Sakkam Devānamindam etadavoca "katam kho te idam kosiya, mā punapi evarūpamakāsī"ti. Amhākampi bhante Kassapa puñnena attho, amhākampi puñnena karanīyanti.

Atha kho Sakko Devānamindo āyasmantam Mahākassapam abhivādetvā padakkhiṇam katvā vehāsam abbhuggantvā ākāse antalikkhe tikkhattum udānam udānesi "aho dānam paramadānam Kassape suppatiṭṭhitam, aho dānam paramadānam Kassape suppatiṭṭhitam, aho dānam paramadānam Kassape suppatiṭṭhitam,"ti¹.

Atha kho Bhagavā vihāre ṭhito eva tassa taṁ saddaṁ sutvā bhikkhū āmantetvā "passatha bhikkhave Sakkaṁ Devānamindaṁ udānaṁ udānetvā ākāsena gacchantan"ti āha. Kiṁ pana tena kataṁ bhanteti. Vañcetvā tena mayhaṁ puttassa Kassapassa piṇḍapāto dinno, taṁ datvā tuṭṭhamānaso udānaṁ udānento gacchatīti. "Therassa piṇḍapātaṁ dātuṁ vaṭṭatī"ti kathaṁ bhante tena ñātanti. Bhikkhave mama puttena sadisaṁ nāma piṇḍapātikaṁ devāpi manussāpi pihayantīti vatvā sayampi udānaṁ udānesi. Sutte pana ettakameva āgataṁ—

Assosi kho Bhagavā dibbāya sotadhātuyā visuddhāya atikkantamānusikāya Sakkassa Devānamindassa vehāsam abbhuggantvā ākāse antalikkhe tikkhattum udānam udānentassa "aho dānam paramadānam Kassape suppatiṭṭhitam, aho dānam paramadānam Kassape suppatiṭṭhitam, aho dānam paramadānam Kassape suppatiṭṭhitam, aho dānam paramadānam Kassape suppatiṭṭhitam,"ti¹.

Atha kho Bhagavā etamattham viditvā tāyam velāyam imam udānam udānesi—

"Piṇḍapātikassa bhikkhuno, Attabharassa anaññaposino. Devā pihayanti tādino, Upasantassa sadā satīmato"ti<sup>1</sup>.

Imañca pana udānam udānetvā "bhikkhave Sakko Devānamindo mama puttassa sīlagandhena āgantvā piṇḍapātam adāsī"ti vatvā imam gāthamāha—

56. "Appamatto ayam gandho, yvāyam tagaracandanam². Yo ca sīlavatam gandho, vāti devesu uttamo"ti.

Tattha **appamatto**ti parittappamāṇo<sup>3</sup>. **Yo ca sīlavata**Bti yo pana sīlavantānam sīlagandho, so tagaram viya lohitacandanam<sup>4</sup> viya ca parittako na hoti, ativiya uļāro vipphārito. Teneva kāraṇena **vāti devesu uttamo**ti pavaro seṭṭho hutvā devesu ca manussesu ca sabbatthameva vāyati, ottharanto gacchatīti.

Desanāvasāne bahū sotāpattiphalādīni pattā, desanā mahājanassa sātthikā jātāti.

Mahākassapattherapiņḍapātadinnavatthu dasamam.

## 11. Godhikattheraparinibbanavatthu

**Tesaṁ sampannasīlānan**ti imaṁ dhammadesanaṁ Satthā Rājagahaṁ upanissāya Veļuvane viharanto Godhikattherassa parinibbānaṁ ārabbha kathesi.

So hi āyasmā Isigilipasse Kāļasilāyam viharanto appamatto ātāpī pahitatto sāmāyikam cetovimuttim phusitvā ekassa anussāyikassa rogassa vasena tato parihāyi. So dutiyampi tatiyampi chakkhattum jhānam nibbattetvā parihīno, sattame vāre uppādetvā cintesi "aham chakkhattum jhānā parihīno, parihīnajjhānassa

<sup>1.</sup> Khu 1. 111 pitthe.

<sup>3.</sup> Parittaparimāņo (Sī)

<sup>2.</sup> Yāyam tagaracandanī (Sī)

<sup>4.</sup> Tagare viya lohitacandane (Sī, Syā)

kho pana aniyatā gati, idāneva satthaṁ āharissāmī"ti kesoropanasatthakaṁ gahetvā galanāliṁ chindituṁ mañcake nipajji. Māro tassa cittaṁ ñatvā "ayaṁ bhikkhu satthaṁ āharitukāmo, satthaṁ āharantā kho pana jīvite nirapekkhā honti, te vipassanaṁ paṭṭhapetvā arahattampi pāpuṇanti, sacāhaṁ etaṁ vāressāmi, na me vacanaṁ karissati, Satthāraṁ vārāpessāmī"ti aññātakavesena Satthāraṁ upasaṅkamitvā evamāha—

"Mahāvīra mahāpañña, iddhiyā yasasā jala. Sabbaverabhayātīta, pāde vandāmi cakkhuma.

Sāvako te mahāvīra, maraṇaṁ maraṇābhibhū. Ākaṅkhati cetayati, taṁ nisedha jutindhara.

Katham hi Bhagavā tuyham, sāvako sāsane rato. Appattamānaso sekkho, kālam kayirā jane sutā"ti¹.

Tasmim khane therena sattham āharitam hoti. Satthā "māro ayan"ti viditvā imam gāthamāha—

"Evam hi dhīrā kubbanti, nāvakankhanti jīvitam. Samūlam tanhamabbuyha, godhiko parinibbuto"ti<sup>1</sup>.

Atha kho Bhagavā sambahulehi bhikkhūhi saddhim therassa sattham āharitvā nipannaṭṭhānam agamāsi. Tasmim khaṇe māro pāpimā "kattha nu kho imassa paṭisandhiviññāṇam patiṭṭhitan"ti dhūmarāsi viya timirapuñjo viya ca hutvā sabbadisāsu therassa viññāṇam samanvesati. Bhagavā tam dhūmatimirabhāvam bhikkhūnam dassetvā "eso kho bhikkhave māro pāpimā Godhikassa kulaputtassa viññāṇam samanvesati 'kattha Godhikassa kulaputtassa viññāṇam patiṭṭhitan'ti. Apatiṭṭhitena ca bhikkhave viññāṇena Godhiko kulaputto parinibbuto"ti āha. Māropi tassa viññāṇaṭṭhānam daṭṭhum asakkonto kumārakavaṇṇo hutvā beluvapaṇḍuvīṇam ādāya Satthāram upasaṅkamitvā pucchi—

"Uddham adho ca tiriyam, disā anudisā svaham. Anvesam nādhigacchāmi, Godhiko so kuhim gato"ti<sup>1</sup>.

Atha nam Satthā āha-

"Yo dhīro dhitisampanno, jhāyī jhānarato sadā. Ahorattam anuyunjam, jīvitam anikāmayam.

Jetvāna maccuno senam, anāgantvā punabbhavam. Samūlam tanhamabbuyha, Godhiko parinibbuto"ti<sup>1</sup>.

Evam vutte māro pāpimā Bhagavantam gāthāya ajjhabhāsi—

"Tassa sokaparetassa, vīṇā kacchā abhassatha.

Tato so dummano yakkho, tatthevantaradhāyathā"ti<sup>1</sup>.

Satthāpi "kim te pāpima Godhikassa kulaputtassa nibbattaṭṭhānena. Tassa hi nibbattaṭṭhānam² tumhādisānam satampi sahassampi daṭṭhum na Sakkotī"ti vatvā imam gāthamāha—

57. "Tesaṁ sampannasīlānaṁ, appamādavihārinaṁ. Sammadaññā vimuttānaṁ, māro maggaṁ na vindatī"ti.

Tattha tesanti yathā appatiṭṭhitena viññāṇena Godhiko kulaputto parinibbuto, ye ca evaṁ parinibbāyanti, tesaṁ. Sampannasīlānanti paripuṇṇasīlānaṁ. Appamādavihārinanti sati-avippavāsasaṅkhātena appamādena viharantānaṁ. Sammadaññā vimuttānanti hetunā ñāyena kāraṇena jānitvā "tadaṅgavimuttiyā vikkhambhanavimuttiyā samucchedavimuttiyā paṭippassaddhivimuttiyā nissaraṇavimuttiyā"ti imāhi pañcahi vimuttīhi vimuttānaṁ. Māro maggaṁ na vindatīti evarūpānaṁ mahākhīṇāsavānaṁ sabbathāmena maggantopi māro gatamaggaṁ na vindati na labhati na passatīti.

Desanāvasāne bahū sotāpattiphalādīni pattā, desanā mahājanassa sātthikā jātāti.

Godhikattheraparinibbānavatthu ekādasamam.

#### 12. Garahadinnavatthu

**Yathā saṅkāraṭṭhānasmin**ti imaṁ dhammadesanaṁ Satthā Jetavane viharanto Garahadinnaṁ nāma Nigaṇṭhasāvakaṁ ārabbha kathesi.

Sāvatthiyañhi Sirigutto ca Garahadinno cāti dve sahāyakā ahesum. Tesu Sirigutto upāsako Buddhasāvako, Garahadinno Niganthasāvako. Tam Niganthā abhikkhanam evam vadanti "tava sahāyakam Siriguttam 'kim tvam samanam Gotamam upasankamasi, tassa santike kim labhissasī'ti vatvā yathā amhe upasankamitvā amhākanca deyyadhammam dassati, kim evam ovaditum na vattatī"ti. Garahadinno tesam vacanam sutvā abhikkhanam gantvā thitanisinnatthānādīsu Siriguttam evam ovadati "samma kim te samanena Gotamena, tam upasankamitvā kim labhissasi, kim te mama ayye upasankamitvā tesam dānam dātum na vattatī"ti. Sirigutto tassa katham sutvāpi bahū divase tunhī hutvā nibbijjitvā ekadivasam "samma tvam abhikkhanam agantva mam thitatthanadīsu evam vadesi "samanam Gotamam upasankamityā kim labhissasi, mama ayye upasankamitvā tesam dānam dehī'ti, kathehi tāva me, tava ayyā kim jānantī"ti. Aho sāmi mā evam vada, mama ayvānam aññātam nāma natthi, sabbam atītānāgatapaccuppannam sabbam kāyavacīmanokammam "idam bhavissati, idam na bhavissatī''ti sabbam bhabbābhabbam jānantīti. Evam vadesīti. Āma vademīti. Yadi evam, atibhāriyam te katam, ettakam kālam mayham etamattham anācikkhantena, ajja mayā ayyānam ñānānubhāvo ñato, gaccha samma, ayye mama vacanena nimantehīti. So Niganthānam santikam gantvā te vanditvā "mayham sahāyako Sirigutto svātanāya tumhe nimantetī"ti āha. Siriguttena sāmam tvam vuttoti. Āma ayyāti. Te hatthatutthā hutvā "nipphannam no kiccam, Siriguttassa amhesu pasannakālato patthāya kā nāma sampatti amhākam na bhavissatī"ti vadimsu.

Siriguttassāpi mahantam nivesanam. So tasmim dvinnam gehānam antare ubhato dīgham āvāṭam khaṇāpetvā gūthakalalassa pūrāpesi. Bahiāvāṭe dvīsu pariyantesu khāṇuke koṭṭāpetvā tesu rajjuyo bandhāpetvā āsanānam purimapāde āvāṭassa purimapasse ṭhapāpetvā pacchimapāde rajjukesu ṭhapāpesi. Evam nisinnakāle evam avamsirā

patissantī"ti maññamāno yathā āvāṭo na paññāyati, evam āsanānam upari paccattharaṇāni dāpesi. Mahantā mahantā cāṭiyo ṭhapāpetvā kadalipaṇṇehi ca setapilotikāhi ca mukhāni bandhāpetvā tā tucchā eva gehassa pacchimabhāge bahi

yāgubhattasitthasappitelamadhuphāṇitapūvacuṇṇamakkhitā katvā ṭhapāpesi. Garahadinno pātova tassa gharam vegena gantvā "ayyānam sakkāro sajjito"ti pucchi. Āma samma sajjitoti. Kaham pana esoti. Etāsu ettikāsu cāṭīsu yāgu, ettikāsu bhattam, ettikāsu sappiphāṇitapūvādīni pūritāni, āsanāni paññattānīti. So "sādhū"ti vatvā gato. Tassa gatakāle pañcasatā Nigaṇṭhā āgamimsu. Sirigutto gehā nikkhamitvā pañcapatiṭṭhitena Nigaṇṭhe vanditvā tesam purato añjalim paggayha ṭhito evam cintesi "tumhe kira atītādibhedam sabbam jānātha, evam tumhākam upaṭṭhākena mayham kathitam. Sace sabbam tumhe jānātha, mayham geham mā pavisittha. Mama geham paviṭṭhānam hi vo neva yāgu atthi, na bhattādīni. Sace ajānitvā pavisissatha, gūtha-āvāṭe vo pātetvā pothessāmī"ti evam cintetvā purisānam sañām adāsi. Evam tesam nisīdanabhāvam ñatvā pacchimapasse ṭhatvā āsanānam upari paccattharaṇāni apaneyyātha, mā tāni asucinā makkhayimsūti.

Atha Nigaṇṭhe "ito etha bhante"ti āha. Nigaṇṭhā pavisitvā paññattāsanesu nisīdituṁ ārabhiṁsu. Atha ne manussā vadiṁsu "āgametha bhante, mā tāva nisīdathā"ti. Kiṁ kāraṇāti. Amhākaṁ gehaṁ paviṭṭhānaṁ ayyānaṁ vattaṁ ñatvā nisīdituṁ vaṭṭatīti. Kiṁ kātuṁ vaṭṭatī āvusoti. Attano attano pattāsanamūlesu ṭhatvā sabbepi ekappahāreneva nisīdituṁ vaṭṭatīti. Idaṁ kirassa adhippāyo¹—ekasmiṁ āvāṭe patite "mā āvuso avasesā āsane nisīdantū"ti vattuṁ mā labhatūti². Te "sādhū"ti vatvā "imehi kathitakathaṁ amhehi kātuṁ vaṭṭatī"ti cintayiṁsu. Atha sabbe attano attano pattāsanamūle paṭipāṭiyā aṭṭhaṁsu. Atha ne "bhante khippaṁ ekappahāreneva nisīdathā"ti vatvā tesaṁ nisinnabhāvaṁ ñatvā āsanānaṁ upari paccattharaṇāni nīhariṁsu. Nigaṇṭhā ekappahāreneva nisinnā, rajjūnaṁ upari ṭhapitā āsanapādā bhaṭṭhā, nigaṇṭhā avaṁsirā āvāṭe patiṁsu. Sirigutto tesu patitesu dvāraṁ

pidahitvā te uttiņņuttiņņe "atītānāgatapaccuppannam kasmā na jānāthā"ti daņḍehi pothetvā "ettakam etesam vaṭṭissatī"ti dvāram vivarāpesi. Te nikkhamitvā palāyitum ārabhimsu. Gamanamagge pana tesam sudhāparikammakatam bhūmim picchilam kārāpesi. Te tattha asaṇṭhahitvā patite patite puna pothāpetvā "alam ettakam tumhākan"ti uyyojesi. Te "nāsitamhā tayā, nāsitamhā tayā"ti kandantā upaṭṭhākassa gehadvāram agamamsu.

Garahadinno tam vippakāram disvā kuddho "nāsitamhi Siriguttena, hattham pasāretvā vandantānam sadevake loke yathāruciyā dātum samatthe nāma puññakkhettabhūte mama ayye pothāpetvā byasanam pāpesī"ti rājakulam gantvā tassa kahāpaṇasahassam daṇḍam kāresi. Athassa rājā sāsanam pesesi. So gantvā rājānam vanditvā "deva upaparikkhitvā daṇḍam gaṇhatha, mā anupaparikkhitvā"ti āha. Upaparikkhitvā gaṇhissāmīti. Sādhu devāti. Tena hi gaṇhāhīti. Deva mayham sahāyako Nigaṇṭhasāvako mam upasaṅkamitvā ṭhitanisinnaṭṭhānādīsu abhiṇham evam vadesi "samma kim te samaṇena Gotamena, tam upasaṅkamitvā kim labhissasī"ti idam ādim katvā Sirigutto sabbam tam pavattim ārocetvā deva sace imasmim kāraṇe daṇḍam gahetum yuttam, gaṇhathāti. Rājā Garahadinnam oloketvā "saccam kira te evam vuttan"ti āha. Saccam devāti. Tvam ettakampi ajānante Satthāroti gahetvā vicaranto "sabbam jānantī"ti kim kāraṇā Tathāgatasāvakassa kathesi. "Tayā āropitadaṇḍo tuyhameva hotū"ti evam sveva daṇḍam pāpito¹, tasseva kulūpakā pothetvā nīhatā.

So taṁ kujjhitvā tato paṭṭhāya aḍḍhamāsamattampi Siriguttena saddhiṁ akathetvā cintesi "evaṁ vicarituṁ mayhaṁ ayuttaṁ, etassa kulūpakānampi mayā byasanaṁ kātuṁ vaṭṭatī"ti Siriguttaṁ upasaṅkamitvā āha "sahāya Siriguttā"ti. Kiṁ sammāti. Ñātisuhajjānaṁ nāma kalahopi hoti vivādopi, kiṁ tvaṁ kiñci na kathesi, kasmā evaṁ karosīti. Samma tava mayā saddhiṁ akathanato na kathemīti. Yaṁ samma kataṁ, katameva taṁ na mayaṁ mettiṁ bhindissāmāti. Tato patthāya ubhopi ekatthāne titthanti

nisīdanti. Athekadivasam Sirigutto Garahadinnam āha "kim te Nigaņṭhehi, te upasankamitvā kim labhissasi, mama Satthāram upasankamitum vā ayyānam dānam dātum vā kim te na vaṭṭatī"ti. Sopi etameva paccāsīsati, tenassa kaṇḍuvanaṭṭhāne nakhena vilekhitam viya ahosi. So "Sirigutta tava Satthā kim jānātī"ti pucchi. Ambho mā evam vada, Satthu me ajānitabbam nāma natthi, atītādibhedam sabbam jānāti, soļasahākārehi sattānam cittam paricchindatīti. Aham evam na jānāmi, kasmā mayham ettakam kālam na kathesi, tena hi tvam gaccha, tava Satthāram svātanāya nimantehi, bhojessāmi, pañcahi bhikkhusatehi saddhim mama bhikkham gaṇhitum vadehīti.

Sirigutto Satthāram upasankamitvā vanditvā evamāha "bhante mama sahāyako Garahadinno tumhe nimantāpeti, pañcahi kira bhikkhusatehi saddhim sve tassa bhikkham ganhatha, purimadiyase kho pana tassa kulūpakānam mayā idam nāma katam, mayā katassa paţikaraṇampi na jānāmi, tumhākam suddhacittena bhikkham dātukāmatampi na jānāmi, āvajjetvā yuttam ce, adhivāsetha. No ce, mā adhivāsayitthā"ti. Satthā "kim nu kho so amhākam kātukāmo"ti āvaijetvā addasa "dvinnam gehānam antare mahantam āvātam khanāpetvā asītisakatamattāni khadiradārūni āharāpetvā pūrāpetvā aggim datvā amhe angāra-āvāte pātetvā nigganhitukāmo"ti. Puna āvajjesi "kim nu kho tattha gatapaccayā attho atthi, natthī"ti. Tato idam addasa—aham angāra-āvāte pādam pasāressāmi, tam paticchādetvā thapitakilañjam antaradhāyissati, angārakāsum bhinditvā cakkamattam mahāpadumam utthahissati, athāham padumakannikā akkamanto āsane nisīdissāmi, pañcasatā bhikkhūpi tatheva gantvā nisīdissanti, mahājano sannipatissati, aham tasmim samāgame dvīhi gāthāhi anumodanam karissāmi, anumodanapariyosāne caturāsītiyā pānasahassānam dhammābhisamayo bhavissati, Sirigutto ca Garahadinno ca sotāpannā bhavissanti, attano ca dhanarāsim sāsane vikirissanti, imam kulaputtam nissāya mayā gantum vattatīti bhikkham adhivāsesi.

Sirigutto gantvā Satthu adhivāsanam Garahadinnassa ārocetvā "Lokajetthassa sakkāram karohī"ti āha. Garahadinno

"Idānissa kattabbayuttakam jānissāmī"ti dvinnam gehānam antare mahantam āvātam khanāpetvā asītisakatamattāni khadiradārūni āharāpetvā pūrāpetvā aggim datvā khadirangārarāsīnam yojāpetvā sabbarattim dhamāpetvā khadirangārarāsim kārāpetvā āvātamatthake rukkhapadarāni thapāpetvā kilañjena paticchādetvā gomayena limpāpetvā ekena passena dubbaladandake attharitvā gamanamaggam kāresi, "evam akkantaakkantakāle dandakesu bhaggesu parivattetvā angārakāsuyam patissantī''ti maññamāno gehapacchābhāge Siriguttena thapitaniyāmeneva cātiyo thapāpesi, āsanānipi tatheva paññāpesi. Sirigutto pātova tassa geham gantvā "kato te samma sakkāro"ti āha. Āma sammāti, Kaham pana soti, "Ehi, passāmā"ti sabbam Siriguttena dassitanaveneva dassesi. Sirigutto "sādhu sammā"ti āha. Mahājano sannipati. Micchāditthikena hi nimantite mahanto sannipāto ahosi<sup>1</sup>. Micchāditthikāpi "samaņassa Gotamassa vippakāram passissāmā"ti sannipatanti, sammāditthikāpi "ajja Satthā mahādhammadesanam desessati, Buddhavisayam Buddhalīlam upadhāressāmā"ti sannipatanti.

Punadivase Satthā pañcahi bhikkhusatehi saddhim Garahadinnassa gehadvāram agamāsi. So gehā nikkhamitvā pañcapatiṭṭhitena vanditvā purato añjalim paggayha ṭhito cintesi "bhante 'tumhe kira atītādibhedam' sabbam jānātha, sattānam soļasahākārehi cittam paricchindathā'ti evam tumhākam upaṭṭhākena mayham kathitam. Sace jānātha, mayham geham mā pavisittha. Paviṭṭhānam hi vo neva yāgu atthi, na bhattādīni, sabbe kho pana tumhe aṅgārakāsuyam pātetvā niggaṇhissāmī"ti. Evam cintetvā Satthu pattam gahetvā "ito etha Bhagavā"ti vatvā "bhante amhākam geham āgatānam vattam ñatvā āgantum vaṭṭatī"ti āha. Kim kātum vaṭṭati āvusoti. Ekekassa pavisitvā purato gantvā nisinnakāle pacchā aññena āgantum vaṭṭatīti. Evam kirassa ahosi "purato gacchantam aṅgārakāsuyam patitam disvā avasesā na āgacchissanti, ekekameva pātetvā niggaṇhissāmī"ti. Satthā "sādhū"ti vatvā ekakova pāyāsi. Garahadinno aṅgārakāsum patvā apasakkitvā

thito "purato yātha bhante"ti āha. Atha Satthā aṅgārakāsumatthake pādaṁ pasāresi, kilañjaṁ antaradhāyi, aṅgārakāsuṁ bhinditvā cakkamattāni padumāni uṭṭhahiṁsu. Satthā padumakaṇṇikā akkamanto gantvā paññatte Buddhāsane nisīdi, bhikkhūpi tatheva gantvā nisīdiṁsu. Garahadinnassa kāyato ḍāho uṭṭhahi.

So vegena gantvā Siriguttam upasankamitvā "sāmi me tānam hohī"ti āha. Kim etanti. Pañcannam bhikkhusatānam gehe yāgu vā bhattādīni vā natthi, kim nu kho karomīti. "Kim pana tayā katan"ti āha. Aham dvinnam gehānam antare mahantam āvātam angārassa pūram kāresim "tattha pātetvā nigganhissāmī"ti. Atha nam bhinditvā mahāpadumāni utthahimsu. Sabbe padumakannikā akkamitvā gantvā pañnattāsanesu nisinnā, idāni kim karomi sāmīti. Nanu tvam idāneva mayham "ettikā cātiyo, ettikā yāgu, ettakāni bhattādīnī"ti dassesīti. Musā tam sāmi, tucchāva cātivoti. Hotu, gaccha, tāsu cātīsu yāgu-ādīni olokehīti. Tam khanaññeva tena yāsu cātīsu "yāgū"ti vuttam, tā yāguyā pūrayimsu, yāsu "bhattādīnī"ti vuttam, tā bhattādīnam paripunnāva ahesum. Tam sampattim disvāva Garahadinnassa sarīram pītipāmojjena paripūritam, cittam pasannam. So sakkaccam Buddhappamukham bhikkhusamgham parivisitvā katabhattakiccassa Satthuno anumodanam kāretukāmo pattam ganhi. Satthā anumodanam karonto "ime sattā paññācakkhuno abhāveneva mama sāvakānam Buddhasāsanassa gunam na jānanti. Paññācakkhuvirahitā hi andhā nāma, paññavanto sacakkhukā nāmā"ti vatvā imā gāthā abhāsi—

- 58. "Yathā saṅkāradhānasmiṁ¹, ujjhitasmiṁ mahāpathe. Padumaṁ tattha jāyetha, sucigandhaṁ manoramaṁ.
- 59. Evam sankārabhūtesu, andhabhūte puthujjane. Atirocati paññāya, Sammāsambuddhasāvako"ti.

Tattha saṅkāradhānasminti saṅkāraṭhānasmim, kacavararāsimhīti attho. Ujjhitasmim mahāpatheti mahāmagge chaḍḍitasmim. Sucigandhanti surabhigandham. Mano ettha ramatīti manoramam. Saṅkārabhūtesūti saṅkāramiva bhūtesu.

puthujjaneti puthūnam kilesānam jananato evam laddhanāme lokiyamahājane. Idam vuttam hoti—yathā nāma mahāpathe chaḍḍite saṅkārarāsimhi asucijegucchiyapaṭikūlepi sucigandham padumam jāyetha, tam rājarājamahāmattādīnam manoramam piyam manāpam uparimatthake patiṭṭhānārahameva bhaveyya, evameva saṅkārabhūtesupi puthujjanesu jāto nippaññassa mahājanassa acakkhukassa antare nibbattopi attano paññābalena kāmesu ādīnavam, nekkhamme ca ānisamsam disvā nikkhamitvā pabbajito pabbajjāmattenapi, tato uttarim sīlasamādhipaññāvimuttivimuttiñāṇadassanāni ārādhetvāpi atirocati. Sammāsambuddhasāvako hi khīṇāsavo bhikkhu andhabhūte puthujjane atikkamitvā rocati virocati sobhatīti.

Desanāvasāne caturāsītiyā pāṇasahassānaṁ dhammābhisamayo ahosi. Garahadinno ca Sirigutto ca sotāpattiphalaṁ pāpuṇiṁsu. Te sabbaṁ attano dhanaṁ Buddhasāsane vippakiriṁsu. Satthā uṭṭhāyāsanā vihāramagamāsi. Bhikkhū sāyanhasamaye dhammasabhāyaṁ kathaṁ samuṭṭhāpesuṁ "aho acchariyā Buddhaguṇā nāma, tathārūpaṁ nāma khadiraṅgārarāsiṁ bhinditvā padumāni uṭṭhahiṁsū"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "anacchariyaṁ bhikkhave, yaṁ mama etarahi Buddhabhūtassa aṅgārarāsimhā padumāni uṭṭhitāni, aparipakke ñāṇe vattamānassa bodhisattabhūtassapi me utthahiṁsū"ti vatvā "kadā bhante, ācikkhatha no"ti yācito atītaṁ āharitvā—

"Kāmam patāmi nirayam, uddhampādo avamsiro. Nānariyam karissāmi, handa piṇḍam paṭiggahā"ti<sup>1</sup>—

Idam Khadirangārajātakam vitthāretvā kathesīti.

Garahadinnavatthu dvādasamam.

## Pupphavaggavannanā niţţhitā.

Catuttho vaggo.

# 5. Bālavagga

#### 1. Aññatarapurisavatthu

**Dīghā jāgarato rattī**ti imam dhammadesanam Satthā Jetavane viharanto Pasenadikosalanceva annataranca purisam ārabbha kathesi.

Rājā kira pasenadi Kosalo ekasmim chanadivase alankatapativattam sabbasetam ekam Pundarīkam nāma hatthim abhiruyha mahantena rājānubhāvena nagaram padakkhinam karoti. Ussāranāya vattamānāya leddudandādīhi pothiyamāno mahājano palāyanto gīvam parivattetvāpi oloketiyeva. Rājūnam kira sudinnadānassetam phalam. Aññatarassāpi duggatapurisassa bhariyā sattabhūmikassa pāsādassa uparitale thitā ekam vātapānakavātam vivaritvā rājānam oloketvāva apagacchi. Rañño punnacando valāhakantaram pavittho viya upatthāsi. So tassā patibaddhacitto hatthikkhandhato patanākārappatto viya hutvā khippam nagaram padakkhinam katvā antepuram pavisitvā ekam vissāsakam amaccam āha "asukatthāne te mayā olokitapāsādo dittho"ti. Āma devāti. Tatthekam itthim addasāti. Addasam devāti. Gaccha, tassā sasāmikaasāmikabhāvam jānāhīti. So gantvā tassā sasāmikabhāvam natvā agantvā rañño "sasāmikā" ti ārocesi. Atha raññā "tena hi tassā sāmikam pakkosāhī" ti vutte so gantvā "ehi bho, rājā tam pakkosatī" ti āha. So "bhariyam me nissāya bhayena uppannena bhavitabban"ti cintetvā rañño āṇam paṭibāhitum asakkonto gantvā rājānam vanditvā atthāsi. Atha nam rājā "mam ito patthāya upatthāhī"ti āha. Alam deva, aham attano kammam katvā tumhākam sunkam dadāmi, ghareyeva me jīvikā hotūti. "Tava sunkena mayham attho natthi, ajjato patthāya mam upatthāhī"ti tassa phalakañca āvudhañca dāpesi. Evam kirassa ahosi "kañcidevassa dosam āropetvā ghātetvā bhariyam ganhissāmī"ti. Atha nam so maranabhayabhīto appamatto hutvā upatthāsi.

Rājā tassa dosam¹ apassanto kāmaparilāhe vaddhante "ekamassa dosam āropetvā rājānam karissāmī''ti tam pakkosāpetvā evamāha "ambho ito voianamatthake nadivā asukatthānam nāma gantvā sāvam mama nhānavelāya kumuduppalāni ceva arunavatīmattikañca<sup>2</sup> āhara. Sace tasmim khane nāgacchasi, ānam te karissāmī"ti. Sevako kira catūhipi dāsehi patikitthataro<sup>3</sup>. Dhanakkītādayo hi dāsā "sīsam me rujjati, pitthi me rujjatī"ti vatvā acchitum labhantiyeva. Sevakassetam natthi, ānattakammam kātumeva vattati. Tasmā so "avassam mayā gantabbam, kumuduppalehi saddhim arunavatīmattikā nāma Nāgabhavane uppajjati, aham kuhim labhissāmī"ti cintento maranabhayabhīto vegena geham gantvā "bhadde nitthitam me bhattan"ti āha. Uddhanamatthake sāmīti. So yāva bhattam otarati, tāva sandhāretum asakkonto ulunkena kanjikam harāpetvā yathāladdhena byañjanena saddhim allameva bhattam pacchiyam opīletvā ādāya yojanikam maggam pakkhando, tassa gacchantasseva bhattam pakkam ahosi. So anucchittham katvāva thokam bhattam apanetvā bhuñjanto ekam addhikam ekam disvā mayā apanetvā thapitam thokam anucchittham bhattameva atthi, gahetvā bhuñja sāmīti. So ganhitvā bhuñji. Itaropi bhuñjitvā ekam bhattamutthim udake khipitvā mukham vikkhāletvā mahantena saddena "imasmim nadīpadese adhivatthā nāgā supannā devatā ca vacanam me sunantu, rājā mayham ānam kātukāmo 'kumuduppalehi saddhim arunavatīmattikam āharā'ti mam ānāpesi, addhikamanussassa ca me bhattam dinnam, tam sahassānisamsam, udake macchānam dinnam, tam satānisamsam. Ettakam puññaphalam tumhākam pattim katvā dammi, mayham kumuduppalehi saddhim arunavatīmattikam āharathā"ti tikkhattum anussāvesi. Tattha adhivattho nāgarājā tam saddam sutvā mahallakavesena tassa santikam gantvā "kim vadesī"ti āha. So punapi tatheva vatvā "mayham tam pattim dehī"ti vutte "demī"ti āha. Punapi "dehī"ti vutte "demi sāmī"ti āha. Evam so dve tayo vāre pattim āharāpetvā kumuduppalehi saddhim arunavatīmattikam adāsi.

<sup>1.</sup> Vivaram (Sī, Syā)

Rājā pana cintesi "manussā nāma bahumāyā<sup>1</sup>, sace so kenaci upāyena labheyya, kiccam me na nipphajjeyyā"ti. So kālasseva dvāram pidahāpetyā muddikam attano santikam āharāpesi. Itaropi puriso rañño nhānavelāyamevāgantvā dvāram alabhanto dvārapālam pakkosetvā "dvāram vivarā"ti āha. Na sakkā vivaritum, rājā kālasseva muddikam datvā rājageham āharāpesīti. So "rājadūto aham, dvāram vivarā"ti vatvāpi "dvāram alabhanto natthi me idāni jīvitam, kim nu kho karissāmī"ti cintetvā dvārassa upari-ummāre<sup>2</sup> mattikāpindam khipitvā tassūpari pupphāni laggetvā mahāsaddam karonto "ambho nagaravāsino rañño mayā āṇattiyā gatabhāvam jānātha, rājā mam akāraņena vināsetukāmo"ti tikkhattum viravitvā "kattha nu kho gacchissāmī"ti cintetvā "bhikkhū nāma muduhadayā, vihāram gantvā nipajjissāmī"ti sannitthānamakāsi. Ime hi nāma sattā sukhitakāle bhikkhūnam atthibhāvampi ajānitvā dukkhābhibhūtakāle vihāram gantukāmā honti, tasmā sopi "me aññam tānam natthī"ti vihāram gantvā ekasmim phāsukatthāne nipajji. Atha raññopi tam rattim niddam alabhantassa tam itthim anussarantassa kāmaparilāho uppajji. So cintesi "vibhātakkhaneyeva tam purisam ghātāpetvā tam itthim ānessāmī"ti.

Tasmim khaņeyeva saṭṭhiyojanikāya Lohakumbhiyā nibbattā cattāro purisā pakkuthitāya ukkhaliyā taṇḍulā viya samparivattakam³ paccamānā timsāya vassasahassehi heṭṭhimatalam patvā aparehi timsāya vassasahassehi puna mukhavaṭṭiyam pāpuṇimsu. Te sīsam ukkhipitvā aññamaññam oloketvā ekekam gātham vattukāmā vattum asakkontā ekekam akkharam vatvā parivattitvā Lohakumbhimeva paviṭṭhā. Rājā niddam alabhanto majjhimayāmasamanantare tam saddam sutvā bhīto utrastamānaso "kim nu kho mayham jīvitantarāyo bhavissati, udāhu me aggamahesiyā, udāhu me rajjam vinassissatī"ti cintento sakalarattim akkhīni nimīletum nāsakkhi. So aruṇuggamanavelāya eva purohitam pakkosāpetvā "ācariya mayā majjhimayāmasamanantare mahantā bheravasaddā sutā, 'rajjassa vā aggamahesiyā vā mayham vā kassa

<sup>1.</sup> Bahumantā (Sī, Syā)

<sup>3.</sup> Samparivattakā (Syā), samparivattantā (Ka)

antarāyo bhavissatī'ti na jānāmi, tena me tvam pakkosāpito''ti āha. Mahārāja kim te saddā sutāti. Ācariya du - iti sa - iti na - iti so - itīti ime sadde assosim, imesam nipphattim upadhārehīti. Brāhmaņassa mahā-andhakāram paviṭṭhassa viya na kiñci paññāyati, "na jānāmīti vutte pana lābhasakkāro me parihāyissatī''ti bhāyitvā "bhāriyam mahārājā''ti āha. Kim ācariyāti. Jīvitantarāyo te paññāyatīti. So dviguņam bhīto "ācariya atthi kiñci pana paṭighā takāraṇan''ti āha. Atthi mahārāja, mā bhāyi, aham tayo vede jānāmīti. Kim pana laddhum vaṭṭatīti. Sabbasatayaññam yajitvā jīvitam labhissasi devāti. Kim laddhum vaṭṭatīti. Hatthisatam assasatam usabhasatam dhenusatam ajasatam urabbhasatam¹ kukkuṭasatam sūkarasatam dārakasatam dārikāsatanti evam ekekam pāṇajātim satam satam katvā gaṇhāpento "sace migajātimeva gaṇhāpessāmi, 'attano khādanīyameva gaṇhāpetī'ti vakkhantī'ti hatthi-assamanussepi gaṇhāpeti. Rājā "mama jīvitameva mayham lābho'ti cintetvā "sabbapāṇe sīgham gaṇhathā'ti āha. Āṇattamanussā adhikataram gaṇhimsu. Vuttampi cetam Kosalasamyutte—

Tena kho pana samayena rañño pasenadissa Kosalassa mahāyañño paccupaṭṭhito hoti, pañca ca usabhasatāni pañca ca vacchatarasatāni pañca ca vacchatarisatāni pañca ca ajasatāni pañca ca urabbhasatāni thūṇūpanītāni honti yaññatthāya. Yepissa te honti dāsāti vā pessāti vā kammakarāti vā, tepi daṇḍatajjitā bhayatajjitā assumukhā rudamānā parikammāni karontīti².

Mahājano attano attano puttadhītuñātīnam atthāya paridevamāno mahāsaddamakāsi, mahāpathavī-undriyanasaddo viya ahosi. Atha Mallikā devī tam saddam sutvā rañño santikam gantvā "kim nu kho te mahārāja indriyāni apākatikāni, kilantarūpāni viya paññāyantī"ti pucchi. Kim tuyham Mallike, tvam mama kaṇṇamūlena āsivisampi gacchantam na jānāsīti. Kim panetam devāti. "Rattibhāge me evarūpo nāma saddo

<sup>1.</sup> Ajasatam gadrabhasatam ājaññasatam urabbhasatam (Ka)

suto, svāham parohitam pucchitvā jīvitantarāyo te paññāyati, sabbasatayaññam yajitvā jīvitam labhissasī'ti sutvā "mama jīvitameva mayham lābho''ti ime pāņe gaņhāpesinti. Mallikā devī "andhabālosi mahārāja, kiñcāpi mahābhakkhosi, anekasūpabyañjanavikatikam doṇapākam bhojanam bhuñjasi, dvīsu raṭṭhesu rajjam kāresi, paññā pana te mandā''ti āha. Kasmā evam vadesi devīti. "Kaham tayā aññassa maraṇena aññassa jīvitalābho diṭṭhapubbo, andhabālassa brāhmaṇassa katham gahetvā kasmā mahājanassa upari dukkham khipasi, dhuravihāre sadevakassa lokassa aggapuggalo atītādīsu appaṭihatañāṇo Satthā vasati, tam pucchitvā tassovādam karohī''ti vutte rājā sallahukehi yānehi Mallikāya saddhim vihāram gantvā maraṇabhayatajjito kiñci vattum asakkonto Satthāram vanditvā ekamantam nisīdi.

Atha naṁ Satthā "handa kuto nu tvaṁ mahārāja āgacchasi divā divassā"ti paṭhamataraṁ ālapi. So tuṇhīyeva nisīdi. Tato Mallikā Bhagavato ārocesi "bhante raññā kira majjhimayāmasamanantare saddo¹ suto, atha naṁ purohitassa ārocesi, purohito 'jīvitantarāyo te bhavissati, tassa paṭighātatthāya sabbasate pāṇe gahetvā tesaṁ galalohitena yaññe yajite jīvitaṁ labhissasī'ti āha. Rājā pāṇe gaṇhāpesi. Tenāyaṁ mayā idhānīto"ti. Evaṁ kira mahārājāti. Evaṁ bhanteti. Kinti te saddo sutoti. So attanā² sutaniyāmeneva ācikkhi. Tathāgatassa³ taṁ sutvāva ekobhāso ahosi. Atha naṁ Satthā āha "mā bhāyi mahārāja, tava antarāyo natthi, pāpakammino sattā attano dukkhaṁ āvīkarontā⁴ evamāhaṁsū"ti. Kiṁ pana bhante tehi katanti. Atha kho Bhagavā tesaṁ kammaṁ ācikkhituṁ "tena hi mahārāja sunāhī"ti vatvā atītaṁ āhari—

Atīte vītativassasahassāyukesu manussesu Kassapo Bhagavā loke uppajjitvā vīsatiyā khīņāsavasahassehi saddhim cārikam caramāno Bārāņasimagamāsi. Bārāņasivāsino dvepi tayopi

<sup>1.</sup> Dussaddo (Ka)

<sup>2.</sup> Attano (Ka)

<sup>3.</sup> Tathāgato (Ka)

<sup>4.</sup> Dukkham adhivāsetum asakkontā (Ka)

bahutarāpi ekato hutvā āgantukadānam pavattayimsu. Tadā Pārāṇasiyam cattālīsakoṭivibhavā cattāro seṭṭhiputtā sahāyakā ahesum. Te mantayimsu "amhākam gehe bahudhanam, tena kim karomā"ti. "Evarūpe Buddhe cārikam caramāne dānam dassāma, sīlam rakkhissāma, pūjam karissāmā"ti ekopi avatvā tesu eko tāva evamāha "tikhiṇasuram pivantā madhuramamsam khādantā vicarissāma, idam amhākam jīvitaphalan"ti¹. Aparopi evamāha "devasikam tivassikagandhasālibhattam nānaggarasehi bhuñjantā vicarissāmā"ti. Aparopi evamāha "nānappakāram pūvakhajjakavikatim pacāpetvā khādantā vicarissāmā"ti. Aparopi evamāha "sammā mayam aññam kiñci na karissāma, 'dhanam dassāmā'ti vutte anicchamānā itthī nāma natthi, tasmā dhanena palobhetvā² pāradārikakammam karissāmā"ti. "Sādhu sādhū"ti sabbeva tassa kathāya³ aṭṭhamsu.

Te tato paṭṭhāya abhirūpānaṁ itthīnaṁ dhanaṁ pesetvā vīsativassasahassāni pāradārikakammaṁ katvā kālaṁ katvā Avīciniraye nibbattā. Te ekaṁ Buddhantaraṁ niraye paccitvā tattha kālaṁ katvā pakkāvasesena saṭṭhiyojanikāya Lohakumbhiyā nibbattitvā tiṁsāya vassasahassehi heṭṭhimatalaṁ patvā punapi tiṁsāya vassasahassehi Lohakumbhimukhaṁ patvā ekekaṁ gāthaṁ vattukāmā hutvā vattuṁ asakkontā ekekaṁ akkharaṁ vatvā puna parivattitvā, Lohakumbhimeva paviṭṭhā. Vadehi mahārāja, paṭhamaṁ te kiṁ saddo nāma sutoti. Du - iti bhanteti. Satthā tena aparipuṇṇaṁ katvā vuttaṁ gāthaṁ paripuṇṇaṁ katvā dassento evamāha—

"Dujjīvitamajīvimha, ye sante na dadamhase. Vijjamānesu bhogesu, dīpam nākamha attano"ti<sup>4</sup>.

Atha rañño imissā gāthāya attham pakāsetvā "kim te mahārāja dutiyasaddo tatiyasaddo catutthasaddo suto"ti pucchitvā "evam nāmā"ti vutte avasesam paripūrento—

"Saṭṭhivassasahassāni, paripuṇṇāni sabbaso. Niraye paccamānānam, kadā anto bhavissati.

<sup>1.</sup> Saphalanti (Syā)

<sup>2.</sup> Payojetvā (Sī)

<sup>3.</sup> Tasseva vacanakathāya (Ka)

<sup>4.</sup> Khu 5. 100; Khu 2. 216 pitthesu.

Natthi anto kuto anto, na anto paṭidissati.

Tadā hi pakataṁ pāpaṁ, mama tuyhañca mārisā.

Sohaṁ nūna ito gantvā, yoniṁ laddhāna mānusiṁ.

Vadaññū sīlasampanno, kāhāmi kusalaṁ bahun''ti¹.

Paṭipāṭiyā imā gāthā vatvā tāsaṁ atthaṁ pakāsetvā "iti kho mahārāja te cattāro janā ekekaṁ gāthaṁ vattukāmāpi vattuṁ asakkontā ekakameva akkharaṁ vatvā puna Lohakumbhimeva paviṭṭhā"ti āha.

Raññā kira Pasenadikosalena tassa saddassa sutakālato paṭṭhāya te heṭṭhā bhassanti eva, ajjāpi ekam vassasahassam nātikkamanti. Rañño tam desanam sutvā mahāsamvego uppajji. So "bhāriyam vatidam pāradārikakammam nāma, ekam kira Buddhantaram niraye paccitvā tato cutā saṭṭhiyojanikāya Lohakumbhiyā nibbattitvā tattha saṭṭhivassasahassāni paccitvā evampi nesam dukkhā muccanakālo na paññāyati, ahampi paradāre sineham katvā sabbarattim niddam na labhim, idāni ito paṭṭhāya paradāre mānasam na bandhissāmī'ti cintetvā Tathāgatam āha "bhante ajja me rattiyā dīghabhāvo ñāto'ti. Sopi puriso tattheva nisinno tam katham sutvā "laddho me balavappaccayo'ti Satthāram āha "bhante raññā tāva ajja rattiyā dīghabhāvo ñāto, aham pana hiyyo sayameva yojanassa dīghabhāvam aññāsin'ti. Satthā dvinnampi katham samsanditvā "ekaccassa ratti dīghā hoti, ekaccassa yojanam dīgham hoti, bālassa pana samsāro dīgho hotī'ti vatvā dhammam desento imam gāthamāha—

60. "Dīghā jāgarato ratti, dīgham santassa yojanam. Dīgho bālāna samsāro, saddhammam avijānatan"ti.

Tattha **dīghā**ti ratti nāmesā tiyāmamattāva, jāgarantassa pana dīghā hoti, dviguņatiguņā viya hutvā khāyati. Tassā dīghabhāvam attānam maṅkuṇasamghassa bhattam katvā yāva sūriyuggamanā samparivattakam semāno mahākusītopi, subhojanam bhuñjitvā sirisayane sayamāno kāmabhogīpi na jānāti, sabbarattim pana padhānam padahanto yogāvacaro ca, dhammakatham kathento dhammakathiko ca, āsanasamīpe thatvā dhammam sunanto ca, sīsarogādiphuttho vā hatthapādacchedanādim patto vā vedanābhibhūto ca, rattim maggapatipanno addhiko ca jānāti. Yojananti yojanampi catugāvutamattameva, santassa pana kilantassa dīgham hoti, dvigunatigunam viya khāyati. Sakaladivasam hi maggam gantvā kilanto patipatham agacchantam disva "purato gamo kīvadūro"ti pucchitva "yojanan"ti vutte thokam gantvā aparampi pucchitvā tenāpi "yojanan"ti vutte puna thokam gantvā aparampi pucchati. Sopi "yojanan"ti vadati. So pucchitapucchita yojananteva vadanti, dīgham vatidam yojanam, ekayojanam dve tīni yojanāni viya maññeti. **Bālānan**ti idhalokaparalokattham pana ajānantānam bālānam samsāravattassa pariyantam kātum asakkontānam yam sattatimsabodhipakkhiyabhedam saddhammam ñatvā samsārassa antam karonti, tam saddhammam avijānatam samsāro dīgho nāma hoti. So hi attano dhammatāya eva dīgho nāma. Vuttampi cetam "anamataggoyam bhikkhave samsāro, pubbā koti na paññāyatī"ti<sup>1</sup>. Bālānam pana pariyantam kātum asakkontānam atidīghoyevāti.

Desanāvasāne so puriso sotāpattiphalam patto, aññepi bahū sotāpattiphalādīni pattā, mahājanassa sātthikā dhammadesanā jātāti.

Rājā Satthāram vanditvā gacchantoyeva te satte bandhanā mocesi. Tattha itthipurisā bandhanā muttā sīsam nhatvā<sup>2</sup> sakāni gehāni gacchantā "ciram jīvatu no ayyā Mallikā devī, tam³ nissāya jīvitam labhimhā"ti Mallikāya guṇakatham kathayimsu. Sāyanhasamaye bhikkhū dhammasabhāyam katham samuṭṭhāpesum "aho paṇḍitā vatāyam Mallikā, attano paññam nissāya ettakassa janassa jīvitadānam adāsī"ti. Satthā (Gandhakuṭiyam nisinnova tesam bhikkhūnam katham sutvā Gandhakuṭito nikkhamitvā dhammasabham pavisitvā paññatte āsane nisīditvā)<sup>4</sup> "kāya nuttha bhikkhave etarahi

<sup>1.</sup> Sam 1. 387 pitthe.

<sup>3.</sup> Yam (Sī, Syā)

<sup>2.</sup> Nahātā (Sī)

<sup>4. ( )</sup> Sī-Syā-potthakesu natthi.

kathāya sannisinnā"ti pucchitvā "imāya nāmā"ti vutte "na bhikkhave Mallikā idāneva attano paññaṁ nissāya mahājanassa jīvitadānaṁ deti, pubbepi adāsiyevā"ti vatvā tamatthaṁ pakāsanto atītaṁ āhari—

Atīte Bārānasiyam rañño putto ekam nigrodharukkham upasankamitvā tattha nibbattāya devatāya āyāci "sāmi devarāja imasmim jambudīpe ekasatarājāno ekasata-aggamahesiyo, sacāham pitu accayena rajjam labhissāmi, etesam galalohitena balim karissāmī"ti. So pitari kālakate rajjam patvā "devatāya me ānubhāvena rajjam pattam, balimassā karissāmī"ti mahatiyā senāya nikkhamityā ekam rājānam attano vase vattetyā tena saddhim aparampi aparampīti sabbe rājāno attano vase katvā saddhim aggamahesīhi ādāya gacchanto Uggasenassa nāma sabbakanitthassa rañño Dhammadinnā nāma aggamahesī garugabbhā, tam ohāya āgantvā "ettakajanam visapānakam pāyetvā māressāmī"ti rukkhamūlam sodhāpesi. Devatā cintesi "ayam rājā ettake rājāno ganhanto 'mam nissāya gahitā ime'ti cintetvā tesam galalohitena mayham balim kātukāmo, sace panāyam ete ghātessati, jambudīpe rājavamso upacchijjissati<sup>1</sup>, rukkhamūlepi<sup>2</sup> me asuci bhavissati, sakkhissāmi nu kho etam nivāretun"ti. Sā upadhārentī "nāham sakkhissāmī"ti natvā annampi devatam upasankamitvā etamattham ārocetvā "tvam sakkhissasī"ti āha. Tāyapi patikkhittā aññampi aññampīti evam sakalacakkavāladevatāyo upasankamitvā tāhipi patikkhittā catunnam mahārājūnam santikam gantvā<sup>3</sup> "mayam na sakkoma, amhākam pana rājā amhehi puññena ca paññāva ca visittho, tam pucchā"ti tehipi patikkhittakāle sakkam upasankamitvā<sup>3</sup> tamattham ārocetvā "deva tumhesu appossukkatam āpannesu khattivavamso upacchijjissati, tassa patisaranam hothā"ti āha. Sakko "ahampi nam patibāhitum na sakkhissāmi, upāyam panate vakkhāmī"ti vatvā upāyam ācikkhi "gaccha, tvam rañño passantasseva rattavattham nivāsetvā attano rukkhato nikkhamitvā gamanākāram dassehi, atha tam rājā 'devatā gacchati, nivattāpessāmi nan'ti nānappakārena yācissati, atha nam vedeyyāsi 'tvam

<sup>1.</sup> Ucchijjissati (Sī, Syā)

<sup>2.</sup> Rukkhamūlampi (Syā, Ka)

<sup>3-3.</sup> Tehi kathitakāle "uppannam bhayam na mayam sakkhissāmā"ti vutte sakkam upasankamitvā(Ka)

ekasatarājāno saddhim aggamahesīhi ānetvā tesam galalohitena balim karissāmīti mayham āyācitvā Uggasenassa rañño devim ohāya āgato, nāham tādisassa musāvādassa balim sampaṭicchāmī''ti. Evam kira vutte rājā tam āṇāpessati, sā rañño dhammam desetvā ettakassa janassa jīvitadānam dassatī''ti. Iminā kāraṇena Sakko devatāya imam upāyam ācikkhi. Devatā tathā akāsi.

Rājāpi tam āṇāpesi. Sā āgantvā tesam rājūnam pariyante nisinnampi attano rājānameva vandi. Rājā "mayi sabbarājajeṭṭhake ṭhite sabbakaniṭṭham attano sāmikam vandatī"ti tassa kujjhi. Atha nam sā āha "kim mayham tayi paṭibaddham, ayam pana me sāmiko issariyassa dāyako, imam avanditvā kasmā tam vandissāmī"ti. Rukkhadevatā passantasseva mahājanassa "evam bhadde, evam bhadde"ti vatvā tam pupphamuṭṭhinā pūjesi. Puna rājā āha "sace mam na vandasi, mayham rajjasiridāyikam evam mahānubhāvam devatam kasmā na vandasī"ti. Mahārāja tayā attano puññe ṭhatvā¹ rājāno gahitā, na devatāya gahetvā dinnāti. Punapi tam devatā "evam bhadde, evam bhadde"ti vatvā tatheva pūjesi. Puna sā rājānam āha "tvam 'devatāya me ettakā rājāno gahetvā dinnā'ti vadesi, idāni te devatāya upari vāmapasse rukkho agginā daḍḍho, sā tam aggim nibbāpetum kasmā nāsakkhi, yadi evam mahānubhāvā"ti. Punapi tam devatā "evam bhadde, evam bhadde"ti vatvā tatheva pūjesi.

Sā kathayamānā ṭhitā rodi ceva hasi ca. Atha nam rājā "kim ummattikāsī"ti āha. Kasmā deva evam vadesi, na mādisiyo ummattikā hontīti. Atha nam kim kāraṇā rodasi ceva hasasi cāti. "Suṇāhi mahārāja, aham hi atīte kuladhītā hutvā patikule vasantī sāmikassa sahāyakam pāhunakam āgatam disvā tassa bhattam pacitukāmā 'mamsam āharā'ti dāsiyā kahāpaṇam datvā tāya mamsam alabhitvā āgatāya 'natthi mamsan'ti vutte gehassa pacchimabhāge sayitāya eļikāya sīsam chinditvā bhattam sampādesim, sāham ekissāya eļikāya sīsam chinditvā niraye paccitvā pakkāvasesena tassā lomagaṇanāya sīsacchedam pāpuṇim, tvam ettakam janam vadhitvā kadā

dukkhā muccissasīti evamaham¹ tava dukkham anussarantī rodin''ti vatvā imam gāthamāha—

"Ekissā² kaṇṭhaṁ chetvāna, lomagaṇanāya paccisaṁ³. Bahūnaṁ kaṇṭhe chetvāna, kathaṁ kāhasi khattiyā"ti.

Atha kasmā tvam hasasīti. "Etasmā dukkhā muttāmhī"ti tussitvā mahārājāti. Punapi tam devatā "evam bhadde, evam bhadde"ti vatvā pupphamuṭṭhinā pūjesi. Rājā "aho me bhāriyam katam kammam, ayam kira ekam eļikam vadhitvā niraye pakkāvasesena tassā lomagaṇanāya sīsacchedam pāpuṇi, aham ettakam janam vadhitvā kadā sotthim pāpuṇissāmī"ti sabbe rājāno mocetvā attano mahallakatare vanditvā daharadaharānam<sup>4</sup> añjalim paggayha sabbe khamāpetvā sakasakaṭṭhānameva pahiṇi.

Satthā imam dhammadesanam āharitvā, "evam bhikkhave na idāneva Mallikā devī attano paññam nissāya mahājanassa jīvitadānam deti, pubbepi adāsiyevā"ti vatvā atītam samodhānesi "tadā Bārāṇasirājā pasenadi Kosalo ahosi, Dhammadinnā devī Mallikā, rukkhadevatā ahamevā"ti. Evam atītam samodhānetvā puna dhammam desento "bhikkhave pāṇātipāto nāma na kattabbayuttako. Pāṇātipātino hi dīgharattam socantī"ti vatvā imā gāthā āha—

"Idha socati pecca socati, Pāpakārī ubhayattha socati. So socati so vihaññati, Disvā kammakiliṭṭhamattano"ti<sup>5</sup>.

"Evam ce sattā jāneyyum, dukkhā'yam jātisambhavo. Na pāņo pāṇinam haññe, pāṇaghātī hi socatī''ti<sup>6</sup>.

## Aññatarapurisavatthu pathamam.

- 1. Evammahantañca (Sī, Syā)
- 2. Elikāya (Ka)
- 3. Paccayim (Sī)

- 4. Daharatarānam (Sī, Syā)
- 5. Khu 1. 15 pitthe. ayam gāthā Sī-Syā-potthakesu imasmim thāne natthi.
- 6. Khu 5. 5 pitthe.

### 2. Mahākassapattherasaddhivihārikavatthu

Carañce nādhigaccheyyāti imam dhammadesanam Satthā Sāvatthiyam Jetavane viharanto Mahākassapattherassa saddhivihārikam ārabbha kathesi. Desanā Rājagahe samutthitā.

Theram kira Rājagaham nissāya Pippaliguhāyam vasantam dve saddhivihārikā upatthahimsu. Tesu eko sakkaccam vattam karoti, eko tena katam katam¹ attanā katam viya dassento mukhodakadantakatthānam patiyāditabhāvam natvā "bhante mukhodakadantakatthāni me patiyāditāni, mukham dhovatha"ti vadati, padadhovananhanadikalepi evameva vadati. Itaro cintesi "ayam niccakālam mayā katam katam attanā katam viya katvā dasseti, hotu, kattabbayuttakamassa karissāmī"ti. Tassa bhuñjitvā supantasseva nhānodakam tāpetvā ekasmim ghate katvā pitthikotthake thapesi, udakatāpanabhājane pana nālimattam udakam sesetvā usumam muñcantam thapesi. Tam itaro sāyanhasamaye pabujihitvā usumam nikkhantam disvā "udakam tāpetvā kotthake thapitam bhavissatī"ti vegena gantvā theram vanditvā "bhante kotthake udakam thapitam, nhāyathā" ti vatvā therena saddhimyeva kotthakam pāvisi. Thero udakam apassanto "kaham udakam āvuso"ti āha. Daharo aggisālam gantvā bhājane ulunkam otāretvā tucchabhāvam ñatvā "passatha dutthassa² kammam, tucchabhājanam uddhane āropetvā kuhim gato, aham 'kotthake udakan'ti saññaya arocesin''ti ujjhayanto ghatam adaya tittham agamasi. Itaropi pitthikotthakato udakam āharitvā kotthake thapesi.

Thero cintesi "ayam daharo 'udakam me tāpetvā koṭṭhake ṭhapitam, etha, bhante nhāyathā'ti vatvā idāni ujjhāyanto ghaṭam ādāya tittham gacchati, kim nu kho etan'ti upadhārento "ettakam kālam esa daharo iminā katam vattam attanāva katam viya pakāsetī'ti ñatvā sāyam āgantvā nisinnassa ovādamadāsi "āvuso bhikkhunā nāma 'attanā katameva katan'ti vattum vaṭṭati, no akatam, tvam idāneva 'koṭṭhake udakam ṭhapitam, nhāyatha bhante'ti vatvā mayi pavisitvā ṭhite

ghaṭaṁ ādāya ujjhāyanto gacchasi, pabbajitassa nāma evaṁ kātuṁ na vaṭṭatī"ti. So "passatha therassa kammaṁ, udakamattakaṁ nāma nissāya maṁ evaṁ vadesī"ti kujjhitvā punadivase therena saddhiṁ piṇḍāya na pāvisi. Thero itarena saddhiṁ ekaṁ padesaṁ agamāsi. So tasmiṁ gate therassa upaṭṭhākakulaṁ gantvā "thero kahaṁ bhante"ti puṭṭho "therassa aphāsukaṁ jātaṁ, vihāreyeva nisinno"ti āha. Kiṁ pana bhante laddhuṁ vaṭṭatīti. "Evarūpaṁ kira nāma āhāraṁ dethā"ti vutte tena vuttaniyāmeneva sampādetvā adaṁsu. So antarāmaggeva taṁ bhattaṁ bhuñjitvā vihāraṁ gato. Theropi gataṭṭhāne mahantaṁ sukhumavatthaṁ labhitvā attanā saddhiṁ gatadaharassa adāsi. So taṁ rajitvā attano nivāsanapārupanaṁ akāsi.

Thero punadivase tam upaṭṭhākakulam gantvā "bhante 'tumhākam kira aphāsukam jātan'ti amhehi daharena vuttaniyāmeneva paṭiyādetvā āhāro pesito, paribhuñjitvā vo phāsukam jātan'ti vutte tuṇhī ahosi. Vihāram pana gantvā tam daharam vanditvā nisinnam evamāha "āvuso tayā kira hiyyo idam nāma katam, idam pabbajitānam na anucchavikam, viññattim katvā bhuñjitum na vaṭṭatī'ti. So kujjhitvā there āghātam bandhitvā "purimadivase udakamattam nissāya mam musāvādim katvā ajja attano upaṭṭhākakule bhattamuṭṭhiyā bhuttakāraṇā mam 'viññattim katvā bhiñjitum na vaṭṭatī'ti vadati, vatthampi tena attano upaṭṭhākasseva dinnam, aho therassa bhāriyam kammam, jānissāmissa kattabbayuttakan'ti punadivase there gāmam pavisante sayam vihāre ohīyitvā daṇḍam gahetvā paribhogabhājanāni bhinditvā therassa paṇṇasālāya aggim datvā yam na jhāyati, tam muggarena paharanto bhinditvā nikkhamitvā palāto. So kālam katvā Avīcimahāniraye nibbatti.

Mahājano katham samuṭṭhāpesi "therassa kira saddhivihāriko ovādamattam asahanto kujjhitvā paṇṇasālam jhāpetvā palāto"ti. Atheko bhikkhu aparabhāge Rājagahā nikkhamitvā Satthāram daṭṭhukāmo Jetavanam gantvā Satthāram vanditvā Satthārā paṭisanthāram katvā "kuto āgatosī"ti puṭṭho "Rājagahato bhante"ti āha. Mama puttassa Mahākassapassa khamanīyami. Khamanīyam bhante, eko pana saddhivihāriko

ovādamattena kujjhitvā paṇṇasālaṁ jhāpetvā palātoti. Satthā "na so idāneva ovādaṁ sutvā kujjhati, pubbepi kujjhiyeva. Na idāneva kuṭiṁ dūseti, pubbepi dūsesiyevā"ti vatvā atītaṁ āhari—

Atīte Bārāṇasiyam Brahmadatte rajjam kārente Himavantapadese eko singilasakuṇo kulāvakam katvā vasi. Athekadivasam deve vassante eko makkaṭo sītena kampamāno tam padesam agamāsi, singilo tam disvā gāthamāha—

"Manussasseva te sīsam, hatthapādā ca vānara. Atha kena nu vannena, agāram te na vijjatī"ti<sup>1</sup>.

Makkaṭo "kiñcāpi me hatthapādā atthi, yāya pana paññāya vicāretvā agāraṁ kareyyaṁ, sā me paññā natthī"ti cintetvā tamatthaṁ viññāpetukāmo imaṁ gāthamāha—

"Manussasseva me sīsam, hatthapādā ca singila. Yā'hu setthā manussesu, sā me paññā na vijjatī''ti<sup>1</sup>.

Atha nam "evarūpassa tava katham gharāvāso ijjhissatī"ti garahanto singilo imam gāthādvayamāha—

"Anavaṭṭhitacittassa, lahucittassa dubbhino. Niccaṁ addhuvasīlassa, sukhabhāvo na vijjati.

So karassu ānubhāvam vītivattassu sīliyam. Sītavātaparittāņam, karassu kuṭavam kapī"ti².

Makkaţo "ayam mam anavaţţhitacittam lahucittam mittadubbhim addhuvasīlam karoti, idānissa mittadubbhibhāvam dassessāmī"ti kulāvakam viddhamsetvā vippakiri. Sakuņo tasmim kulāvakam gaņhante eva ekena passena nikkhamitvā palāyi.

Satthā imam dhammadesanam āharitvā jātakam samodhānesi "tadā makkato kuṭidūsakabhikkhu ahosi, siṅgilasakuṇo Kassapo

ahosī"ti. Jātakam samodhānetvā "evam bhikkhave na idāneva, pubbepi so ovādakkhaņe kujjhitvā kuṭim dūsesi, mama puttassa Kassapassa evarūpena bālena saddhim vasanato ekakasseva nivāso seyyo"ti vatvā imam gāthamāha—

61. "Carañce nādhigaccheyya, seyyaṁ sadisamattano. Ekacariyaṁ daļhaṁ kayirā, natthi bāle sahāyatā"ti.

Tattha caranti iriyāpathacāram aggahetvā manasācāro veditabbo, kalyāṇamittam pariyesantoti attho. Seyyam sadisamattanoti attano sīlasamādhipaññāguṇehi adhikataram vā sadisam vā na labheyya ce. Ekacariyanti etesu hi seyyam labhamāno sīlādīhi vaḍḍhati, sadisam labhamāno na parihāyati, hīnena pana saddhim ekato vasanto ekato sambhogaparibhogam taronto sīlādīhi parihāyati. Tena vuttam "evarūpo puggalo na sevitabbo na bhajitabbo na payirupāsitabbo aññatra anuddayā aññatra anukampā"ti¹. Tasmā sace kāruññam paṭicca "ayam mam nissāya sīlādīhi vaḍḍhissatī"ti tamhā puggalā kiñci apaccāsīsanto tam saṅgaṇhitum sakkoti. Iccetam kusalam. No ce sakkoti, ekacariyam daļham kayirā ekībhāvameva thiram katvā sabba-iriyāpathesu ekakova vihareyya. Kim kāraṇā? Natthi bāle sahāyatāti sahāyatā nāma cūļasīlam majjhimasīlam mahāsīlam dasa kathāvatthūni terasa dhutaṅgaguṇā vipassanāguṇā cattāro maggā cattāri phalāni tisso vijjā cha abhiññā. Ayam sahāyatāguṇo bālam nissāya natthīti.

Desanāvasāne āgantuko bhikkhu sotāpattiphalam patto, aññepi bahū sotāpattiphalādīni pāpuņimsu, desanā mahājanassa sātthikā ahosīti.

Mahākassapattherasaddhivihārikavatthu dutiyam.

#### 3. Ānandasetthivatthu

**Puttā matthī**ti imam dhammadesanam Satthā Sāvatthiyam viharanto Ānandaseṭṭhim ārabbha kathesi.

Sāvatthiyam kira Ānandaseṭṭhi nāma cattālīsakoṭivibhavo mahāmaccharī ahosi. So anvaḍḍhamāsam ñātake sannipātetvā puttam mūlasirim nāma tīsu velāsu evam ovadati "idam cattālīsakoṭidhanam 'bahū'ti mā saññam kari, vijjamānam dhanam na dātabbam, navam dhanam uppādetabbam¹. Ekekampi hi kahāpaṇam vayam karontassa pana² khīyateva. Tasmā—

Añjanānam khayam disvā, upacikānañca ācayam. Madhūnañca samāhāram, pandito gharamāvase"ti.

So aparena samayena attano pañca mahānidhiyo puttassa anācikkhitvā dhananissito maccheramalamalino kālaṁ katvā tasseva nagarassa ekasmiṁ dvāragāmake caṇḍālānaṁ kulasahassaṁ paṭivasati. Tatthekissā caṇḍāliyā kucchismiṁ paṭisandhiṁ gaṇhi. Rājā tassa kālakiriyaṁ sutvā puttamassa mūlasiriṁ pakkosāpetvā seṭṭhiṭṭhāne ṭhapesi. Tampi caṇḍālakulasahassaṁ ekatova bhatiyā kammaṁ katvā jīvamānaṁ tassa paṭisandhiggahaṇato paṭṭhāya neva bhatiṁ labhati, na yāpanamattato paraṁ bhattapiṇḍampi. Te "mayaṁ etarahi kammaṁ karontāpi piṇḍabhattampi na labhāma, amhākaṁ antare kāḷakaṇṇiyā bhavitabban"ti dve koṭṭhāsā hutvā yāva tassa mātāpitaro visuṁ honti, tāva vibhajitvā "imasmiṁ kule kāḷakaṇṇī uppannā"ti tassa mātaraṁ nīhariṁsu.

Sāpi yāvassā so kucchigato, tāva yāpanamattampi kicchena labhitvā puttam vijāyi. Tassa hatthā ca pādā ca akkhīni ca kaṇṇā ca nāsā ca mukhañca yathāṭhāne na ahesum. So evarūpena aṅgavekallena samannāgato paṁsupisācako viya ativirūpo ahosi. Evaṁ santepi taṁ mātā na pariccaji. Kucchiyaṁ vasitaputtasmiṁ hi sineho balavā hoti. Sā taṁ kicchena posayamānā taṁ ādāya gatadivase kiñci alabhitvā gehe katvā sayameva gatadivase bhatiṁ labhati. Atha naṁ piṇḍāya caritvā jīvituṁ samatthakāle sā kapālakaṁ hatthe ṭhapetvā

"Tāta mayam tam nissāya mahādukkham pattā, idāni na sakkomi tam posetum, imasmim nagare kapaṇaddhikādīnam paṭiyattabhattāni atthi, tattha bhikkhāya caritvā jīvāhī"ti tam vissajjesi. So gharapaṭipāṭiyā caranto Ānandaseṭṭhikāle nivutthaṭṭhānam¹ gantvā jātissaro hutvā attano geham pāvisi. Tīsu pana dvārakoṭṭhakesu na koci sallakkhesi. Catutthe dvārakoṭṭhake Mūlasiriseṭṭhino puttakā disvā ubbiggahadayā parodimsu. Atha nam seṭṭhipurisā "nikkhama kāļakaṇṇī"ti pothetvā nīharitvā saṅkāraṭṭhāne khipimsu. Satthā Ānandattherena pacchāsamaṇena piṇḍāya caranto tam ṭhānam patto theram oloketvā tena puṭṭho tam pavattim ācikkhi. Thero Mūlasirim pakkosāpesi. Atha mahājanakāyo sannipati. Satthā Mūlasirim āmantetvā "jānāsi etan"ti pucchitvā "na jānāmī"ti vutte "pitā te Ānandaseṭṭhī"ti vatvā asaddahantam "Ānandaseṭṭhi puttassa te pañca mahānidhiyo ācikkhāhī"ti ācikkhāpetvā saddahāpesi. So Satthāram saraṇam agamāsi. Tassa dhammam desento imam gāthāmāha—

62. "Puttā matthi dhanammatthi, iti bālo vihaññati. Attā hi attano natthi, kuto puttā kuto dhanan"ti.

Tassattho—puttā me atthi, dhanaṁ me atthi, iti bālo puttataṇhāya ceva dhanataṇhāya ca haññati vihaññati dukkhayati, "puttā me nassiṁsū"ti vihaññati, "nassantī"ti vihaññati. Dhanepi eseva nayo. Iti chahākārehi vihaññati. "Putte posessāmī"ti rattiṁ ca divā ca thalajalapathādīsu nānappa kārato vāyamantopi vihaññati, "dhanaṁ uppādessāmī"ti kasivāṇijjādīni karontopi vihaññateva. Evaṁ vihaññassa ca attā hi attano natthi tena vighātena dukkhitaṁ attānaṁ sukhitaṁ kātuṁ asakkontassa pavattiyampissa attā hi attano natthi, maraṇamañce nipannassa māraṇantikāhi vedanāhi aggijālāhi viya pariḍayhamānassa chijjamānesu sandhibandhanesu, bhijjamānesu aṭṭhisaṅghāṭesu nimīletvā paralokaṁ ummīletvā idhalokaṁ passantassāpi divase divase dvikkhattuṁ nhāpetvā tikkhattuṁ bhojetvā gandhamālādīhi alaṅkaritvā yāvajīvaṁ positopi²

sahāyabhāvena dukkhaparittāṇaṁ kātuṁ asamatthatāya attā hi attano natthi. **Kuto puttā kuto dhanaṁ** puttā vā dhanaṁ vā tasmiṁ samaye kimeva karissanti, Ānandaseṭṭhinopi kassaci kiñci adatvā puttassatthāya dhanaṁ saṇṭhapetvā pubbe vā maraṇamañce nipannassa, idāni vā imaṁ dukkhaṁ pattassa kuto puttā kuto dhanaṁ. Puttā vā dhanaṁ vā tasmiṁ samaye kiṁ dukkhaṁ hariṁsu, kiṁ vā sukhaṁ uppādayiṁsūti.

Desanāvasāne caturāsītiyā pāṇasahassānaṁ dhammābhisamayo ahosi, desanā mahājanassa sātthikā ahosīti.

Ānandaseṭṭhivatthu tatiyam.

## 4. Ganthibhedakacoravatthu

Yo bāloti imam dhammadesanam Satthā Jetavane viharanto Gaṇṭhibhedakacore ārabbha kathesi.

Te kira dve sahāyakā dhammassavanatthāya gacchantena mahājanena saddhim Jetavanam gantvā eko dhammakatham assosi, eko attano gayhūpagam olokesi. Tesu eko dhammam suṇamāno sotāpattiphalam pāpuṇi, itaro ekassa dussante baddham pañcamāsakamattam labhi. Tassa tam gehe pākabhattam¹ jātam, itarassa gehe na paccati. Atha nam sahāyakacoro attano bhariyāya saddhim uppaṇḍayamāno "tvam atipaṇḍitatāya attano gehe pākabhattamūlampi na nipphādesī"ti āha. Itaro pana "bālabhāveneva vatāyam² attano paṇḍitabhāvam maññatī"ti tam pavattim Satthu ārocetum ñātīhi saddhim Jetavanam gantvā ārocesi. Satthā tassa dhammam desento imam gāthamāha—

63. "Yo bālo mañnati bālyam, paṇḍito vāpi tena so. Bālo ca paṇḍitamānī, sa ve 'bālo'ti vuccatī"ti.

Tattha **yo bālo**ti yo andhabālo apaṇḍito samāno "bālo ahan"ti attano bālyaṁ bālabhāvaṁ maññati jānāti. **Tena** 

soti tena kāraņena so puggalo paṇḍito vāpi hoti paṇḍitasadiso vā. So hi "bālo ahan"ti jānamāno aññaṁ paṇḍitaṁ upasaṅkamanto payirupāsanto tena paṇḍitabhāvatthāya ovadiyamāno anusāsiyamāno taṁ ovādaṁ gaṇhitvā paṇḍito vā hoti paṇḍitataro vā. Save bāloti yo ca bālo samāno "ko añño mayā sadiso bahussuto vā dhammakathiko vā vinayadharo vā dhutaṅgadharo¹ vā atthī"ti evaṁ paṇḍitamānī hoti, so aññaṁ paṇḍitaṁ anupasaṅkamanto apayirupāsanto neva pariyattiṁ uggaṇhāti, na paṭipattiṁ pūreti, ekanta bālabhāvameva pāpuṇāti. So Gaṇṭhibhedakacoro viya. Tena vuttaṁ "sa ve 'bālo'ti vuccatī"ti.

Desanāpariyosāne itarassa ñātakehi saddhim mahājano sotāpattiphalādīni pāpuņīti.

Ganthibhedakacoravatthu catuttham.

### 5. Udāyittheravatthu

Yāvajīvampi ce bāloti imam dhammadesanam Satthā Jetavane viharanto Udāyittheram ārabbha kathesi.

So kira mahātheresu paṭikkantesu dhammasabhaṁ gantvā dhammāsane nisīdi. Atha naṁ ekadivasaṁ āgantukā bhikkhū disvā "ayaṁ bahussuto mahāthero bhavissatī"ti maññamānā khandhādipaṭisaṁyuttaṁ pañhaṁ pucchitvā kiñci ajānamānaṁ "ko eso, Buddhehi saddhiṁ ekavihāre vasamāno khandhadhātu āyatanamattampi na jānātī"ti garahitvā taṁ pavattiṁ Tathāgatassa ārocesuṁ. Satthā tesaṁ dhammaṁ desento imaṁ gāthamāha—

64. "Yāvajīvampi ce bālo, paṇḍitam payirupāsati. Na so dhammam vijānāti, dabbī sūparasam yathā"ti.

Tassattho—**bālo** nāmesa yāvajīvampi paṇḍitaṁ upasaṅkamanto payirupāsanto "idaṁ Buddhavacanaṁ, ettakaṁ Buddhavacanan"ti evaṁ pariyattidhammaṁ vā

"Ayam cāro, ayam vihāro, ayam ācāro, ayam gocaro, idam sāvajjam, idam anavajjam, idam sevitabbam, idam na sevitabbam, idam paṭivijjhitabbam, idam sacchikātabban"ti evam paṭipattipaṭivedhadhammam vā na jānāti. Yathā kim? **Dabbī sūparasam yathā**ti. Yathā hi dabbī yāva parikkhayā nānappakārāya sūpavikatiyā samparivattamānāpi "idam loṇikam, idam aloṇikam, idam tittakam, idam khārikam, idam kaṭukam, idam ambilam, idam kasāvan"ti sūparasam na jānāti, evameva bālo yāvajīvampi paṇḍitam payirupāsamāno vuttappakāram dhammam na jānātīti.

Desanāvasāne āgantukā bhikkhū āsavehi cittāni vimuccimsūti.

Udāyittheravatthu pañcamam.

#### 6. Timsamattapāveyyakabhikkhuvatthu

**Muhuttamapi ce viññū**ti imam dhammadesanam Satthā Jetavane viharanto timsamatte Pāveyyake<sup>1</sup> bhikkhū ārabbha kathesi.

Tesañhi Bhagavā itthim pariyesantānam Kappāsikavanasaṇḍe paṭhamam dhammam deseti. Tadā te sabbeva ehibhikkhubhāvam patvā iddhimayapattacīvaradharā hutvā terasa dhutaṅgāni samādāya vattamānā punapi dīghassa addhuno accayena Satthāram upasaṅkamitvā Anamataggadhammadesanam² sutvā tasmimyeva āsane arahattam pāpuṇimsu. Bhikkhū "aho vatimehi bhikkhūhi khippameva dhammo viññāto"ti dhammasabhāyam katham samuṭṭhāpesum. Satthā tam sutvā "na bhikkhave idāneva, pubbepi ime timsamattā sahāyakā dhuttā hutvā Tuṇḍilajātake³ Mahātuṇḍilassa dhammadesanam sutvāpi khippameva dhammam viññāya pañca sīlāni samādiyimsu, te teneva upanissayena etarahi nisinnāsaneyeva arahattam pattā"ti vatvā dhammam desento imam gāthamāha—

65. "Muhuttamapi ce viññū, paṇḍitaṁ payirupāsati. Khippaṁ dhammaṁ vijānāti, jivhā sūparasaṁ yathā"ti Tassattho—viññū paṇḍitapuriso muhuttamapi ce aññaṁ paṇḍitaṁ payirupāsati, so tassa santike uggaṇhanto paripucchanto khippameva pariyattidhammaṁ vijānāti. Tato kammaṭṭhānaṁ kathāpetvā paṭipattiyaṁ ghaṭento vāyamanto yathā nāma anupahatajivhāpasādo puriso rasavijānanatthaṁ jivhagge ṭhapetvā eva loṇikādibhedaṁ rasaṁ vijānāti, evaṁ paṇḍito khippameva lokuttaradhammampi vijānātīti.

Desanāvasāne bahū bhikkhū arahattam pāpunimsūti.

Timsamattapāveyyakabhikkhuvatthu chaṭṭham.

#### 7. Suppabuddhakutthivatthu

Caranti bālā dummedhāti imam dhammadesanam Satthā Veļuvane viharanto Suppabuddhakuṭṭhim ārabbha kathesi. Suppabuddhakuṭṭhivatthu Udāne¹ āgatameva.

Tadā hi Suppabuddhakuṭṭhi parisapariyante nisinno Bhagavato dhammadesanaṁ sutvā sotāpattiphalaṁ patvā attanā paṭiladdhaguṇaṁ Satthu ārocetukāmo parisamajjhe ogāhituṁ avisahanto mahājanassa Satthāraṁ vanditvā anugantvā nivattanakāle vihāraṁ agamāsi. Tasmiṁ khaṇe Sakko devarājā "ayaṁ Suppabuddhakuṭṭhi attano Satthu sāsane paṭiladdhaguṇaṁ pākaṭaṁ kātukāmo"ti ñatvā "vīmaṁsissāmi nan"ti gantvā ākāse ṭhitova etadavoca "Suppabuddha tvaṁ manussadaliddo manussavarāko, ahaṁ te apariyantaṁ dhanaṁ dassāmi, 'Buddho na Buddho, dhammo na dhammo, saṁgho na saṁgho, alaṁ me Buddhena, alaṁ me dhammena, alaṁ me saṁghenā'ti vadehī"ti. Atha naṁ so āha "kosi tvan"ti. Ahaṁ Sakkoti. Andhabāla ahirika tvaṁ mayā saddhiṁ kathetuṁ na yuttarūpo, tvaṁ maṁ "duggato daliddo kapaṇo"ti vadesi, nevāhaṁ duggato, na daliddo, sukhappatto ahamasmi mahaddhano—

"Saddhādhanam sīladhanam, hirī ottappiyam dhanam. Sutadhananca cāgo ca, paññā ve sattamam dhanam.

Yassa ete dhanā atthi, itthiyā purisassa vā. 'Adaliddo'ti tam āhu, amogham tassa jīvitan"ti<sup>1</sup>—

Imāni me sattavidha-ariyadhanāni santi. Yesañhi imāni satta dhanāni santi, na te Buddhehi vā Paccekabuddhehi vā "daliddā"ti vuccantīti. Sakko tassa kathaṁ sutvā taṁ antarāmagge ohāya Satthu santikaṁ gantvā sabbaṁ taṁ vacanapaṭivacanaṁ ārocesi. Atha naṁ Bhagavā āha "na kho Sakka sakkā tādisānaṁ satenapi sahassenapi Suppabuddhakuṭṭhiṁ 'Buddho na Buddho'ti vā, 'dhammo na dhammo'ti vā, 'saṁgho na saṁgho'ti vā kathāpetun"ti. Suppabuddhopi kho kuṭṭhi Satthu santikaṁ gantvā Satthārā katapaṭisanthāro sammodamāno attanā paṭiladdhaguṇaṁ ārocetvā vuṭṭhāyāsanā pakkāmi. Atha naṁ acirapakkantaṁ gāvī taruṇavacchā jīvitā voropesi.

Sā kira ekā yakkhinī Pukkusātikulaputtam, Bāhiyam dārucīriyam, Tambadāthitacoraghātakam, Suppabuddhakutthinti imesam catunnam janānam anekasate attabhāve gāvī hutvā jīvitā voropesi. Te kira atīte cattāro setthiputtā hutvā ekam nagarasobhinim ganikam uyyānam netvā divasam sampattim anubhavitvā sāyanhasamaye evam sammantayimsu "imasmim thāne añño natthi, imissā amhehi dinnam kahāpanasahassañca sabbañca pasādhanabhandam gahetvā imam māretvā gacchāmā"ti. Sā tesam katham sutvā "ime nillajjā, mayā saddhim abhiramitvā idāni mam māretukāmā, jānissāmi nesam kattabbayuttakan"ti tehi māriyamānā "aham yakkhinī hutvā yathā mam ete mārenti, evameva te māretum samatthā bhaveyyan"ti patthanam akāsi. Tassa nissandena ime māresi. Sambahulā bhikkhū tassa kālakiriyam Bhagavato ārocetvā "tassa kā gati, kena ca kāranena kutthibhavam patto"ti pucchimsu. Sattha sotapattiphalam patva tassa Tāvatimsabhavane uppannabhāvañca Tagarasikhipaccekabuddham disvā nitthubhitvā apasabyam<sup>2</sup> katvā dīgharattam niraye paccitvā vipākāvasesena idāni kutthibhāvappattim ca byākaritvā "bhikkhave ime sattā

<sup>1.</sup> Am 2. 398, 399 pitthesu.

<sup>2.</sup> Apasādam (Sī), apabyāyam (Syā), appabyāyakammam (Ka) udāne Suppabuddhakuṭṭhisuttavaṇṇanā passitabbā.

attanāva attano kaṭukavipākakammam karonto vicarantī"ti vatvā anusandhim ghaṭetvā uttari dhammam desento imam gāthamāha—

66. "Caranti bālā dummedhā, amitteneva attanā. Karontā pāpakam kammam, yam hoti kaṭukapphalan"ti.

Tattha **carantī**ti catūhi iriyāpathehi akusalameva karontā vicaranti. **Bālā**ti idhalokatthañca paralokatthañca ajānantā idha bālā nāma. **Dummedhā**ti duppaññā. **Amitteneva attanā**ti attano amittabhūtena viya verinā hutvā. **Kaṭukapphalan**ti tikhinaphalam dukkhaphalanti.

Desanāvasāne bahū sotāpattiphalādīni pāpuņimsūti.

Suppabuddhakutthivatthu sattamam.

#### 8. Kassakavatthu

Na tam kammam katam sādhūti imam dhammadesanam Satthā Jetavane viharanto ekam Kassakam ārabbha kathesi.

So kira Sāvatthito avidūre ekam khettam kasati. Corā udakaniddhamanena nagaram pavisitvā ekasmim aḍḍhakule umaṅgam bhinditvā bahum hiraññasuvaṇṇam gahetvā udakaniddhamaneneva nikkhamimsu. Eko coro te vañcetvā ekam sahassatthavikam ovaṭṭikāya katvā tam khettam gantvā tehi saddhim bhaṇḍam bhājetvā ādāya gacchanto ovaṭṭikato patamānam sahassatthavikam na sallakkhesi. Tam divasam Satthā paccūsasamaye lokam volokento tam Kassakam attano ñāṇajālassa antopaviṭṭham disvā "kim nu kho bhavissatī"ti upadhārayamāno idam addasa "ayam Kassako pātova kasitum gamissati, bhaṇḍasāmikā corānam anupadam gantvā ovaṭṭikato patamānam sahassatthavikam disvā ekam gaṇhissanti, mam ṭhapetvā tassa añño sakkhī nāma na bhavissati, sotāpattimaggassa upanissayopissa atthi, tattha mayā gantum vaṭṭatī"ti. Sopi Kassako pātova kasitum gato. Satthā Ānandattherena pacchāsamaṇena tattha agamāsi. Kassako Satthāram disvā gantvā

Bhagavantam vanditvā puna kasitum ārabhi. Satthā tena saddhim kiñci avatvāva sahassatthavikāya patitaṭṭhānam gantvā tam disvā Ānandattheram āha "passa Ānanda, āsīviso"ti. Passāmi bhante, ghoravisoti.

Kassako tam katham sutvā "mama velāya vā avelāya vā vicaranatthānametam, āsīviso kirettha atthī"ti cintetvā Satthari ettakam vatvā pakkante "māressāmi nan"ti patodalatthim ādāya gato sahassabhandikam disvā "imam sandhāya Satthārā kathitam bhavissatī"ti tam ādāya nivatto, abyattatāya ekamante thapetvā pamsunā paticchādetvā puna kasitum ārabhi. Manussā ca vibhātāya rattiyā gehe corehi katakammam disvā padānupadam gacchantā tam khettam gantvā tattha corehi bhandassa bhājitatthānam disvā Kassakassa padavalañjam addasamsu. Te tassa padānusārena gantvā thavikāya thapitatthānam disvā pamsum viyūhitvā thavikam<sup>1</sup> ādāya "tvam geham vilumpitvā khettam kasamāno viva vicarasī"ti tajjetvā pothetvā netvā rañño dassayimsu. Rājā tam pavattim sutvā tassa vadham ānāpesi. Rājapurisā tam pacchābāham bandhitvā kasāhi tālentā āghātanam nayimsu. So kasāhi tāļiyamāno aññam kiñci avatvā "passānanda āsīvisoti, passāmi Bhagavā ghoraviso"ti vadanto gacchati. Atha nam rājapurisā "tvam Satthu ceva Ānandattherassa ca katham kathesi, kim nāmetan"ti pucchitvā "rājānam datthum labhamāno kathessāmī"ti vutte rañño santikam netvā rañño tam pavattim kathayimsu. Atha nam rajā "kasma evam kathesī"ti pucchi. So "nāham deva coro"ti vatvā kasanatthāya nikkhantakālato patthāya sabbam tam pavattim rañño ācikkhi. Rājā tassa katham sutvā "ayam bhane loke aggapuggalam Satthāram sakkhim apadisati, na yuttam etassa dosam āropetum, ahamettha kattabbam jānissāmī"ti tam ādāya sāyanhasamaye Satthu santikam gantvā Satthāram pucchi "Bhagavā kacci tumhe Ānandattherena saddhim etassa Kassakassa kasanatthānam gatā"ti. Ama mahārājāti. Kim vo tattha ditthanti. Sahassatthavikā mahārājāti. Disvā kim avocutthāti. Idam nāma mahārājāti. Bhante sacāyam puriso tumhādisam apadisam nākarissa, na jīvitam alabhissa, tumhehi

\_\_\_\_\_

pana kathitakatham kathetvā tena jīvitam laddhanti. Tam sutvā Satthā "āma mahārāja, ahampi ettakameva vatvā gato, paṇḍitena nāma yam kammam katvā pacchānutappam hoti, tam na kattabban"ti vatvā anusandhim ghaṭetvā dhammam desento imam gāthamāha—

67. "Na tam kammam katam sādhu, yam katvā anutappati. Yassa assumukho rodam, vipākam paţisevatī"ti.

Tattha **na taṁ kamman**ti yaṁ nirayādīsu nibbattanasamatthaṁ dukkhudrayaṁ kammaṁ katvā anussaranto anussaritānussaritakkhaṇe anutappati anusocati, taṁ kataṁ **na sādhu** na sundaraṁ niratthakaṁ¹. **Yassa assumukho**ti yassa assūhi tintamukho rodanto vipākaṁ anubhotīti.

Desanāvasāne Kassako upāsako sotāpattiphalam patto, sampattabhikkhūpi sotāpattiphalādīni pāpuņimsūti.

Kassakavatthu atthamam.

#### 9. Sumanamālākāravatthu

**Tañca kammaṁ kataṁ sādhū**ti imaṁ dhammadesanaṁ Satthā Veļuvane viharanto Sumanaṁ nāma mālākāraṁ ārabbha kathesi.

So kira devasikam Bimbisārarājānam pātova aṭṭhahi
Sumanapupphanāļīhi upaṭṭhahanto aṭṭha kahāpaṇe labhati. Athekadivasam tasmim pupphāni gahetvā nagaram paviṭṭhamatte Bhagavā mahābhikkhusamghaparivuto chabbaṇṇaramsiyo vissajjetvā mahatā Buddhānubhāvena mahatiyā Buddhalīļāya nagaram piṇḍāya pāvisi. Bhagavā hi ekadā bhabbaṇṇaramsiyo cīvarena paṭicchādetvā aññataro piṇḍapātiko viya carati timsayojanamaggam Aṅgulimālassa paccuggamanam gacchanto viya, ekadā chabbaṇṇaramsiyo vissajjetvā Kapilavatthuppavesanādīsu viya. Tasmimpi divase sarīrato chabbaṇṇaramsiyo vissajjento mahantena Buddhānubhāvena mahatiyā Buddhalīļāya rājagaham pāvisi. Mālākāro Bhagavato ratanagghiyasadisam² attabhāvam disvā

<sup>1.</sup> Na latthakam (Sī), na silitthakam (Syā)

<sup>2.</sup> Ratanagghiyakañcanagghiyasadisam (Sī, Syā)

dvattimsamahāpurisalakkhaṇa-asītānubyañjanasarīrasobhaggam oloketvā pasannacitto "kim nu kho Satthu adhikāram karomī"ti cintetvā aññam apassanto "imehi pupphehi Bhagavantam pūjessāmī"ti cintetvā puna cintesi "imāni rañño nibaddham upaṭṭhānapupphāni, rājā imāni alabhanto mam bandhāpeyya vā ghātāpeyya vā raṭṭhato vā pabbājeyya, kim nu kho karomī"ti. Athassa etadahosi "rājā mam ghātetu vā bandhāpetu vā raṭṭhato pabbājetu vā, so hi mayham dadamānovi imasmim attabhāve jīvitamattam dhanam dadeyya, Satthupūjā pana me anekāsu kappakoṭīsu alam hitāya ceva sukhāya cā"ti attano jīvitam Tathāgatassa pariccaji.

So "yāva me pasannam cittam na patikuṭati, tam tāvadeva pūjam karissāmī'ti hatthatutho udaggudaggo Satthāram pūjesi. Katham? Pathamam tāva dveva pupphamutthiyo Tathāgatassa upari khipi, tā uparimatthake vitānam hutvā atthamsu. Aparā dve mutthiyo khipi, tā dakkhinahatthapassena mālā patacchannena<sup>1</sup> otaritvā atthamsu. Aparā dve mutthiyo khipi, tā pitthipassena otaritvā tatheva atthamsu. Aparā dve mutthiyo khipi, tā vāmahatthapassena otaritvā tatheva atthamsu. Evam attha nāliyo attha mutthiyo hutvā catūsu thānesu Tathāgatam parikkhipimsu. Purato gamanadvāramattameva ahosi. Pupphānam vantāni anto ahesum, pattāni bahimukhāni. Bhagavā rajatapattaparikkhitto viya hutvā pāyāsi. Pupphāni acitta kānipi sacittakam nissāya sacittakāni viya abhijjitvā apatitvā Satthārā saddhimyeva gacchanti, thitathitatthāne titthanti. Satthu sarīrato satasahassavijjulatā<sup>2</sup> viya ramsiyo nikkhamimsu. Purato ca pacchato ca dakkhinato ca vāmato ca sīsamatthakato ca nirantaram nikkhantaramsīsu ekāpi sammukhasammukhatthāneneva apalāyitvā sabbāpi Satthāram tikkhattum padakkhinam katvā tarunatālakkhandhappamānā hutvā purato eva dhāvanti. Sakalanagaram sankhubhi. Antonagare nava kotiyo, bahinagare nava kotivoti atthārasasu kotīsu ekopi puriso vā itthī vā bhikkham gahetvā anikkhanto nāma natthi. Mahājano sīhanādam nadanto celukkhepasahassāni karonto Satthu puratova gacchati. Satthāpi mālākārassa guņam pākaṭam kātum tigāvutappamāņe nagare

bhericaraṇamaggeneva acari. Mālākārassa sakalasarīraṁ pañcavaṇṇāya pītiyā paripūri.

So thokaññeva Tathāgatena saddhim caritvā manosilārase<sup>1</sup> nimuggo viya Buddharasmīnam anto pavittho Satthāram thometvā vanditvā tucchapacchimeva gahetvā geham agamāsi. Atha nam bhariyā pucchi "kaham pupphānī"ti. Satthā me pūjitoti. Rañño dāni kim karissasīti. Rājā mam ghātetu vā ratthato vā nīharatu, aham jīvitam pariccajitvā Satthāram pūjesim, sabbapupphāni attha mutthiyova ahesum, evarūpā nāma pūjā jātā. Mahājano ukkutthisahassāni karonto Satthārā saddhim carati, yo esa mahājanassa ukkutthisaddo, tasmim thāne esoti. Athassa bhariyā andhabālatāya evarūpe pātihāriye pasādam nāma ajanetvā tam akkositvā paribhāsitvā "rājāno nāma candā, sakim kuddhā hatthapādādicchedanena bahumpi anattham karonti, tayā katakammena mayhampi anattho siyā"ti putte ādāya rājakulam gantvā raññā pakkositvā kim etan"ti pucchitā āha "mama sāmiko tumhākam upatthānapupphehi Satthāram pūjetvā tucchahattho gharam agantva "kaham pupphani"ti maya puttho idam nama vadesi, aham tam paribhāsitvā 'rājāno nāma candā, sakim kuddhā hatthapādādicchedanena bahumpi anattham karonti, tayā katakammena mayhampi anattho siyā'ti tam chaddetvā idhāgatā, tena katam kammam sukatam vā hotu, dukkatam vā, tassevetam, mayā tassa chadditabhāvam jānāhi devā"ti. Rājā pathamadassaneneva sotāpattiphalam patto saddho pasanno ariyasāvako cintesi "aho ayam itthī andhabālā, evarūpe gune pasādam na uppādesī"ti. So kuddho viya hutvā amma kim vadesi, mayham upatthānapupphehi tena pūjā katāti. Āma devāti. "Bhaddakam te katam tam chaddentiyā, mama pupphehi pūjākārassa aham kattabbayuttakam jānissāmī"ti tam uyvojetvā vegena Satthu santikam gantvā vanditvā Satthārā saddhimyeva vicari.

Satthā rañño cittappasādam ñatvā bhericaraṇavīthiyā nagaram caritvā rañño gharadvāram agamāsi. Rājā pattam gahetvā Satthāram geham pavesetukāmo ahosi. Satthā pana rājangaṇeyeva nisīdanākāram

dassesi. Rājā tam natvā "sīgham mandapam karothā" ti tankhananneva mandapam kārāpesi. Nisīdi Satthā saddhim bhikkhusamghena. Kasmā pana Satthā rājageham na pāvisi? Evam kirassa ahosi "sacāham anto pavisitvā nisīdevyam, mahājano mam datthum na labheyya, mālākārassa guno pākato na bhaveyya, rājangane pana mam nisinnam mahājano datthum labhissati, mālākārassa guno pākato bhavissatī"ti. Gunavantānañhi gunam Buddhā eva pākatam kātum sakkonti, avasesajano gunavantānam gunam kathento maccharāyati. Cattāro pupphapatā<sup>1</sup> catuddisam atthamsu. Mahājano Satthāram parivāresi. Rājā Buddhappamukham bhikkhusamgham panītenāhārena parivisi. Satthā bhattakiccāvasāne anumodanam katvā purimanayeneva catūhi pupphapatehi parikkhitto sīhanādam nadanto mahājanena parivuto vihāram agamāsi. Rājā Satthāram anugantvā nivatto mālākāram pakkosāpetvā "mama āharitapupphehi kinti katvā Satthāram pūjesī"ti pucchi. Mālākāro "rājā mam ghātetu vā ratthato vā pabbājetūti jīvitam pariccajitvā pūjesim devā"ti āha. Rājā "tvam mahāpuriso nāmā"ti vatvā attha hatthī ca asse ca dāse ca dāsiyo ca mahāpasādhanāni ca attha kahāpanasahassāni ca rājakulato nīharitvā sabbālankārappatimanditā attha nāriyo ca attha gāmavare cāti idam sabbatthakam nāma dānam adāsi.

Ānandatthero cintesi "ajja pātova paṭṭhāya sīhanādasahassāni ceva celukkhepasahassāni ca pavattanti, ko nu kho mālākārassa vipāko"ti. So Satthāram pucchi. Atha nam Satthā āha—Ānanda "iminā mālākārena appamattakam kammam katan"ti mā sallakkhesi. Ayam hi mayham jīvitam pariccajitvā pūjam akāsi, so evam mayi cittam pasādetvā—

"Kappānam satasahassam, duggatim na gamissati. Ṭhatvā<sup>2</sup> devamanussesu, phalam etassa kammuno. Pacchā paccekasambuddho, Sumano nāma bhavissatī"ti—

Āha. Satthu pana vihāram gantvā Gandhakuṭipavisanakāle tāni pupphāni dvārakoṭṭhake patimsu. Sāyanhasamaye bhikkhū dhammasabhāyam katham

samuṭṭhāpesuṁ "aho acchariyaṁ mālākārassa kammaṁ, dharamānakabuddhassa jīvitaṁ pariccajitvā pupphapūjaṁ katvā taṅkhaṇaññeva sabbaṭṭhakaṁ nāma labhatī"ti. Satthā Gandhakuṭito nikkhamitvā tiṇṇaṁ gamanānaṁ aññatarena gamanena dhammasabhaṁ gantvā Buddhāsane nisīditvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "āma bhikkhave, yassa kammassa katattā pacchānutappaṁ na hoti, anussaritānussaritakhaṇe somanassameva uppajjati, evarūpaṁ kammaṁ kattabbamevā"ti anusandhiṁ ghaṭetvā dhammaṁ desento imaṁ gāthamāha—

68. "Tañca kammaṁ kataṁ sādhu, yaṁ katvā nānutappati. Yassa patīto sumano, vipākaṁ patisevatī"ti.

Tattha yaṁ katvāti yaṁ devamanussasampattīnañceva nibbānasampattiyā ca nibbattanasamatthaṁ sukhudrayaṁ kammaṁ katvā nānutappati, atha kho diṭṭhadhammeyeva anussaritānussaritakkhaṇeyeva pītivegena patīto somanassavegena ca sumano hutvā āyatiṁ pītisomanassajāto hutvā vipākaṁ paṭisevati, taṁ kammaṁ kataṁ sādhu bhaddakanti.

Desanāvasāne caturāsītiyā pānasahassānam dhammābhisamayo ahosīti.

Sumanamālākāravatthu navamam.

## 10. Uppalavannattherīvatthu

**Madhuvā maññatī**ti imam dhammadesanam Satthā Jetavane viharanto Uppalavaṇṇattherim ārabbha kathesi.

Sā kira Padumuttarabuddhassa pādamūle patthanam paṭṭhapetvā kappasatasahassam puññāni kurumānā devesu ca manussesu ca samsarantī imasmim Buddhuppāde devalokato cavitvā Sāvatthiyam seṭṭhikule paṭisandhim gaṇhi. Nīluppalagabbhasamānavaṇṇatāya cassā Uppalavaṇṇātveva nāmam akamsu. Athassā vayappattakāle sakalajambudīpe rājāno ca seṭṭhino ca seṭṭhissa santikam sāsanam pahiṇimsu "dhītaram amhākam

detū''ti. Apahiṇanto nāma nāhosi. Tato seṭṭhi cintesi "ahaṁ sabbesaṁ manaṁ gahetuṁ na sakkhissāmi, upāyaṁ panekaṁ karissāmī''ti dhītaraṁ pakkosāpetvā "amma pabbajituṁ sakkhissasī''ti āha. Tassā pacchimabhavikattā taṁ vacanaṁ sīse āsittaṁ satapākatelaṁ viya ahosi. Tasmā pitaraṁ "pabbajissāmi tātā''ti āha. So tassā mahantaṁ sakkāraṁ katvā bhikkhunī-upassayaṁ netvā pabbājesi. Tassā acirapabbajitāya eva uposathāgāre kālavāro¹ pāpuṇi. Sā dīpaṁ jāletvā uposathāgāraṁ sammajjitvā dīpasikhāya nimittaṁ gaṇhitvā ṭhitāva punappunaṁ olokayamānā tejokasiṇārammaṇaṁ jhānaṁ nibbattetvā tameva pādakaṁ katvā arahattaṁ pāpuṇi saddhiṁ paṭisambhidāhi ceva abhiññāhi ca.

Sā aparena samayena janapadacārikam caritvā paccāgantvā Andhavanam pāvisi. Tadā bhikkhunīnam araññavāso appatikkhitto hoti. Athassā tattha kutikam² katvā mancakam pannāpetvā sānivā parikkhipimsu. Sā Sāvatthiyam pindāya pavisitvā nikkhami. Mātulaputto panassā Nandamānavo nāma gihikālato patthāya patibaddhacitto, so tassā āgatabhāvam sutvā theriyā āgamanato puretarameva Andhavanam gantvā tam kutikam pavisitvā hetthāmancake nilīno theriyā agantvā kutikam pavisitvā dvāram pidhāya mañcake nisinnamattāya bahi ātapato āgatattā cakkhupathe andhakāre avigateyeva hetthāmañcakato nikkhamitvā mañcakam abhiruyha "mā nassi bāla, mā nassi bālā"ti theriyā vāriyamānoyeva abhibhavitvā attanā patthitakammam katvā pāyāsi. Athassa agunam dhāretum asakkontī viya mahāpathavī dvedhā bhijji. So pathavim pavittho gantvā Mahā-avīcimhi eva nibbatti. Therīpi tamattham bhikkhunīnam ārocesi. Bhikkhuniyo bhikkhūnam etamattham ārocesum. Bhikkhū Bhagavato ārocayimsu. Tam sutvā Satthā bhikkhū āmantetvā "bhikkhave bhikkhubhikkhūnī upāsaka-upāsikāsu yo koci bālo pāpakammam karonto madhusakkharādīsu kiñci deva madhurarasam khādamāno puriso viya tutthahattho<sup>3</sup> udaggudaggo viya karotī"ti anusandhim ghatetvā dhammam desento imam gāthamāha—

<sup>1.</sup> Tālavāro (Sī), tālavāro (Syā)

<sup>2.</sup> Kutim (Ka) Vi 1. 43 pitthe passitabbam.

<sup>3.</sup> Hatthapahattho (Sī)

69. "Madhuvā maññati bālo, yāva pāpam na paccati. Yadā ca paccati pāpam, bālo dukkham nigacchatī"ti.

Tattha **madhuvā**ti bālassa hi pāpaṁ akusalakammaṁ karontassa taṁ kammaṁ madhu viya madhurarasaṁ viya iṭṭhaṁ kantaṁ manāpaṁ viya upaṭṭhāti. Iti naṁ so madhuṁva maññati. **Yāvā**ti yattakaṁ kālaṁ. **Pāpaṁ na paccatī**ti diṭṭhadhamme vā samparāye vā vipākaṁ na deti, tāva naṁ evaṁ maññati. **Yadā cā**ti yadā panassa diṭṭhadhamme vā vividhā kammakāraṇā kayiramānassa, samparāye vā nirayādīsu mahādukkhaṁ anubhavantassa taṁ pāpaṁ paccati, atha so bālo dukkhaṁ nigacchati vindati patilabhatīti.

Desanāvasāne bahū sotāpattiphalādīni pāpuņimsu.

Aparena pana samayena dhammasabhāyam mahājano katham samuṭṭhāpesi "khīṇāsavāpi maññe kāmasukham sādiyanti, kāmam sevanti, kim na sevissanti. Na hi ete koṭāparukkhā, na ca vammikā allamamsasarīrāva, tasmā etepi kāmasukham sādiyanti, kāmam sevantī"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "na bhikkhave khīṇāsavā kāmasukham sādiyanti, na kāmam sevanti. Yathā hi padumapatte patitam udakabindu na vilimpati, na saṇṭhāti, vinivattetvā patateva, yathā ca āragge sāsapo na vilimpati, na saṇṭhāti, vinivattetvā patateva, evam khīṇāsavassa citte duvidhopi kāmo na vilimpati, na saṇṭhātī"ti anusandhim ghaṭetvā dhammam desento imam Brāhmaṇavagge gāthamāha—

"Vāri pokkharapatteva, āraggeriva sāsapo. Yo na limpati kāmesu, tamaham brūmi brāhmanan"ti<sup>1</sup>.

Imissā attho Brāhmaṇavaggeyeva āvi bhavissati. Satthā pana rājānam Pasenadikosalam pakkosāpetvā "mahārāja imasmim sāsane yatheva kulaputtā, evam kuladhītaropi mahantam ñātigaṇañca bhogakkhandhañca pahāya pabbajitvā araññe viharanti, tā evam viharamānā rāgarattā pāpapuggalā omānātimānavasena viheṭhentipi, brahmacariyantarāyampi pāpenti, tasmā bhikkhunisaṃghassa antonagare vasanatṭhānam

kātum vaṭṭatī"ti. Rājā "sādhū"ti sampaṭicchitvā nagarassa ekapasse bhikkhunisamghassa vasanaṭṭhānam kārāpesi. Tato paṭṭhāya bhikkhuniyo antogāmeyeva vasantīti.

Uppalavannattherīvatthu dasamam.

#### 11. Jambukattheravatthu

**Māse māse**ti imam dhammadesanam Satthā Veļuvane viharanto Jambukam ājīvakam ārabbha kathesi.

Atīte kira Kassapasammāsambuddhakāle gāmavāsī eko kuṭumbiko ekassa therassa vihāram katvā tam tattha viharantam catūhi paccayehi upaṭṭhahi. Thero tassa gehe nibaddham bhuñjati. Atheko khīṇāsavo bhikkhu divā piṇḍāya caranto tassa gehadvāram pāpuṇi. Kuṭumbiko tam disvā tassa iriyāpathe pasanno geham pavesetvā sakkaccam paṇītena bhojanena parivisitvā "bhante imam sāṭakam rajitvā nivāseyyāthā"ti mahantam sāṭakam datvā "bhante kesā vo dīghā, tumhākam kesoropanatthāya nhāpitam ānessāmi, sayanatthāya ca vo mañcakam gāhāpetvā āgamissāmī"ti āha. Nibaddham gehe bhuñjanto kulūpako bhikkhu tam tassa sakkāram disvā cittam pasādetum nāsakkhi, "ayam tam muhuttam diṭṭhakassa evarūpam sakkāram karoti, nibaddham gehe bhuñjantassa pana mayham na karotī"ti cintetvā vihāram agamāsi. Itaropi teneva saddhim gantvā kuṭumbikena dinnasāṭakam rajitvā nivāsesi. Kuṭumbikopi nhāpitam ādāya gantvā therassa kese ohārāpetvā mañcakam attharāpetvā "bhante imasmimyeva mañcake sayathā"ti vatvā dvepi there svātanāya nimantetvā pakkāmi.

Nevāsiko tassa tam sakkāram kayiramānam adhivāsetum nāsakkhi. Athassa so sāyam therassa nipannaṭṭhānam gantvā catūhākārehi theram akkosi "āvuso āgantuka kuṭumbikassate gehe bhattam bhuñjanato varataram mīļham khāditum, kuṭumbikena ānītanhāpitena kesohārāpanato varataram tālaṭṭhikena kese luñcāpetum, kuṭumbikena dinnasāṭakanivāsanato varataram naggena vicaritum, kuṭumbikena ābhatamañcake nipajjanato

varataram bhūmiyam nipajjitun"ti. Theropi "mā esa bālo mam nissāya nassī''ti nimantanam anādiyitvā pātova utthāya yathāsukham agamāsi. Nevāsikopi pātova vihāre kattabbavattam katvā bhikkhācāravelāya "idānipi āgantuko niddāyati, ghandikasaddena pabujjheyyā"ti saññāya nakhapittheneva ghandim paharitvā gāmam pindāya pāvisi. Kutumbikopi sakkāram katvā therānam āgamanamaggam olokento nevāsikam disvā "bhante thero kuhin"ti pucchi. Atha nam nevāsiko "mā āvuso kiñci avaca<sup>1</sup>, tuyham kulūpako hiyyo tava nikkhantavelāya ovarakam pavisitvā niddam okkanto pātova utthāya mama vihārasammajjanasaddampi pānīyaghataparibhojanīyaghatesu udakasiñcanasaddampi ghandikasaddampi karontassa na jānātī"ti āha. Kutumbiko cintesi "tādisāya iriyāpathasampattiyā samannāgatassa me ayyassa yāva imamhā kālā niddāyanam nāma natthi, mam pana tassa sakkāram karontam disvā addhā iminā bhadantena kiñci vuttam bhavissatī"ti. So attano pandītabhāvena tam sakkaccam bhojetvā tassa pattam sādhukam dhovitvā nānaggarasabhojanassa pūretvā "bhante sace me ayyam passeyyātha, imamassa pindapātam dadeyyāthā"ti āha.

Itaro tam gahetvāva cintesi "sace so evarūpam piṇḍapātam bhuñjissati, imasmimyeva ṭhāne paluddho bhavissatī"ti antarāmagge tam piṇḍapātam chaḍḍetvā therassa vasanaṭṭhānam gantvā tam tattha olokento na addasa. Atha nam ettakassa kammassa katattā vīsativassasahassāni katopi samaṇadhammo rakkhitum nāsakkhi. Āyupariyosāne pana kālam katvā Avīcimhi nibbattitvā ekam Buddhantaram mahādukkham anubhavitvā imasmim Buddhuppāde Rājagahanagare ekasmim bahvannapāne kulaghare nibbatti. So padasā gamanakālato paṭṭhāya neva sayane sayitum, na bhattam bhuñjitum icchati, attano sarīravalañjameva khādati. "Bālatāya ajānanto karotī"ti tam posayimsu. Mahallakakālepi vattham nivāsetum na icchati, naggova vicarati, bhūmiyam sayati, attano sarīravalañjameva khādati. Athassa mātāpitaro "nāyam kulagharassa anucchaviko, kevalam alajjanako ājīvakānam esa anucchaviko"ti tesam santikam netvā "imam dārakam pabbājethā"ti adamsu. Atha nam te pabbājesum. Pabbājentā

ca pana galappamāņe āvāţe ṭhapetvā dvinnaṁ aṁsakūṭānaṁ upari¹ padarāni datvā tesaṁ upari nisīditvā tālaṭṭhikhaṇḍena kese luñciṁsu. Atha ne tassa mātāpitaro svātanāya nimantetvā pakkamiṁsu.

Punadivase ājīvakā "ehi, gāmam pavisissāmā"ti tam vadimsu. So "gacchatha tumhe, aham idheva bhavissāmī"ti na icchi. Atha nam punappunam vatvā anicchamānam ohāya agamamsu. Sopi tesam gatabhāvam ñatvā vaccakuṭiyā padaram vivaritvā oruyha ubhohi hatthehi ālopam ālopam katvā² gūtham khādi. Ājīvakā tassa antogāmato āhāram pahiṇimsu. Tampi na icchi. Punappunam vuccamānopi "na me iminā attho, laddho me āhāro"ti āha. Kaham laddhoti. Idheva laddhoti. Evam dutiye tatiye catutthepi divase tehi bahumpi vuccamāno "aham idheva bhavissāmī"ti gāmam gantum na icchi. Ājīvakā "ayam divase divase neva gāmam pavisitum icchati, na amhehi pahitāhāram āharitum icchati, 'idheva me laddho'ti vadati, kim nu kho karoti, pariggaṇhissāma nan"ti gāmam pavisantā ekam dve jane tassa pariggaṇhanattham ohāya gamimsu. Te pacchato gacchantā viya hutvā nilīyimsu. Sopi tesam gatabhāvam ñatvā purimanayeneva vaccakuṭim oruyha gūtham khādi.

Itare tassa kiriyam disvā ājīvakānam ārocayimsu. Tam sutvā ājīvakā "aho bhāriyam kammam, sace samaņassa Gotamassa sāvakā jāneyyum 'ājīvakā gūtham khādamānā vicarantī'ti amhākam akittim pakāseyyum, nāyam amhākam anucchaviko"ti tam attano santikā nīharimsu. So tehi nīharito mahājanassa uccārakaraṇaṭṭhāne pattharito eko piṭṭhipāsāṇo atthi, tasmim mahantam soṇḍi, piṭṭhipāsāṇam nissāya mahājanassa uccārakaraṇaṭṭhānam, so tattha gantvā rattim gūtham khāditvā mahājanassa sarīravalañjanatthāya āgamanakāle ekena hattena pāsāṇassa ekam antam olubbha ekam pādam ukkhipitvā jaṇṇuke ṭhapetvā uddhamvātābhimukho mukham vivaritvā tiṭṭhati. Mahājano tam disvā upasankamitvā vanditvā "bhante kasmā ayyo mukham vivaritvā ṭhito"ti pucchati. Aham vātabhakkho, añno me āhāro natthīti. Atha kasmā ekam pādam jaṇṇuke katvā ṭhitosi bhanteti. Aham

uggatapo ghoratapo, mayā dvīhi pādehi akkantā pathavī kampati, tasmā ekam pādam ukkhipitvā jaṇṇuke ṭhapetvā ṭhitomhi. Ahañhi rattindivam ṭhitakova vītināmemi, na nisīdāmi, na nipajjāmīti. Manussā nāma yebhuyyena vacanamattameva saddahanti, tasmā "aho acchariyam, evarūpāpi nāma tapassino honti, na no evarūpā diṭṭhapubbā"ti yebhuyyena Aṅgamagadhavāsino saṅkhubhitvā upasaṅkamitvā māse māse mahantam sakkāram abhiharanti. So "aham vātameva bhakkhāmi na aññam āhāram. Aññam hi me khādantassa tapo nassatī"ti tehi abhihaṭam na kiñci icchati. Manussā "mā no bhante nāsetha, tumhādisena ghoratapena paribhoge kate amhākam dīgharattam hitāya sukhāya samvattatī"ti punappunam yācanti. Tassa añño āhāro na ruccati, mahājanassa pana yācanāya pīļito tehi ābhatāni sappiphāṇitādīni kusaggena jivhagge ṭhapetvā "gacchatha, alam vo ettakam hitāya sukhāya cā"ti uyyojesi. Evam so pañcapaññāsa vassāni naggo gūtham khādanto kese luñcanto bhūmiyam sayamāno vītināmesi.

Buddhānampi kho paccūsakāle lokavolokanam avijahitameva hoti. Tasmā ekadivasam Bhagavato paccūsasamaye lokam volokentassa ayam Jambukājīvako ñāṇajālassa anto paññāyi. Satthā "kim nu kho bhavissatī"ti āvajjetvā tassa saha paṭisambhidāhi arahattassūpanissayam disvā "aham etam ādim katvā ekam gātham bhāsissāmi, gāthāvasāne caturāsītiyā pāṇasahassānam dhammābhisamayo bhavissati, imam kulaputtam nissāya mahājano sotthibhāvam pāpuṇissatī"ti ñatvā punadivase Rājagahe piṇḍāya caritvā piṇḍapātapaṭikkanto Ānandattheram āmantesi "Ānanda Jambukājīvakassa santikam gamissāmī"ti. Bhante kim tumheyeva gamissathāti. "Āma ahamevā"ti evam vatvā Satthā vaḍḍhamānakacchāyāya tassa santikam pāyāsi.

Devatā cintayimsu "Satthā sāyam Jambukājīvakassa santikam gacchati, so ca jegucche uccārapassāvadantakaṭṭhakiliṭṭhe piṭṭhipāsāṇe vasati, devam vassāpetum vaṭṭatī"ti attano ānubhāvena tam muhuttamyeva devam vassāpesum. Piṭṭhipāsāṇo suci nimmalo ahosi. Athassa

upari pañcavaṇṇaṁ pupphavassaṁ vassāpesuṁ. Satthā sāyaṁ Jambukājīvakassa santikaṁ gantvā "Jambukā"ti saddamakāsi. Jambuko "ko nu kho esa, dujjano maṁ Jambukavādena vadatī"ti cintetvā "ko eso"ti āha. Ahaṁ samaṇoti¹. Kiṁ mahāsamaṇāti. Ajja me ekarattiṁ idha vasanaṭṭhānaṁ dehīti. Natthi mahāsamaṇa imasmiṁ ṭhāne vasanaṭṭhānanti. Jambuka mā evaṁ kari, ekarattiṁ me vasanaṭṭhānaṁ dehi, pabbajitā nāma pabbajitaṁ patthenti, manussā manussaṁ, pasavo pasavanti. Kiṁ pana tvaṁ pabbajitoti. Āma pabbajitomhīti. Sace tvaṁ pabbajito, kahaṁ te lābukaṁ, kahaṁ dhūmakaṭacchuko, kahaṁ yaññasuttakanti. "Atthetaṁ mayhaṁ, visuṁ visuṁ pana gahetvā vicaraṇaṁ dukkhan"ti abbhantareneva gahetvā carāmīti. So "carissasi tvaṁ etaṁ aggaṇhitvā"ti² kujjhi. Atha naṁ Satthā āha "hotu Jambuka, mā kujjha, vasanaṭṭhānaṁ me ācikkhā"ti. Natthi mahāsamaṇa ettha vasanaṭṭhānanti.

Satthā tassa vasanaṭṭhānato avidūre ekam pabbhāram atthi, tam niddisanto³ "etasmim pabbhāre ko vasatī"ti āha. Natthi koci mahāsamaṇāti. Tena hi etam mayham dehīti. Tvaññeva jāna mahāsamaṇāti. Satthā pabbhāre nisīdanam paññāpetvā nisīdi. Paṭhamayāme cattāro mahārājāno catuddisam ekobhāsam karontā Satthu upaṭṭhānam āgamimsu. Jambuko obhāsam disvā "ko obhāso nāmeso"ti cintesi. Majjhimayāme Sakko devarājā āgami. Jambuko tampi disvā "ko nāmeso"ti cintesi. Pacchimayāme ekāya aṅguliyā ekam, dvīhi dve, dasahi dasa cakkavāļāni obhāsetum samattho mahābrahmā sakalam arañām ekobhāsam karonto āgami. Jambuko tampi disvā "ko nu kho eso"ti cintetvā pātova Satthu santikam gantvā paṭisanthāram katvā ekamantam ṭhito Satthāram pucchi "mahāsamaṇa tumhākam santikam catasso disā obhāsentā ke āgatā"ti. Cattāro mahārājānoti. Kim kāraṇāti. Mam upaṭṭhātunti. Kim pana tvam catūhi mahārājehi uttaritaroti. Āma Jambuka, mahārājūnampi atirājāti. Majjhimayāme pana ko āgatoti. Sakko devarājā

<sup>1.</sup> Jambukāti (Ka)

Jambukāti. Kiṁ kāraṇāti. Maṁ upaṭṭhātumevāti. Kiṁ pana tvaṁ Sakkadevarājatopi uttaritaroti. Āma Jambuka, Sakkatopi uttaritaromhi, eso pana mayhaṁ gilānupaṭṭhāko kappiyakārakasāmaṇerasadisoti. Pacchimayāme sakalaṁ araññaṁ obhāsetvā ko āgatoti. Yaṁ loke brāhmaṇādayo khipitvā pakkhalitvā "namo mahābrahmuno"ti vadanti, so eva mahābrahmāti. Kiṁ pana tvaṁ mahābrahmatopi uttaritaroti. Āma Jambuka, ahañhi brahmunāpi atibrahmāti. Acchariyosi tvaṁ mahāsamaṇa, mayhaṁ pana pañca paññāsa vassāni idha vasantassa etesu ekopi maṁ upaṭṭhātuṁ nāgatapubbo. Ahañhi ettakaṁ addhānaṁ vātabhakkho hutvā thitakova vītināmesiṁ, na tāva te mayhaṁ upatthānaṁ āgatapubbāti.

Atha nam Satthā āha "Jambuka tvam lokasmim andhabālam mahājanam vañcayamāno mampi vañcetukāmo jāto, nanu tvam pañcapaññāsa vassāni gūthameva khādi, bhūmiyamyeva nipajji, naggo hutvā vicari, tālatthikhandena kese luñci. Atha ca pana lokam vañcento 'aham vātabhakkho, ekapādena titthāmi, na nisīdāmi, na nipajjāmī'ti vadesi, mamampi vañcetukāmosi, pubbepi tvam pāpikam lāmikam ditthim nissāya ettakam kālam gūthabhakkho bhūmisayo naggo vicaranto tālatthikhandena kesaluñcanam patto, idānipi pāpikam lāmikam ditthimeva ganhāsī"ti. Kim pana mayā katam mahāsamanāti. Athassa Satthā pubbe katakammam ācikkhi. Tassa Satthari kathenteyeva samvego uppajji, hirottappam upatthitam, so ukkutiko nisīdi. Athassa Satthā udakasātikam khipitvā adāsi. So tam nivāsetvā Satthāram vanditvā ekamantam nisīdi. Satthāpissa anupubbim katham kathetvā dhammam desesi. So desanāvasāne saha patisambhidāhi arahattam patvā Satthāram vanditvā utthāyāsanā pabbajjañca upasampadañca yāci. Ettāvatā tassa purimakammam parikkhīnam. Ayañhi khīnāsavamahātheram catūhi akkosehi akkositvā yāvāyam mahāpathavī tigāvutādhikam yojanam ussannā, tāva Avīcimhi paccitvā tattha pakkāvasesena pañcapaññāsa vassāni imam vippakāram patto. Tenassa tam kammam khīṇam. Vīsati pana vassasahassāni iminā katassa samanadhammassa phalam nāsetum na sakkā. Tasmā Satthā dakkhinahattham pasāretvā "ehi bhikkhu, cara brahmacariyam sammā

dukkhassa antakiriyāyā"ti āha. Tāvadevassa gihilingam antaradhāyi, aṭṭhaparikkhāradharo saṭṭhivassikamahāthero viya ahosi.

Aṅgamagadhavāsīnam tassa sakkāram gahetvā āgatadivaso kiresa, tasmā ubhayaratthavāsino sakkāram gahetvā āgatā Tathāgatam disvā "kim nu kho amhākam ayyo Jambuko mahā, udāhu samano Gotamo"ti cintetvā "sace samano Gotamo mahā bhaveyya, ayam samanassa Gotamassa santikam gaccheyya, Jambukājīvakassa pana mahantatāya samano Gotamo imassa santikam āgato"ti cintayimsu. Satthā mahājanassa parivitakkam ñatvā "Jambuka tava upatthākānam kankham chindāhī"ti āha. So "ahampi bhante ettakameva paccāsīsāmī"ti vatvā catutthajjhānam samāpajjitvā utthāya tālappamānam vehāsam abbhuggantvā "Satthā me bhante Bhagavā, sāvakohamasmī''ti vatvā oruyha vanditvā puna dvitālamattam titālamattanti evam sattatālamattam vehāsam abbhuggantvā oruyha attano sāvakabhāvam jānāpesi. Tam disvā mahājano "aho Buddhā nāma acchariyā anopamagunā"ti<sup>1</sup> cintesi. Satthā mahājanena saddhim kathento evamāha "ayam ettakam kālam tumhehi ābhatam sakkāram kusaggena jivhagge thapetvā 'tapacaranam pūremī'ti idha nivuttho, sacepi iminā upāvena vassasatam tapacaranam pūreyya, yā cassa idāni kālam vā<sup>2</sup> bhattam vā kukkuccāyitvā abhunjantassa bhattacchedanakusalacetanā, tassā tam tapacaraṇam solasim kalampi na agghatī"ti anusandhim ghatetvā dhammam desento imam gathamaha—

70. "Māse māse kusaggena, bālo bhuñjeyya bhojanam. Na so saṅkhātadhammānam, kalam agghati soļasin"ti.

Tassattho—sace **bālo** apariññātadhammo sīlādiguṇā paribāhiro titthāyatane pabbajito "tapacaraṇaṁ pūressāmī"ti māse māse patte kusaggena bhojanaṁ bhuñjanto vassasataṁ bhuñjeyya bhojanaṁ. **Na so saṅkhātadhammānaṁ, kalaṁ agghati soļasin**ti saṅkhātadhammā vuccanti ñātadhammā tulitadhammā. Tesu heṭṭhimakoṭiyā sotāpanno saṅkhātadhammo, uparimakoṭiyā khīṇāsavo. Imesaṁ saṅkhātadhammānaṁ so bālo kalaṁ

na agghati solasinti puggalādhiṭṭhānā desanā. Ayaṁ panettha attho—yā cassa tathā tapacaraṇaṁ pūrentassa vassasataṁ cetanā, yā ca saṅkhātadhammānaṁ kālaṁ vā bhattaṁ vā kukkuccāyitvā abhuñjantānaṁ ekā bhattacchedanakusalacetanā, tassā cetanāya sā tāva dīgharattaṁ pavattacetanā solasiṁ kalaṁ na agghati. Idaṁ vuttaṁ hoti—yaṁ tassā saṅkhātadhammānaṁ cetanāya phalaṁ, taṁ solasa koṭṭhāse katvā tato ekekaṁ puna solasa solasa koļāse katvā tato ekassa koļāsassa yaṁ phalaṁ, tadeva tassa bālassa tapacaraṇato mahapphalataranti¹.

Desanāvasāne caturāsītiyā pāṇasahassānam dhammābhisamayo ahosīti.

Jambukattheravatthu ekādasamam.

## 12. Ahipetavatthu

Na hi pāpam katam kammanti imam dhammadesanam Satthā Veļuvane viharanto añnataram Ahipetam ārabbha kathesi.

Ekasmim hi divase jaṭilasahassassa abbhantaro² āyasmā Lakkhaṇatthero ca Mahāmoggallānatthero ca "Rājagahe piṇḍāya carissāmā"ti Gijjhakūṭato otaranti. Tesu āyasmā Mahāmoggallānatthero ekam ahipetam disvā sitam pātvākāsi. Atha nam Lakkhaṇatthero "kasmā āvuso sitam pātukarosī"ti sitakāraṇam pucchi. "Akālo āvuso Lakkhaṇa imassa pañhassa, Bhagavato santike mam puccheyyāsī"ti thero āha. Tesu Rājagahe piṇḍāya caritvā Bhagavato santikam gantvā nisinnesu Lakkhaṇatthero pucchi "āvuso Moggallāna tvam Gijjhākūṭā otaranto sitam pātukaritvā mayā sitakāraṇam puṭṭho 'Bhagavato santike mam puccheyyāsī'ti avaca, kathehi idāni tam kāraṇan"ti. Thero āha "aham āvuso ekam petam disvā sitam pātvākāsim, tassa evarūpo attabhāvo—manussasīsam viya assa sīsam, ahissa

viya¹ seso attabhāvo, ahipeto nāmesa pamāṇato pañcavīsatiyojaniko, tassa sīsato uṭṭhitā aggijālā yāva naṅguṭṭhā gacchanti, naṅguṭṭhato uṭṭhitā aggijālā yāva sīsā, majjhesīsato² uṭṭhitā dve passāni gacchanti, dvīhi passehi uṭṭhitā majjhe otarantī'ti. Dvinnaṁyeva kira petānaṁ attabhāvo pañcavīsatiyojaniko, avasesānaṁ tigāvutappamāṇo. Imassa ceva Ahipetassa Kākapetassa ca pañcavīsatiyojaniko. Tesu ayaṁ tāva ahipeto. Kākapetampi Mahāmoggallāno Gijjhakūṭamatthake paccamānaṁ disvā tassa pubbakammaṁ pucchanto imaṁ gāthamāha—

"Pañcayojanikā jivhā, sīsaṁ te navayojanaṁ. Kāyo accuggato tuyhaṁ, pañcavīsatiyojanaṁ. Kiṁ nu kammaṁ karitvāna, pattosi dukkhamīdisan"ti.

Athassa peto ācikkhanto—

"Aham bhante Moggallāna, Kassapassa Mahesino. Samghassa ābhatam bhattam, āhāresim yadicchakan"ti—

Gāthaṁ vatvā āha "bhante Kassapabuddhakāle sambahulā bhikkhū gāmaṁ piṇḍāya pavisiṁsu, manussā there disvā sampiyāyamānā āsanasālāyaṁ nisīdāpetvā pāde dhovitvā telaṁ makkhetvā yāguṁ pāyetvā khajjakaṁ datvā piṇḍapātakālaṁ āgamayamānā dhammaṁ suṇantā nisīdiṁsu, dhammakathāvasāne therānaṁ patte ādāya attano attano gehā nānaggarasabhojanassa pūretvā āhariṁsu, tadā ahaṁ kāko hutvā āsanasālāya chadanapiṭṭhe nilīno taṁ disvā ekena gahitapattato tikkhattuṁ mukhaṁ pūrento tayo kabaļe aggahesiṁ, taṁ pana bhattaṁ neva saṁghassa santakaṁ, na saṁghassa niyametvā dinnaṁ, na bhikkhūhi gahitāvasesakaṁ, attano attano gehaṁ netvā manussehi bhuñjitabbakaṁ, kevalaṁ saṁghaṁ uddissa abhihaṭamattameva, tato mayā tayo kabaļā gahitā, ettakaṁ me pubbakammaṁ, svāhaṁ kālaṁ katvā tassa kammassa vipākena Avīcimhi paccitvā tattha pakkāvasesena idāni Gijjhakūṭe kākapeto hutvā nibbatto imaṁ dukkhaṁ paccānubhomī'ti. Idaṁ kākapetassa vatthu.

Idha pana thero "ahipetaṁ disvā sitaṁ pātvākāsin"ti āha. Athassa Satthā sakkhī hutvāpi uṭṭhāya "saccaṁ bhikkhave Moggallāno āha, mayāpesa sambodhipattadivaseyeva diṭṭho, apicāhaṁ 'ye me vacanaṁ na saddaheyyuṁ, tesaṁ ahitāya bhaveyyā'ti parānuddayāya na kathesin"ti āha. Lakkhaṇasaṁyuttepi¹ hi Mahāmoggallānena diṭṭhakāleyeva Satthā tassa sakkhī hutvā Vinītavatthūni² kathesi, idampi tena tatheva kathitaṁ, taṁ sutvā bhikkhū tassa pubbakammaṁ pucchiṁsu. Satthāpi tesaṁ kathesi—

Atīte kira Bārānasim nissāya nadītīre Paccekabuddhassa pannasālam karimsu. So tattha viharanto nibaddham nagare pindāya carati. Nāgarāpi sāyampātam gandhapupphādihatthā Paccekabuddhassūpatthānam gacchanti. Eko Bārānasivāsī puriso tam maggam nissāya khettam kasi. Mahājano sāyampātam Paccekabuddhassūpatthānam gacchanto tam khettam maddanto gacchati. Kassako ca "mā me khettam maddathā" ti vārentopi vāretum nāsakkhi. Athassa etadahosi "sace imasmim thāne Paccekabuddhassa pannasālā na bhaveyya, na me khettam maddeyyun''ti. So Paccekabuddhassa pindāya pavitthakāle paribhogabhājanāni bhinditvā pannasālam jhāpesi. Paccekabuddho tam jhāmam disvā yathāsukham pakkāmi. Mahājano gandhamālam ādāya āgato jhāmapannasālam disvā "kaham nu kho no ayyo gato"ti āha. Sopi mahājaneneva saddhim gato mahājanamajjhe thitakova evamāha "mayā tassa pannasālā jhāpitā"ti. Atha nam "ganhatha, imam pāpimam nissāya mayam Paccekabuddham datthum na labhimhā"ti. Dandādīhi pothetvā jīvitakkhayam pāpesum. So Avīcimhi nibbattitvā yāvāyam mahāpathavī yojanamattam ussannā, tāva niraye paccitvā pakkāvasesena Gijjhakūte ahipeto hutvā nibbatti. Satthā idam tassa pubbakammam kathetvā "bhikkhave pāpakammam nāmetam khīrasadisam, yathā khīram duyhamānameva na parinamati, tathā kammam kayiramānameva na vipaccati. Yadā pana vipaccati, tadā evarūpena dukkhena socatī"ti anusandhim ghatetvā dhammam desento imam gāthamāha71. "Na hi pāpam katam kammam, sajjukhīramva muccati. Dahantam bālamanveti, bhasmacchannova pāvako"ti.

Tattha sajjukhīramvāti tam khaṇamyeva dhenuyā thanehi nikkhantam abbhuṇham khīram na muccati na pariṇamati. Idam vuttam hoti—yathā idam sajjukhīram tam khaṇaññeva na muccati na pariṇamati na pakatim vijahati. Yasmim pana bhājane duhitvā gahitam yāva tattha takkādi-ambilam na pakkhipati, yāva dadhibhājanādikam ambilabhājanam na pāpuṇāti, tāva pakatim avijahitvā pacchā jahati, evameva pāpakammampi kariyamānameva na vipaccati. Yadi vipacceyya, na koci pāpakammam kātum visaheyya. Yāva pana kusalābhinibbattā khandhā dharanti, tāva nam te rakkhanti. Tesam bhedā apāye nibbattakkhandhesu vipaccati, vipaccamānañca dahantam bālamanveti. Kim viyāti? Bhasmacchannova pāvakoti. Yathā hi chārikāya paṭicchanno vītaccitangāro akkantopi chārikāya paṭicchannattā na tāva dahati, chārikam pana tāpetvā cammādīnam dahanavasena yāva matthalungā dahanto gacchati, evameva pāpakammampi yena katam hoti, tam bālam dutiye vā tatiye vā attabhāve nirayādīsu nibbattam dahantam anugacchatīti.

Desanāvasāne bahū sotāpannādayo ahesunti.

Ahipetavatthu dvādasamam.

# 13. Saṭṭhikūṭapetavatthu

Yāvadeva anatthāyāti imam dhammadesanam Satthā Veļuvane viharanto Satthikūṭapetam ārabbha kathesi.

Purimanayeneva hi Mahāmoggallānatthero Lakkhaṇattherena saddhim Gijjhakūṭā orohanto aññatarasmim padese sitam pātvākāsi. Therena sitakāraṇam puṭṭho "Bhagavato santike mam puccheyyāsī"ti vatvā piṇḍāya caritvā Satthāram upasaṅkamitvā vanditvā nisinnakāle puna puṭṭho āha "aham āvuso ekam petam addasam tigāvutappamāṇena attabhāvena, tassa saṭṭhi ayakūṭasahassāni ādittāni sampajjalitāni uparimatthake patitvā utthahanti sīsam bhindanti, bhinnam bhinnam puna

samuṭṭhahati, iminā attabhāvena mayā evarūpo attabhāvo na diṭṭhapubbo, ahaṁ taṁ disvā sitaṁ pātvākāsin''ti. Petavatthusmiṁ hi—

"Saṭṭhi kūṭasahassāni, paripuṇṇāni sabbaso. Sīse tuyhaṁ nipatanti, vobhindanteva matthakan"ti¹ ādi—

Imameva petam sandhāya vuttam. Satthā therassa katham sutvāva "bhikkhave mayāpesa satto Bodhimaṇḍe nisinneneva diṭṭho, 'ye ca pana me vacanam na saddaheyyum, tesam ahitāya bhaveyyā'ti paresam anukampāya na kathesim, idāni pana Moggallānassa sakkhī hutvā kathemī"ti āha. Tam sutvā bhikkhū tassa pubbakammam pucchimsu. Satthāpi nesam kathesi—

Atīte kira Bārānasiyam sālittakasippe nipphattim patto eko pīthasappī ahosi. So nagaradvāre ekassa vatarukkhassa hetthā nisinno sakkharāni khipitvā tassa pannāni chindanto "hatthirūpakam no dassehi, assarūpakam no dassehī"ti gāmadārakehi vuccamāno icchiticchitāni rūpāni dassetvā tesam santikā khādanīyādīni labhati. Athekadivasam rājā uyyānam gacchanto tam padesam pāpuni. Dārakā pīthasappim pārohantare katvā palāvimsu. Rañño thitamaijhanhike rukkhamūlam pavitthassa chiddavachiddacchaya sarīram phari<sup>2</sup>. So "kim nu kho etan"ti uddham olokento rukkhapannesu hatthirūpakādīni disvā "kassetam kamman"ti pucchitvā "pīthasappino"ti sutvā tam pakkosāpetvā āha "mayham purohito atimukharo appamattakepi vutte bahum bhananto mam upaddaveti, sakkhissasi tassa mukhe nālimattā ajalandikā khipitun"ti. Sakkhissāmi deva, ajalandikā āharāpetvā purohitena saddhim tumhe antosāniyam nisīdatha, ahamettha kattabbam jānissāmīti. Atha rājā tathā kāresi. Itaro katthariyaggena sāniyā chiddam katvā purohitassa raññā saddhim kathentassa mukhe vivatamatte ekekam ajalandikam khipi. Purohito mukham pavittham gili. Pīthasappī khīnāsu ajalandikāsu sānim cālesi. Rājā tāya saññāya ajalandikānam khīnabhāvam ñatvā āha "ācariya aham tumhehi saddhim kathento

katham nittharitum na sakkhissāmi, tumhe atimukharatāya nāļimattā ajalaņḍikā gilantāpi tuṇhībhāvam nāpajjathā"ti. Brāhmaņo maṅkubhāvam āpajjitvā tato paṭṭhāya mukham vivaritvā raññā saddhim sallapitum nāsakkhi. Rājā pīṭhasappiguṇam anussaritvā tam pakkosāpetvā "tam nissāya me sukham laddhan"ti tuṭṭho tassa sabbaṭṭhakam nāma dhanam datvā nagarassa catūsu disāsu cattāro varagāme adāsi. Tamattham viditvā rañño atthadhammānusāsako amacco imam gāthamāha—

"Sādhu kho sippakam nāma, api yādisa kīdisam. Passa khañjappahārena, laddhā gāmā catuddisā"ti<sup>1</sup>.

So pana amacco tena samayena ayameva<sup>2</sup> Bhagavā ahosi. Atheko puriso pīthasappinā laddhasampattim disvā cintesi "ayam nāma pīthasappī hutvā imam sippam nissāya mahāsampattim patto, mayāpetam sikkhitum vattatī'ti. So tam upasankamitvā vanditvā "idam me ācariya sippam dethā"ti āha. Na sakkā tāta dātunti. So tena patikkhitto "hotu, ārādhessāmi nan"ti tassa hatthapādaparikammādīni karonto cirassam tam ārādhetvā punappunam yāci. Pīthasappī "ayam me ativiya upakāro"ti tam patibāhitum asakkonto sippam sikkhāpetvā "nipphannam te tāta sippam, idāni kim karissasī"ti āha. Bahi gantvā sippam vīmamsissāmīti. Kim karissasīti. Gāvim vā manussam vā paharitvā māressāmīti. Tāta gāvim mārentassa satam dando hoti, manussam mārentassa sahassam, tvam saputtadāropi tam nittharitum na sakkhissasi, mā vinassa, yamhi pahate dando natthi, tādisam nimātāpitikam kañci upadhārehīti. So "sādhū"ti sakkharā ucchange katvā tādisam upadhārayamāno vicaranto gāvim disvā "ayam sasāmikā"ti paharitum na visahi, manussam disvā "ayam samātāpitiko" ti paharitum na visahi.

Tena samayena Sunetto nāma Paccekabuddho taṁ nagaraṁ nissāya paṇṇasālāya viharati. So taṁ piṇḍāya pavisantaṁ nagaradvārantare disvā "ayaṁ nimātāpitiko, imasmiṁ pahaṭe daṇḍo natthi, imaṁ paharitvā sippaṁ vīmaṁsissāmī"ti Paccekabuddhassa dakkhiṇakaṇṇasotaṁ sandhāya

sakkharam khipi. Sā dakkhiṇakaṇṇasotena pavisitvā vāmena nikkhami, dukkhā vedanā uppajji. Paccekabuddho bhikkhāya caritum nāsakkhi, ākāsena paṇṇasālam gantvā parinibbāyi. Manussā Paccekabuddhe anāgacchante "kiñci aphāsukam bhavissatī"ti cintetvā tattha gantvā tam parinibbutam disvā rodimsu paridevimsu. Sopi mahājanam gacchantam disvā tattha gantvā Paccekabuddham sañjānitvā "ayam piṇḍāya pavisanto dvārantare mama sammukhībhūto, aham attano sippam vīmamsanto imam paharin"ti āha. Manussā "iminā kira pāpakena Paccekabuddho pahaṭo, gaṇhatha gaṇhathā"ti pothetvā tattheva nam jīvitakkhayam pāpesum. So Avīcimhi nibbattitvā yāvāyam mahāpathavī yojanamattam ussannā, tāva paccitvā vipākāvasesena Gijjhakūṭamatthake Saṭṭhikūṭapeto hutvā nibbatti. Satthā tassa imam pubbakammam kathetvā "bhikkhave bālassa nāma sippam vā issariyam vā uppajjamānam anatthāya uppajjati. Bālo hi sippam vā issariyam vā labhitvā attano anatthameva karotī"ti anusandhim ghaṭetvā dhammam desento imam gāthamāha—

72. "Yāvadeva anatthāya, ñattaṁ bālassa jāyati. Hanti bālassa sukkaṁsaṁ, muddhamassa vipātayan"ti.

Tattha yāvadevāti avadhiparicchedanatthe nipāto. Ña ttanti jānanasabhāvo¹. Yaṁ sippaṁ jānāti, yamhi vā issariye yase sampattiyañca thito janena ñāyati, pākaṭo paññāto hoti, tassetaṁ nāmaṁ. Sippaṁ vā hi issariyādibhāvo vā bālassa anatthāyeva jāyati. Taṁ nissāya so attano anatthameva karoti. Hantīti vināseti. Sukkaṁsanti kusalakoṭṭhāsaṁ. Bālassa hi sippaṁ vā issariyaṁ vā uppajjamānaṁ kusalakoṭṭhāsaṁ ghātentameva uppajjati. Muddhanti paññāyetaṁ nāmaṁ. Vipātayanti viddhaṁsayamānaṁ. Tassa hi taṁ sukkaṁsaṁ hanantaṁ paññāsaṅkhātaṁ muddhaṁ vipātentaṁ viddhaṁsentameva hantīti.

Desanāvasāne bahū sotāpattiphalādīni pāpuņimsu.

Saṭṭhikūṭapetavatthu terasamam.

## 14. Cittagahapativatthu

Asantaṁ bhāvanamiccheyyāti imaṁ dhammadesanaṁ Satthā Jetavane viharanto Sudhammattheraṁ ārabbha kathesi. Desanā Macchikāsaṇḍe samutthāya Sāvatthiyaṁ nitthitā.

Macchikāsandanagarasmim hi Citto nāma gahapati pañcavaggiyānam abbhantaram Mahānāmattheram nāma pindāya caramānam disvā tassa iriyāpathe pasīditvā pattam ādāya geham pavesetvā bhojetvā bhattakiccāvasāne dhammakatham sunanto sotāpattiphalam patvā acalasaddho hutvā Ambātakavanam nāma attano uyyānam samghārāmam kattukāmo therassa hatthe udakam pātetvā nivyādesi. Tasmim khane "patitthitam Buddhasāsanan"ti udakapariyantam katvā mahāpathavī kampi. Mahāsetthi uyyāne mahāvihāram kāretvā sabbadisāhi āgatānam bhikkhūnam vivatadvāro ahosi, Macchikāsande Sudhammatthero nāma nevāsiko ahosi. Aparena samayena Cittassa gunakatham sutvā dve aggasāvakā tassa sangaham kattukāmā Macchikāsandam agamamsu. Citto gahapati tesam āgamanam sutvā addhayojanamaggam paccuggantvā te ādāya attano vihāram pavesetvā āgantukavattam katvā "bhante thokam dhammakatham sotukāmomhī"ti Dhammasenāpatim yāci. Atha nam thero "upāsaka addhānena āgatāmhā kilantarūpā, apica thokam sunāhī"ti tassa dhammam kathesi. So therassa dhammam sunantova anāgāmiphalam pāpuņi. So dve aggasāvake vanditvā "bhante sve bhikkhusahassena saddhim mama gehe bhikkham ganhathā"ti nimantetvā pacchā nevāsikam Sudhammattheram "tumhepi bhante sve therehi saddhim agaccheyyatha"ti nimantesi. So "ayam mam pacchā nimantetī"ti kuddho patikkhipitvā punappunam yāciyamānopi patikkhipi eva. Upāsako "paññāyissatha bhante"ti pakkamitvā punadivase attano nivesane mahādānam sajjesi. Sudhammattheropi paccūsakāleyeva "kīdiso nu kho gahapatinā aggasāvakānam sakkāro sajjito, sve gantvā passissāmī"ti cintetvā pātova pattacīvaram ādāya tassa geham agamāsi.

So gahapatinā "nisīdatha bhante"ti vuccamānopi "nāham nisīdāmi, piņḍāya carissāmī"ti vatvā aggasāvakānam paṭiyāditam sakkāram

oloketvā gahapatim jātiyā ghattetukāmo "ulāro te gahapati sakkāro, apicettha ekaññeva natthī"ti āha. Kim bhanteti. "Tilasamgulikā gahapatī"ti vatvā gahapatinā kākopamāya apasādito kujihitvā "eso te gahapati āvāso, pakkamissāmahan"ti vatvā yāvatatiyam vāriyamānopi pakkamitvā Satthu santikam gantvā Cittena ca attanā ca vuttavacanam ārocesi. Satthā "tayā upāsako saddho pasanno hīnena khumsito"ti tasseva dosam āropetvā patisāranīyakammam kārāpetvā "gaccha, Cittagahapatim khamāpehī"ti pesesi. So tattha gantvā "gahapati<sup>1</sup> mayhameva so doso, khamāhi me"ti vatvāpi "nāham khamāmī"ti tena patikkhitto mankubhūto tam khamāpetum nāsakkhi. Punadeva Satthusantikam paccāgamāsi. Satthā "nāssa upāsako khamissatī"ti jānantopi "mānathaddho esa, timsayojanam tāva maggam gantvā paccāgacchatū"ti khamanūpāyam anācikkhitvāva uyyojesi. Athassa punāgatakāle nihatamānassa anudūtam datvā "gaccha, iminā saddhim gantvā upāsakam khamāpehī"ti vatvā "samanena nāma mayham vihāro, mayham nivāsaṭṭhānam, mayham upāsako, mayham upāsikā'ti mānam vā issam² vā kātum na vattati. Evam karontassa hi icchāmānādayo kilesā vaddhantī"ti anusandhim ghatetvā dhammam desento imā gāthā abhāsi—

- 73. "Asantam bhāvanamiccheyya, purekkhārañca bhikkhusu. Āvāsesu issariyam, pūjā parakulesu ca.
- 74. Mameva kata maññantu, gihī pabbajitā ubho.

  Mamevātivasā assu, kiccākiccesu kismici.

  Iti bālassa saṅkappo, icchā māno ca vaddhatī"ti.

Tattha **asantan**ti yo bālo bhikkhu avijjamānam sambhāvanam iccheyya, "assaddhova samāno 'saddhoti mam jano jānātū'ti icchatī"ti **pāpicchatān**iddese<sup>3</sup> vuttanayeneva bālo "assaddho dussīlo appassuto appavivitto kusīto anupaṭṭhitassati asamāhito duppañño akhīṇāsavova samāno 'aho vata mam jano ayam saddho, sīlavā, bahussuto, pavivitto, āraddhavīriyo, upaṭṭhitassati, samāhito,

paññavā, khīṇāsavo'ti jāneyyo''ti idam asantasambhāvanam icchati. Purekkhāranti parivāram. "Aho vata mam sakalavihāre bhikkhū parivāretvā pañham pucchantā vihareyyun''ti evam icchācāre ṭhatvā purekkhārañca bhikkhūsu icchati. Āvāsesūti samghikesu ca āvāsesu yāni vihāramajjhe paṇītasenāsanāni, tāni attano sandiṭṭhasambhattādīnam bhikkhūnam "tumhe idha vasathā"ti vicārento sayampi varataram senāsanam palibodhento, sesānam āgantukabhikkhūnam paccantimāni lāmakasenā sanāni ceva amanussapariggahitāni ca "tumhe idha vasathā"ti vicārento āvāsesu issariyam icchati. Pūjā parakulesu cāti neva mātāpitūnam na ñātakānam paresuyeva kulesu "aho vatime mayhameva dadeyyum, na aññesan"ti evam catuppaccayehi pūjam icchati.

Mameva kata maññantūti yassa ca bālassa "yamkiñci vihāre uposathāgārādikaraṇavasena katam navakammam, tam sabbam amhākam therena katanti evam gihī ca pabbajitā ca ubhopi mameva nissāya katam parikammam niṭṭhitam maññantū"ti saṅkappo uppajjati. Mamevātivasā assūti "gihī ca pabbajitā ca sabbepi mameva vase vattantu, sakaṭagoṇavāsipharasu-ādīni vā laddhabbāni hontu, antamaso yāgumattampi tāpetvā pivanādīni vā, evarūpesu kiccākiccesu khuddakamahantesu karaṇīyesu kismiñci ekakiccepi mameva vase vattantu, mameva āpucchitvā karontū"ti saṅkappo uppajjati. Iti bālassāti yassa bālassa sā ca icchā ayañca evarūpo saṅkappo uppajjati, tassa neva vipassanā, na maggaphalāni vaḍḍhanti. Kevalam panassa candodaye¹ samuddassa udakam viya chasu dvāresu uppajjamānā taṇhā ceva navavidhamāno ca vaḍḍhatīti.

Desanāvasāne bahū sotāpattiphalādīni pāpuņimsūti.

Sudhammattheropi imam ovādam sutvā Satthāram vanditvā uṭṭhāyāsanā padakkhiṇam katvā tena anudūtena bhikkhunā saddhim gantvā upāsakassa cakkhupathe āpattim paṭikaritvā upāsakam khamāpesi. So upāsakena "khamāmaham bhante, sace mayham doso atthi, khamatha me"ti paṭikhamāpito Satthārā dinne ovāde ṭhatvā katipāheneva saha paṭisambhidāhi

arahattam pāpuṇi. Upāsakopi cintesi "mayā Satthāram adisvāva sotāpattiphalam pattam, adisvā eva anāgāmiphale patiṭṭhito, Satthāram me daṭṭhum vaṭṭatī"ti. So tilataṇḍulasappiphāṇitavatthacchādanādīhi paripūrāni pañca sakaṭasatāni yojāpetvā "Satthāram daṭṭhukāmo āgacchantu, piṇḍapātādīhi na kilamissantī"ti bhikkhusamghassa ārocāpetvā bhikkhunīsamghassāpi upāsakānampi upāsikānampi ārocāpesi. Tena saddhim pañcasatā pañcasatā bhikkhū ca bhikkhuniyo ca upāsakā ca upāsikāyo ca nikkhamimsu. So tesam ceva attano parisāya cāti tiṇṇam janasahassānam yathā timsayojane magge yāgubhattādīhi kiñci vekallam na hoti, tathā samvidahi. Tassa pana nikkhantabhāvam ñatvā yojane yojane devatā khandhāvāram bandhitvā dibbehi yāgukhajjakabhattapānakādīhi tam mahājanam upaṭṭhahimsu. Kassaci kenaci vekallam na hoti. Evam devatāhi upaṭṭhiyamāno devasikam yojanam gacchanto māsena Sāvatthim pāpuṇi, pañca sakaṭasatāni yathāpūritāneva ahesum. Deva tāhi ceva manussehi ca abhihaṭam paṇṇākāram vissajjentova agamāsi.

Satthā Ānandattheram āha "Ānanda ajja vaddhamānakacchāyāya Citto gahapati pañcahi upāsakasatehi parivuto āgantvā mam vandissatī"ti. Kim pana bhante tassa tumhākam vandanakāle kiñci pātihāriyam bhavissatīti. Bhavissati Ānandāti. Kim bhanteti. Tassa āgantvā mam vandanakāle rājamānena atthakarīsamatte padese jannukamattena odhinā pañcavannānam dibbapupphānam ghanavassam vassissatīti. Tam katham sutvā nagaravāsino "evam mahāpuñño kira Citto nāma gahapati āgantvā ajja Satthāram vandissati, evarūpam kira pātihāriyam bhavissati, mayampi tam mahāpuññam datthum labhissāmā"ti pannākāram ādāya maggassa ubhosu passesu atthamsu. Vihārasamīpe āgatakāle pañca bhikkhusatāni pathamam āgamimsu. Citto gahapati "ammā tumhe pacchato āgacchathā" ti mahāupāsikāyo thapetvā pañcahi upāsakasatehi parivuto Satthu santikam agamāsi. Buddhānam sammukhatthāne pana thitā vā nisinnā vā ito vā etto vā na honti, Buddhavīthiyā dvīsu passesu niccalāva titthanti. Citto gahapati mahantam Buddhavīthim okkami. Tīni phalāni pattena ariyasāvakena olokitolokitatthānam kampi. "Eso kira Citto gahapatī"ti mahājano

olokesi. So Satthāraṁ upasaṅkamitvā chabbaṇṇānaṁ Buddharasmīnaṁ anto pavisitvā dvīsu gopphakesu Satthu pāde gahetvā vandi. Taṁ khaṇaññeva vuttappakāraṁ pupphavassaṁ vassi, sādhukārasahassāni pavattayiṁsu. So ekamāsaṁ Satthu santike vasi, vasamāno ca sakalaṁ Buddhappamukhaṁ bhikkhusaṁghaṁ vihāreyeva nisīdāpetvā mahādānaṁ adāsi, attanā saddhiṁ āgatepi antovihāreyeva katvā paṭijaggi, ekadivasampi attano sakaṭesu kiñci gahetabbaṁ nāhosi, devamanussehi ābhatapaṇṇākāreneva dānaṁ adāsi. Sabbakiccāni akāsi. So Satthāraṁ vanditvā āha "bhante ahaṁ 'tumhākaṁ dānaṁ dassāmī'ti āgacchanto māsaṁ antarāmagge ahosiṁ, idheva me māso vītivatto, mayā ābhataṁ paṇṇākāraṁ kiñci gahetuṁ na labhāmi, ettakaṁ kālaṁ devamanussehi ābhatapaṇṇākāreneva dānaṁ adāsiṁ, sohaṁ sacepi idha saṁvaccharaṁ vasissāmi, neva mama deyyadhammaṁ dātuṁ labhissāmi. Ahaṁ sakaṭāni otāretvā gantuṁ icchāmi, paṭisāmanaṭṭhānaṁ me ārocāpethā''ti.

Satthā Ānandattheram āha "Ānanda upāsakassa ekam padesam tuccham kāretvā dehī"ti. Thero tathā akāsi. Kappiyabhūmi<sup>1</sup> kira Cittassa gahapatino anuññātā. Upāsakopi attanā saddhim āgatehi tīhi janasahassehi saddhim tucchasakatehi puna maggam patipajji. Devamanussā utthāya "ayya tayā tucchasakatehi gamanakammam katan"ti sattahi ratanehi sakatani pūrayimsu. So attano ābhatapannākāreneva mahājanam patijagganto agamāsi. Ānandatthero Satthāram vanditvā āha "bhante tumhākam santikam āgacchantopi māsena āgato, idhāpi māsameva vuttho, ettakam kālam devamanussehi abhihatapannākāreneva mahādānam adāsi, idāni pañca sakatasatāni tucchāni katvā māseneva kira gamissati, devamanussā panassa utthāya 'ayya tayā tucchasakatehi gamanakammam katan'ti pañca sakatasatāni sattaratanehi pūrayimsu, so puna attano ābhatapannākāreneva kira mahājanam patijagganto gamissatī"ti. Kim pana bhante etassa tumhākam santikam āgacchantassevāyam sakkāro uppajjati, udāhu aññattha gacchantassāpi uppajjatīti. "Ānanda mama santikam āgacchantassāpi aññattha gacchantassāpi

etassa uppajjateva. Ayam hi upāsako saddho pasanno sampannasīlo, evarūpo puggalo yam yam padesam bhajati tattha tatthevassa lābhasakkāro nibbattatī"ti vatvā Satthā imam Pakinnakavagge gāthamāha—

"Saddho sīlena sampanno, yaso bhogasamappito. Yam yam padesam bhajati, tattha tattheva pūjito"ti<sup>1</sup>.

Attho panassā tattheva āvibhavissati.

Evam vutte Ānandatthero Cittassa pubbakammam pucchi. Athassa Satthā ācikkhanto āha—

Ānanda ayam Padumuttarassa Bhagavato pādamūle katābhinīhāro kappasatasahassam devamanussesu samsaritvā Kassapabuddhakāle migaluddakakule nibbatto vuddhimanvāya ekadivasam deve vassante migānam māranatthāva sattim ādāva ārañnam gantvā mige olokento ekasmim akatapabbhāre sasīsam pārupitvā ekam bhikkhum nisinnam disvā "eko ayyo samanadhammam karonto nisinno bhavissati, bhattamassa āharissāmī"ti vegena geham gantvā ekasmim uddhane hiyyo ābhatamamsam, ekasmim bhattam pacāpetvā aññe pindapātacārike bhikkhū disvā tesampi patte ādāya pañnattāsane nisīdāpetvā bhikkham sampādetvā "ayye parivisathā" ti añnam ānāpetvā tam bhattam putake<sup>2</sup> pakkhipitvā ādāva gacchanto antarāmagge nānāpupphāni ocinitvā pattapute katvā therassa nisinnatthānam gantvā "mayham bhante sangaham karothā"ti vatvā pattam ādāya pūretvā therassa hatthe thapetvā tehi pupphehi pūjam katvā "yathā me ayam rasapindapāto pupphapūjāya saddhim cittam tosesi, evam nibbattanibbattatthāne pannākārasahassāni ādāya āgantvā mayham cittam tosentu<sup>3</sup>, pañcavaṇṇakusumavassañca vassatū"ti patthanam patthapesi. So yāvajīvam kusalam katvā devaloke nibbatti, nibbattatthāne jannukamattena odhinā dibbapupphavassam vassi. Idānipissa jātadivase ceva idha āgatassa pupphavassavassanañca paṇṇākārābhihāro ca sattahi ratanehi sakatapūranañca tasseva kammassa nissandoti.

# Cittagahapativatthu<sup>4</sup> cuddasamam.

<sup>1.</sup> Khu 1. 56 pitthe.

<sup>3.</sup> Tosetvā (Sī, Ka)

<sup>2.</sup> Piţake (Syā)

<sup>4.</sup> Sudhammattheravatthu (Sī, Syā)

### 15. Vanavāsītissasāmaņeravatthu

**Aññā hi lābhūpanisā**ti imam dhammadesanam Satthā Jetavane viharanto Vanavāsikatissattheram ārabbha kathesi. Desanā Rājagahe samutthitā.

Sāriputtattherassa kira pitu Vangantabrāhmaņassa sahāyako Mahāsenabrāhmaņo nāma Rājagahe vasati. Sāriputtatthero ekadivasam piņḍāya caranto tasmim anukampāya tassa gehadvāram agamāsi. So pana parikkhīņavibhavo daliddo, so "mama putto mayham gehadvāram piṇḍāya caritum āgato bhavissati, ahañcamhi duggato, mayham duggatabhāvam na jānāti maññe, natthi me koci deyyadhammo"ti therassa sammukhā bhavitum asakkonto nilīyi. Thero aparampi divasam agamāsi, brāhmaņo tatheva nilīyi. "Kiñcideva labhitvā dassāmī"ti cintentopi nālabhi. Athekadivasam ekasmim brāhmaṇavācake tūlasāṭakena saddhim pāyasapātim labhitvā ādāya geham gantvāva theram anussari "imam piṇḍapātam mayā therassa dātum vaṭṭatī"ti. Theropi tam khaṇam jhānam samāpajjitvā samāpattito vuṭṭhāya tam brāhmaṇam disvā "brāhmaṇo deyyadhammam labhitvā mama āgamanam paccāsīsati, mayā tattha gantum vaṭṭatī"ti saṃghāṭim pārupitvā pattam ādāya tassa gehadvāre ṭhitameva attānam dassesi.

Brāhmaņo theram disvāva cittam pasīdi, atha nam upasankamitvā vanditvā paṭisanthāram katvā antogehe nisīdāpetvā pāyasapātim gahetvā therassa patte ākiri. Thero upaḍḍham sampaṭicchitvā hatthena pattam pidahi. Atha nam brāhmaņo āha "bhante ekapaṭivīsamattova ayam pāyaso, paralokasangaham me karotha, mā idhalokasangaham, niravasesameva dātukāmomhī"ti sabbam ākiri. Thero tattheva paribhuñji. Athassa bhattakiccapariyosāne tampi sāṭakam datvā vanditvā evamāha "bhante ahampi tumhehi diṭṭhadhammameva pāpuṇeyyan"ti. Thero "evam hotu brāhmaṇā"ti tassa anumodanam katvā uṭṭhāyāsanā pakkamanto anupubbena cārikam caranto Jetavanam agamāsi. "Duggatakāle dinnadānam pana ativiya tosetī"ti brāhmaṇopi tam dānam datvā pasannacitto somanassajāto there adhimattam sinehamakāsi. So there sineheneva kālam katvā Sāvatthiyam therassūpaṭṭhākakule paṭisandhim

gaņhi. Tamkhaņeyeva panassa mātā "kucchiyam me gabbho patiṭṭhito"ti ñatvā sāmikassa ārocesi. So tassā gabbhaparihāram adāsi.

Tassā accunha-atisīta-ati-ambilādiparibhogam vajjetvā sukhena gabbham parihariyamānāya evarūpo dohalo uppajji "aho vatāham Sāriputtattherappamukhāni pañca bhikkhusatāni nimantetvā gehe nisīdāpetvā asambhinnakhīrapāyasam datvā sayampi kāsāyavatthāni paridahitvā suvannasarakam ādāya āsanapariyante nisīditvā ettakānam bhikkhūnam ucchitthapāyasam paribhuñjeyyan"ti. Tassā kira so kāsāyavatthaparidahane dohalo kucchiyam puttassa Buddhasāsane pabbajjāya pubbanimittam ahosi. Athassā ñātakā "dhammiko no dhītāya dohalo"ti Sāriputtattheram samghattheram katvā pañcannam bhikkhusatānam asambhinnakhīrapāyasam adamsu. Sāpi ekam kāsāvam nivāsetvā ekam pārupitvā suvannasarakam gahetvā āsanapariyante nisinnā ucchitthapāyasam paribhuñji, dohalo patippassambhi. Tassā yāva gabbhavutthānā antarantarā katamaṅgalesupi, dasamāsaccayena puttam vijātāya katamangalesupi Sāriputtattherappamukhānam pañcannam bhikkhusatānam appodakamadhupāyasameva adamsu. Pubbe<sup>1</sup> kiresa dārakena brāhmanakāle dinnapāyasassa nissando.

Jātamaṅgaladivase pana taṁ dārakaṁ pātova nhāpetvā maṇḍetvā sirisayane satasahassagghanikassa kambalassa upari nipajjāpesuṁ. So tattha nipannakova theraṁ oloketvā "ayaṁ me pubbācariyo, mayā theraṁ nissāya ayaṁ sampatti laddhā, mayā imassa ekaṁ pariccāgaṁ kātuṁ vaṭṭatī"ti sikkhāpadagahaṇatthāya ānīyamāno taṁ kambalaṁ cūḷaṅguliyā veṭhetvā aggahesi. Athassa "aṅguliyaṁ kambalo laggo"ti te taṁ harituṁ ārabhiṁsu. So parodi. Ñātakā "apetha, mā dārakaṁ rodāpethā"ti kambaleneva saddhiṁ ānayiṁsu. So theraṁ vandanakāle kambalato aṅguliṁ apakaḍḍhitvā kambalaṁ therassa pādamūle pātesi. Ñātakā "daharakumārena ajānitvā katan"ti avatvā "puttena no dinnaṁ, pariccattameva hotu bhante"ti vatvā "bhante satasahassagghanikena kambalena pūjākārakassa tumhākaṁ dāsassa sikkhāpadāni dethā"ti āhaṁsu. Konāmo ayaṁ dārakoti. Bhante ayyena

samānanāmako, Tisso nāmesa bhavissatīti. Thero kira gihikāle Upatissamāṇavo nāma ahosi. Mātāpissa cintesi "na mayā puttassa ajjhāsayo bhinditabbo"ti. Evam dārakassa nāmakaraṇamaṅgalam katvā puna tassa āhāraparibhogamaṅgalepi puna tassa kaṇṇavijjhanamaṅgalepi dussagahaṇamaṅgalepi cūļākappanamaṅgalepi Sāriputtattherappamukhānam pañcannam bhikkhusatānam appodakamadhupāyasameva adamsu.

Dārako vuddhimanvāya sattavassikakāle mātaram āha "amma therassa santike pabbajissāmī"ti. "Sādhu tāta, pubbevāham 'na mayā puttassa ajjhāsayo bhinditabbo'ti manam akāsim, pabbaja puttā"ti theram nimantāpetvā tassa āgatassa bhikkhañca datvā "bhante tumhākam dāso 'pabbajissāmī'ti vadati, imam ādāya sāyam vihāram āgamissāmā"ti theram uyyojetvā sāyanhasamaye mahantena sakkārasammānena puttam ādāya vihāram gantvā therassa niyyādesi. Thero tena saddhim kathesi "Tissa pabbajjā nāma dukkarā, unhena atthe sati sītam<sup>1</sup> labhati, sītena atthe sati unham labhati, pabbajitvā kicchena jīvanti, tvanca sukhedhito"ti. Bhante aham tumhehi vuttaniyāmeneva sabbam kātum sakkhissāmīti. Thero "sādhū"ti vatvā tassa patikūlamanasikāravasena tacapañcakakammatthānam ācikkhitvā tam pabbājesi. Sakalampi hi dvattimsakāram kathetum vattatiyeva. Sabbam kathetum asakkontena pana tacapañcakakammatthānam kathetabbameva. Idañhi kammatthānam sabbabuddhānam avijahitameva. Kesādīsu ekekakotthāsesu arahattam pattānam bhikkhūnampi bhikkhunīnampi upāsakānampi upāsikānampi paricchedo natthi. Abyattā bhikkhū pana pabbājentā arahattassūpanissayam nāsenti. Tasmā thero kammatthānam ācikkhitvā pabbājetvā dasasu sīlesu patitthāpesi.

Mātāpitaro puttassa pabbajitasakkāram karontā sattāham vihāreyeva Buddhappamukhassa bhikkhusamghassa appodakamadhupāyasameva adamsu. Bhikkhūpi "nibaddham appodakamadhupāyasam paribhuñjitum na sakkomā"ti ujjhāyimsu. Tassapi mātāpitaro sattame divase sāyam geham agamamsu. Sāmaņero aṭṭhame divase bhikkhūhi saddhim piṇḍāya pāvisi. Sāvatthivāsino "sāmaņero kira ajja piṇḍāya pavisissati,

sakkāramassa karissāmā"ti pañcahi sāṭakasatehi cumbaṭakāni katvā pañca piṇḍapātasatāni sajjetvā ādāya paṭipathe ṭhatvā adaṁsu, punadivase vihārassa upavanaṁ¹ āgantvā adaṁsu. Evaṁ sāmaṇero dvīheva divasehi sāṭakasahassehi saddhiṁ piṇḍapātasahassaṁ labhitvā bhikkhusaṁghassa dāpesi. Brāhmaṇakāle dinnathūlasāṭakassa kiresa nissando. Athassa bhikkhū "Pindapātadāyakatisso"ti nāmaṁ kariṁsu.

Punekadivasam sāmaņero sītakāle vihāracārikam caranto bhikkhū tattha tattha aggisālādīsu visibbente disvā āha "kim bhante visibbento nisinnātthā"ti. Sītam no pīļeti sāmaņerāti. Bhante sītakāle nāma kambalam pārupitum vaṭṭati. So hi sītam paṭibāhitum samatthoti. Sāmaņera tvam mahāpuñño kambalam labheyyāsi, amhākam kuto kambaloti. "Tena hi bhante kambalatthikā mayā saddhim āgacchantū"ti sakalavihāre ārocāpesi. Atha bhikkhū "sāmaņerena saddhim gantvā kambalam āharissāmā"ti sattavassikasāmaņeram nissāya sahassamattā bhikkhū nikkhamimsu. So "ettakānam bhikkhūnam kuto kambalam labhissāmī"ti cittampi anuppādetvā te ādāya nagarābhimukho pāyāsi. Sudinnassa hi dānassa evarūpo ānubhāvo hoti. So bahinagareyeva gharapaṭipāṭiyā caranto pañca kambalasatāni labhitvā antonagaram pāvisi. Manussā ito cito ca kambale āharanti.

Eko pana puriso āpaṇadvārena āgacchanto pañca kambalasatāni pasāretvā nisinnam ekam āpaṇikam disvā āha "ambho eko sāmaṇero kambale samharanto āgacchati, tava kambale paṭicchādehī"ti. Kim pana so dinnake gaṇhāti, udāhu adinnaketi. Dinnake gaṇhātīti. "Evam sante sace icchāmi, dassāmi, no ce, na dassāmi, gaccha tvan"ti uyyojesi. Maccharinohi andhabālā evarūpesu dānam dadamānesu maccharāyitvā asadisadānam disvā maccharāyanto kāļo² viya niraye nibbattanti. Āpaṇiko cintesi "ayam puriso attano dhammatāya āgacchamāno 'tava kambale paṭicchādehī'ti mam āha. Sacepi³ so dinnakam gaṇhāti, aham pana 'mama santakam sace icchāmi, dassāmi, no ce,

<sup>1.</sup> Vihārassūpacāram (Ka)

<sup>2.</sup> Khu 1. 40 piṭṭhe Asadisadānavatthuṭṭhakathāyaṁ āgato.

<sup>3.</sup> Ahampi sace (Syā), api sace (Ka)

na dassāmī'ti avacam, diṭṭhakam pana adentassa lajjā uppajjati, attano santakam paṭicchādentassa doso natthi, imesu pañcakambalasatesu dve kambalāni satasahassagghanikāni, imāneva paṭicchādetum vaṭṭatī''ti. Dvepi kambale dasāya dasam sambandhitvā tesam antare pakkhipitvā paṭicchādesi. Sāmaṇeropi bhikkhusahassena saddhim tam padesam pāpuṇi. Āpaṇikassa sāmaṇeram disvāva puttasineho uppajji, sakalasarīram sinehena paripuṇṇam ahosi. So cintesi "tiṭṭhatu kambalāni, imam disvā hadayamamsampi dātum yuttan''ti. Te dvepi kambale nīharitvā sāmaṇerassa pādamūle ṭhapetvā vanditvā "bhante tayā diṭṭhadhammassa bhāgī assan''ti avaca. Sopissa "evam hotū''ti anumodanam akāsi.

Sāmaṇero antonagarepi pañca kambalasatāni labhi. Evam ekadivasamyeva kambalasahassam labhitvā bhikkhusahassassa adāsi. Athassa Kambaladāyakatissattheroti nāmam karimsu. Evam nāmakaraṇadivase dinnakambalo sattavassikakāle kambalasahassabhāvam pāpuṇi. Buddhasāsanam hi ṭhapetvā natthaññam tam ṭhānam, yattha appam dinnam bahum hoti, bahum dinnam bahutaram. Tenāha Bhagavā—

Tathārūpoyam bhikkhave bhikkhusamgho, yathārūpe bhikkhusamghe appam dinnam bahum hoti, bahum dinnam bahutaranti<sup>1</sup>.

Evam sāmaņero ekakambalassa nissandena sattavassikova kambalasahassam labhi. Tassa Jetavane viharantassa abhikkhaṇam ñātidāyakā<sup>2</sup> santikam āgantvā kathāsallāpam karonti. So cintesi "mayā idha vasantena ñātidāyakesu³ āgantvā kathentesu akathetumpi na sakkā, etehi saddhim kathāpapañcena attano patiṭṭham kātum na sakkā, yamnūnāham Satthu santike kammaṭṭhānam uggaṇhitvā araññam paviseyyan"ti. So Satthāram upasaṅkamitvā vanditvā yāva arahattā kammaṭṭhānam kathāpetvā upajjhāyam vanditvā pattacīvaramādāya vihārā nikkhamitvā "sace āsannaṭṭhāne vasissāmi, ñātakā mam pakkosissantī"ti vīsati yojanasatam maggam agamāsi. Athekena gāmadvārena gacchanto ekam mahallakapurisam disvā pucchi "kim nu kho mahā-upāsaka imasmim padese

vasantānam āraññakavihāro atthī"ti. Atthi bhanteti. Tena hi me maggam ācikkhāhīti. Mahallaka-upāsakassa pana tam disvāva puttasineho udapādi. Athassa tattheva thito anācikkhitvā "ehi bhante, ācikkhissāmi te"ti gahetvā agamāsi. Sāmaņero tena saddhim gacchanto antarāmagge nānāpupphaphalapaṭimaṇḍite rukkhapabbatapadese¹ disvā "ayam upāsaka kim padeso nāma, ayam upāsaka kim padeso nāmā"ti pucchi. Sopissa tesam nāmāni ācikkhanto āraññakavihāram patvā "idam bhante phāsukaṭṭhānam, idheva vasāhī"ti vatvā "bhante konāmo tvan"ti nāmam pucchitvā "ayam Vanavāsītisso nāma upāsakā"ti vutte "sve amhākam gāme bhikkhāya caritum vaṭṭatī"ti vatvā nivattitvā antogāmameva gato. "Vanavāsītisso nāma vihāram āgato, tassa yāgubhattādīni paṭiyādethā"ti manussānam ārocesi.

Sāmaņero paṭhamameva Tisso nāma hutvā tato Piṇḍapātadāyakatisso Kambaladāyakatisso Vanavāsītissoti tīṇi nāmāni labhitvā sattavassabbhantare cattāri nāmāni labhi. So punadivase pātova tam gāmam piṇḍāya pāvisi. Manussā bhikkham datvā vandimsu. Sāmaņero "sukhitā hotha, dukkhā muccathā"ti āha. Ekamanussopi tassa bhikkham datvā puna geham gantum nāsakkhi, sabbeva olokentā aṭṭhamsu. Sopi attano yāpanamattameva gaṇhi. Sakalagāmavāsino tassa pādamūle urena nipajjitvā bhante tumhesu imam temāsam idha vasantesu mayam tīṇi saraṇāni gahetvā pañcasu sīlesu patiṭṭhāya māsassa aṭṭha uposathakammāni upavasissāma, idha vasanatthāya no paṭiññam dethāti. So upakāram sallakkhetvā tesam paṭiññam datvā nibaddham tattheva piṇḍapātacāram cari. Vanditavanditakkhaṇe ca "sukhitā hotha, dukkhā muccathā"ti padadvayameva kathetvā pakkāmi. So tatthevapaṭhamamāsañca dutiyamāsañca vītināmetvā tatiyamāse gacchante saha paṭisambhidāhi arahattham pāpuni.

Athassa pavāretvā vuṭṭhavassakāle upajjhāyo Satthāraṁ upasaṅkamitvā vanditvā āha "ahaṁ bhante Tissasāmaṇerassa santikaṁ gacchāmī"ti. Gaccha Sāriputtāti. So attano parivāre pañcasate

bhikkhū ādāya pakkanto "āvuso Moggallāna ahaṁ Tissasāmaṇerassa santikaṁ gacchāmī"ti āha. Mahāmoggallānatthero "ahampi āvuso gacchāmī"ti pañcahi bhikkhusatehi saddhiṁ nikkhami. Etenupāyena Mahākassapatthero Anuruddhatthero Upālitthero Puṇṇattheroti sabbe mahāsāvakā pañcahi pañcahi bhikkhusatehi saddhiṁ nikkhamiṁsu. Sabbepi mahāsāvakānaṁ parivārā cattālīsa bhikkhusahassāni ahesuṁ. Te vīsatiyojanasataṁ maggaṁ gantvā gocaragāmaṁ sampattā. Sāmaṇerassa nibaddhūpaṭṭhāko upāsako dvāreyeva disvā paccuggantvā vandi.

Atha nam Sāriputtatthero pucchi "atthi nu kho upāsaka imasmim padese āraññakavihāro''ti. Atthi bhanteti. Sabhikkhuko, abhikkhukoti. Sabhikkhuko bhanteti. Konāmo tattha vasatīti. Vanavāsītisso bhanteti. Tena hi maggam no ācikkhāti. Ke tumhe bhanteti. Mayam sāmanerassa santikam āgatāti. Upāsako oloketvā Dhammasenāpatim ādim katvā sabbepi mahāsāvake sañjānitvā nirantaram pītiyā phutthasarīro hutvā "titthatha tāva bhante"ti vegena gāmam pavisitvā "ete ayyā Sāriputtattheram ādim katvā asīti mahāsāvakā attano attano parivārehi saddhim sāmanerassa santikam āgatā, mañcapīthapaccattharaṇadīpatelādīni gahetvā vegena nikkhamathā"ti ugghosesi. Manussā tāvadeva mañcādīni gahetvā therānam padānupadikā hutvā therehi saddhimyeva vihāram pavisimsu. Sāmanero sikkhusamgham sañjānitvā katipayānam<sup>1</sup> mahātherānam pattacīvarāni patiggahetvā vattamakāsi. Tassa therānam vasanatthānam samvidahantassa pattacīvaram patisāmentasseva andhakāro jātoti. Sāriputtatthero upāsake āha "gacchatha upāsakā, tumhākam andhakāro jāto"ti. Bhante ajja dhammassavanadivaso, na mayam gamissāma, dhammam sunissāma, ito pubbe dhammassavanampi natthīti. Tena hi sāmaņera dīpam jāletvā dhammassavanassa kālam ghosehīti. So tathā akāsi. Atha nam thero āha "Tissa tava upatthākā 'dhammam sotukāmāmhā'ti vadanti, kathehi tesam dhamman''ti. Upāsakā ekappahāreneva utthāya "bhante amhākam ayyo 'sukhitā hotha, dukkhā muccathā'ti imāni dve padāni thapetvā aññam dhammakatham na

jānāti, amhākam aññam dhammakathikam dethā"ti vadimsu. Sāmaņero pana arahattam patvāpi neva tesam dhammakatham kathesīti.

Tadā pana nam upajjhāyo "sāmanera katham pana sukhitā honti, 'katham pana dukkhā muccantī'ti imesam no dvinnam padānam attham kathehī"ti āha. So "sādhu bhante"ti cittabījanim gahetvā dhammāsanam āruyha pañcahi nikāyehi atthañca kāranañca ākaddhitvā ghanavassam vassanto cātuddīpakamahāmegho viya khandhadhātuāyatanabodhipakkhiyadhamme vibhajanto arahattakūtena dhammakatham kathetvā "bhante evam arahattappattassa sukham hoti, arahattam pattoyeva dukkhā muccati, sesajanā jātidukkhādīhi ceva nirayadukkhādīhi ca na parimuccanti'ti āha. Sādhu sāmanera, sukathito te patibhāno<sup>1</sup>, idāni sarabhañnam bhanāhīti. So sarabhañnampi bhani. Arune uggacchante sāmanerassa upatthākamanussā dve bhāgā ahesum. Ekacce "na vata no ito pubbe evarūpo kakkhalo ditthapubbo. Katham hi nāma evarūpam dhammakatham jananto ettakam kalam matapitutthane thatva upatthahantanam manussanam ekampi dhammapadam na kathesi"ti kujjhimsu. Ekacce "lābhā vata no, ye mayam evarūpam bhadantam guṇam vā agunam vā ajānantāpi upatthahimha, idāni ca panassa santike dhammam sotum labhimhā"ti tussimsu.

Vanavāsītissassa upaṭṭhāke attano ñāṇajālassa anto paviṭṭhe disvā "kiṁ nu kho bhavissatī"ti āvajjento imamatthaṁ upadhāresi "Vanavāsītissasāmaṇerassa upaṭṭhākā ekacce tuṭṭhā, ekacce kuddhā, mayhaṁ puttassa pana sāmaṇerassa kuddhā nirayabhāgino² bhavissanti, gantabbameva tattha mayā, mayi gate sabbepi te sāmaṇere mettacittaṁ katvā dukkhā muccissantī"ti. Tepi manussā bhikkhusaṁghaṁ nimantetvā gāmaṁ gantvā maṇḍapaṁ kāretvā yāgubhattādīni sampādetvā āsanāni paññāpetvā saṁghassa āgamanamaggaṁ olokentā nisīdiṁsu. Bhikkhūpi sarīrapaṭijagganaṁ katvā bhikkhācāravelāya gāmaṁ piṇḍāya pavisantā sāmaṇeraṁ pucchiṁsu "kiṁ Tissa tvaṁ amhehi saddhiṁ gamissasi, udāhu pacchā"ti. Mama gamanavelāyameva gamissāmi, gacchatha tumhe bhanteti.

Sammāsambuddhopi tam divasam paccūsasamaye lokam volokento

Bhikkhū pattacīvaramādāya pavisimsu.

Satthā Jetavanasmimyeva cīvaram pārupitvā pattamādāya ekacittakkhaņeneva gantvā bhikkhūnam purato ṭhitameva attānam dassesi. "Sammāsambuddho āgato"ti sakalagāmo sankhubhitvā ekakolāhalo ahosi. Manussā udaggacittā Buddhappamukham bhikkhusamgham nisīdāpetvā yāgum datvā khajjakam adamsu. Sāmaņero bhatte aniṭṭhiteyeva antogāmam pāvisi. Gāmavāsino nīharitvā tassa sakkaccam bhikkham adamsu. So yāpanamattam gahetvā Satthu santikam gantvā pattam upanāmesi. Satthā "āhara Tissā"ti hattham pasāretvā pattam gahetvā "passa Sāriputta tava sāmaņerassa pattan"ti therassa dassesi. Thero Satthu hatthato pattam gahetvā sāmaņerassa datvā "gaccha, attano pattaṭṭhāne nisīditvā bhattakiccam karohī"ti āha.

Gāmavāsino Buddhappamukham bhikkhusamgham parivisitvā Satthāram vanditvā anumodanam yācimsu. Satthā anumodanam karonto evamāha "lābhā vata vo upāsakā, ye tumhe attano kulūpakam sāmaneram nissāya Sāriputtam Moggallānam Kassapam Anuruddhanti asītimahāsāvake dassanāya labhatha, ahampi tumhākam kulūpakameva nissāya āgato, Buddhadassanampi vo imam nissāyeva laddham, lābhā vo, suladdham vo"ti. Manussā cintayimsu "aho amhākam lābhā, Buddhānañceva bhikkhusamghassa ca ārādhanasamattham amhākam ayyam dassanāya labhāma, deyyadhammañcassa dātum labhāmā"ti sāmanerassa kuddhā manussā tussimsu. Tutthā manussā bhiyyoso mattāya pasīdimsu. Anumodanāvasāne bahū sotāpattiphalādīni pāpunimsu. Satthā utthāyāsanā pakkāmi. Manussā Satthāram anugantvā vanditvā nivattimsu. Satthā sāmanerena saddhim samadhurena gacchanto "sāmanera ayam padeso konāmo, ayam padeso konāmo"ti pubbe tassa upāsakena dassitapadese pucchanto agamāsi. Sāmaneropi "bhante ayam itthannāmo, ayam itthannāmo"ti ācikkhamānova agamāsi. Satthā tassa vasanaṭṭhānaṁ gantvā pabbatamatthakam abhiruhi. Tattha thitānam pana mahāsamuddo paññāyati. Satthā sāmaneram pucchi "Tissa pabbatamatthake thito ito cito ca oloketvā kim passasī"ti. Mahāsamuddam bhanteti. Mahāsamuddam disvā kim cintesīti. "Mama dukkhitakāle rodantassa catūhi mahāsamuddehi

atirekatarena assunā bhavitabban"ti idam bhante cintesinti. Sādhu sādhu Tissa, evametam. Ekekassa hi sattassa dukkhitakāle paggharita-assūni catūhi mahāsamuddehi atirekatarānevāti. Idanca pana vatvā imam gāthamāha—

"Catūsu samuddesu jalam parittakam, Tato bahum assujalam anappakam. Dukkhena phuṭṭhassa narassa socanā<sup>1</sup>, Kim kāraṇā samma tuvam pamajjasī"ti.

Atha nam puna pucchi "Tissa kaham vasasī"ti. Imasmim pabbhāre bhanteti. Tattha pana vasanto kim cintesīti. "Mayā marantena imasmim thāne katassa sarīranikkhepassa paricchedo natthī"ti cintesim bhanteti. "Sādhu sādhu Tissa, evametam. Imesañhi sattānam pathaviyam nipajjitvā amatatthānam nāma natthī"ti vatvā—

"Upasāļakanāmāni, sahassāni catuddasa. Asmim padese daḍḍhāni, natthi loke anāmatam.

Yamhi saccañca dhammo ca, ahimsā samyamo damo. Etam ariyā sevanti, etam loke anāmatan"ti<sup>2</sup>—

Imam Dukanipāte **Upasāļakajātakam** kathesi. Iti pathaviyam sarīranikkhepam katvā marantesu sattesu amatapubbapadese marantā nāma natthi, Ānandattherasadisā pana amatapubbapadese parinibbāyanti.

Ānandatthero kira vīsavassasatikakāle āyusankhāram olokento parikkhīṇabhāvam ñatvā "ito sattame divase parinibbāyissāmī"ti ārocesi. Tam pavattim sutvā Rohiṇīnadiyā ubhayatīravāsikesu manussesu orimatīravāsikā "mayam therassa bahūpakārā, amhākam santike parinibbāyissatī"ti vadimsu. Paratīravāsikāpi "mayam therassa bahūpakārā, amhākam santike parinibbāyissatī"ti vadimsu. Thero tesam vacanam sutvā "ubhayatīravāsino mayham upakārā, ime nāma anupakārāti na sakkā vattum, sacāham

orimatīre parinibbāyissāmi, paratīravāsino dhātugahanattham tehi saddhim kalaham karissanti. Sace paratīre parinibbāyissāmi, orimatīravāsinopi tathā karissanti, kalaho uppajjamānopi mam nissāyeva uppajjissati, vūpasamamānopi mam nissāyeva vūpasamissatī"ti cintetvā "orimatīravāsinopi mayham upakārā, paratīra vāsinopi mayham upakārā, anupakārāpi nāma natthi, orimatīravāsino orimatīreveva sannipatantu, paratīravāsinopi paratīreyevā"ti āha. Tato sattame divase majjhenadiyā sattatālappamāne ākāse pallankena nisīditvā mahājanassa dhammam kathetvā "mama sarīram majjhe bhijjitvā eko bhāgo orimatīre patatu, eko bhāgo paratīre"ti adhitthāya yathānisinnova tejodhātum samāpajji, jālā utthahimsu. Sarīram majjhe bhijjitvā eko bhāgo orimatīre pati, eko bhāgo paratīre. Tato mahājano paridevi, pathavi-undriyanasaddo viya ārodanasaddo ahosi. Satthu parinibbāne ārodanasaddatopi kāruññataro ahosi. Manussā cattāro māse rodantā paridevantā "Satthu pattacīcaraggāhake titthante Satthu thitakālo viya no ahosi, idāni no Satthā parinibbuto"ti vippalapantā viravantā vicarimsūti.

Puna Satthā sāmaņeram pucchi "Tissa imasmim vanasaņde dīpi-ādīnam saddena bhāyasi, na bhāyasī"ti. "Na bhāyāmi Bhagavā, apica kho pana me etesam saddam sutvā vanarati nāma uppajjatī"ti vatvā saṭṭhimattāhi gāthāhi vanavaṇṇanam nāma kathesi. Atha nam Satthā "Tissā"ti āmantesi. Kim bhanteti. Mayam gacchāma, tvam gamissasi, nivattissasīti. Mayham upajjhāye mam ādāya gacchante gamissāmi, nivattente nivattissāmi bhanteti. Satthā bhikkhusamghena saddhim pakkāmi. Sāmaņerassa pana nivattitumeva ajjhāsayo, thero tam ñatvā "Tissa sace nivattitukāmo, nivattā"ti āha. So Satthārañca bhikkhusamghañca vanditvā nivatti. Satthā Jetavanameva agamāsi.

Bhikkhūnam dhammasabhāyam kathā udapādi "aho vata Vanavāsītissasāmaņero dukkaram karoti, paṭisandhiggahaṇato paṭṭhāyassa ñātakā sattasu maṅgalesu pañcannam bhikkhusatānam appodakamadhupāyasameva adamsu, pabbajitakāle antovihāre Buddhappamukhassa bhikkhusamghassa satta divasāni

Khuddakanikāya

appodakamadhupāyasameva adamsu. Pabbajitvā atthame divase antogāmam pavisanto dvīheva divasehi sātakasahassena saddhim pindapātasahassam labhi, punekadivasam kambalasahassam labhi. Itissa idha vasanakāle mahālābhasakkāro uppajji, idāni evarūpam lābhasakkāram chaddetvā araññam pavisitvā missakāhārena vāpeti, dukkarakārako vata Tissasāmanero''ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "āma bhikkhave, lābhūpanisā nāmesā aññā, nibbānagāminī patipadā aññā. 'Evam lābham labhissāmī'ti hi āraññikādidhutaṅgasamādānavasena lābhūpanisaṁ rakkhantassa bhikkhuno cattāro apāyā vivatadvārā eva titthanti, nibbānagāminiyā pana patipadāya uppannam lābhasakkāram pahāya araññam pavisitvā ghatento vāyamanto arahattam ganhatī"ti anusandhim ghatetva dhammam desento imam gāthamāha—

75. "Aññā hi lābhūpanisā, aññā nibbānagāminī. Evametam abhiññaya, bhikkhu Buddhassa savako. Sakkāram nābhinandeyya, vivekamanubrūhaye"ti.

Tattha aññā hi lābhūpanisā, aññā nibbānagāminīti lābhūpanisā nāmesā aññā eva, aññā nibbānagāminī patipadā. Lābhuppādakena hi bhikkhunā thokam akusalakammam kātum vattati, kāyavankādīni kātabbāni honti. Yasmim hi kāle kāyavankādīsu kinci karoti, tadā lābho uppajjati. Pāyasapātiyam hi vankam akatvā ujukameva hattham otāretvā ukkhipantassa hattho makkhitamattakova hoti, vankamkatva otaretva ukkhipantassa pana pāyasapindam uddharantova nikkhamati, evam kāyavankādīni karanakāleyeva lābho uppajjati. Ayam adhammikā lābhūpanisā nāma. Upadhisampadā cīvaradhāranam bāhusaccam parivāro araññavāsoti evarūpehi pana kāranehi uppanno lābho dhammiko nāma hoti. Nibbānagāminim patipadam pūrentena pana bhikkhunā kāyavankādīni pahātabbāni. Anandheneva andhena viya, amūgeneva mūgena viya, abadhireneva badhirena viya bhavitum vattati. Asathena amayena bhavitum vattati. **Evametan**ti etam labhuppadanam patipadanca nibbanagaminim patipadañca evam ñatvā sabbesam sankhatāsankhatadhammānam

bujjhanatthena **Buddhassa** savanante jātatthena ovādānusāsanim vā savanatthena **sāvako bhikkhu** adhammikam catupaccayasakkāram nābhinandeyya, na ceva dhammikam patikkoseyya, kāyavivekādikam **vivekam anubrūhaye.** Tattha **Kāyaviveko**ti kāyassa ekībhāvo. **Cittaviveko**ti attha samāpattiyo. **Upadhiviveko**ti nibbānam. Tesu kāyaviveko gaṇasaṅgaṇikam vinodeti, cittaviveko kilesasaṅgaṇikam vinodeti, upadhiviveko saṅkhārasaṅgaṇikam vinodeti. Kāyaviveko cittavivekassa paccayo hoti, cittaviveko upadhivivekassa paccayo hoti. Vuttampihetam—

Kāyaviveko ca vivekaṭṭhakāyānaṁ nekkhammābhiratānaṁ, cittaviveko ca parisuddhacittānaṁ paramavodānappattānaṁ, upadhiviveko ca nirupadhīnaṁ puggalānaṁ visaṅkhāragatānanti¹.

Imam tividhampi vivekam brūheyya vaḍḍheyya, upasampajja vihareyyāti attho.

Desanāvasāne bahū sotāpattiphalādīni pāpuņimsūti.

Vanavāsītissasāmaneravatthu pannarasamam.

Bālavaggavannanā niţţhitā.

Pañcamo vaggo.

# 6. Panditavagga

#### 1. Rādhattheravatthu

**Nidhīnamva pavattāran**ti imam dhammadesanam Satthā Jetavane viharanto āyasmantam Rādhattheram ārabbha kathesi.

So kira gihikāle Sāvatthiyam duggatabrāhmano ahosi. So "bhikkhūnam santike jīvissāmī"ti cintetvā vihāram gantvā appaharitakam karonto parivenam sammajjanto mukhadhovanādīni dadanto antovihāreyeva vasi. Bhikkhūpi nam sanganhimsu, pabbājetum pana na icchanti. So pabbajjam alabhamāno kiso ahosi. Athekadivasam Satthā paccūsakāle lokam volokento tam brāhmaṇam disvā "kim nukho"ti upadhārento "arahā bhavissatī"ti ñatvā sāyanhasamaye vihāracārikam caranto viya brāhmaņassa santikam gantvā "brāhmana kim karonto vicarasī"ti āha. Bhikkhūnam vattapativattam karonto bhanteti. Labhasi nesam santikā sangahanti. Ama bhante, āhāramattam labhāmi, na pana mam pabbājentīti. Satthā etasmim nidāne bhikkhusamgham sannipātāpetvā tamattham pucchitvā "bhikkhave atthi koci imassa brāhmanassa adhikāram saratī"ti<sup>1</sup> pucchi. Sāriputtatthero "aham bhante sarāmi, ayam me Rājagahe pindāya carantassa attano abhihatam katacchubhikkham dāpesi, imamassāham adhikāram sarāmī"ti āha. So Satthārā "kim pana te Sāriputta evam katūpakāram dukkhato mocetum na vattatī"ti vutte "sādhu bhante,, pabbājessāmī"ti tam brāhmanam pabbājesi. Tassa bhattagge āsanapariyante āsanam pāpunāti, yāgubhattādīhipi kilamati. Thero tam ādāya cārikam pakkāmi, abhikkhanam ca nam "idam te kattabbam, idam te na kattabban"ti ovadi anusāsi. So suvaco ahosi padakkhinaggāhī. Tasmā yathā nusittham patipajjamāno katipāheneva arahattam pāpuņi.

Thero tam ādāya Satthu santikam gantvā vanditvā nisīdi. Atha nam Satthā patisanthāram katvā āha "suvaco nu kho Sāriputta te

antevāsiko"ti. Āma bhante, ativiya suvaco, kismiñci dose vuccamāne na kuddhapubboti. Sāriputta evarūpe saddhivihārike labhanto kittake gaņheyyāsīti. Bhante bahukepi gaņheyyamevāti. Athekadivasam dhammasabhāya katham samuṭṭhāpesum "Sāriputtatthero kira kataññū katavedī, kaṭacchubhikkhāmattam upakāram saritvā Duggatabrāhmaṇam pabbājesi. Theropi ovādakkhamo ovādakkhamameva labhī"ti. Satthā tesam katham sutvā "na bhikkhave idāneva, pubbepi Sāriputto kataññū katavedīyevā"ti vatvā tamattham pakāsetum—

"Alīnacittam nissāya, pahaṭṭhā mahatī camū. Kosalam senā'santuṭṭham, jīvaggāham agāhayi.

Evam nissayasampanno, bhikkhu āraddhavīriyo. Bhāvayam kusalam dhammam, yogakkhemassa pattiyā. Pāpuṇe anupubbena, sabbasamyojanakkhayan"ti<sup>1</sup>—

Imam Dukanipāte **Alīnacittajātakam** vitthāretvā kathesi. Tadā kira vaḍḍhakīhi pādassa arogakaraṇabhāvena katam attano upakāram ñatvā sabbasetassa hatthipotakassa dāyako ekacāriko hatthī Sāriputtatthero ahosīti evam theram ārabbha jātakam kathetvā Rādhattheram ārabbha "bhikkhave bhikkhunā nāma Rādhena viya suvacena bhavitabbam, dosam dassetvā ovādiyamānenapi na kujjhitabbam, ovādadāyako pana nidhi-ācikkhaṇako viya daṭṭhabbo"ti vatvā anusandhim ghaṭetvā dhammam desento imam gāthamāha—

76. "Nidhīnamva pavattāram, yam passe vajjadassinam. Niggayhavādim medhāvim, tādisam paṇḍitam bhaje. Tādisam bhajamānassa, seyyo hoti na pāpiyo"ti.

Tattha **nidhīnan**ti tattha tattha nidahitvā ṭhapitānaṁ hiraññasuvaṇṇādipūrānaṁ nidhikumbhīnaṁ. **Pavattāran**ti kicchajīvike duggatamanusse anukampaṁ katvā "ehi, sukhena jīvanūpāyaṁ dassessāmī'ti nidhiṭṭhānaṁ netvā hatthaṁ pasāretvā "imaṁ gahetvā sukhena jīvā''ti ācikkhitāraṁ² viya. **Vajjadassinan**ti dve vajjadassino "iminā naṁ asāruppena vā khalitena vā saṁghamajjhe niggaṇhissāmī''ti

randhagavesako ca, aññātam ñāpanatthāya ñātam anuggahanatthāya sīlādīnamassa vuddhikāmatāya tam tam vajjam olokanena ullumpanasabhāvasanthito ca. Ayam idha adhippeto. Yathā hi duggatamanusso "imam ganhāhī"ti tajjetvāpi pothetvāpi nidhim dassente kopam na karoti, pamudito eva hoti, evameva evarūpe puggale asāruppam vā khalitam vā disvā ācikkhante kopo na kātabbo, tuttheneva bhavitabbam, "bhante mahantam vo kammam katam, mayham ācariyupajjhāyatthāne thatvā ovadantehi punapi mam vadeyyāthā"ti pavāretabbameva. Niggayhavādinti ekacco hi saddhivihārikādīnam asāruppam vā khalitam vā disvā "ayam me mukhodakadānādīhi sakkaccam upatthahati, sace nam vakkhāmi, na mam upatthahissati, evam me parihāni bhavissatī"ti vattum avisahanto na niggayhavādī nāma hoti. So imasmim sāsane kacavaram ākirati. Yo pana tathārūpam vajjam disvā vajjānurūpam tajjento panāmento dandakammam karonto vihārā tam nīharanto sikkhāpeti, ayam niggayhavādī nāma seyyathāpi Sammāsambuddho. Vuttañhetam "niggayha niggayhāham Ānanda vakkhāmi, pavayha pavayha Ānanda vakkhāmi, yo sāro so thassatī"ti<sup>1</sup>. **Medhāvin**ti dhammojapaññāya samannāgatam. **Tādisan**ti evarūpam panditam bhajeyya payirupāseyya. Tādisañhi ācariyam bhajamānassa antevāsikassa seyyo hoti, na pāpiyo vaddhiyeva hoti, no parihānīti.

Desanāpariyosāne bahū sotāpattiphalādīni pāpuņimsūti.

Rādhattheravatthu paṭhamam.

# 2. Assajipunabbasukavatthu

Ovadeyyānusāseyyāti imam dhammadesanam Satthā Jetavane viharanto Assajipunabbasukabhikkhū ārabbha kathesi. Desanā pana Kīṭāgirismim samuṭṭhitā.

Te kira dve bhikkhū kiñcāpi aggasāvakānam saddhivihārikā, alajjino pana ahesum pāpabhikkhū. Te pāpakehi attano parivārehi pañcahi

bhikkhusatehi saddhim Kīṭāgirismim viharantā "mālāvaccham ropentipi ropāpentipī"ti-ādikam¹ nānappakāram anācāram karontā kuladūsakakammam katvā tato uppannehi paccayehi jīvikam kappentā tam āvāsam pesalānam bhikkhūnam anāvāsam akamsu. Satthā tam pavattim sutvā tesam pabbājanīyakammakaraṇatthāya saparivāre dve aggasāvake āmantetvā "gacchatha Sāriputtā, tesu ye tumhākam vacanam na karonti, tesam pabbājanīyakammam karotha, ye pana karonti, te ovadatha anusāsatha. Ovadanto hi anusāsanto apaṇḍitānamyeva appiyo hoti amanāpo, paṇḍitānam pana piyo hoti manāpo"ti anusandhim ghaṭetvā dhammam desento imam gāthamāha—

77. "Ovadeyyānusāseyya, asabbhā ca nivāraye. Satam hi so piyo hoti, asatam hoti appiyo"ti.

Tattha **ovadeyyā**ti uppanne vatthusmim vadanto ovadati nāma, anuppanne vatthusmim "ayasopi te siyā"ti-ādivasena anāgatam dassento anusāsati nāma. Sammukhā vadanto ovadati nāma, parammukhā dūtam vā sāsanam vā pesento anusāsati nāma. Sakim vadanto ovadati nāma, punappunam vadanto anusāsati nāma. Ovadanto eva vā anusāsati nāmāti evam ovadeyya anusāseyya. **Asabbhā cā**ti akusaladhammā ca nivāreyya, kusaladhamme patiṭṭhāpeyyāti attho. **Satam hi so piyo hotī**ti so evarūpo puggalo Buddhādīnam sappurisānam piyo hoti. Ye pana adiṭṭhadhammā avitiṇṇaparalokā āmisacakkhukā jīvikatthāya pabbajitā, tesam **asatam** so ovādako anusāsako, "na tvam amhākam upajjhāyo, na ācariyo, kasmā amhe ovadasī"ti evam mukhasattīhi vijjhantānam appiyo hotīti.

Desanāvasāne bahū sotāpattiphalādīni pāpuņimsūti. Sāriputtamoggallānāpi tattha gantvā te bhikkhū ovadimsu anusāsimsu. Tesu ekacce ovādam sampaṭicchitvā sammā vattimsu, ekacce vibbhamimsu, ekacce pabbājanīyakammam pāpuṇimsūti.

Assajipunabbasukavatthu dutiyam.

#### 3. Channattheravatthu

Na bhaje pāpake mitteti imam dhammadesanam Satthā Jetavane viharanto Channattheram ārabbha kathesi.

So kira āyasmā "ahaṁ amhākaṁ ayyaputtena saddhiṁ mahābhinikkhamanaṁ nikkhanto tadā aññaṁ ekampi na passāmi, idāni pana 'ahaṁ Sāriputto nāma, ahaṁ Moggallāno nāma, mayaṁ aggasāvakamhā'ti vatvā ime vicarantī'ti dve aggasāvake akkosati. Satthā bhikkhūnaṁ santikā taṁ pavattiṁ sutvā Channattheraṁ pakkosāpetvā ovadati. So taṁkhaṇeyeva tuṇhī hutvā puna gantvā there akkosatiyeva. Evaṁ yāvatatiyaṁ akkosantaṁ pakkosāpetvā Satthā ovaditvā "Channa dve aggasāvakā nāma tuyhaṁ kalyāṇamittā uttamapurisā, evarūpe kalyāṇamitte sevassu bhajassū"ti vatvā dhammaṁ desento imaṁ gāthamāha—

78. "Na bhaje pāpake mitte, na bhaje purisādhame. Bhajetha mitte kalyāṇe, bhajetha purisuttame"ti.

Tassattho—kāyaduccaritādi-akusalakammābhiratā **pāpamittā** nāma. Sandhicchedanādike vā ekavīsati-anesanādibhede vā aṭṭhāne niyojakā **purisādhamā** nāma. Ubhopi vā ete pāpamittā ceva purisādhamā ca, te na bhajeyya na payirupāseyya. Viparītā pana kalyāṇamittā ceva sappurisā ca, te bhajetha payirupāsethāti.

Desanāvasāne bahū sotāpattiphalādīni pāpuņimsūti.

Channatthero pana tam ovādam sutvāpi purimanayeneva bhikkhū akkosati paribhāsati. Punapi Satthu ārocesum. Satthā "bhikkhave mayi dharante Channam sikkhāpetum na sakkhissatha, mayi pana parinibbute sakkhissathā"ti vatvā parinibbānakāle āyasmatā Ānandena "bhante katham Channatthere amhehi paṭipajjitabban"ti vutte "Ānanda Channassa bhikkhuno brahmadaṇḍo dātabbo"ti āṇāpesi. So Satthari parinibbute Ānandattherena ārocitam¹ brahmadaṇḍam sutvā dukkhī dummano tikkhattum mucchito patitvā

"Mā mam bhante nāsayitthā"ti yācitvā sammā vattam pūrento na cirasseva saha paṭisambhidāhi arahattam pāpuṇīti.

Channattheravatthu tatiyam.

### 4. Mahākappinattheravatthu

**Dhammapīti sukhaṁ setī**ti imaṁ dhammadesanaṁ Satthā Jetavane viharanto Mahākappinattheraṁ ārabbha kathesi.

Tatrāyam anupubbī kathā—atīte kira āyasmā Mahākappino Padumuttarabuddhassa pādamūle katābhinīhāro samsāre samsaranto Bārānasito avidūre ekasmim Pesakāragāme jetthakapesakāro hutvā nibbatti. Tadā sahassamattā Paccekabuddhā attha māse Himavante vasitvā vassike cattāro māse janapade vasanti. Te ekavāram Bārānasiyā avidūre otaritvā "senāsanakaranatthāya hatthakammam yācathā"ti rañño santikam attha Paccekabuddhe pahinimsu. Tadā pana rañño vappamangalakālo hoti. So "Paccekabuddhā kira āgatā"ti sutvā tasmim khaņe nikkhamitvā āgatakāraņam pucchitvā "ajja bhante okāso natthi, sve amhākam vappamangalam, tatiyadivase karissāmī"ti vatvā Paccekabuddhe animantetvāva pāvisi. Paccekabuddhā "aññattha gamissāmā"ti pakkamimsu. Tasmim khane jetthapesakārassa bhariyā kenacideva karanīyena Bārānasim gacchantī te Paccekabuddhe disvā vanditvā "kim bhante avelāya ayyā āgatā"ti pucchitvā ādito patthāya kathesum. Tam pavattim sutvā saddhāsampannā ñāṇasampannā itthī "sve bhante amhākam bhikkham ganhathā"ti nimantesi. Bahukā mayam bhaginīti. Kittakā bhanteti. Sahassamattāti. "Bhante imasmim gāme sahassapesakārā vasimha<sup>1</sup>, ekeko ekekassa bhikkham dassati, bhikkham adhivāsetha, ahameva vo vasanatthānampi kāressāmī"ti āha. Paccekabuddhā adhivāsayimsu.

Sā gāmam pavisitvā ugghosesi "aham sahassamatte Paccekabuddhe disvā nimantayim, ayyānam nisīdanaṭṭhānam samvidahatha, yāgubhattādīni

sampādethā"ti. Gāmamajjhe maṇḍapaṁ kāretvā āsanāni paññāpetvā punadivase Paccekabuddhe nisīdāpetvā paṇītena khādanīyena bhojanīyena parivisitvā bhattakiccāvasāne tasmiṁ gāme sabbā itthiyo ādāya tāhi saddhiṁ Paccekabuddhe vanditvā "bhante temāsaṁ vasanatthāya paṭiññaṁ dethā"ti tesaṁ paṭiññaṁ gahetvā puna gāme ugghosesi "ammatātā ekekakulato ekeko puriso pharasuvāsi-ādīni gahetvā araññaṁ pavisitvā dabbasambhāre āharitvā ayyānaṁ vasanaṭṭhānaṁ karotū"ti. Gāmavāsino tassāyeva vacanaṁ sutvā¹ ekeko ekekaṁ katvā saddhiṁ rattiṭṭhānadivāṭṭhānehi paṇṇasālasahassaṁ kāretvā attano attano paṇṇasālāyaṁ vassūpagate Paccekabuddhe "ahaṁ sakkaccaṁ upaṭṭhahissāmi, ahaṁ sakkaccaṁ upaṭṭhahissāmī"ti upaṭṭhahiṁsu. Vassaṁvuṭṭhakāle "attano attano paṇṇasālāya vassaṁvuṭṭhānaṁ Paccekabuddhānaṁ cīvarasāṭake sajjethā"ti samādapetvā ekekassa sahassasahassamūlaṁ cīvaraṁ dāpesi. Paccekabuddhā vuṭṭhavassā anumodanaṁ katvā pakkamiṁsu.

Gāmavāsinopi idam puññakammam katvā ito cutā Tāvatimsabhavane nibbattitvā Gaṇadevaputtā nāma ahesum. Te tattha dibbasampattim anubhavitvā Kassapasammāsambuddhakāle Bārāṇasiyam kuṭumbikagehesu nibbattimsu. Jeṭṭhakapesakāro jeṭṭhakakuṭumbikassa putto ahosi. Bhariyāpissa jeṭṭhakakuṭumbikasseva dhītā ahosi. Tā sabbāpi vayappattā parakulam gacchantiyo tesam tesamyeva gehāni agamimsu. Athekadivasam vihāre dhammassavanam saṅghuṭṭham. "Satthā dhammam desessatī"ti sutvā sabbepi te kuṭumbikā "dhammam sossāmā"ti bhariyāhi saddhim vihāram agamimsu. Tesam vihāramajjham paviṭṭhakkhaṇe vassam uṭṭhahi. Yesam kulūpakā vā ñātisāmaṇerādayo vā atthi, te tesam pariveṇāni pavisimsu. Te pana tathārūpānam natthitāya katthaci² pavisitum avisahantā vihāramajjheyeva aṭṭhamsu. Atha ne jeṭṭhakakuṭumbiko āha "passatha amhākam vippakāram, kulaputtehi nāma ettakena lajjitum yuttan"ti. Ayya kim pana karomāti. Mayam vissāsikaṭṭhānassa abhāvena imam vippakāram pattā,

<sup>1.</sup> Tassā ovāde ṭhatvā (Sī), tassā vacane ṭhatvā (Syā)

<sup>2.</sup> Yesam pana tathārūpānam natthi, te yattha katthaci (Ka)

sabbe dhanam samharitvā pariveņam karomāti. "Sādhu ayyā"ti jeṭṭhako sahassam adāsi, sesā pañca pañca satāni. Itthiyo aḍḍhateyyāni aḍḍhateyyāni satāni. Te tam dhanam samharitvā sahassakūṭāgāraparivāram Satthu vasanatthāya mahāpariveṇam nāma ārabhimsu. Navakammassa mahantatāya dhane appahonte pubbe dinnadhanato puna upaḍḍhūpaḍḍham adamsu. Niṭṭhite pariveṇe vihāramaham karontā Buddhappamukhassa bhikkhusamghassa sattāham mahādānam datvā vīsatiyā bhikkhusahassānam cīvarāni sajjimsu.

Jetthakakutumbikassa pana bhariyā sabbehi samānam<sup>1</sup> akatvā attano paññaya thita "atirekataram katva Sattharam pūjessamī"ti anojapupphavannena sahassamūlena sātakena saddhim anojapupphacankotakam gahetvā anumodanakāle Satthāram anojapupphehi pūjetvā tam sātakam Satthu pādamūle thapetvā "bhante nibbattanibbattatthāne anojapupphavannamyeva me sarīram hotu, Anojā eva ca me nāmam hotū"ti patthanam patthapesi. Satthā "evam hotū"ti anumodanam akāsi. Te sabbepi yāvatāyukam thatvā tato cutā devaloke nibbattitvā imasmim Buddhuppāde devalokā cavitvā jetthakakutumbiko Kukkutavatīnagare rājakule nibbattitvā vayappatto Mahākappinarājā nāma ahosi, sesā amaccakule nibbattimsu. Jetthakakutumbikassa bhariyā Maddaratthe Sāgalanagare rājakule nibbatti, anojapupphavannamevassā sarīram ahosi, **Anojā**tvevassā nāmam karimsu. Sā vayappattā Mahākappinarañño geham gantvā Anojādevī nāma ahosi. Sesitthiyopi amaccakulesu nibbattitvā vayappattā tesamyeva amaccaputtānam gehāni agamamsu. Te sabbe rañño sampattisadisam sampattim anubhavimsu. Yadā rājā sabbālankārapatimandito hatthim abhiruhitvā vicari, tadā tepi tatheva vicaranti. Tasmim assena vā rathena vā vicarante tepi tatheva vicaranti. Evam te ekato hutvā katānam puññānam ānubhāvena ekatova sampattim anubhavimsu. Rañño pana balo, balavāhano<sup>2</sup>, puppho, pupphavāhano, supattoti pañca assā honti. Rājā tesu supattam assam sayam ārohati, itare cattāro assārohānam sāsanāhāraņatthāya adāsi. Rājā te pātova bhojetvā

"Gacchatha dve vā tīṇi vā yojanāni āhiṇḍitvā Buddhassa vā dhammassa vā saṁghassa vā uppannabhāvaṁ ñatvā mayhaṁ sukhasāsanaṁ āharathā"ti pesesi. Te catūhi dvārehi nikkhamitvā tīṇi yojanāni āhiṇḍitvā sāsanaṁ alabhitvā paccāgacchanti.

Athekadivasam rājā supattam assam āruyha amaccasahassaparivuto uyyānam gacchanto kilantarūpe pañcasatavānijake nagaram pavisante disvā "ime addhānakilantā, addhā imesam santikā ekam bhaddakam sāsanam sossāmī"ti te pakkosāpetvā "kuto āgacchathā"ti pucchi. Atthi deva ito vīsatiyojanasatamatthake Sāvatthi nāma nagaram, tato āgacchāmāti. Atthi pana vo padese kiñci sāsanam uppannanti. Deva aññam kiñci natthi, Sammāsambuddho pana uppannoti. Rājā tāvadeva pañcavannāya pītiyā phutthasarīro kiñci sallakkhetum asakkonto muhuttam vītināmetvā "tātā kim vadethā"ti pucchi. Buddho deva uppannoti. Rājā dutiyampi tatiyampi tatheva vītināmetvā catutthe vāre "kim vadetha tātā"ti pucchitvā "buddho deva uppanno"ti vutte "tātā vo satasahassam dadāmī"ti vatvā "aññampi kiñci sāsanam atthī"ti pucchi. Atthi deva, dhammo uppannoti. Rājā tampi sutvā purimanayeneva tayo vāre vītināmetvā catutthe vāre "dhammo uppanno"ti vutte "idhāpi vo satasahassam dammī"ti vatvā "aparampi sāsanam atthi tātā"ti pucchi. Atthi deva, samgharatanam uppannanti. Rājā tampi sutvā tayo vāre vītināmetvā catutthe vāre "samgho"ti pade vutte "idhāpi vo satasahassam dammī"ti vatvā amaccasahassam oloketvā "tātā kim karissathā"ti pucchi. Deva tumhe kim karissathāti. Aham tātā "Buddho uppanno, dhammo uppanno, samgho uppanno"ti sutvā na puna nivattissāmi, Satthāram uddissa gantvā tassa santike pabbajissāmīti. Mayampi deva tumhehi saddhim pabbajissāmāti. Rājā suvannapatte akkharāni likhāpetvā vānijake āha "Anojā nāma devī tumhākam tīni satasahassāni dassati, evanca pana nam vadeyyātha 'raññā kira te issariyam vissattham, yathāsukham sampattim paribhuñjāhī'ti, sace pana vo 'rājā kahan'ti pucchati, 'Satthāram uddissa pabbajissāmīti vatvā gato'ti āroceyyāthā''ti. Amaccāpi attano attano bhariyānam tatheva sāsanam

pahiņimsu. Rājā vāņijake uyyojetvā assam abhiruyha amaccasahassaparivuto tam khaņamyeva nikkhami.

Satthāpi tam divasam paccūsakāle lokam volokento Mahākappinarājānam saparivāram disvā "ayam Mahākappino vānijakānam santikā tinnam ratanānam uppannabhāvam sutvā tesam vacanam tīhi satasahassehi pūjetvā rajjam pahāya amaccasahassehi parivuto mam uddissa pabbajitukāmo sve nikkhamissati, so saparivāro saha patisambhidāhi arahattam pāpunissati, paccuggamanamassa karissāmī"ti punadivase cakkavattī viya khuddakagāmabhojakam paccuggacchanto sayameva pattacīvaram gahetvā vīsayojanasatam maggam paccuggantvā Candabhāgāya nadiyā tīre nigrodharukkhamūle chabbannarasmiyo vissajjento nisīdi. Rājāpi āgacchanto ekam nadim patvā "kā nāmesā"ti pucchi. Aparacchā<sup>1</sup> nāma devāti. Kimassā parimānam tātāti. Gambhīrato gāvutam, puthulato dve gāvutāni devāti. Atthi panettha nāvā vā ulumpo vāti. Natthi devāti. "Nāvādīni olokente amhe jāti jaram upaneti, jarā maraṇam. Aham nibbematiko hutvā tīni ratanāni uddissa nikkhanto, tesam me ānubhāvena imam udakam udakam viya mā ahosī"ti tinnam ratanānam gunam āvajjetvā "itipi so Bhagavā Araham Sammāsambuddho"ti Buddhānussatim anussaranto saparivāro assasahassena udakapitthim pakkhandi. Sindhavā pitthipāsāne viya pakkhandimsu. Khurānam aggā neva<sup>2</sup> temimsu.

So taṁ uttaritvā purato gacchanto aparampi nadiṁ disvā "ayaṁ kā nāmā"ti pucchi. Nīlavāhinī³ nāma devāti. Kimassā parimāṇanti. Gambhīratopi puthulatopi aḍḍhayojanaṁ devāti. Sesaṁ purimasadisameva. Taṁ pana nadiṁ disvā "svākkhāto Bhagavatā dhammo"ti dhammānussatiṁ anussaranto pakkhandi. Tampi atikkamitvā gacchanto aparampi nadiṁ disvā "ayaṁ kā nāmā"ti pucchi. Candābhāgā nāma devāti. Kimassā parimāṇanti. Gambhīratopi puthulatopi yojanaṁ devāti. Sesaṁ purimasadisameva.

<sup>1.</sup> Aravacchā (Sī), āravapacchā (Syā)

<sup>2.</sup> Aggaggāneva (Sī) Am-Ttha 1. 248; Sam-Ttha 2. 225 pitthesu pana passitabbam.

<sup>3.</sup> Nīlavāhanā (Ka) nalavāhanā (Syā)

Imam pana nadim disvā "suppatipanno Bhagavato sāvakasamgho"ti samghānussatim anussaranto pakkhandi. Tam pana nadim atikkamitvā gacchanto Satthu sarīrato nikkhantā chabbannarasmiyo addasa. Nigrodharukkhassa sākhāvitapapalāsāni sovannamayāni viya ahesum. Rājā cintesi "ayam pana obhāso neva candassa, na sūriyassa, na devamārabrahmanāgasupannādīnam aññatarassa, addhā aham Satthāram uddissa āgacchanto Mahāgotamabuddhena dittho bhavissāmī"ti. So tāvadeva assapitthito otaritvā onatasarīro rasmi-anusārena Satthāram upasankamitvā manosilārase nimujjanto viva Buddharasmīnam anto pavisitvā Satthāram vanditvā ekamantam nisīdi saddhim amaccasahassena. Satthā tassa anupubbim katham kathesi. Desanāvasāne rājā saparivāro sotāpattiphale patitthahi. Atha sabbeva utthahitvā pabbajjam yācimsu. Satthā "āgamissati nu kho imesam kulaputtanam iddhimayapattacīvaran"ti upadharento "ime kulaputtā Paccekabuddhasahassasa cīvarasahassam adamsu, Kassapasammāsambuddhakāle vīsativā bhikkhusahassānampi vīsaticīvarasahassānipi adamsu, anacchariyam imesam iddhimayapattacīvarāgamanan"ti ñatvā dakkhinahattam pasāretvā "etha bhikkhavo, caratha brahmacariyam sammā dukkhassa antakiriyāyā"ti āha. Te tāvadeva atthaparikkhāradharā vassasatthikattherā viya hutvā vehāsam abbhuggantvā paccorohitvā Satthāram vanditvā nisīdimsu.

Tepi vāṇijakā rājakulam gantvā raññā pahitabhāvam ārocāpetvā deviyā "āgacchantū"ti vutte pavisitvā vanditvā ekamantam aṭṭhamsu. Atha ne devī pucchi "tātā kim kāraṇā āgatātthā"ti. Mayam raññā tumhākam santikam pahitā, tīṇi kira no satasahassāni dethāti¹. Tātā atibahum bhaṇatha, kim tumhehi rañño katam, kismim vo rājā pasanno ettakam dhanam dāpesīti. Devi na aññam kiñci katam, rañño pana ekam sāsanam ārocayimhāti. Sakkā pana tātā mayham ārocetunti. Sakkā devīti. Tena hi tātā vadethāti. Devi Buddho loke uppannoti. Sāpi tam sutvā purimanayeneva pītiyā phuṭṭhasarīrā tikkhattum kiñci asallakkhetvā catutthe vāre "Buddho"ti padam sutvā tātā imasmim pade raññā kim dinnanti. Satasahassam devīti.

Tātā ananucchavikam raññā katam evarūpam sāsanam sutvā tumhākam satasahassam dadamānena. Aham hi vo mama duggatapaṇṇākāre tīṇi satasahassāni dammi, aparampi tumhehi rañño kim ārocitanti. Te idañcidañcāti itarānipi dve sāsanāni ārocayimsu. Devī purimanayeneva pītiyā phuṭṭhasarīrā tikkhattum kiñci asallakkhetvā catutthe vāre tatheva sutvā tīṇi tīṇi satasahassāni dāpesi. Evam te sabbānipi dvādasa satasahassāni labhimsu.

Atha ne devī pucchi "rājā kaham tātā"ti. Devi "Satthāram uddissa pabbajissāmī"ti gatoti. Mayham tena kim sāsanam dinnanti<sup>1</sup>. Sabbam kira tena tumhākam issariyam vissattham, tumhe kira yathāruciyā sampattim anubhavathāti. Amaccā pana kaham tātāti. Tepi "raññā saddhimyeva pabbajissāmā"ti gatā devīti. Sā tesam bariyāyo pakkosāpetvā ammā tumhākam sāmikā "raññā saddhim pabbajissāmā"ti gatā, tumhe kim karissathāti. Kim pana tehi amhākam sāsanam pahitam devīti. Tehi kira attano sampatti tumhākam vissatthā, tumhe kira tam sampattim yathāruci paribhuñjathāti. Tumhe pana devi kim karissathāti. Ammā so tāva rājā sāsanam sutvā<sup>2</sup> magge thitakova tīhi satasahassehi tīni ratanāni pūjetvā khelapindam viya sampattim pahāya "pabbajissāmī"ti nikkhanto, mayā pana tinnam ratanānam sāsanam sutvā tīni ratanāni navahi satasahassehi pūjitāni, na kho panesā sampatti nāma rañnoyeva dukkhā, mayhampi dukkhā eva. Ko rañña chadditakhelapindam janukehi patitthahitva mukhena ganhissati, na mayham sampattiyā attho, ahampi Satthāram uddissa gantvā pabbajissāmīti. Devi mayampi tumheheva saddhim pabbajissāmāti. Sace sakkotha, sādhu ammāti. Sakkoma devīti. "Sādhu ammā, tena hi ethā"ti rathasahassam yojāpetvā ratham āruyha tāhi saddhim nikkhamitvā antarāmagge pathamam nadim disvā yathā raññā puttham, tatheva pucchitvā sabbapavattim sutvā "rañño gatamaggam olokethā" ti vatvā "sindhavānam padavalañjam na passāma devī"ti vutte "rājā tīni ratanāni uddissa nikkhanto saccakiriyam katvā gato bhavissati. Ahampi tīni ratanāni uddissa nikkhantā, tesameva anubhavena idam udakam udakam viya ma

ahosī"ti tiṇṇaṁ ratanānaṁ guṇaṁ anussaritvā rathasahassaṁ pesesi. Udakaṁ piṭṭhipāsāṇasadisaṁ ahosi. Cakkānaṁ aggagganemivaṭṭiyo neva temiṁsu. Eteneva upāyena itarā dve nadiyo uttari.

Atha Satthā tassāgamanabhāvam ñatvā yathā attano santike nisinnā bhikkhū na paññāyanti, evamakāsi. Sāpi gacchantī gacchantī Satthu sarīrato nikkhantā chabbaṇṇarasmiyo disvā tatheva cintetvā Satthāram upasaṅkamitvā vanditvā ekamantam thitā pucchi "bhante Mahākappino tumhākam uddissa nikkhanto āgatettha maññe, kaham so, amhākampi nam dassethā"ti. Nisīdatha tāva, idheva nam passissathāti. Tā sabbāpi tuṭṭhacittā "idheva kira nisinnā sāmike passissāmā"ti nisīdimsu. Satthā tāsam anupubbim katham kathesi, Anojādevī desanāvasāne saparivārā sotāpattiphalam pāpuṇi. Mahākappinatthero tāsam vaḍḍhitadhammadesanam suṇanto saparivāro saha paṭisambhidāhi arahattam pāpuṇi, tasmim khaṇe Satthā tāsam te bhikkhū arahattappatte dassesi. Tāsam kira āgatakkhaṇeyeva attano sāmike kāsāvadhare muṇḍakasīse disvā cittam ekaggam na bhaveyya, tena maggaphalāni pattum na sakkuṇeyyum. Tasmā acalasaddhāya patiṭṭhitakāle tāsam te bhikkhū arahattappatteyeva dassesi.

Tāpi te disvā pañcapatiṭṭhitena vanditvā "bhante tumhākaṁ tāva pabbajitakicaṁ matthakaṁ pattan"ti vatvā Satthāraṁ vanditvā ekamantaṁ ṭhitā pabbajjaṁ yāciṁsu. Evaṁ kira vutte "Satthā Uppalavaṇṇāya āgamanaṁ cintesī"ti ekacce vadanti. Satthā pana tā upāsikāyo āha "Sāvatthiṁ gantvā bhikkhunī-upassaye pabbajethā"ti. Tā anupubbena janapadacārikaṁ caramānā antarāmagge mahājanena abhihaṭasakkārasammānā padasāva vīsayojanasatikaṁ gantvā bhikkhunī-upassaye pabbajitvā arahattaṁ pāpuṇiṁsu. Satthāpi bhikkhusahassaṁ ādāya ākāseneva Jetavanaṁ agamāsi. Tatra sudaṁ āyasmā Mahākappino rattiṭṭhānadivāṭṭhānādīsu "aho sukhaṁ, aho sukhaṁ"ti udānaṁ udānento vicarati. Bhikkhū Bhagavato ārocesuṁ "bhante Mahākappino 'aho sukhaṁ, aho sukhaṁ'ti udānaṁ udānemto vicarati, attano kāmasukhaṁ rajjasukhaṁ ārabbha kathesi maññe"ti. Satthā taṁ pakkosāpetvā "saccaṁ kira tvaṁ Kappina kāmasukhaṁ

rajjasukham ārabbha udānam udānesī"ti. Bhagavā me bhante tam ārabbha udānabhāvam vā anudānabhāvam vā jānātīti, Satthā "na bhikkhave mama putto kāmasukham rajjasukham ārabbha udānam udāneti, puttassa pana me dhammapīti nāma dhammarati nāma uppajjati, so amatamahānibbānam ārabbha eva udānam udānesī"ti anusandhim ghaṭetvā dhammam desento imam gāthamāha—

79. "Dhammapīti sukham seti, vippasannena cetasā. Ariyappavedite dhamme, sadā ramati paṇḍito"ti.

Tattha dhammapītīti dhammapāyako, dhammam pivantoti attho. Dhammo ca nāmesa na sakkā bhājanena yāgu-ādīni viya pātum, navavidham pana lokuttaradhammam nāmakāyena phusanto ārammaṇato sacchikaronto pariññābhisamayādīhi dukkhādīni ariyasaccāni paṭivijjhanto dhammam pivati nāma. Sukham setīti desanāmattamevetam, catūhipi iriyāpathehi sukham viharatīti attho. Vippasannenāti anāvilena nirupakkilesena. Ariyappavediteti Buddhādīhi ariyehi pavedite satipaṭṭhānādibhede bodhipakkhiyadhamme. Sadā ramatīti evarūpo dhammapīti vippasannena cetasā viharanto paṇḍiccena samannāgato sadā ramatī abhiramatīti.

Desanāvasāne bahū sotāpannādayo ahesunti.

Mahākappinattheravatthu catuttham.

# 5. Panditasāmaneravatthu

**Udakaṁ hi nayantī**ti imaṁ dhammadesanaṁ Satthā Jetavane viharanto Panditasāmaneraṁ ārabbha kathesi.

Atīte kira Kassapasammāsambuddho vīsatikhīņāsavasahassaparivāro Bārāņasim agamāsi. Manussā attano balam sallakkhetvā aṭṭhapi dasapi ekato hutvā āgantukadānādīni adamsu. Athekadivasam Satthā bhattakiccapariyosāne evam anumodanamakāsi—

"Upāsakā idha ekacco 'attano santakameva dātum vaṭṭati, kim parena samādapitenā'ti attanāva dānam deti, param na

samādapeti. So nibbattanibbattaṭṭhāne bhogasampadaṁ labhati, no parivārasampadaṁ. Ekacco paraṁ samādapeti, attanā na deti. So nibbattanibbattaṭṭhāne parivārasampadaṁ labhati, no bhogasampadaṁ. Ekacco attanāpi na deti, parampi na samādapeti. So nibbattanibbattaṭṭhāne neva bhogasampadaṁ labhati, na parivārasampadaṁ, vighāsādova hutvā jīvati. Ekacco attanā ca deti, parañca samādapeti. So nibbattanibbattaṭṭhāne bhogasampadampi labhati parivārasampadampī"ti.

Tam sutvā samīpe thito eko paṇḍitapuriso cintesi "aham dāni tathā karissāmi, yathā me dvepi sampattiyo bhavissantī"ti. So Satthāram vanditvā āha "bhante svātanāya¹ mayham bhikkham gaṇhathā"ti. Kittakehi te bhikkhūhi atthoti. Kittako pana vo bhante parivāroti. Vīsati bhikkhusahassānīti. Bhante sabbehi saddhim svātanāya mayham bhikkham gaṇhathāti. Satthā adhivāsesi. So gāmam pavisitvā "ammatātā svātanāya mayā Buddhappamukho bhikkhusamgho nimantito, tumhe yattakānam bhikkhūnam dātum sakkhissatha, tattakānam dānam dethā"ti ārocetvā vicaranto attano attano balam sallakkhetvā "mayam dasannam dassāma, mayam vīsatiyā, mayam satassa, mayam pañcasatānan"ti vutte sabbesam vacanam ādito paṭṭhāya paṇṇe āropesi.

Tena ca samayena tasmim nagare atiduggatabhāveneva "mahāduggato"ti paññāto eko puriso atthi, so tampi sammukhāgatam disvā samma mahāduggata mayā svātanāya Buddhappamukho bhikkhusamgho nimantito, sve nagaravāsino dānam dassanti, tvam kati bhikkhū bhojessasīti. Sāmi mayham kim bhikkhūhi, bhikkhūhi nāma sadhanānam attho, mayham pana sve yāgu-atthāya taṇḍulanāļimattampi natthi, aham bhatim katvā jīvāmi, kim me bhikkhūhīti. Samādapakena nāma byattena bhavitabbam. Tasmā so tena "natthī"ti vuttepi tuṇhībhūto ahutvā² evamāha "samma mahāduggata imasmim nagare subhojanam bhuñjitvā sukhumavattham nivāsetvā nānābharaṇapaṭipaṇḍitā sirisayane sayamānā bahū janā sampattim anubhavanti, tvam pana divasam bhatim katvā kucchipūraṇamattampi na labhasi,

evam santepi 'aham pubbe puññam akatattā kiñci na labhāmī'ti na jānāsī"ti. Jānāmi sāmīti. Atha kasmā idāni puññam na karosi, tvam yuvā balasampanno, kim tayā bhatim katvāpi yathābalam dānam dātum na vaṭṭatīti. So tasmim kathenteyeva samvegappatto hutvā "mayhampi ekam bhikkhum paṇṇe āropehi, kiñcideva bhatim katvā ekassa bhikkham dassāmī"ti āha. Itaro "kim ekena bhikkhunā¹ paṇṇe āropitenā"ti na āropesi. Mahāduggatopi geham gantvā bhariyam āha "bhadde nagaravāsino sve samghabhattam karissanti, ahampi samādapakena 'ekassa bhikkham dehī'ti vutto, mayampi sve ekassa bhikkham dassāmā"ti. Athassa bhariyā "mayam daliddā, kasmā tayā sampaṭicchitan"ti avatvāva "sāmi bhaddakam te katam, mayam pubbepi kiñci adatvā idāni duggatā jātā, mayam ubhopi bhatim katvā ekassa bhikkham dassāma sāmī"ti vatvā ubhopi gehā nikkhamitvā bhatiṭṭhānam agamamsu.

Mahāsetthi tam disvā "kim samma mahāduggata bhatim karissasī"ti pucchi. Āma ayyāti. Kim karissasīti. Yam tumhe kāressatha, tam karissāmīti. "Tena hi mayam sve dve tīni bhikkhusatāni bhojessāma, ehi, dārūni phālehī"ti vāsipharasum nīharitvā dāpesi. Mahāduggato dalham kaccham bandhitvā mahussāhappatto vāsim pahāya pharasum ganhanto, pharasum pahāya vāsim ganhanto dārūni phāleti. Atha nam setthi āha "samma tvam ajja ativiya ussāhappatto kammam karosi, kim nu kho kāranan"ti. Sāmi aham sve ekam bhikkhum bhojessāmīti. Tam sutvā setthi pasannamānaso cintesi "aho iminā dukkaram katam, 'aham duggato'ti tunhībhāvam anāpajjitvā 'bhatim katvā ekam bhikkhum bhojessāmī'ti vadatī"ti. Setthibhariyāpi tassa bhariyam disvā "amma kim kammam karissasī"ti pucchitvā "yam tumhe kāressatha, tam karomī"ti vutte udukkhalasālam pavesetvā suppamusalādīni dāpesi. Sā naccantī viya tutthapahatthā vīhim kotteti ceva ophunāti ca. Atha nam setthibhariyā pucchi "amma tvam ativiya tutthapahattha kammam karosi, kim nu kho kāranan"ti. Ayye imam bhatim katvā mayampi ekam bhikkhum bhojessāmāti. Tam sutvā setthibhariyāpi tassam "aho vatāyam dukkarakārikā"ti pasīdi. Setthi mahāduggatassa

dārūnam phālitakāle "ayam te bhatī" ti sālīnam catasso nāļiyo dāpetvā "ayam te tuṭṭhidāyo" ti aparāpi catasso nāļiyo dāpesi.

So geham gantvā bhariyam āha "mayā bhatim katvā sāli laddho, ayam nivāpo bhavissati, tayā laddhāya bhatiyā dadhitelakatukabhandāni ganhāhī''ti. Setthibhariyāpi puna tassā ekam sappikarotikanceva<sup>1</sup> dadhibhājanañca katukabhandañca suddhatandulanāliñca dāpesi. Iti ca ubhinnampi nava tandulanāliyo ahesum. Te "deyyadhammo no laddho"ti tutthahatthā pātova utthahimsu. Bhariyā mahāduggatam āha "gaccha sāmi, pannam pariyesitvā āharā"ti. So antarāpane pannam adisvā nadītīram gantvā "ajja ayyānam bhojanam dātum labhissāmī"ti pahatthamānaso gāyanto pannam uccinati. Mahājālam khipitvā thito kevatto "mahāduggatassa saddena bhavitabban"ti tam pakkositvā pucchi "ativiya tutthacitto gāyasi, kim nu kho kāranan"ti. Pannam uccināmi sammāti. Kim karissasīti. Ekam bhikkhum bhojessāmīti. Aho sukhito bhikkhu, so tava kim pannam khādissatīti<sup>2</sup>. Kim karomi samma, attanā laddhapannena bhojessāmīti. Tena hi ehīti. Kim karomi sammāti. Ime macche gahetvā pādagghanakāni addhagghanakāni kahāpanagghanakāni ca uddānāni karohīti. So tathā akāsi. Baddhabaddhe macche nagaravāsino nimantitanimantitānam bhikkhūnam atthāya harimsu. Tassa macchuddānāni karontasseva bhikkhācāravelā pāpuņi. So velam sallakkhetvā "gamissāmaham samma, ayam bhikkhūnam āgamanavelā"ti āha. Atthi pana kiñci macchuddānanti. Natthi samma sabbāni khīnānīti. "Tena hi mayā attano atthāya vālukāya nikhanitvā cattāro rohitamacchā thapitā, sace bhikkhum bhojetukāmosi, ime gahetvā gacchā"ti te macche tassa adāsi.

Tam divasam pana Satthā paccūsakāle lokam volokento mahāduggatam attano ñāṇajālassa anto paviṭṭham disvā "kim nu kho bhavissatī"ti āvajjento "mahāduggato 'ekam bhikkhum bhojessāmī'ti

<sup>1.</sup> Sappikaradakañceva (Syā)

<sup>2.</sup> Aho suhito bhikkhu yo tava pannam khādissatīti (Syā)

bhariyāya saddhim hiyyo bhatim akāsi, kataram nu kho bhikkhum labhissatī"ti cintetvā "manussā panne āropitasaññāya bhikkhū gahetvā attano attano gehesu nisīdāpessanti, mahāduggato mam thapetvā aññam bhikkhum na labhissatī''ti upadhāresi. Buddhā kira duggatesu anukampam karonti. Tasmā Satthā pātova sarīrapatijagganam katvā "mahāduggatam sanganhissāmī"ti Gandhakutim pavisitvā nisīdi. Mahāduggatepi macche gahetvā geham pavisante Sakkassa Pandukambalasilāsanam unhākāram dassesi. So "kim nu kho kāranan"ti olokento "hiyyo mahāduggato 'ekassa bhikkhuno bhikkham dassāmī'ti attano bhariyāya saddhim bhatim akāsi, kataram nu kho bhikkhum labhissatī"ti cintetvā "natthetassa añño bhikkhu, Satthā pana mahāduggatassa saṅgahaṁ karissāmī"ti Gandhakutiyaṁ nisinno. Mahāduggato attano upakappanakam yāgubhattam pannasūpevvampi Tathāgatassa dadeyya, "yamnūnāham mahāduggatassa geham gantvā bhattakārakakammam kareyyan"ti aññātakavesena tassa gehasamīpam gantvā "atthi nu kho kassaci kiñci bhatiyā kātabban"ti pucchi. Mahāduggato tam disvā āha "samma kim kammam karissasī"ti. Aham sāmi sabbasippiko, mayham ajānanasippam nāma natthi, yāgubhattādīnipi sampādetum jānāmīti. Samma mayam tava kammena atthikā, tuyham pana kiñci dātabbam bhatim na passāmāti. Kim pana te kattabbanti. Ekassa bhikkhussa bhikkham dātukāmomhi, tassa yāgubhattasamvidhānam icchāmīti. Sace bhikkhussa bhikkham dassasi, na me bhatiyā attho, kim mama puññam na vattatīti. Evam sante sādhu samma, pavisāti. So tassa geham pavisitvā telatandulādīni āharāpetvā "gaccha, attano pattabhikkhum ānehī"ti tam uyyojesi. Dānaveyyāvatikopi panne āropitaniyāmeneva tesam tesam gehāni bhikkhū pahini.

Mahāduggato tassa santikam gantvā "mayham pattabhikkhum dehī"ti āha. So tasmim khaņe satim labhitvā "aham tava bhikkhum pamuṭṭho"ti āha. Mahāduggato tikhiṇāya sattiyā kucchiyam pahaṭo viya "sāmi kasmā mam nāsesi, aham tayā hiyyo samādapito bhariyāya saddhim divasam bhatim katvā ajja pātova paṇṇatthāya nadītīre āhiṇḍitvā āgato, dehi me ekam bhikkhun"ti bāhā paggayha paridevi. Manussā

sannipatitvā "kimetam mahāduggatā"ti pucchimsu. So tamattham ārocesi. Te veyyāvaṭikam pucchimsu "saccam kira samma tayā esa 'bhatim katvā ekassa bhikkhussa bhikkham dehī'ti samādapito"ti. Āma ayyāti. Bhāriyam te kammam katam, yo tvam ettake bhikkhū samvidahanto etassa ekam bhikkhum nādāsīti. So tesam vacanena mankubhūto tam āha "samma mahāduggata mā mam nāsayi, aham tava kāraṇā mahāvihesam patto, manussā paṇṇe āropitaniyāmena attano attano pattabhikkhū nayimsu, attano gehe nisinnabhikkhum nīharitvā dento nāma natthi, Satthā pana mukham dhovitvā Gandhakuṭiyameva nisinno, rājayuvarājasenāpati-ādayo Satthu Gandhakuṭito nikkhamanam olokentā nisinnā Satthu pattam gahetvā gamissāmā"ti. Buddhā nāma duggate anukampam karonti, tvam vihāram gantvā 'duggatomhi bhante, mama saṅgaham karothā'ti Satthāram vanda, sace te puññam atthi, addhā lacchasī"ti.

So vihāram agamāsi. Atha nam aññesu divasesu vihāre vighāsādabhāvena diṭṭhattā rājayuvarājādayo "mahāduggata na tāva bhattakālo, kasmā tvam āgacchasī"ti āhamsu. So "jānāmi sāmi, 'na tāva bhattakālo'ti. Satthāram pana vanditum āgacchāmī"ti vadanto gantvā Gandhakutiyā ummāre sīsam thapetvā pañcapatitthitena vanditvā "bhante imasmim nagare mayā duggatataro natthi, avassayo me hotha, karotha me sangahan"ti āha. Satthā Gandhakutidvāram vivaritvā pattam nīharitvā tassa hatthe thapesi. So cakkavattisirim patto viya ahosi. Rājayuvarājādayo aññamaññassa mukhāni olokayimsu. Satthārā dinnapattañhi koci issariyavasena gahetum samattho nāma natthi. Evam pana vadimsu "samma mahāduggata Satthu pattam amhākam dehi, ettakam nāma te dhanam dassāma, tvam duggato dhanam ganhāhi, kim te pattenā'ti. Mahāduggato "na kassaci dassāmi, na me dhanena attho, Satthāramyeva bhojessāmī"ti āha. Avasesā tam yācitvā pattam alabhitvā nivattimsu. Rājā pana "mahāduggato dhanena palobhiyamānopi Satthu pattam na deti, Satthārā ca sayam dinnapattam koci gahetum na sakkoti, imassa deyyadhammo nāma kittako bhavissati, iminā deyyadhammassa dinnakāle Satthāram ādāya geham netvā mayham sampāditam āhāram dassāmī"ti cintetvā Satthārā

saddhimyeva agamāsi. Sakkopi devarājā yāgukhajjakabhattasūpeyyapaṇṇādīni sampādetvā Satthu nisīdanārahamāsanam paññapetvā nisīdi.

Mahāduggato Satthāram netvā "pavisatha bhante" ti āha. Vasanagehañcassa nīcam hoti, anonatena pavisitum na sakkā. Buddhā ca nāma geham pavisantā na onamitvā pavisanti. Gehanhi pavisanakāle mahāpathavī vā hetthā ogacchati, geham vā uddham gacchati. Idam tesam sudinnadānassa phalam. Puna nikkhamitvā gatakāle sabbam pākatikameva hoti. Tasmā Satthā thitakova geham pavisitvā Sakkena paññattāsane nisīdi. Satthari nisinne rājā āha "samma mahāduggata tayā amhākam yācantānampi Satthu patto na dinno, passāma tāva, kīdiso te Satthu sakkāro kato"ti. Athassa Sakko yāgukhajjakādīni vivaritvā dassesi. Tesam vāsagandho sakalanagaram chādetvā atthāsi. Rājā yāgu-ādīni oloketvā Bhagavantam āha "bhante 'aham mahāduggatassa deyyadhammo kittako bhavissati, iminā deyyadhamme dinne Satthāram geham netvā attano sampāditam āhāram dassāmī'ti cintetvā āgato, mayā evarūpo āhāro na ditthapubbo, mayi idha thite mahāduggato kilameyya, gacchāmahan"ti Satthāram vanditvā pakkāmi. Sakkopi Satthāram yāgu-ādīni datvā sakkaccam parivisi. Satthāpi katabhattakicco anumodanam katvā utthāyāsanā pakkāmi.

Sakko mahāduggatassa saññaṁ adāsi. So pattaṁ gahetvā Satthāraṁ anugacchi. Sakko nivattitvā mahāduggatassa gehadvāre ṭhito ākāsaṁ olokesi. Tāvadeva ākāsato sattaratanavassaṁ vassitvā tassa gehe sabbabhājanāni pūretvā sakalaṁ gehaṁ pūresi. Tassa gehe okāso nāhosi. Tassa bhariyā dārake hatthesu gahetvā nīharitvā bahi aṭṭhāsi. So Satthāraṁ anugantvā nivatto dārake bahi disvā "kiṁ idan"ti pucchi. Sāmi sakalaṁ no gehaṁ sattahi ratanehi puṇṇaṁ, pavisituṁ okāso natthīti. So "ajjeva me dānena vipāko dinno"ti cintetvā rañño santikaṁ gantvā vanditvā "kasmā āgatosī"ti vutte āha "deva gehaṁ me sattahi ratanehi puṇṇaṁ, taṁ dhanaṁ gaṇhathā"ti. Rājā "aho

Buddhānaṁ dinnadānaṁ, ajjeva matthakaṁ pattan"ti cintetvā taṁ āha "kiṁ te laddhuṁ vaṭṭatī"ti. Dhanaharaṇatthāya sakaṭasahassaṁ devāti. Rājā sakaṭasahassaṁ pesetvā dhanaṁ āharāpetvā rājaṅgaṇe okirāpesi. Tālappamāṇo rāsi ahosi. Rājā nāgare sannipātāpetvā "imasmiṁ nagare atthi kassaci ettakaṁ dhanan"ti pucchi. Natthi devāti. Evaṁ mahādhanassa kiṁ kātuṁ vaṭṭatīti. Seṭṭhiṭṭhānaṁ dātuṁ vaṭṭati devāti. Rājā tassa mahāsakkāraṁ katvā setthitthānaṁ dāpesi.

Athassa pubbe ekassa seṭṭhino gehaṭṭhānaṁ ācikkhitvā "ettha jāte gacche harāpetvā gehaṁ uṭṭhāpetvā vasāhī"ti āha. Tassa taṁ ṭhānaṁ sodhetvā samaṁ katvā bhūmiyā khaññamānāya aññamaññaṁ āhacca nidhikumbhiyo uṭṭhahiṁsu. Tena rañño ārocite "tava puññena nibbattā, tvameva gaṇhāhī"ti āha. So gehaṁ kāretvā sattāhaṁ Buddhappamukhassa bhikkhusaṁghassa mahādānaṁ adāsi. Tato parampi yāvatāyukaṁ tiṭṭhanto puññani karitvā āyupariyosāne devaloke nibbatto.

Ekam Buddhantaram dibbasampattim anubhavitvā imasmim Buddhuppāde tato cuto Sāvatthiyam Sāriputtattherassūpatthākakule setthidhītu kucchiyam patisandhim ganhi. Athassā mātāpitaro gabbhassa patitthitabhāvam natvā<sup>1</sup> gabbhaparihāram adamsu. Tassā aparena samayena evarūpo dohalo uppajji "aho vatāham Dhammadesanāpatim ādim katvā pañcannam bhikkhusatānam rohitamaccharasena dānam datvā kāsāyāni vatthāni nivāsetvā āsanapariyante nisinnā tesam bhikkhūnam ucchitthabhattam paribhuñjeyyan"ti. Sā mātāpitūnam ārocetvā tathā akāsi, dohalo patipassambhi. Athassā tato aparesupi sattasu mangalesu rohitamaccharaseneva Dhammasenāpatittherappamukhāni pañca bhikkhusatāni bhojesum. Sabbam Tissakumārassa vatthumhi vuttaniyāmeneva veditabbam. Ayamassa pana mahāduggatakāle dinnassa rohitamaccharasadānasseva nissando. Nāmaggahanadivase panassa "bhante dāsassa vo sikkhāpadāni dethā"ti mātarā vutte thero āha "konāmo ayam dārako"ti. Bhante imassa dārakassa kucchiyam patisandhiggahanato patthāya imasmim gehe jalā elamūgāpi

paṇḍitā jātā, tasmā me puttassa **Paṇḍito**tveva nāmaṁ bhavissatīti. Thero sikkhāpadāni adāsi. Jātadivasato paṭṭhāya panassa "nāhaṁ mama puttassa ajjhāsayaṁ bhindissāmī"ti mātu cittaṁ uppajji. So sattavassikakāle mātaraṁ āha "amma therassa santike pabbajissāmī"ti. "Sādhu tāta, 'ahaṁ tava ajjhāsayaṁ na bhindissāmi'cceva manaṁ uppādesin"ti vatvā theraṁ nimantetvā bhojetvā "bhante dāso vo pabbajitukāmo, ahaṁ imaṁ sāyanhasamaye vihāraṁ ānessāmī"ti theraṁ uyyojetvā ñātake sannipātāpetvā "mama puttassa gihikāle kattabbasakkāraṁ ajjeva karissāmā"ti mahantaṁ sakkāraṁ kāretvā taṁ ādāya vihāraṁ gantvā "imaṁ bhante pabbājethā"ti therassa adāsi.

Thero pabbajjāya dukkarabhāvam ācikkhitvā "karissāmaham bhante tumhākam ovādan"ti vutte "tena hi ehī"ti kese temetvā tacapañcakakammatthānam ācikkhitvā pabbājesi. Mātāpitaropissa sattāham vihāreyeva vasantā Buddhappamukhassa bhikkhusamghassa rohitamaccharaseneva dānam datvā sattame divase sāyam geham agamamsu. Thero atthame divase antogāmam gacchanto tam ādāya gacchati, bhikkhusamghena saddhim nāgamāsi. Kim kāranā? Natāvassa pattacīvaraggahanāni vā iriyāpatho vā pāsādiko hoti, apica vihāre therassa kattabbayattam atthi. Thero hi<sup>1</sup> bhikkhusamghe antogāmam pavitthe sakalavihāram vicaranto asammajjanatthānam sammajjitvā tucchabhājanesu pānīyaparibhojanīyāni upatthapetvā dunnikkhittāni mañcapīthādīni patisāmetvā pacchā gāmam pavisati. Apica "aññatitthiyā tucchavihāram pavisitvā 'passatha samanassa Gotamassa sāvakānam nisinnatthānānī'ti vattum mā labhimsū"ti sakalavihāram patijaggitvā pacchā gāmam pavisati. Tasmā tam divasampi sāmaņerena pattacīvaram gāhāpetvā divātaram pindāya pāvisi.

Sāmaņero upajjhāyena saddhim gacchanto antarāmagge mātikam disvā "bhante idam kimnāmā"ti pucchi. Mātikā nāma sāmaņerāti. Imāya kim karontīti. Ito cito ca udakam āharitvā attano sassakammam sampādentīti. Kim pana bhante udakassa cittam

atthīti. Natthāvusoti. Evarūpam acittakam attano icchitatthānam haranti bhanteti. Āmāvusoti. So cintesi "sace evarūpampi acittakam attano icchiticchitatthānam haritvā<sup>1</sup> kammam karonti, kasmā sacittakāpi cittam attano vase vattetvā samanadhammam kātum na sakkhissantī"ti. Atheso purato gacchanto usukāre saradandakam aggimhi tāpetvā akkhikotiyā oloketvā ujukam karonte disvā "ime bhante ke nāmā"ti pucchi. Usukārā nāmāvusoti. Kim panete karontīti. Aggimhi tāpetvā saradandakam ujum karontīti. Sacittako bhante esoti. Acittako āvusoti. So cintesi "sace acittakam gahetvā aggimhi tāpetvā ujum karonti, kasmā sacittakāpi attano cittam vase vattetvā samaņadhammam kātum na sakkhissantī"ti. Atheso purato gacchanto dārūni araneminābhi-ādīni tacchante disvā "bhante ime ke nāmā"ti pucchi. Tacchakā nāmāvusoti. Kim panete karontīti. Dārūni gahetvā yānakādīnam cakkādīni karonti āvusoti. Etāni pana sacittakāni bhanteti. Acittakāni āvusoti. Athassa etadahosi "sace acittakāni katthakalingarāni gahetvā cakkādīni karonti, kasmā sacittakā attano cittam vase vattetvā samanadhammam kātum na sakkhissantī"ti. So imāni kāranāni disvā "bhante sace tumhākam pattacīvare tumhe ganheyyātha, aham nivatteyyan''ti. Thero "ayam adhunā pabbajito daharasāmaņero mam anubandhamāno<sup>2</sup> evam vadetī"ti cittam anuppādetvāva "āhara sāmanerā"ti vatvā attano pattacīvaram aggahesi.

Sāmaņeropi upajjhāyam vanditvā nivattanto "bhante mayham āhāram āharanto rohitamaccharaseneva āhareyyāthā"ti āha. Katham labhissāmāvusoti. "Bhante attano puññena alabhantā mama puññena labhissathā"ti āha. Thero "daharasāmaņerassa bahi nisinnakassa paripanthopi bhaveyyā"ti kuñcikam datvā "mayham vasanagabbhassa dvāram vivaritvā anto pavisitvā nisīdeyyāsī"ti āha. So tathā katvā attano karajakāye ñāṇam otāretvā attabhāvam sammasanto nisīdi. Athassa gunatejena sakkassa āsanam unhākāram dassesi. So "kim nu kho

kāraṇan"ti upadhārento "paṇḍitasāmaṇero upajjhāyassa pattacīvaraṁ datvā 'samaṇadhammaṁ karissāmī'ti nivatto, mayāpi tattha gantuṁ vaṭṭatī"ti cintetvā cattāro mahārāje āmantetvā "vihārassa upavane vasante sakuṇe palāpetvā samantato ārakkhaṁ gaṇhathā"ti vatvā Candadevaputtaṁ "candamaṇḍalaṁ ākaḍḍhitvā gaṇhāhī"ti, Sūriyadevaputtaṁ "sūriyamaṇḍalaṁ ākaḍḍhitvā gaṇhāhī"ti vatvā sayaṁ gantvā āviñchanarajjuṭṭhāne ārakkhaṁ gahetvā aṭṭhāsi, vihāre purāṇapaṇṇassa patantassapi saddo nāhosi, sāmaṇerassa cittaṁ ekaggaṁ ahosi. So antarābhatteyeva attabhāvaṁ sammasitvā tīṇi phalāni pāpuṇi.

Theropi "sāmanero vihāre nisinno, tassa upakappanakam bhojanam asukakule nāma sakkā laddhun"ti ekam pemagāravayuttam upatthākakulam agamāsi. Tattha ca manussā tam divasam rohitamacche labhitvā therasseva āgamanam olokentā nisīdimsu. Te theram āgacchantam disvā "bhante bhaddakam vo katam idhāgacchantehī"ti antogehe pavesetvā yāgukhajjakādīni datvā rohitamaccharasenassa pindapātam<sup>1</sup> adamsu. Thero haranākāram<sup>2</sup> dassesi. Manussā "paribhuñjatha bhante, haranakabhattampi labhissathā"ti vatvā therassa bhattakiccāvasāne pattam rohitamaccharasabhojanassa pūretvā adamsu. Thero "sāmanero me chāto"ti sīgham agamāsi. Satthāpi tam divasam kālasseva bhuñjitvā vihāram gantvā evam āvajjesi "Panditasāmanero upajjhāyassa pattacīvaram datvā 'samanadhammam karissāmī'ti nivatto, nipphajjissati nu kho assa pabbajitakiccan"ti upadhārento tinnam phalānam pattabhāvam natvā "arahattassa upanissayo atthi, natthī"ti āvajjento "atthī"ti disvā "purebhattameva arahattam pattum sakkhissati, na sakkhissatī"ti upadhārento "sakkhissatī"ti aññāsi. Athassa etadahosi "Sāriputto sāmaņerassa bhattam ādāya sīgham āgacchati, antarāyampissa kareyya, dvārakotthake ārakkham gahetvā nisīdissāmi, atha nam pañham<sup>3</sup> pucchissāmi, tasmim pañhe vissajjiyamāne<sup>4</sup> sāmanero saha patisambhidāhi arahattam pāpuņissatī"ti. Tato

<sup>1.</sup> Patte bhojanam pūretvā pindapātam (Ka)

<sup>3.</sup> Cattāro pañhe (Syā, Ka)

<sup>2.</sup> Gamanākāram (Sī)

<sup>4.</sup> Tasmim vissajjamāne (Syā)

gantvā dvārakoṭṭhake ṭhatvā sampattaṁ theraṁ cattāro pañhe pucchi, puṭṭhaṁ puṭṭhaṁ pañhaṁ¹ vissajjesi.

Tatridam pucchāvissajjanam—Satthā kira nam āha "Sāriputta kim te laddhan"ti. Āhāro bhanteti. Āhāro nāma kim āharati Sāriputtāti. Vedanam bhanteti. Vedanā kim āharati Sāriputtāti. Rūpam bhanteti. Rūpam pana kim āharati Sāriputtāti. Phassam bhanteti. Tatrāyam adhippāyo—jighacchitena hi paribhutto āhāro tassa khuddam² pariharitvā sukham vedanam āharati. Āhāraparibhogena sukhitassa sukhāya vedanāya uppajjamānāya sarīre vaṇṇasampatti hoti. Evam vedanā rūpam āharati. Sukhito pana āhārajarūpavasena uppannasukhasomanasso "idāni me assādo jāto"ti nipajjanto vā nisīdanto vā sukhasamphassam paṭilabhatīti.

Evam imesu catūsu pañhesu vissajjitesu³ sāmaņero saha paṭisambhidāhi arahattam patto. Satthāpi theram āha "gaccha Sāriputta, tava sāmaņerassa bhattam dehī"ti. Thero gantvā dvāram ākoṭesi. Sāmaņero nikkhamitvā therassa hatthato pattam gahetvā ekamantam ṭhapetvā tālavaṇṭena theram bīji. Atha nam thero āha "sāmaṇera bhattakiccam karohī"ti. Tumhe pana bhanteti. Katam mayā bhattakiccam, tvam karohīti. Sattavassikadārako pabbajitvā aṭṭhame divase tam khaṇam vikasitapadumuppalasadiso arahattam patto, paccavekkhitaṭṭhānam⁴ pana paccavekkhanto nisīditvā bhattakiccamakāsi. Tena pattam dhovitvā paṭisāmitakāle Candadevaputto candamaṇḍalam⁵ vissajjesi, Sūriyadevaputto sūriyamaṇḍalam. Cattāro mahārājāno catuddisam ārakkham vissajjesum, Sakko devarājā āviñchanake ārakkham vissajjesi. Sūriyo majjhaṭṭhānato galitvā gato.

Bhikkhū ujjhāyimsu "chāyā adhikappamāṇā jātā, sūriyo majjhaṭṭhānato galitvā gato<sup>6</sup>, sāmaṇerena ca idāneva bhuttam, kim nu kho etan"ti. Satthā tam pavattim ñatvā āgantvā pucchi "bhikkhave kim kathethā"ti, idam nāma bhanteti. "Āma bhikkhave, puññavato samaṇadhammam

<sup>1.</sup> Putthapañhe (Sī, Syā)

<sup>2.</sup> Khudam (Sī)

<sup>3.</sup> Vissajjantesu (Sī, Ka)

<sup>4.</sup> Paccavekkhanatthānaṁ (Sī), bhattapakkhipanatthānaṁ (Syā)

<sup>5.</sup> Candam (Sī, Ka)

<sup>6.</sup> Galito (Sī)

karaṇakāle Candadevaputto candamaṇḍalaṁ, Sūriyadevaputto sūriyamaṇḍalaṁ ākaḍḍhitvā gaṇhi, cattāro mahārājāno vihāropavane catuddisaṁ ārakkhaṁ gaṇhiṁsu, Sakko devarājā āviñchanake ārakkhaṁ gaṇhi, ahampi 'Buddhomhī'ti appossukko nisīdituṁ nālatthaṁ, gantvā dvārakoṭṭhake mama puttassa ārakkhaṁ aggahesiṁ, nettike ca mātikāya udakaṁ harante, usukāre ca usuṁ ujuṁ karonte, tacchake ca dārūni tacchante disvā ettakaṁ ārammaṇaṁ gahetvā paṇḍitā attānaṁ dametvā arahattaṁ gaṇhantiyevā"ti vatvā anusandhiṁ ghaṭetvā dhammaṁ desento imaṁ gāthamāha—

80. "Udakam hi nayanti nettikā, usukārā namayanti tejanam. Dārum namayanti tacchakā, attānam damayanti panditā"ti.

Tattha udakanti pathaviyā thalaṭṭhānaṁ khaṇitvā āvāṭaṭṭhānaṁ pūretvā mātikaṁ vā katvā rukkhadoṇṁ vā ṭhapetvā attanā icchiticchitaṭṭhānaṁ udakaṁ. Nentīti nettikā. Tejananti kaṇḍaṁ. Idaṁ vuttaṁ hoti—nettikā attano ruciyā udakaṁ nayanti, usukārāpi tāpetvā tejanaṁ namayanti usuṁ ujuṁ karonti. Tacchakāpi nemi-ādīnaṁ atthāya tacchantā dāruṁ namayanti attano ruciyā ujuṁ vā vaṅkaṁ vā karonti. Evaṁ ettakaṁ ārammaṇaṁ katvā paṇḍitā sotāpattimaggādīni uppādentā attānaṁ damayanti, arahattappattā pana¹ ekantadantā nāma hontīti.

Desanāvasāne bahū sotāpattiphalādīni pāpuņimsūti.

Paṇḍitasāmaṇeravatthu pañcamam.

# 6. Lakuṇḍakabhaddiyattheravatthu

Selo yathāti imam dhammadesanam Satthā Jetavane viharanto Lakuṇḍakabhaddiyattheram ārabbha kathesi.

<sup>1.</sup> Arahatte pana patte (Syā), arahattam pana patte (Sī), arahattam pana pattena (Ka) Kāṇamātuvatthumhi 375 piṭṭhe pana passitabbam.

Puthujjanā kira sāmaņerādayo theram disvā sīsepi kaņņesupi nāsāyapi gahetvā "kim cūļapita sāsanasmim na ukkaņthasi, abhiramasī"ti vadanti. Thero tesu neva kujjhati, na dussati. Dhammasabhāyam katham samuṭṭhāpesum "passathāvuso, Lakuṇḍakabhaddiyattheram disvā sāmaṇerādayo evañcevañca viheṭhenti, so tesu neva kujjhati, na dussatī"ti. Satthā āgantvā "kim kathetha bhikkhave"ti pucchitvā "imam nāma bhante"ti vutte "āma bhikkhave khīṇāsavā nāma neva kujjhanti, na dussanti. Ghanaselasadisā hete acalā akampiyā"ti vatvā anusandhim ghaṭetvā dhammam desento imam gāthamāha—

81. "Selo yathā ekaghano, vātena na samīrati. Evam nindāpasamsāsu, na samiñjanti panditā"ti.

Tattha nindāpasaṁsāsūti kiñcāpi idha dve lokadhammā vuttā, attho pana aṭṭhannampi vasena veditabbo. Yathā hi ekaghano asusiro selo puratthimādibhedena vātena na samīrati na iñjati na calati, evaṁ aṭṭhasupi lokadhammesu ajjhottharantesu paṇḍitā na samiñjanti, paṭighavasena vā anunayavasena vā na calanti na kampanti.

Desanāvasāne bahū sotāpattiphalādīni pāpuņimsūti.

Lakuṇḍakabhaddiyattheravatthu chaṭṭhaṁ.

# 7. Kāṇamātuvatthu

**Yathāpi rahado**ti imam dhammadesanam Satthā Jetavane viharanto Kāṇamātaram ārabbha kathesi. Vatthu Vinaye<sup>1</sup> āgatameva.

Tadā pana Kāṇamātarā atucchahattaṁ dhītaraṁ patikulaṁ pesetuṁ pakkesu pūvesu catukkhattuṁ catunnaṁ bhikkhūnaṁ dinnakāle Satthārā tasmiṁ vatthusmiṁ sikkhāpade paññatte kāṇāya sāmikena aññāya pajāpatiyā ānītāya kāṇā taṁ pavattiṁ sutvā "imehi me gharāvāso nāsito"ti diṭṭhadiṭṭhe bhikkhū akkosati paribhāsati.

bhikkhū taṁ vīthiṁ paṭipajjituṁ na visahiṁsu. Satthā taṁ pavattiṁ ñatvā tattha agamāsi. Kāṇamātā Satthāraṁ vanditvā paññattāsane nisīdāpetvā yāgukhajjakaṁ adāsi, Satthā katapātarāso "kahaṁ Kāṇā"ti pucchi. Esā bhante tumhe disvā maṅkubhūtā rodantī ṭhitāti. Kiṁ kāraṇāti. Esā bhante bhikkhū akkosati paribhāsati, tasmā tumhe disvā maṅkubhūtā rodamānā ṭhitāti. Atha naṁ Satthā pakkosāpetvā Kāṇe kasmā maṁ disvā maṅkubhūtā nilīyitvā rodasīti. Athassā mātā tāya katakiriyaṁ ārocesi. Atha naṁ Satthā āha "kiṁ pana Kāṇamāte mama sāvakā tayā dinnakaṁ gaṇhiṁsu, adinnakaṁ"ti. Dinnakaṁ bhanteti. Sace mama sāvakā piṇḍāya carantā tava gehadvāraṁ pattā tayā dinnakaṁ gaṇhiṁsu, ko tesaṁ dosoti. Natthi bhante ayyānaṁ doso. Etissāyeva dosoti. Satthā Kāṇaṁ āha "Kāṇe mayhaṁ kira sāvakā piṇḍāya caramānā gehadvāraṁ āgatā, atha nesaṁ tava mātarā pūvā dinnā, ko nāmettha mama sāvakānaṁ doso"ti "natthi bhante ayyānaṁ doso, mayhameva doso"ti Satthāraṁ vanditvā khamāpesi.

Athassā Satthā anupubbim katham kathesi, sā sotāpattiphalam pāpuņi. Satthā uṭṭhāyāsanā vihāram gacchanto rājangaņena pāyāsi. Rājā disvā "Satthā viya bhaņe"ti pucchitvā "āma devā"ti vutte "gacchatha, mama āgantvā vandanabhāvam ārocethā"ti pesetvā rājangaņe ṭhitam Satthāram upasankamitvā vanditvā "kaham bhante gatātthā"ti pucchi. Kāṇamātāya¹ geham mahārājāti. Kim kāraṇā bhanteti. Kāṇā kira bhikkhū akkosati paribhāsati, tamkāraṇā gatomhīti. Kim pana vo bhante tassā anakkosanabhāvo katoti. Āma mahārāja, bhikkhūnañca anakkosikā katā, lokuttarakuṭumbasāminī cāti. "Hotu bhante, tumhehi sā lokuttarakuṭumbasāminī katā, aham pana nam lokiyakuṭumbasāminim karissāmī"ti vatvā rājā Satthāram vanditvā paṭinivatto paṭicchannamahāyoggam pahiṇitvā Kāṇam pakkosāpetvā sabbābharaṇehi alaṅkaritvā jetthadhītutthāne thapetvā "mama dhītaram

posetum samatthā ganhantū"ti āha. Atheko sabbatthakamahāmatto "aham devassa dhītaram posessāmī''ti tam attano geham netvā sabbam issariyam paticchāpetvā<sup>1</sup> "yathāruci puññāni karohī"ti āha. Tato patthāya Kānā catūsu dvāresu purise thapetvā attanā upatthātabbe bhikkhū ca bhikkhuniyo ca pariyesamānāpi na labhati. Kānāya gehadvāre patiyādetvā thapitam khādanīyabhojanīyam mahogho viya pavattati. Bhikkhū dhammasabhāyam katham samutthāpesum "pubbe āvuso cattāro mahallakattherā Kānāya vippatisāram karimsu, sā evam vippatisārinī hutvāpi Satthāram āgamma saddhāsampadam labhi, Satthārā puna tassā gehadvāram bhikkhūnam upasankamanāraham katam. Idāni upatthātabbe bhikkhū vā bhikkhuniyo vā pariyesamānāpi na labhati, aho Buddhā nāma acchariyaguņā"ti. Satthā āgantvā "kāya nuttha bhikkhave etarahi kathāya sannisinnā" ti pucchitvā "imāya nāmā"ti vutte "na bhikkhave idāneva tehi mahallakabhikkhūhi kānāya vippatisāro kato, pubbepi karimsuyeva. Na ca idāneva mayā Kānā mama vacanakārikā katā, pubbepi katāyevā"ti vatvā tamattham sotukāmehi bhikkhūhi yācito—

Yatthe'ko labhate babbu, dutiyo tattha jāyati.

Tatiyo ca catuttho ca, idam te babbukā bilanti<sup>2</sup>—

Idam **Babbujātakam** vitthārena kathetvā "tadā cattāro mahallakabhikkhū cattāro biļārā ahesum, mūsikā Kāṇā, maṇikāro ahamevā"ti jātakam samodhānetvā "evam bhikkhave atītepi Kāṇā dummanā āvilacittā vikkhittacittā hutvā mama vacanena pasanna-udakarahado viya vippasannacittā ahosī"ti vatvā anusandhim ghaṭetvā dhammam desento imam gāthamāha—

82. "Yathāpi rahado gambhīro. Vippasanno anāvilo. Evam dhammāni sutvāna, vippasīdanti paṇḍitā"ti. Tattha rahadoti yo caturanginiyāpi senāya ogāhantiyā nakhubhati¹ evarūpo udakaṇṇavo, sabbākārena pana caturāsītiyojanasahassagambhīro nīlamahāsamuddo rahado nāma. Tassa hi heṭṭhā cattālīsayojanasahassamatte ṭhāne udakaṁ macchehi calati, upari tāvattakeyeva ṭhāne udakaṁ vātena calati, majjhe catuyojanasahassamatte ṭhāne udakaṁ niccalaṁ tiṭṭhati. Ayaṁ gambhīro rahado nāma. Evaṁ dhammānīti desanādhammāni. Idaṁ vuttaṁ hoti—yathā nāma rahado anākulatāya² vippasanno, acalatāya anāvilo, evaṁ mama desanādhammaṁ sutvā sotāpattimaggādivasena nirupakkilesacittataṁ āpajjantā vippasīdanti paṇḍitā, arahattappattā pana ekantavippasannāva hontīti.

Desanāvasāne bahū sotāpattiphalādīni pāpuņimsūti.

Kāṇamātuvatthu sattamam.

### 8. Pañcasatabhikkhuvatthu

Sabbattha ve sappurisā cajantīti imam dhammadesanam Satthā Jetavane viharanto pañcasate bhikkhū ārabbha kathesi. Desanā Verañjāyam samuṭṭhitā.

Paṭhamabodhiyañhi Bhagavā Verañjaṁ gantvā Verañjena brāhmaṇena nimantito pañcahi bhikkhusatehi saddhiṁ vassaṁ upagañchi. Verañjo brāhmaṇo mārāvaṭṭanena āvaṭṭo ekadivasampi Satthāraṁ ārabbha satiṁ na uppādesi. Verañjāpi dubbhikkhā ahosi, bhikkhū santarabāhiraṁ Verañjaṁ piṇḍāya caritvā piṇḍapātaṁ alabhantā kilamiṁsu. Tesaṁ assavāṇijakā patthapatthapulakaṁ³ bhikkhaṁ paññāpesuṁ. Te kilamante disvā Mahāmoggallānatthero pathavojaṁ bhojetukāmo, Uttarakuruñca piṇḍāya pavesetukāmo⁴ ahosi, Satthā taṁ paṭikkhipi. Bhikkhūnaṁ ekadivasampi piṇḍapātaṁ ārabbha parittāso⁵

<sup>1.</sup> Nakkhubbhati (Sī), nakkhambhati (Ka)

<sup>2.</sup> Athalusatāya (Sī)

<sup>3.</sup> Patthapatthapūlakam (Syā), patthapatthamūlakam (Ka)

<sup>4.</sup> Pesetukāmo (Ka)

<sup>5.</sup> Paribhāso nāma (Ka)

nāhosi, icchācāram vajjetvā eva viharimsu. Satthā tattha temāsam vasitvā Verañjam brāhmanam apaloketvā tena katasakkārasammāno tam saranesu patitthāpetvā tato nikkhanto anupubbena cārikam caramāno ekasmim samaye Sāvatthim patvā Jetavane vihāsi. Sāvatthivāsino Satthu āgantukabhattāni karimsu. Tadā pana pañcasatamattā vighāsādā bhikkhū nissāva antovihāreveva vasanti. Te bhikkhūnam bhuttāvasesāni panītabhojanāni bhuñjitvā niddāyitvā utthāya nadītīram gantvā nadantā vaggantā mallamutthiyuddham yujjhantā kīlantā antovihārepi bahivihārepi anācārameva carantā vicaranti. Bhikkhū dhammasabhāyam katham samutthāpesum "passathāvuso, ime vighāsādā dubbhikkhakāle Veranjāyam kañci vikāram na dassesum, idāni pana evarūpāni panītabhojanāni bhuñjitvā anekappakāram vikāram dassentā vicaranti, bhikkhū pana Veranjāyampi upasantarūpā viharitvā idānipi upasantupasantāva viharantī"ti. Satthā dhammasabham gantvā "bhikkhave kim kathethā" ti pucchitvā "idam nāmā"ti vutte "i-ubbepete gadrabhayoniyam nibbattā pañcasatā gadrabhā hutvā pañcasatānam ājānīyasindhavānam allarasamuddikapānakapītāvasesam ucchitthakasatam udakena madditvā makacipilobhikāhi parissāvitattā 'vālodakan'ti sankhyam gatam apparasam nihīnam pivitvā madhumattā viya nadantā vicarimsūti vatvā—

> "Vālodakam apparasam nihīnam, Pitvā mado jāyati gadrabhānam. Imanca pitvāna rasam panītam, Mado na sanjāyati sindhavānam.

> Appam pivitvāna nihīnajacco, So majjatī tena janinda puṭṭho². Dhorayhasīlī ca kulamhi jāto, Na majjatī aggarasam pivitvā"ti³.

Idam **Vālodakajātakam** vitthārena kathetvā "evam bhikkhave sappurisā lokadhammam vivajjetvā sukhitakālepi dukkhitakālepi

nibbikārāva hontī"ti anusandhim ghaṭetvā dhammam desento imam gāthamāha—

83. "Sabbattha ve sappurisā cajanti, Na kāmakāmā lapayanti santo. Sukhena phuṭṭhā atha vā dukhena, Na uccāvacaṁ panditā dassayantī"ti.

Tattha sabbatthāti pañcakkhandhādibhedesu sabbadhammesu. Sappurisāti supurisā. Cajantīti arahattamaggañāņena apakaḍḍhantā chandarāgam vijahanti. Kāmakāmāti kāme kāmayantā kāmahetu kāmakāraṇā. Na lapayanti santoti Buddhādayo santo kāmahetu neva attanā lapayanti, na param lapāpenti. Ye hi bhikkhāya paviṭṭhā icchācāre ṭhitā "kim upāsaka sukham te puttadārassa, rājacorādīnam vasena dvipadacatuppadesu natthi koci upaddavo"ti-ādīni vadanti, tāva te lapayanti nāma. Tathā pana vatvā "āma bhante, sabbesam no sukham, natthi koci upaddavo, idāni no geham pahūta-annapānam, idheva vasathā"ti attānam nimantāpentā lapāpenti nāma. Santo pana idam ubhayampi na karonti. Sukhena phuṭṭhā atha vā dukhenāti desanāmattametam, aṭṭhahi pana lokadhammehi phuṭṭhā tuṭṭhibhāvamaṅkubhāvavasena vā vaṇṇabhaṇana-avaṇṇabhaṇanavasena vā uccāvacam ākāram panditā na dassayantīti.

Desanāvasāne bahū sotāpattiphalādīni pāpuņimsūti.

Pañcasatabhikkhuvatthu aṭṭhamam.

#### 9. Dhammikattheravatthu

Na attahetūti imam dhammadesanam Satthā Jetavane viharanto Dhammikattheram ārabbha kathesi.

Sāvatthiyam kireko upāsako dhammena samena agāram ajjhāvasati. So pabbajitukāmo hutvā ekadivasam bhariyāya saddhim

nisīditvā sukhakatham kathento āha "bhadde icchāmaham pabbajitun"ti. Tena hi sāmi āgamehi tāva, vāvāham kucchigatam dārakam vijāvāmīti. So āgametvā dārakassa padasā gamanakāle puna tam āpucchitvā "āgamehi tāva sāmi, yāvāsam vayappatto hotī"ti vutte "kim me imāya apalokitāya vā anapalokitāya vā, attano dukkhanissaranam karissāmī"ti nikkhamitvā pabbaji. So kammatthānam gahetvā ghatento vāyamanto attano pabbajita kiccam nitthapetvā tesam dassanatthāya puna Sāvatthim gantvā puttassa dhammakatham kathesi. Sopi nikkhamitvā pabbaji, pabbajitvā ca pana na cirasseva arahattam pāpuni. Purānaduti yikāpissa "yesam atthāya aham gharāvāse vaseyyam, te ubhopi pabbajitā, idāni me kim gharāvāsena, pabbajissāmī"ti nikkhamitvā pabbaji, pabbajitvā ca pana na cirasseva arahattam pāpuni. Athekadivasam dhammasabhāyam katham samutthāpesum "āvuso Dhammika-upāsako attano<sup>1</sup> dhamme patitthitattā nikkhamitvā pabbajitvā arahattam patto puttadārassāpi patitthā jāto"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave panditena nāma neva attahetu, na parahetu samiddhi icchitabba, dhammikeneva pana dhammapatisaranena<sup>2</sup> bhavitabban"ti anusandhim ghatetvā dhammam desento imam gāthamāha—

84. "Na attahetu na parassa hetu,Na puttamicche na dhanam na raṭṭham.Na iccheyya adhammena samiddhimattano,Sa sīlavā paññavā dhammiko siyā"ti.

Tattha **na attahetū**ti paṇḍito nāma attahetu vā parahetu vā pāpaṁ na karoti. **Na puttamicche**ti puttaṁ vā **dhanaṁ** vā **raṭṭhaṁ** vā pāpakammena na iccheyya, etānipi icchanto pāpakammaṁ na karotiyevāti attho. **Samiddhimattano**ti yā attano samiddhi, tampi **adhammena na iccheyya,** samiddhikāraṇāpi pāpaṁ na karotīti attho. **Sa sīlavā**ti yo evarūpo

puggalo, so eva sīlavā ca **paññavā** ca **dhammiko** ca **siyā**, na aññoti attho.

Desanāvasāne bahū sotāpattiphalādīni pāpuņimsūti.

Dhammikattherayatthu nayamam.

#### 10. Dhammassavanavatthu

Appakā te manussesūti imam dhammadesanam Satthā Jetavane viharanto dhammassavanam ārabbha kathesi.

Sāvatthiyam kira ekavīthivāsino manussā samaggā hutvā gaṇabandhena dānam datvā sabbarattim dhammassavanam kāresum, sabbarattim pana dhammam sotum nāsakkhimsu. Ekacce kāmaratinissitā hutvā puna gehameva gatā, ekacce dosanissitā hutvā, ekacce mānanissitā hutvā, ekacce thinimiddhasamangino hutvā tattheva nisīditvā pacalāyantā sotum nāsakkhimsu. Punadivase bhikkhū tam pavattim nātvā dhammasabhāyam katham samuṭṭhāpesum. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave ime sattā nāma yebhuyyena bhavanissitā, bhavesu eva laggā viharanti, pāragāmino nāma appakā"ti anusandhim ghaṭetvā dhammam desento imā gāthā āha—

- 85. "Appakā te manussesu, ye janā pāragāmino. Athāyam itarā pajā, tīramevānudhāvati.
- 86. Ye ca kho sammadakkhāte, dhamme dhammānuvattino. Te janā pāramessanti, maccudheyyam suduttaran''ti.

Tattha appakāti thokā na bahū. Pāragāminoti nibbānapāragāmino. Athāyam itarā pajāti yā panāyam avasesā pajā sakkāyadiṭṭhitīrameva anudhāvati, ayameva bahutarāti attho. Sammadakkhāteti sammā akkhāte sukathite. Dhammeti desanādhamme. Dhammānuvattinoti tam

dhammam sutvā tadanucchavikam paṭipadam pūretvā maggaphalasacchikaraṇena dhammānuvattino. **Pāramessantī**ti te evarūpā janā nibbānapāram gamissanti. **Maccudheyyan**ti kilesamārasankhātassa maccussa nivāsaṭṭhānabhūtam¹ tebhūmikavaṭṭam. **Suduttaran**ti ye janā dhammānuvattino, te etam² suduttaram duratikkamam māradheyyam taritvā atikkamitvā nibbānapāram gamissantīti attho.

Desanāvasāne bahū sotāpattiphalādīni pāpuņimsūti.

Dhammassavanavatthu dasamam.

## 11. Pañcasata-āgantukabhikkhuvatthu

**Kaṇhaṁ dhammaṁ vippahāyā**ti imaṁ dhammadesanaṁ Satthā Jetavane viharanto pañcasate āgantuke bhikkhū ārabbha kathesi.

Kosalaratthe kira pañcasatā bhikkhū vassam vasitvā vuṭṭhavassā "Satthāram passissāmā"ti Jetavanam gantvā Satthāram vanditvā ekamantam nisīdimsu. Satthā tesam cariyapaṭipakkham nisāmetvā³ dhammam desento imā gāthā abhāsi—

- 87. "Kaṇhaṁ dhamma vippahāya, sukkaṁ bhāvetha paṇḍito. Okā anokamāgamma, viveke yattha dūramaṁ.
- 88. Tatrābhiratimiccheyya, hitvā kāme akiñcano. Pariyodapeyya attānam, cittaklesehi paṇḍito.
- 89. Yesam sambodhiyangesu, sammā cittam subhāvitam. Ādānapaṭinissagge, anupādāya ye ratā. Khīṇāsavā jutimanto, te loke parinibbutā"ti.

Tattha kanham **dhamman**ti kāyaduccaritādibhedam akusalam dhammam **vippahāya** jahitvā. **Sukkam bhāvethā**ti **paṇḍito** bhikkhu abhinikkhamanato paṭṭhāya yāva arahattamaggā kāyasucaritādibhedam sukkam dhammam bhāveyya. Katham?

Okā anokamāgammāti okam vuccati ālayo, anokam vuccati anālayo, ālayato nikkhamitvā anālayasankhātam nibbānam paticca ārabbha tam patthayamāno bhāveyyāti attho. Tatrābhiratimiccheyyā-i yasmim anālayasankhāte viveke nibbāne imehi sattehi durabhiramam, tatra abhiratim iccheyya. Hitvā kāmeti vatthukāmakilesakāme hitvā akiñcano hutvā viveke abhiratim icchevyāti attho. **Cittaklesehī**ti pañcahi nīvaranehi **attānam** pariyodapeyya vodāpeyya, parisodheyyāti attho. Sambodhiyangesūti sambojjhangesu. Sammā cittam subhāvitanti hetunā navena cittam sutthu bhāvitam vaddhitam. Ādānapatinissaggeti ādānam vuccati gahanam, tassa patinissaggasankhāte aggahane catūhi upādānehi kinci anupādivitvā ve ratāti attho. Jutimantoti ānubhāvavanto, arahattamaggañānajutiyā khandhādibhede dhamme jotetvā thitāti attho. **Te loke**ti imasmim khandhādiloke **parinibbutā** nāma arahattappattito patthāya kilesavattassa khepitattā sa-upādisesena, carimacittanirodhena khandhavattassa khepitattā anupādisesena cāti dvīhi parinibbānehi parinibbutā, anupādāno viya padīpo apannattikabhāvam gatāti<sup>1</sup> attho.

Desanāvasāne bahū sotāpattiphalādīni pāpuņimsūti.

Pañcasata-āgantukabhikkhuvatthu ekādasamam.

Paņditavaggavaņņanā niţţhitā.

Chattho vaggo.

# 7. Arahantavagga

### 1. Jīvakapañhavatthu

**Gataddhino**ti imam dhammadesanam Satthā Jīvakambavane viharanto Jīvakena puṭṭhapañham ārabbha kathesi. Jīvakavatthu Khandhake<sup>1</sup> vitthāritameva.

Ekasmim pana samaye Devadatto Ajātasattunā saddhim ekato hutvā Gijjhakūtam abhiruhitvā padutthacitto "Satthāram vadhissāmī"ti silam pavijjhi. Tam dve pabbatakūtāni sampaticchimsu. Tato bhijjitvā gatā papatikā Bhagavato pādam paharitvā<sup>2</sup> lohitam uppādesi, bhusā<sup>3</sup> vedanā pavattimsu. Bhikkhū Satthāram maddakucchim<sup>4</sup> nayimsu. Satthā tatopi Jīvakambavanam gantukāmo "tattha mam nethā"ti āha. Bhikkhū Bhagavantam ādāya Jīvakambavanam agamamsu. Jīvako tam pavattim sutvā Satthu santikam gantvā vanapatikammatthāya tikhinabhesajjam datvā vanam bandhitvā Satthāram etadavoca "bhante mayā antonagare ekassa manussassa bhesajjam katam, tassa santikam gantvā puna āgamissāmi, idam bhesajjam yāva mamāgamanā baddhaniyāmeneva titthatū"ti. So gantvā tassa purisassa kattabbakiccam katvā dvārapidahanavelāya āgacchanto dvāram na sampāpuni. Athassa etadahosi "aho mayā bhāriyam kammam katam, yvāham añnatarassa purisassa viya Tathāgatassa pāde tikhinabhesajjam datvā vaņam bandhim, ayam tassa mocanavelā, tasmim amuccamāne sabbarattim Bhagavato sarīre parilāho uppajjissatī"ti. Tasmim khaņe Satthā Ānandattheram āmantesi "Ānanda Jīvako sāyam āgacchanto dvāram na sampāpuni, 'ayam vaņassa mocanavelā'ti pana cintesi, mocehi nan"ti. Thero mocesi, vano rukkhato challi<sup>5</sup> viva apagato. Jīvako anto-aruneveva Satthu santikam vegena agantva "kim nu kho bhante sarīre vo parilaho uppanno"ti pucchi. Satthā "Tathāgatassa kho Jīvaka Bodhimandeyeva sabbaparilāho vūpasanto"ti anusandhim ghatetvā dhammam desento imam gāthamāha—

<sup>1.</sup> Vi 3. 377 pitthe.

<sup>2.</sup> Abhihanitvā (Sī, Syā)

<sup>3.</sup> Kharā (Sī)

<sup>4.</sup> Maddakucchipabbatam (Ka)

<sup>5.</sup> Jalli (Sī)

90. "Gataddhino visokassa, vippamuttassa sabbadhi. Sabbaganthappahīnassa, parilāho na vijjatī"ti.

Tattha **gataddhino**ti gatamaggassa kantāraddhā vattaddhāti<sup>1</sup> dve addhā nāma. Tesu kantārapatipanno yāva icchitatthānam na pāpunāti, tāva addhikoyeva, etasmim pana patte gataddhi nāma hoti. Vattasannissitāpi sattā vāva vatte vasanti, tāva addhikā eva. Kasmā? Vattassa akhepitattā. Sotāpannādayopi addhikā eva, vattam pana khepetvā thito khīnāsavo gataddhi nāma hoti. Tassa gataddhino. Visokassāti vattamūlakassa sokassa vigatattā visokassa. Vippamuttassa sabbadhīti sabbesu khandhādidhammesu vippamuttassa, sabbaganthappahīnassāti catunnampi ganthānam pahīnattā sabbaganthappahīnassa. Parilāho na vijjatīti duvidho parilāho kāyiko cetasiko cāti. Tesu khīnāsavassa sītunhādivasena uppannattā<sup>2</sup> kāyikaparilāho anibbutova, tam sandhāya Jīvako pucchati. Satthā pana Dhammarājatāya desanāvidhikusalatāya cetasika<sup>3</sup>parilāhavasena desanam vinivattento "Jīvaka paramatthena<sup>4</sup> evarūpassa khīṇāsavassa pariļāho na vijjatī"ti āha.

Desanāvasāne bahū sotāpattiphalādīni pāpuņimsūti.

Jīvakapañhavatthu paṭhamam.

# 2. Mahākassapattheravatthu

**Uyyuñjantī**ti imam dhammadesanam Satthā Veluvane viharanto Mahākassapattheram ārabbha kathesi.

Ekasmim hi samaye Sattha Rajagahe vutthavasso "addhamasaccayena cārikam pakkamissāmī"ti bhikkhūnam ārocāpesi. Vattam kiretam Buddhānam bhikkhūhi saddhim cārikam caritukāmānam "evam bhikkhū attano pattapacanacīvararajanādīni katvā sukham gamissantī"ti "idāni addhamāsaccayena cārikam pakkamissāmī"ti bhikkhūnam ārocāpanam. Bhikkhūsu pana attano pattapacanādīni

<sup>1.</sup> Kantāraddhānavattaddhānāti (Sī, Ka) 2. Uppajjanako (Sī), uppajjanto (Syā)

<sup>3.</sup> Kāyikacetasika... (Sī)

<sup>4.</sup> Āvuso Jīvaka paramatthena hi (sabbattha)

karontesu Mahākassapattheropi cīvarāni dhovi. Bhikkhū ujjhāyimsu "thero kasmā cīvarāni dhovati, imasmim nagare anto ca bahi ca aṭṭhārasa manussakoṭiyo vasanti. Tattha ye therassa na ñātakā, te upaṭṭhākā, ye na upaṭṭhākā, te ñātakā. Te therassa catūhi paccayehi sammānasakkāraṁ¹ karonti. Ettakaṁ upakāraṁ pahāya esa kahaṁ gamissati. Sacepi gaccheyya, māpamādakandarato paraṁ na gamissatī"ti. Satthā kira yaṁ kandaraṁ patvā nivattetabbayuttake bhikkhū "tumhe ito nivattatha, mā pamajjitthā"ti vadati. Taṁ² "māpamādakandaran"ti vuccati, taṁ sandhāyetaṁ vuttaṁ.

Satthāpi cārikam pakkamanto cintesi "imasmim nagare anto ca bahi ca atthārasa manussakotiyo vasanti, manussānam mangalāmangalatthānesu bhikkhūhi gantabbam hoti, na sakkā vihāram tuccham kātum, kam nu kho nivattessāmī"ti. Athassa etadahosi "Kassapassa hete manussā ñātakā ca upatthākā ca, Kassapam nivattetum vattatī'ti. So theram āha "Kassapa na sakkā vihāram tuccham kātum, manussānam mangalāmangalatthānesu bhikkhūhi attho hoti, tvam attano parisāya saddhim nivattassū"ti. "Sādhu bhante"ti thero parisam ādāya nivatti. Bhikkhū ujjhāyimsu "dittham vo āvuso, nanu idāneva amhehi vuttam 'Mahākassapo kasmā cīvarāni dhovati, na eso Satthārā saddhim gamissatī'ti, yam amhehi vuttam, tadeva jātan"ti. Satthā bhikkhūnam katham sutvā nivattitvā thito āha "bhikkhave kim nāmetam kathethā"ti. "Mahākassapattheram ārabbha kathema bhante"ti attanā kathitaniyāmeneva sabbam ārocesum. Tam sutvā Satthā "na bhikkhave tumhe Kassapam 'kulesu ca paccayesu ca laggo'ti vadetha, so 'mama vacanam karissāmī'ti nivatto. Eso hi pubbe patthanam karontoyeva 'catūsu paccayesu alaggo candūpamo hutvā kulāni upasankamitum samattho bhaveyyan'ti patthanam akāsi. Natthetassa kule vā paccaye vā laggo, aham candopamappatipadañceva<sup>3</sup> ariyavamsappatipadañca kathento mama puttam Kassapam ādim katvā kathesin"ti āha.

Bhikkhū Satthāram pucchimsu "bhante kadā pana therena patthanā ṭhapitā"ti. Sotukāmāttha bhikkhaveti. Āma bhanteti. Satthā tesam "bhikkhave ito kappasatasahassamatthake Padumuttaro nāma Buddho loke udapādī"ti vatvā Padumuttarapādamūle tena ṭhapitapatthanam ādim katvā sabbam therassa pubbacaritam kathesi. Tam Therapāḷiyam¹ vitthāritameva. Satthā pana imam therassa pubbacaritam vitthāretvā "iti kho bhikkhave aham candopamappaṭipadañceva ariyavamsappaṭipadañca mama puttam Kassapam ādim katvā kathesim, mama puttassa Kassapassa paccayesu vā kulesu vā vihāresu vā pariveņesu vā laggo nāma natthi, pallale otaritvā tattha caritvā gacchanto rājahamso viya katthaci alaggoyeva mama putto"ti anusandhim ghaṭetvā dhammam desento imam gāthamāha—

91. "Uyyuñjanti satīmanto, na nikete ramanti te. Haṁsāva pallalaṁ hitvā, okamokaṁ jahanti te"ti.

Tattha uyyuñjanti satīmantoti sativepullappattā khīṇāsavā attanā paṭividdhaguṇesu² jhānavipassanādīsu āvajjanasamāpajjanavuṭṭhānādhiṭṭhānapacca-vekkhaṇāhi yuñjanti ghaṭenti. Na nikete ramanti teti tesaṁ ālaye rati nāma natthi. Haṁsāvāti desanāsīsametaṁ, ayaṁ panettha attho—yathā gocarasampanne pallale sakuṇā attano gocaraṁ gahetvā gamanakāle "mama udakaṁ, mama padumaṁ, mama uppalaṁ, mama kaṇṇikā"ti tasmiṁ ṭhāne kañci ālayaṁ akatvā anapekkhāva taṁ ṭhānaṁ pahāya uppatitvā ākāse kīḷamānā gacchanti, evamevaṁ³ khīṇāsavā yattha katthaci viharantāpi kulādīsu alaggā eva viharitvā gamanasamayepi taṁ ṭhānaṁ pahāya gacchantā "mama vihāro, mama pariveṇaṁ, mamūpaṭṭhākā"ti anālayā anapekkhāva gacchanti. Okamokanti ālayālayaṁ, sabbālaye pariccajantīti attho.

Desanāvasāne bahū sotāpattiphalādīni pāpuņimsūti.

Mahākassapattheravatthu dutiyam.

### 3. Belatthasīsattheravatthu

**Yesaṁ sannicayo natthī**ti imaṁ dhammadesanaṁ Satthā Jetavane viharanto āyasmantaṁ Belatthasīsaṁ ārabbha kathesi.

So kirāyasmā antogāme ekam vīthim piṇḍāya caritvā bhattakiccam katvā puna aparam vīthim caritvā sukkham kūram¹ ādāya vihāram haritvā paṭisāmetvā "nibaddham piṇḍapātapariyesanam nāma dukkhan"ti katipāham jhānasukhena vītināmetvā āhārena atthe sati tam paribhuñjati. Bhikkhū ñatvā ujjhāyitvā tamattham Bhagavato ārocesum. Satthā etasmim nidāne āyatim sannidhikāraparivajjanatthāya bhikkhūnam sikkhāpadam paññapetvāpi² therena pana apaññatte sikkhāpade appicchatam nissāya katattā tassa dosābhāvam pakāsento anusandhim ghaṭetvā dhammam desento imam gāthamāha—

92. "Yesam sannicayo natthi. Ye pariññātabhojanā. Suññato animitto ca, vimokkho yesam gocaro. Ākāseva sakuntānam, gati tesam durannayā"ti.

Tattha sannicayoti dve sannicayā kammasannicayo ca paccayasannicayo ca. Tesu kusalākusalakammam kammasannicayo nāma, cattāro paccayā paccayasannicayo nāma. Tattha vihāre vasantassa bhikkhuno ekam guļapiņdam, catubhāgamattam sappim, ekanca taņdulanāļim thapentassa paccayasannicayo natthi, tato uttari hoti. Yesam ayam duvidhopi sannicayo natthi. Parinnātabhojanāti tīhi parinnāhi parinnātabhojanā. Yāgu-ādīnam hi yāgubhāvādijānanam nātaparinnā, āhāre paṭikūlasannāvasena pana bhojanassa parijānanam tīraṇaparinnā, kabaļīkārāhāre chandarāga apakaḍḍhananāṇam pahānaparinnā. Imāhi tīhi parinnāhi ye parinnātabhojanā. Sunnato animitto cāti ettha appaṇihitavimokkhopi gahitoyeva. Tīṇipi cetāni nibbānasseva nāmāni. Nibbānam hi rāgadosamohānam abhāvena sunnato³, tehi ca vimuttanti sunnato vimokkho, tathā rājādinimittānam abhāvena animittam, tehi ca vimuttanti animitto vimokkho, rāgādipanidhīnam pana abhāvena

<sup>1.</sup> Sukkhāhāram (Ka) Vi 2. 116 pitthe pana passitabbam.

<sup>2.</sup> Paññapesi. (Ka)

appaṇihitaṁ, tehi ca vimuttanti appaṇihito vimokkhoti vuccati. Phalasamāpattivasena taṁ ārammaṇaṁ katvā viharantānaṁ ayaṁ tividho vimokkho yesaṁ gocaro. Gati tesaṁ durannayāti yathā nāma ākāsena gatānaṁ sakuṇānaṁ padanikkhepassa adassanena gati durannayā na sakkā jānituṁ, evameva yesaṁ ayaṁ duvidho sannicayo natthi, imāhi ca tīhi pariññāhi pariññātabhojanā, yesañca ayaṁ vuttappakāro vimokkho gocaro, tesaṁ tayo bhavā catasso yoniyo pañca gatiyo satta viññāṇaṭṭhitiyo nava sattāvāsāti imesu pañcasu koṭṭhāsesu iminā nāma gatāti gamanassa apaññāyanato gati durannayā na sakkā paññāpetunti.

Desanāvasāne bahū sotāpattiphalādīni pāpuņimsūti.

Belatthasīsattheravatthu tatiyam.

#### 4. Anuruddhattheravatthu

Yassāsavāti imam dhammadesanam Satthā Veļuvane viharanto Anuruddhattheram ārabbha kathesi.

Ekasmim hi divase thero jiṇṇacīvaro saṅkārakūṭādīsu cīvaram pariyesati. Tassa ito tatiye attabhāve purāṇadutiyikā Tāvatimsabhavane nibbattitvā Jālinī nāma devadhītā ahosi. Sā theram coļakāni pariyesamānam disvā therassa atthāya terasahatthāyatāni catuhatthavitthatāni tīṇi dibbadussāni gahetvā "sacāham imāni iminā nīhārena dassāmi, thero na gaṇhissatī"ti cintetvā tassa coļakāni pariyesamānassa purato ekasmim saṅkārakūṭe yathā nesam dasantamattameva paññāyati, tathā ṭhapesi. Thero tena maggena coļakapariyesamānam caranto nesam dasantam disvā tattheva gahetvā ākaḍḍhamāno vuttappamāṇāni dibbadussāni disvā "ukkaṭṭhapamsukūlam vata idan"ti ādāya pakkāmi. Athassa cīvarakaraṇadivase Satthā pañcasatabhikkhuparivāro vihāram gantvā nisīdi, asītimahātherāpi tattheva nisīdimsu, cīvaram sibbetum Mahākassapatthero mūle nisīdi, Sāriputtatthero majjhe, Ānandatthero agge, bhikkhusamgho suttam vattesi, Satthā

sūcipāsake āvuņi, Mahāmoggallānatthero yena yena attho, tam tam upanento vicari.

Devadhītāpi antogāmam pavisitvā "bhontā ayyassa no Anuruddhattherassa cīvaram karonto Satthā asītimahāsāvakaparivuto pañcahi bhikkhusatehi saddhim vihāre nisīdi, yāgu-ādīni ādāya vihāram gacchathā"ti bhikkham samādapesi. Mahāmoggallānattheropi antarābhatte mahājambupesim āhari, pañcasatā bhikkhū parikkhīnam khāditum nāsakkhimsu. Sakko cīvarakaranatthāne bhūmiparibhandamakāsi, bhūmi alattakarasarañjitā viva ahosi. Bhikkhūhi paribhuttāvasesānam yāgukhajjakabhattānam mahārāsi ahosi. Bhikkhū ujjhāyimsu "ettakānam bhikkhūnam kim evambahukehi yāgu-ādīhi, nanu nāma pamānam sallakkhetvā 'ettakam nāma āharathā'ti ñātakā ca upatthākā ca vattabbā siyum, Anuruddhatthero attano ñāti-upaṭṭhākānam bahubhāvam ñāpetukāmo maññe"ti, atha ne Satthā "kim bhikkhave kathethā"ti pucchitvā "bhante idam nāmā"ti vutte kim pana tumhe bhikkhave "idam Anuruddhena āharāpitan"ti maññathāti. Āma bhanteti. "Na bhikkhave mama putto Anuruddho evarūpam vadeti. Na hi khīnāsavā paccayapatisamyuttam katham kathenti, ayam pana pindapāto devatānubhāvena nibbatto"ti anusandhim ghatetvā dhammam desento imam gathamaha—

93. "Yassāsavā parikkhīṇā, āhāre ca anissito. Suññato animitto ca, vimokkho yassa gocaro. Ākāseva sakuntānam, padam tassa durannayan"ti.

Tattha yassāsavāti yassa cattāro āsavā parikkhīņā. Āhāre ca anissitoti āhārasmim ca taṇhādiṭṭhinissayehi anissito. Padam tassa durannayanti yathā ākāse gacchantānam sakuṇānam "imasmim ṭhāne pādehi akkamitvā gatā, idam ṭhānam urena paharitvā gatā, idam sīsena, idam pakkhehī"ti na sakkā ñātum, evameva evarūpassa bhikkhuno "nirayapadena vā gato, tiracchānayonipadena vā"ti-ādinā nayena padam paññāpetum nāma na sakkoti.

Desanāvasāne bahū sotāpattiphalādīni pāpunimsūti.

Anuruddhattheravatthu catuttham.

### 5. Mahākaccāyanattheravatthu

**Yassindriyānī**ti imam dhammadesanam Satthā Pubbārāme viharanto Mahākaccāyanattheram ārabbha kathesi.

Ekasmim hi samaye Bhagavā mahāpavāranāya Migāramātuyā pāsādassa hetthā mahāsāvakaparivuto nisīdi. Tasmim samaye Mahākaccāyanatthero avantīsu viharati. So panāyasmā dūratopi āgantvā dhammassavanam pagganhātiyeva. Tasmā mahātherā nisīdantā Mahākaccāyanattherassa āsanam thapetvā nisīdimsu. Sakko devarājā dvīhi devalokehi devaparisāya saddhim āgantvā dibbagandhamālādīhi Satthāram pūjetvā thito Mahākaccāyanattheram adisvā kim nu kho mama ayyo na dissati, sādhu kho panassa sace āgaccheyyāti. Theropi tam khanaññeva āgantvā attano āsane<sup>1</sup> nisinnameva attānam dassesi. Sakko theram disvā gopphakesu dalam gatetvā "sādhu vata me ayyo āgato, aham ayyassa āgamanameva paccāsīsāmī"ti vatvā ubhohi hatthehi pāde sambāhitvā gandhamālādīhi pūjetvā vanditvā ekamantam atthāsi. Bhikkhū ujjhāyimsu "Sakko mukham oloketvā sakkāram karoti, avasesamahāsāvakānam evarūpam sakkāram akaritvā Mahākaccāyanam disvā vegena gopphakesu gahetvā 'sādhu vata me ayyo āgato, aham ayyassa āgamanameva paccāsīsāmī'ti vatvā ubhohi hatthehi pāde sambāhitvā pūjetvā vanditvā ekamantam thito"ti. Satthā tesam tam katham sutvā "bhikkhave mama puttena Mahākaccāyanena sadisā indriyesu guttadvārā bhikkhū devānampi manussānampi piyāyevā"ti vatvā anusandhim ghatetvā dhammam desento imam gāthamāha—

94. "Yassindriyāni samathaṅgatāni, Assā yathā sārathinā sudantā. Pahīnamānassa anāsavassa, Devāpi tassa pihayanti tādino"ti. Tassattho—yassa bhikkhuno chekena sārathinā sudantā assā viya cha indriyāni samatham dantabhāvam nibbisevanabhāvam gatāni, tassa navavidham mānam pahāya ṭhitattā pahīnamānassa catunnam āsavānam abhāvena anāsavassa. Tādinoti tādibhāvasaṇṭhitassa tathārūpassa devāpi pihayanti, manussāpi dassananca āgamananca patthentiyevāti.

Desanāvasāne bahū sotāpattiphalādīni pāpuņimsūti.

Mahākaccāyanattheravatthu pañcamam.

## 6. Sāriputtattheravatthu

**Pathavisamo**ti imam dhammadesanam Satthā Jetavane viharanto Sāriputtattheram ārabbha kathesi.

Ekasmim hi samaye āyasmā Sāriputto vuṭṭhavasso cārikam pakkamitukāmo Bhagavantam āpucchitvā vanditvā attano parivārena saddhim nikkhami. Aññepi bahū bhikkhū theram anugacchimsu. Thero ca nāmagottavasena paññāyamāne bhikkhū nāmagottavasena kathetvā nivattāpesi. Aññataro nāmagottavasena apākaṭo bhikkhu cintesi "aho vata mampi nāmagottavasena paggaṇhanto kathetvā nivattāpeyyā"ti. Thero mahābhikkhusamghassa antare tam na sallakkhesi. So "aññe viya bhikkhū na mam paggaṇhātī"ti there āghātam bandhi. Therassapi samghāṭikaṇṇo tassa bhikkhuno sarīram phusi, tenāpi āghātam bandhiyeva. So "dāni thero vihārūpacāram atikkanto bhavissatī"ti ñatvā Satthāram upasaṅkamitvā "āyasmā mam bhante Sāriputto tumhākam aggasāvakomhīti kaṇṇasakkhalim bhindanto viya paharitvā akhamāpetvāva cārikam pakkanto"ti āha. Satthā theram pakkosāpesi.

Tasmim khane Mahāmoggallānatthero ca Ānandatthero ca cintesum "amhākam aggajeṭṭhabhātarā imassa bhikkhuno apahaṭabhāvam Satthā no na jānāti, sīhanādam pana nadāpetukāmo bhavissatīti parisam sannipātāpessāmā"ti. Te kuncikahatthā parivenadvārāni vivaritvā

"Abhikkamathāyasmanto, abhikkamathāyasmanto, idānāyasmā Sāriputto Bhagavato sammukhā sīhanādaṁ nadissatī"ti¹ mahābhikkhusaṁghaṁ sannipātesuṁ. Theropi āgantvā Satthāraṁ vanditvā nisīdi. Atha naṁ Satthā tamatthaṁ pucchi. Thero "nāyaṁ bhikkhu mayā pahaṭo"ti avatvāva attano guṇakathaṁ kathento "yassa nūna bhante kāye kāyagatāsati anupaṭṭhitā assa, so idha aññataraṁ sabrahmacāriṁ āsajja appaṭinissajja cārikaṁ pakkameyyā"ti vatvā "seyyathāpi bhante pathaviyaṁ sucimpi nikkhipanti, asucimpi nikkhipantī"ti-ādinā¹ nayena attano pathavīsamacittatañca āpotejovāyo rajoharaṇa caṇḍālakumāraka usabhachinnavisāṇasamacittatañca ahikuṇapādīhi viya attano kāyena aṭṭiyanañca medakathālikā viya attano kāyapariharaṇañca pakāsesi. Imāhi ca pana navahi upamāhi there attano guṇe kathente navasupi ṭhānesu² udakapariyantaṁ katvā mahāpathavī kampi. Rajoharaṇacaṇḍālakumārakamedakathāliko pamānaṁ pana āharaṇakāle puthujjanā bhikkhū assūni sandhāretuṁ nāsakkhiṁsu, khīṇāsavānaṁ dhammasaṁvego udapādi.

There attano guṇaṁ kathenteyeva abbhācikkhanakassa bhikkhuno sakalasarīre ḍāho uppajji, so tāvadeva Bhagavato pādesu patitvā attano abbhācikkhanadosaṁ³ pakāsetvā accayaṁ desesi. Satthā theraṁ āmantetvā "Sāriputta khama imassa moghapurisassa, yāvassa sattadhā muddhā na phalatī'ti āha. Thero ukkuṭikaṁ nisīditvā añjaliṁ paggayha "khamāmahaṁ bhante tassa āyasmato, khamatu ca me so āyasmā, sace mayhaṁ doso atthī'ti āha. Bhikkhū kathayiṁsu "passatha dānāvuso therassa anopamaguṇaṁ⁴, evarūpassa nāma musāvādena abbhācikkhanakassa bhikkhuno upari appamattakampi kopaṁ vā dosaṁ vā akatvā sayameva ukkuṭikaṁ nisīditvā añjaliṁ paggayha khamāpetī'ti. Satthā taṁ kathaṁ sutvā "bhikkhave kiṁ kathethā'ti pucchitvā "idaṁ nāma bhante'ti vutte "na bhikkhave sakkā Sāriputtasadisānaṁ kopaṁ vā dosaṁ vā uppādetuṁ, mahāpathavīsadisaṁ bhikkhave indakhīlasadisaṁ

<sup>1.</sup> Am 3. 181 pitthe.

<sup>3.</sup> Abhūtabbhakkhānadosaṁ (Sī, Syā)

<sup>2.</sup> Vāresu (Sī, Syā)

<sup>4.</sup> Anomagunattam (Syā)

pasanna-udakarahadasadisañca Sāriputtassa cittan"ti vatvā anusandhim ghaṭetvā dhammam desento imam gāthamāha—

95. "Pathavisamo no virujjhati, Indakhilupamo tādi subbato. Rahadova apetakaddamo, Saṃsārā na bhayanti tādino"ti.

Tassattho—bhikkhave yathā nāma pathaviyaṁ sucīni gandhamālādīnipi nikkhipanti, asucīni muttakarīsādīnipi nikkhipanti, yathā nāma nagaradvāre¹ nikhātaṁ indakhīlaṁ dārakādayo omuttentipi² ūhadantipi, apare pana taṁ gandhamālādīhi sakkaronti. Tattha pathaviyā indakhīlassa ca³ neva anurodho uppajjati, na virodho, evameva yvāyaṁ khīṇāsavo bhikkhu aṭṭhahi lokadhammehi akampiyabhāvena tādi, vatānaṁ sundaratāya subbato. So "ime maṁ catūhi paccayehi sakkaronti, ime pana na sakkarontī"ti sakkārañca asakkārañca karontesu neva anurujjhati, no virujjhati, atha kho pathavisamo ca indakhilupamo eva ca hoti. Yathā ca apagatakaddamo rahado pasannodako hoti, evaṁ apagatakilesatāya rāgakaddamādīhi akaddamo vippasannova hoti. Tādinoti tassa pana evarūpassa sugatiduggatīsu saṁsaraṇavasena saṁsārā nāma na hontīti.

Desanāvasāne nava bhikkhusahassāni saha paṭisambhidāhi arahattam pāpuṇimsūti.

Sāriputtattheravatthu chaṭṭhaṁ.

# $7.\ Kosambiv \overline{a}s\overline{\imath}tiss at the ras\overline{a}ma \underline{n}era vat thu$

Santam tassa manam hotīti imam dhammadesanam Satthā Jetavane viharanto Tissattherassa sāmaneram ārabbha kathesi.

Eko kira Kosambivāsī kulaputto Satthu sāsane pabbajitvā laddhūpasampado "Kosambivāsītissatthero"ti paññāyi. Tassa Kosambiyam

<sup>1.</sup> Tathā nagaradvāre (Sī, Syā)

<sup>3.</sup> Pathaviyā vā indakhīlassa vā (Syā)

<sup>2.</sup> Ummihantipi (Syā)

vuṭṭhavassassa upaṭṭhāko ticīvarañceva sappiphāṇitañca āharitvā pādamūle ṭhapesi. Atha naṁ thero āha "kiṁ idaṁ upāsakā"ti. Nanu mayā bhante tumhe vassaṁ vāsitā, amhākañca vihāre vuṭṭhavassā imaṁ lābhaṁ labhanti, gaṇhatha bhanteti. Hotu upāsaka, na mayhaṁ iminā atthoti. Kiṁ kāraṇā bhanteti. Mama santike kappiyakārako sāmaṇeropi natthi āvusoti. Sace bhante kappiyakārako natthi, mama putto ayyassa santike sāmaṇero bhavissatīti. Thero adhivāsesi. Upāsako sattavassikaṁ attano puttaṁ therassa santikaṁ netvā "imaṁ pabbājethā"ti adāsi. Athassa thero kese temetvā tacapañcakakammaṭṭhānaṁ datvā pabbājesi. So khuraggeyeva saha paṭisambhidāhi arahattaṁ pāpuṇi.

Thero tam pabbājetvā addhamāsam tattha vasitvā "Satthāram passissāmī''ti sāmaneram bhandakam gāhāpetvā gacchanto antarāmagge ekam vihāram pāvisi. Sāmanero upajjhāvassa senāsanam gahetvā patijaggi, tassa tam patijaggantasseva vikālo jāto, tena attano senāsanam patijaggitum nāsakkhi. Atha nam upatthānavelāyam āgantvā nisinnam thero pucchi "sāmanera attano vasanatthānam patijaggitan"ti<sup>1</sup>. Bhante patijaggitum okāsam nālatthanti. "Tena hi mama vasanatthāneyeva vasa, dukkham te āgantukatthāne bahi vasitun"ti tam gahetvāva senāsanam pāvisi. Thero pana puthujjano nipannamattova niddam okkami. Sāmanero cintesi "ajja me upajjhāyena saddhim tatiyo divaso<sup>2</sup> ekasenāsane vasantassa, 'sace nipajjitvā niddāyissāmi, thero sahaseyyam āpajjeyyā'ti nisinnakova vītināmessāmī''ti upajjhāvassa mañcakasamīpe pallankam ābhujitvā nisinnakova rattim vītināmesi. Thero paccūsakāle paccutthāya "sāmaneram nikkhamāpetum vattatī"ti mañcakapasse thapitabījanim gahetvā bījanipattassa aggena sāmanerassa katasārakam paharitvā bījanim uddham ukkhipanto "sāmanera bahi nikkhamā"ti āha. Bījanipattadandako akkhimhi patihaññi, tāvadeva akkhi bhijji. So "kim bhante"ti vatvā utthāya "bahi nikkhamā"ti vutte "akkhi me bhante bhinnan''ti avatvā ekena hatthena paticchādetvā nikkhami. Vattakaranakāle ca pana "akkhi me bhinnan"ti tunhī anisīditvā ekena hatthena akkhim gahetvā ekena

hatthena muṭṭhisammuñjaniṁ ādāya vaccakuṭiñca mukhadhovanaṭṭhānañca sammajjitvā mukhadhovanodakañca ṭhapetvā pariveṇaṁ sammajji. So upajjhāyassa dantakatthaṁ dadamāno ekeneva hatthena adāsi.

Atha nam upajihāyo āha "asikkhito vatāyam sāmanero, ācariyupajjhāyānam ekena hatthena dantakattham dātum na vattatī"ti<sup>1</sup>. Jānāmaham bhante "na evam vattatī" ti<sup>2</sup>, eko pana me hattho na tucchoti. Kim sāmanerāti. So ādito patthāya tam pavattim ārocesi. Thero sutvāva samviggamānaso "aho vata mayā bhāriyam kammam katan"ti vatvā "khamāhi me sappurisa, nāhametam jānāmi, avassayo me hohī"ti añjalim paggayha sattavassikadārakassa pādamūle ukkutikam nisīdi. Atha nam sāmaņero āha "nāham bhante etadatthāya kathesim, tumhākam cittam anurakkhantena mayā evam vuttam, nevettha tumhākam doso atthi, na mayham. Vattasseveso doso, mā cintayittha, mayā tumhākam vippatisāram rakkhanteneva nārocitan"ti. Thero sāmaņerena assāsiyamānopi anassāsitvā uppannasamvego sāmanerassa bhandakam gahetvā Satthu santikam pāyāsi. Satthāpissa āgamanam olokentova nisīdi. So gantvā Satthāram vanditvā Satthārā saddhim patisammodanam katvā "khamanīyam te bhikkhu, kiñci<sup>3</sup> atirekam aphāsukam atthī"ti pucchito āha "khamanīyam bhante, natthi me kiñci atirekam aphāsukam, apica kho pana me ayam daharasāmanero viya añño atirekaguno na ditthapubbo"ti. Kim pana iminā katam bhikkhūti. So ādito paṭṭhāya sabbam tam pavattim Bhagavato ārocento āha "evam bhante mayā khamāpiyamāno mam evam vadesi 'nevettha tumhākam doso atthi, na mayham. Vattasseveso doso, tumhe mā cintayitthā'ti, iti mam assāsesiyeva, mayi neva kopam, na dosamakāsi, na me bhante evarūpo gunasampanno ditthapubbo"ti. Atha nam Satthā "bhikkhu khīnāsavā nāma na kassaci kuppanti, na dussanti, santindriyā santamānasāva hontī"ti vatvā anusandhim ghatetvā dhammam desento imam gāthamāha96. "Santaṁ tassa manaṁ hoti, santā vācā ca kamma ca. Sammadaññā vimuttassa, upasantassa tādino"ti.

Tattha santam tassāti tassa khīṇāsavasāmaṇerassa abhijjhādīnam abhāvena manam santameva hoti upasantam nibbutam. Tathā musāvādādīnam abhāvena vācā ca pāṇātipātādīnam abhāvena kāyakammañca santameva hoti. Sammadaññā vimuttassāti nayena hetunā jānitvā pañcahi vimuttīhi vimuttassa. Upasantassāti abbhantare rāgādīnam upasamena upasantassa. Tādinoti tathārūpassa guṇasampannassāti.

Desanāvasāne Kosambivāsītissatthero saha paṭisambhidāhi arahattam pāpuṇi, sesamahājanassāpi sātthikā dhammadesanā ahosīti.

Kosambivāsītissattherasāmaņeravatthu sattamam.

## 8. Sāriputtattheravatthu

**Assaddho**ti imam dhammadesanam Satthā Jetavane viharanto Sāriputtattheram ārabbha kathesi.

Ekasmim hi samaye timsamattā āraññakā bhikkhū Satthu santikam āgantvā¹ vanditvā nisīdimsu. Satthā tesam saha paṭisambhidāhi arahattassūpanissayam disvā Sāriputtattheram āmantetvā "saddahasi tvam Sāriputta, saddhindriyam bhāvitam bahulīkatam amatogadham hoti amatapariyosānan"ti² evam pañcindriyāni ārabbha pañham pucchi. Thero "na khvāham bhante ettha Bhagavato saddhāya gacchāmi, saddhindriyam -pa- amatapariyosānam. Yesam hetam bhante aññātam assa adiṭṭham aviditam asacchikatam aphassitam paññāya, te tattha paresam saddhāya gaccheyyum. Saddhindriyam -pa- amatapariyosānan"ti evam tam pañham byākāsi. Tam sutvā bhikkhū katham samuṭṭhāpesum "Sāriputtatthero micchāgahaṇam neva³ vissajjesi, ajjāpi Sammāsambuddhassa na saddahatiyevā"ti. Tam sutvā Satthā "kim nāmetam bhikkhave vadetha. Aham hi 'pañcindriyāni abhāvetvā samathavipassanam

avaḍḍhetvā maggaphalāni sacchikātuṁ samattho nāma atthīti saddahasi tvaṁ Sāriputtā'ti pucchiṁ. So 'evaṁ sacchikaronto atthi nāmāti na saddahāmi bhante'ti kathesi. Na dinnassa vā katassa vā phalaṁ vipākaṁ na saddahati, nāpi Buddhādīnaṁ guṇaṁ na saddahati. Eso pana attanā paṭividdhesu jhānavipassanāmaggaphaladhammesu paresaṁ saddhāya na gacchati. Tasmā anupavajjo''ti vatvā anusandhiṁ ghaṭetvā dhammaṁ desento imaṁ gāthamāha—

97. "Assaddho akataññū ca, sandhicchedo ca yo naro, Hatāvakāso vantāso, sa ve uttamaporiso"ti.

Tassattho—attano paṭividdhaguṇaṁ paresaṁ kathāya na saddahatīti assaddho. Akataṁ nibbānaṁ jānātīti akataññū, sacchikatanibbānoti attho. Vaṭṭasandhiṁ saṁsārasandhiṁ chinditvā ṭhitoti sandhicchedo. Kusalākusalakammabījassa khīṇattā nibbattanāvakāso hato assāti hatāvakāso. Catūhi maggehi kattabbakiccassa katattā sabbā āsā iminā vantāti vantāso. So evarūpo naro. Paṭividdhalokuttaradhammatāya purisesu uttamabhāvaṁ pattoti purisuttamoti.

Gāthāvasāne te āraññakā timsamattā bhikkhū saha paṭisambhidāhi arahattam pāpuṇimsu, sesajanassāpi satthikā dhammadesanā ahosīti.

Sāriputtattheravatthu aṭṭhamam.

# 9. Khadiravaniyarevatattheravatthu

**Gāme vā**ti imam dhammadesanam Satthā Jetavane viharanto Khadiravaniyarevatattheram ārabbha kathesi.

Āyasmā hi Sāriputto sattāsītikoṭidhanaṁ pahāya pabbajitvā Cālā Upacālā Sīsūpacālāti tisso bhaginiyo, Cundo Upasenoti ime dve ca bhātaro pabbājesi, Revatakumāro ekova gehe avasiṭṭho. Athassa mātā cintesi "mama putto Upatisso ettakaṁ dhanaṁ pahāya pabbajitvā Tisso ca bhaginiyo dve ca bhātaro pabbājesi, Revato ekova avaseso. Sace imampi pabbājessati,

ettakam no dhanam nassissati, kulavamso pacchijjissati, daharakaleyeva nam gharāvāsena bandhissāmī"ti. Sāriputtattheropi patikacceva bhikkhū ānāpesi "sace āvuso Revato pabbajitukāmo āgacchati, āgatamattameva nam pabbājeyyātha, mama mātāpitaro micchāditthikā, kim tehi āpucchitehi, ahameva tassa mātā ca pitā cā"ti. Mātāpissa Revatakumāram sattavassikameva gharabandhanena bandhitukāmā samānajātike kule dārikam vāretvā divasam vavatthapetvā kumāram mandetvā pasādhetvā mahatā parivārena saddhim ādāya kumārikāya ñātigharam agamāsi. Atha nesam katamangalānam dvinnampi natakesu sannipatitesu udakapātiyam hatthe otāretvā mangalāni vatvā kumārikāya vuddhim ākankhamānā ñātakā "tava ayyikāya ditthadhammam passa<sup>1</sup>, ayyikā viya ciram jīva ammā"ti āhamsu. Revatakumāro "ko nu kho imissā ayyikāya ditthadhammo"ti cintetvā "katarā imissā ayvikā"ti pucchi. Atha nam āhamsu "tāta kim na passasi imam vīsavassasatikam khandadantam palitakesam valittacam tilakāhatagattam gopānasivankam, esā etissā ayyikā"ti. Kim pana ayampi evarūpā bhavissatīti. Sace jīvissati, bhavissati tātāti. So cintesi "evarūpampi nāma sarīram jarāya imam vippakāram pāpunissati, idam me bhātarā Upatissena dittham bhavissati, ajjeva mayā palāyitvā pabbajitum vattatī"ti. Atha nam ñātakā kumārikāya saddhim ekayānam āropetvā ādāya pakkamimsu.

So thokam gantvā sarīrakiccam apadisitvā "ṭhapetha tāva yānam, otaritvā āgamissāmī"ti yānā otaritvā ekasmim gumbe thokam papañcam katvā agamāsi. Punapi thokam gantvā teneva apadesena otaritvā abhiruhi, punapi tatheva akāsi. Athassa ñātakā "addhā imassa uṭṭhānāni vattantī"ti sallakkhetvā nātidaļham ārakkham karimsu. So punapi thokam gantvā teneva apadesena otaritvā "tumhe pājento purato gacchatha, mayam pacchato saṇikam āgamissāmā"ti vatvā otaritvā gumbābhimukho ahosi. Ñātakāpissa "pacchato āgamissatī"ti saññāya yānam pājentā gamimsu.

Sopi tato palāyitvā ekasmim padese timsamattā bhikkhū vasanti, tesam santikam gantvā vanditvā āha "pabbājetha mam bhante"ti. Āvuso tvam sabbālankārapaṭimaṇḍito, mayam te rājaputtabhāvam vā amaccaputtabhāvam vā na jānāma, katham pabbājessāmāti. Tumhe mam bhante na jānāthāti. Na jānāmavusoti. Aham Upatissassa kaniṭṭhabhātikoti. Ko esa Upatisso nāmāti. Bhante¹ bhaddantā mama bhātaram "Sāriputto"ti vadanti, tasmā mayā "Upatisso"ti vutte na jānantīti. Kim pana tvam Sāriputtattherassa kaniṭṭhabhātikoti. Āma bhanteti. "Tena hi ehi, bhātarā te anuññātamevā"ti vatvā bhikkhū tassa ābharaṇāni omuñcāpetvā ekamantam ṭhapāpetvā tam pabbājetvā therassa sāsanam pahiṇimsu. Thero tam sutvā Bhagavato ārocesi "bhante 'āraññikabhikkhūhi kira Revato pabbājito'ti sāsanam pahiṇimsu, gantvā tam passitvā āgamissāmī"ti. Satthā "adhivāsehi tāva Sāriputtā"ti gantum na adāsi. Thero puna katipāhaccayena Satthāram āpucchi. Satthā "adhivāsehi tāva Sāriputta, mayampi āgamissāmā"ti neva gantum adāsi.

Sāmaṇeropi "sacāhaṁ idha vasissāmi, ñātakā maṁ anubandhitvā pakkosissantī"ti tesaṁ bhikkhūnaṁ santike yāva arahattā kammaṭṭhānaṁ uggaṇhitvā pattacīvaramādāya cārikaṁ caramāno tato tiṁsayojanike ṭhāne Khadiravanaṁ gantvā antovasseyeva temāsabbhantare saha paṭisambhidāhi arahattaṁ pāpuṇi. Theropi pavāretvā Satthāraṁ puna tattha gamanatthāya āpucchi. Satthā "mayampi gamissāma Sāriputtā"ti pañcahi bhikkhusatehi saddhiṁ nikkhami. Thokaṁ gatakāle Ānandatthero dvedhāpathe ṭhatvā Satthāraṁ āha "bhante Revatassa santikaṁ gamanamaggesu ayaṁ parihārapatho saṭṭhiyojaniko manussāvāso, ayaṁ ujumaggo tiṁsayojaniko amanussapariggahito, katarena gacchāmā"ti. Sīvali pana Ānanda amhehi saddhiṁ āgatoti. Āma bhanteti. Sace Sīvali āgato, ujumaggameva gaṇhāhīti. Satthā kira "ahaṁ tumhākaṁ yāgubhattaṁ uppādessāmi, ujumaggaṁ gaṇhāhī"ti avatvā "tesaṁ tesaṁ janānaṁ puññassa vipākadānaṭṭhānaṁ etan"ti ñatvā "sace Sīvali āgato, ujumaggaṁ

gaṇhāhī"ti āha. Satthari pana taṁ maggaṁ paṭipanne devatā "amhākaṁ ayyassa Sīvalittherassa sakkāraṁ karissāmā"ti cintetvā ekekayojane vihāre kāretvā ekayojanato uddhaṁ gantuṁ adatvā pāto vuṭṭhāya dibbayāgu-ādīni gahetvā "ayyo no Sīvalitthero kahaṁ nisinno"ti vicaranti. Thero attano abhihaṭaṁ Buddhappamukhassa bhikkhusaṁghassa dāpesi. Evaṁ Satthā saparivāro tiṁsayojanikaṁ kantāraṁ Sīvalittherassa puññaṁ anubhavamānova agamāsi. Revatattheropi Satthu āgamanaṁ ñatvā Bhagavato Gandhakuṭiṁ māpetvā pañca kūṭāgārasatāni pañca caṅkamanasatāni pañcarattiṭṭhānadivāṭṭhānasatāni ca māpesi. Satthā tassa santike māsamattameva vasi, tasmiṁ vasamānopi Sīvalittherasseva puññaṁ anubhavi.

Tattha pana dve mahallakabhikkhū Satthu Khadiravanam pavisanakāle evam cintayimsu "ayam bhikkhu ettakam navakammam karonto kim sakkhissati samaṇadhammam kātum, Satthā 'Sāriputtassa kaniṭṭho'ti mukholokanakiccam karonto evarūpassa navakammikassa bhikkhussa santikam āgato''ti, Satthāpi tam divasam paccūsakāle lokam voloketvā te bhikkhū ditvā tesam cittācāram aññāsi, tasmā tattha māsamattam vasitvā nikkhamanadivase yathā te bhikkhū attano telanāļinca udakatumbanca upāhanāni ca pamussanti, tathā adhiṭṭhahitvā nikkhamanto vihārūpacārato bahi nikkhantakāle iddhim vissajjesi. Atha te bhikkhū "mayā idancidanca pamuṭṭham, mayāpi pamuṭṭham''ti ubhopi nivattitvā tam ṭhānam asallakkhetvā khadirarukkhakaṇṭakehi vijjhamānā vicaritvā ekasmim khadirarukkhe olambantam attano bhaṇḍakam disvā ādāya pakkamimsu. Satthāpi bhikkhusamgham ādāya puna māsamatteneva Sīvalittherassa puññam anubhavamāno patigantvā Pubbārāmam pāvisi.

Atha te mahallakabhikkhū pātova mukham dhovitvā "āgantukabhattadāyikāya Visākhāya gharam yāgum pivissāmā"ti gantvā yāgum pivitvā khajjakam khāditvā nisīdimsu. Atha ne Visākhā pucchi "tumhepi bhante Satthārā saddhim Revatattherassa vasanaṭṭhānam āgamitthā"ti. Āma upāsiketi, ramaṇīyam bhante therassa vasanaṭṭhānanti. Kuto tassa ramaṇīyatā, setakaṇṭakakhadirarukkhagahanam¹ petānam nivāsanaṭṭhānasadisam upāsiketi. Athaññe dve daharabhikkhū āgamimsu. Upāsikā tesampi yāgukhajjakam datvā tatheva

<sup>1.</sup> Kuto tassa tam ramanīyam, tāva suddhakam kantakakhadirarukkhagahanam (Ka)

paṭipucchi. Te āhaṁsu "na sakkā upāsike vaṇṇetuṁ, sudhammadevasabhāsadisaṁ iddhiyā abhisaṅkhataṁ viya therassa vasanaṭṭhānan"ti. Upāsikā cintesi "paṭhamaṁ āgatā bhikkhū aññathā vadiṁsu, ime aññathā vadanti, paṭhamaṁ āgatā bhikkhū kiñcideva pamussitvā iddhiyā vissaṭṭhakāle paṭinivattitvā gatā bhavissanti, ime pana iddhiyā abhisaṅkharitvā nimmitakāle gatā bhavissantī"ti attano paṇḍitabhāvena etamatthaṁ ñatvā "Satthāraṁ¹ āgatakāle pucchissāmī"ti aṭṭhāsi. Tato muhuttaṁyeva² Satthā bhikkhusaṁghaparivuto Visākhāya gehaṁ gantvā paññattāsane nisīdi. Sā Buddhappamukhaṁ bhikkhusaṁghaṁ sakkaccaṁ parivisitvā bhattakiccāvasāne Satthāraṁ vanditvā paṭipucchi "bhante tumhehi saddhiṁ gatabhikkhūsu ekacce Revatattherassa vasanaṭṭhānaṁ 'khadiragahanaṁ araññan'ti vadanti, ekacce 'ramaṇīyan'ti, kiṁ nu kho etan"ti. Taṁ sutvā Satthā "upāsike gāmo vā hotu araññaṁ vā, yasmiṁ ṭhāne arahanto viharanti, taṁ ramaṇīyamevā"ti vatvā anusandhiṁ ghaṭetvā dhammaṁ desento imaṁ gāthamāha—

98. "Gāme vā yadi vāraññe, ninne vā yadi vā thale. Yattha arahanto viharanti, tam bhūmirāmaņeyyakan"ti.

Tattha kiñcāpi arahanto gāmante kāyavivekam na labhanti, cittavivekam pana labhanteva. Tesañhi dibbapaṭibhāgānipi ārammaṇāni cittam cāletum na sakkonti. Tasmā gāmo vā hotu araññādīnam vā aññataram, yattha arahanto viharanti, tam bhūmirāmaneyyakanti so bhūmipadeso ramaṇīyo evāti attho.

Desanāvasāne bahū sotāpattiphalādīni pāpuņimsūti.

Aparena samayena bhikkhū kathaṁ samuṭṭhāpesuṁ "āvuso kena nu kho kāraṇena āyasmā Sīvalitthero sattadivasasattamāsādhikāni satta vassāni mātu kucchiyaṁ vasi, kena niraye pacci, kena nissandena lābhaggayasaggappatto jāto"ti. Satthā taṁ kathaṁ sutvā "bhikkhave kiṁ kathethā"ti pucchitvā "bhante idaṁ nāmā"ti vutte tassāyasmato pubbakammaṁ kathento āha—

Bhikkhave ito ekanavutikappe Vipassī Bhagavā loke uppajjitvā ekasmim samaye janapadacārikam caritvā pitu nagaram paccāgamāsi. Rājā Buddhappamukhassa bhikkhusamghassa āgantukadānam sajjetvā nāgarānam sāsanam pesesi "āgantvā mayham dāne sahāyakā hontū"ti. Te tathā katvā "raññā dinnadānato atirekataram dassāmā" ti Satthāram nimantetvā punadivase dānam pativādetvā rañno sāsanam pahinimsu. Rājā āgantvā tesam dānam disvā "ito adhikataram dassāmī"ti punadivasatthāya Satthāram nimantesi. Neva rājā nāgare parājetum sakkhi, na nāgarā rājānam. Nāgarā chatthe vāre "sve dāni yathā 'imasmim dāne idam nāma natthī'ti na sakkā hoti vattum, evam danam dassama"ti cintetva punadivase danam patiyadetva "kim nu kho ettha natthī"ti olokentā allamadhumeva na addasamsu. Pakkamadhu pana bahum atthi. Te allamadhassatthāva catūsu nagaradvāresu cattāri kahāpanasahassāni gāhāpetvā pahinimsu. Atheko janapadamanusso gāmabhojakam passitum āgacchanto antarāmagge madhupatalam disvā makkhikā palāpetvā sākham chinditvā sākhādandakeneva saddhim madhupatalam ādāya "gāmabhojakassa dassāmī"ti nagaram pāvisi. Madhuatthāya gato tam disvā "ambho vikkiniyam madhun"ti pucchi. Na vikkiniyam sāmīti. Handa imam kahāpanam gahetvā dehīti. So cintesi "imam madhupatalam pādamattampi na agghati, ayam pana kahāpanam deti." Bahukahāpanako maññe, mayā vaddhetum vattatī"ti. Atha nam "na demī"ti āha, tena hi dve kahāpaņe ganhāhīti. Dvīhipi na demīti. Evam tāva vaddhesi, yāva so "tena hi idam sahassam ganhāhī"ti bhandikam upanesi.

Atha naṁ so āha "kiṁ nu kho tvaṁ ummattako, udāhu kahāpaṇānaṁ ṭhapanokāsaṁ na labhasi, pādampi na agghanakaṁ madhuṁ 'sahassaṁ gahetvā dehī'ti vadasi, kiṁ nāmetan"ti. Jānāmahaṁ bho, iminā pana me kammaṁ atthi, tenevaṁ vadāmīti. Kiṁ kammaṁ sāmīti. Amhehi Vipassībuddhassa aṭṭhasaṭṭhisamaṇasahassaparivārassa mahādānaṁ sajjitaṁ, tatrekaṁ allamadhumeva natthi, tasmā evaṁ gaṇhāmīti. Evaṁ sante nāhaṁ mūlena dassāmi, sace ahampi dāne pattiṁ labhissāmi, dassāmīti. So gantvā nāgarānaṁ tamatthaṁ ārocesi. Nāgarā tassa saddhāya balavabhāvaṁ ñatvā "sādhu¹, pattiko

hotū"ti paṭijānimsu, te Buddhappamukham bhikkhusamgham nisīdāpetvā yāgukhajjakam datvā mahatim suvaṇṇapātim āharāpetvā madhupaṭalam pīļāpesum. Teneva manussena paṇṇākāratthāya dadhivārakopi āhaṭo atthi, so tampi dadhim pātiyam ākiritvā tena madhunā samsanditvā¹ Buddhappamukhassa bhikkhusamghassa ādito paṭṭhāya adāsi. Tam yāvadattham gaṇhantānam sabbesam pāpuṇi, uttarimpi avasiṭṭham ahosiyeva. "Evam thokam madhu katham tāva bahūnam pāpuṇī"ti na cintetabbam. Tañhi Buddhānubhāvena pāpuṇi, Buddhavisayo na cintetabbo. Cattāri hi "acinteyyānī"ti² vuttāni. Tāni cintento ummādasseva bhāgī hotīti. So puriso ettakam kammam katvā āyupariyosāne devaloke nibbattitvā ettakam kālam samsaranto ekasmim samaye devalokā cavitvā Bārāṇasiyam rājakule nibbatto pitu accayena rajjam pāpuṇi. So "ekam nagaram gaṇhissāmī"ti gantvā parivāresi, nāgarānañca sāsanam pahiṇi "rajjam vā me dentu yuddham vā"ti. Te "neva rajjam dassāma, na yuddhan"ti vatvā cūļadvārehi nikkhamitvā dārūdakādīni āharanti, sabbakiccāni karonti.

Itaropi cattāri mahādvārāni rakkhanto sattamāsādhikāni satta vassāni nagaram uparundhi. Athassa mātā "kim me putto karotī"ti pucchitvā "idam nāma devī"ti tam pavattim sutvā "bālo mama putto, gacchatha, tassa 'cūļadvārānipi pidhāya nagaram uparundhatū'ti vadethā"ti. So mātu sāsanam sutvā tathā akāsi. Nāgarāpi bahi nikkhamitum alabhantā sattame divase attano rājānam māretvā tassa rajjam adamsu. So imam kammam katvā āyupariyosāne Avīcimhi nibbattitvā yāvāyam pathavī yojanamattam ussannā, tāya niraye paccitvā catunnam cūļadvārānam pidahitattā tato cuto tassā eva mātu kucchismim paṭisandhim gahetvā sattamāsādhikāni satta vassāni antokucchismim vasitvā satta divasāni yonimukhe tiriyam nipajji. Evam bhikkhave Sīvali tadā nagaram uparundhitvā gahitakammena ettakam kālam niraye paccitvā catunnam cūļadvārānam pidahitattā tato cuto tassā eva mātu kucchiyam paṭisandhim gahetvā ettakam kālam kucchiyam vasi. Navamadhuno dinnattā lābhaggayasaggappatto jātoti.

Punekadivasam bhikkhū katham samuṭṭhāpesum "aho sāmaṇerassa lābho, aho puññam, yena ekakena pañcannam bhikkhusatānam pañcakūṭāgārasatādīni katānī"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave mayham puttassa neva puññam atthi, na pāpam, ubhayamassa pahīnan"ti vatvā Brāhmaṇavagge imam gāthamāha—

"Yodha puññañca pāpañca, ubho saṅga'mupaccagā. Asokaṁ virajaṁ suddhaṁ, tamahaṁ brūmi brāhmanan"ti¹.

Khadiravaniyarevatattheravatthu navamam.

#### 10. Aññatara-itthivatthu

Ramaṇīyānīti imam dhammadesanam Satthā Jetavane viharanto aññataram itthim ārabbha kathesi.

Eko kira piṇḍapātiko bhikkhu Satthu santike kammaṭṭhānaṁ gahetvā ekaṁ jiṇṇa-uyyānaṁ pavisitvā samaṇadhammaṁ karoti. Ekā nagarasobhinī itthī purisena saddhiṁ "ahaṁ asukaṭṭhānaṁ nāma gamissāmi, tvaṁ tattha āgaccheyyāsī"ti saṅketaṁ katvā agamāsi, so puriso nāgacchi. Sā tassa āgamanamaggaṁ olokentī taṁ adisvā ukkaṇṭhitvā ito cito ca vicaramānā taṁ uyyānaṁ pavisitvā theraṁ pallaṅkaṁ ābhujitvā nisinnaṁ disvā ito cito ca olokayamānā aññaṁ kañci adisvā "ayañca puriso eva, imassa cittaṁ pamohessāmī"ti tassa purato ṭhatvā punappunaṁ nivatthasāṭakaṁ mocetvā nivāseti, kese muñcitvā bandhati, pāṇiṁ paharitvā hasati. Therassa saṁvego uppajjitvā sakalasarīraṁ phari. So "kiṁ nu kho idan"ti cintesi. Satthāpi "mama santike kammaṭṭhānaṁ gahetvā "samaṇadhammaṁ karissāmī"ti gatassa bhikkhuno kā nu kho pavattī"ti upadhārento taṁ itthiṁ disvā tassā anācārakiriyaṁ, therassa ca saṁveguppattiṁ ñatvā Gandhakuṭiyaṁ nisinnova tena saddhiṁ kathesi "bhikkhu kāmagavesakānaṁ aramanatthānameva vītarāgānaṁ ramanatthānaṁ

hotī"ti. Evañca pana vatvā obhāsam pharitvā tassa dhammam desento imam gāthamāha—

99. "Ramaṇīyāni araññāni, yattha na ramatī jano. Vītarāgā ramissanti, na te kāmagavesino"ti.

Tattha araññānīti supupphitataruvanasaṇḍapaṭimaṇḍitāni vimalasalilasampannāni araññāni nāma ramaṇīyāni. Yatthāti yesu araññesu vikasitesu padumavanesu gāmamakkhikā viya kāmagavesako jano na ramati. Vītarāgāti vigatarāgā pana khīṇāsavā nāma bhamaramadhukarā viya padumavanesu tathārūpesu araññesu ramissanti. Kiṁ kāraṇā? Na te kāmagavesino, yasmā te kāmagavesino na hontīti attho.

Desanāvasāne so thero yathānisinnova saha paṭisambhidāhi arahattam pāpuṇitvā ākāsenāgantvā thutim karonto Tathāgatassa pāde vanditvā agamāsīti.

Aññatara-itthivatthu dasamam.

# Arahantavaggavannanā niţţhitā.

Sattamo vaggo.

# 8. Sahassavagga

### 1. Tambadāthikacoraghātakavatthu

Sahassamapi ce vācāti imam dhammadesanam Satthā Veļuvane viharanto Tambadāthikacoraghātakam ārabbha kathesi.

Ekūnapañcasatā kira corā gāmaghātakādīni karontā jīvikam kappesum. Atheko puriso nibbiddhapingalo Tambadāthiko tesam santikam gantvā "ahampi tumhehi saddhim jīvissāmī"ti āha. Atha nam corajetthakassa dassetvā "ayampi amhākam santike vasitum icchatī"ti āhamsu. Atha nam corajetthako oloketvā "ayam mātu thanam chinditvā pitu vā galalohitam nīharitvā khādanasamattho atikakkhalo"ti cintetvā "natthetassa amhākam santike vasanakiccan"ti patikkhipi. So evam patikkhittopi agantva ekam tasseva antevāsikam upatthahanto ārādhesi. So tam ādāya corajetthakam upasankamitvā "sāmi bhaddako esa, amhākam upakārako, sanganhatha nan"ti yācitvā corajetthakam paticchāpesi. Athekadivasam nāgarā rājapurisehi saddhim ekato hutvā te core gahetvā vinicchayamahāmaccānam santikam nayimsu. Amaccā tesam pharasunā sīsacchedam ānāpesum. Tato "ko nu kho ime māressatī"ti pariyesantā te māretum icchantam kañci adisvā corajetthakam āhamsu "tvam ime māretvā jīvitanceva labhissasi sammānañca, mārehi ne"ti. Sopi attānam nissāya vasitattā te māretum na icchi. Etenūpāyena ekūnapañcasate pucchimsu, sabbepi na icchimsu. Sabbapacchā tam nibbiddhapingalam Tambadāthikam pucchimsu. So "sādhū"ti sampaticchitvā te sabbepi māretvā jīvitañceva sammānañca labhi. Etenūpāyena nagarassa dakkhinatopi pañca corasatāni ānetvā amaccānam dassetvā tehi tesampi sīsacchede ānatte corajetthakam ādim katvā pucchantā kañci māretum icchantam adisvā "purimadivase eko puriso pañcasate core māresi, kaham nu kho so"ti. "Asukatthāne amhehi dittho"ti vutte tam pakkosāpetvā "ime mārehi, sammānam lacchasī"ti ānāpesum. So "sādhū"ti sampaticchitvā te sabbepi māretvā sammānam labhi. Atha nam "bhaddako

ayam puriso, nibaddham coraghātakameva etam karissāmā"ti mantetvā tassa tam ṭhānantaram datvāva sammānam karimsu. So pacchimadisatopi uttaradisatopi ānīte pañcasate pañcasate core ghātesiyeva. Evam catūhi disāhi ānītāni dve sahassāni māretvā tato paṭṭhāya devasikam ekam dveti ānīte te manusse māretvā pañcapaṇṇāsa samvaccharāni coraghātakakammam akāsi.

So mahallakakāle ekappahāreneva sīsam chinnitum na sakkoti, dve tayo vāre paharanto manusse kilameti. Nāgarā cintavimsu "aññopi coraghātako uppajjissati, ayam ativiya manusse kilameti, kim imina"ti tassa tam thānantaram harimsu. So pubbe coraghātakakammam karonto "ahatasātake nivāsetum, navasappinā sankhatam khīrayāgum pivitum, sumanapupphāni pilandhitum, gandhe vilimpitun"ti imāni cattāri na labhi. So ṭhānā cāvitadivase "khīrayāgum me pacathā" ti vatvā ahatavatthasumanamālāvilepanāni gāhāpetvā nadim gantvā nhatvā ahatavatthāni nivāsetvā mālā pilandhitvā gandhehi anulittagatto geham āgantvā nisīdi. Athassa navasappinā sankhatam khīrayāgum purato thapetvā hatthadhovanodakam āharimsu. Tasmim khane Sāriputtatthero samāpattito vutthāya "kattha nu kho ajja mayā gantabban"ti attano bhikkhācāram olokento tassa gehe khīrayāgum disvā "karissati nu kho me puriso sangahan"ti upadhārento "mam disvā mama sangaham karissati, karitvā ca pana mahāsampattim labhissati ayam kulaputto"ti ñatvā cīvaram pārupitvā pattam ādāya tassa gehadvāre thitameva attānam dassesi.

So theram disvā pasannacitto cintesi "mayā ciram coraghātakakammam katam, bahū manussā māritā, idāni me gehe khīrayāgu paṭiyattā, thero āgantvā mama gehadvāre ṭhito, idāni mayā ayyassa deyyadhammam dātum vaṭṭatī"ti purato ṭhapitayāgum apanetvā theram upasankamitvā vanditvā antogehe nisīdāpetvā patte khīrayāgum ākiritvā navasappim āsiñcitvā theram bījamāno aṭṭhāsi. Athassa ca dīgharattam aladdhapubbatāya khīrayāgum pātum balava-ajjhāsayo ahosi. Thero tassa ajjhāsayam ñatvā "tvam upāsaka attano yāgum

pivā"ti āha. So aññassa hatthe bījanim datvā yāgum pivi. Thero bījamānam purisam "gaccha, upāsakameva bījāhī"ti¹ āha. So bījiyamāno kucchipūram yāgum pivitvā āgantvā theram bījamāno ṭhatvā katāhārakiccassa therassa pattam aggahesi. Thero tassa anumodanam ārabhi. So attano cittam therassa dhammadesanānugam² kātum nāsakkhi. Thero sallakkhetvā "upāsaka kasmā cittam desanānugam kātum na sakkosī"ti pucchi. Bhante mayā dīgharattam kakkhaļakammam katam, bahū manussā māritā, tamaham attano kammam anussaranto cittam ayyassa desanānugam kātum nāsakkhinti. Thero "vañcessāmi nan"ti cintetvā kim pana tvam attano ruciyā akāsi, aññehi kāritosīti. Rājā mam kāresi bhanteti. Kim nu kho te upāsaka evam sante akusalam hotīti. Mandadhātuko³ upāsako therenevam vutte⁴ "natthi mayham akusalan"ti saññī hutvā tena hi bhante dhammam kathethāti. So there anumodanam karonte ekaggacitto hutvā dhammam suṇanto sotāpattimaggassa orato anulomikam khantim nibbattesi. Theropi anumodanam katvā pakkāmi.

Upāsakam theram anugantvā nivattamānam ekā yakkhinī dhenuvesena āgantvā ure paharitvā māresi. So kālam katvā Tusitapure nibbatti. Bhikkhū dhammasabhāyam katham samuṭṭhāpesum "coraghātako pañcapaṇṇāsa vassāni kakkhaļakammam katvā ajjeva tato mutto, ajjeva therassa bhikkham datvā ajjeva kālam kato, kaham nu kho nibbatto"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave Tusitapure nibbatto"ti āha. Kim bhante vadetha, ettakam kālam ettake manusse ghātetvā Tusitavimāne nibbattoti. "Āma bhikkhave, mahanto tena kalyāṇamitto laddho, so Sāriputtassa dhammadesanam sutvā anulomañāṇam nibbattetvā ito cuto Tusitavimāne nibbatto"ti vatvā imam gāthamāha—

"Subhāsitam suņitvāna, nagare coraghātako. Anulomakhantim laddhāna, modatī tidivam gato"ti.

<sup>1.</sup> Gaccha tvam upāsaka, mā me bījāhīti (Ka)

<sup>2.</sup> Dhammadesanānugatam (Syā), dhammadesanānuyogam (Ka)

<sup>3.</sup> Muddhadhātuko (Sī)

Bhante anumodanakathā nāma na balavā, tena kataṁ akusalakammaṁ mahantaṁ, kathaṁ ettakena visesaṁ nibbattesīti. Satthā "kiṁ bhikkhave 'mayā desitadhammassa appaṁ vā bahuṁ vā'ti mā pamāṇaṁ gaṇhatha. Ekavācāpi hi atthanissitā seyyāvā"ti vatvā anusandhiṁ ghaṭetvā dhammaṁ desento imaṁ gāthamāha—

100. "Sahassamapi ce vācā, anatthapadasamhitā. Ekam atthapadam seyyo, yam sutvā upasammatī"ti.

Tattha sahassamapīti paricchedavacanam, ekam sahassam dve sahassānīti evam sahassena cepi¹ paricchinnavācā honti, tā ca pana anatthapadasamhitā ākāsavaṇṇanāpabbatavaṇṇanāvanavaṇṇanādīni pakāsakehi aniyyānadīpakehi anatthakehi padehi samhitā yāva bahukā hoti, tāva pāpikā evāti attho. Ekam atthapadanti yam pana "ayam kāyo, ayam kāyagatāsati, tisso vijjā anuppatto, katam Buddhassa sāsanan"ti evarūpam ekam atthapadam sutvā rāgādivūpasamena upasammati, tam atthasādhakam nibbānappaṭisamyuttam khandhadhātu-āyatana-indriyabalabojjhangasatipaṭṭhānaparidīpakam ekampi padam seyyoyevāti attho.

Desanāvasāne bahū sotāpattiphalādīni pāpuņimsūti.

Tambadāṭhikacoraghātakavatthu paṭhamam.

# 2. Bāhiyadārucīriyattheravatthu

**Sahassamapi ce gāthā**ti imam dhammadesanam Satthā Jetavane viharanto Dārucīriyattheram ārabbha kathesi.

Ekasmim hi kāle bahū manussā nāvāya mahāsamuddam pakkhanditvā antomahāsamudde bhinnāya nāvāya macchakacchapabhakkhā ahesum. Ekovettha<sup>2</sup> ekam phalakam gahetvā vāyamanto suppārakapaṭṭanatīram okkami, tassa nivāsanapārupanam natthi. So aññam kiñci apassanto sukkhakaṭṭhadaṇḍake vākehi paliveṭhetvā nivāsanapārupanam katvā devakulato

kapālam gahetvā suppārakapaṭṭanam agamāsi. Manussā tam disvā yāgubhattādīni datvā "ayam eko arahā"ti sambhāvesum. So vatthesu upanītesu "sacāham nivāsessāmi vā pārupissāmi vā, lābhasakkāro me parihāyissatī"ti tāni vatthāni paṭikkhipitvā dārucīrāneva paridahi¹. Athassa bahūhi "arahā arahā"ti vuccamānassa evam cetaso parivitakko udapādi "ye kho keci loke arahanto vā arahattamaggam vā samāpannā, aham tesam aññataro"ti. Athassa purānasālohitā devatā evam cintesi.

Purānasālohitāti pubbe ekato katasamanadhammā. Pubbe kira Kassapadasabalassa sāsane osakkamāne sāmaņerādīnam vippakāram disvā satta bhikkhū samvegappattā "yāva sāsanassa antaradhānam na hoti, tāva attano patittham karissāmā"ti suvannacetiyam vanditvā araññam pavitthā ekam pabbatam disvā "jīvite sālayā nivattantu, nirālayā imam pabbatam abhiruhantū"ti vatvā nissenim bandhitvā sabbepi tam abhiruyha nissenim pātetvā samanadhammam karimsu. Tesu samghatthero ekarattātikkameneva arahattam pāpuni. So Anotattadahe nāgalatādantakattham khāditvā Uttarakuruto pindapātam āharitvā te bhikkhū āha "āvuso imam dantakattham khāditvā mukham dhovitvā imam pindapātam paribhuñjathā"ti. Kim pana bhante amhehi evam katikā katā "yo pathamam arahattam pāpunāti, tenābhatam pindapātam avasesā paribhuñjissantī"ti. No hetam āvusoti. "Tena hi sace mayampi tumhe viya visesam nibbattessāma, sayam āharitvā paribhuñjissāmā"ti na icchimsu. Dutiyadiyase dutiyatthero anāgāmiphalam pāpuni. Sopi tatheva pindapātam āharitvā itare nimantesi. Te evamāhamsu "kim pana bhante amhehi evam katikā katā 'mahātherena ābhatam pindapātam abhunjitvā anutherena ābhatam bhunjissāmā'ti". No hetam āvusoti. "Evam sante tumhe viya mayampi visesam nibbattetvā attano purisakārena bhuñjitum sakkontā bhuñjissāmā"ti na icchimsu. Tesu arahattam patto bhikkhu parinibbāyi, anāgāmī brahmaloke nibbatti. Itare pañca therā visesam nibbattetum asakkontā sussitvā sattame divase kālam

katvā devaloke nibbattitvā imasmim Buddhuppāde tato cavitvā tattha tattha kulagharesu nibbattimsu. Tesu eko **Pukkusāti rājā**<sup>1</sup> ahosi, eko **Kumārakassapo**<sup>2</sup>, eko **Dārucīriyo**<sup>3</sup>, eko **Dabbo Mallaputto**<sup>4</sup>, eko **Sabhiyo paribbājakot**i<sup>5</sup>. Tattha yo brahmaloke nibbatto bhikkhu, tam sandhāyetam vuttam "purānasālohitā devatā"ti.

Tassa hi brahmuno etadahosi "ayam mayā saddhim nissenim bandhitvā pabbatam abhiruhitvā samaṇadhammam akāsi, idāni imam laddhim gahetvā vicaranto vinasseyya, samvejessāmi nan"ti. Atha nam upasankamitvā evamāha "neva kho tvam Bāhiya arahā, napi arahattamaggam vā samāpanno, sāpi te paṭipadā natthi, yāya tvam arahā vā assa arahattamaggam vā samāpanno"ti. Bāhiyo ākāse ṭhatvā kathentam mahābrahmānam oloketvā cintesi "aho bhāriyam kammam katam, aham 'arahantomhī'ti cintesim, ayanca mam 'na tvam arahā, napi arahattamaggam vā samāpannosī'ti vadati, atthi nu kho loke añno arahā'ti. Atha nam pucchi "atthi nu kho etarahi devate loke arahā vā arahattamaggam vā samāpanno'ti. Athassa devatā ācikkhi "atthi Bāhiya uttaresu janapadesu Sāvatthi nāma nagaram, tattha so Bhagavā etarahi viharati Araham Sammāsambuddho. So hi Bāhiya Bhagavā arahā ceva arahattatthāya ca dhammam desetī'ti.

Bāhiyo rattibhāge devatāya kathaṁ sutvā saṁviggamānaso taṁ khaṇaṁyeva suppārakā nikkhamitvā ekarattivāsena<sup>6</sup> Sāvatthiṁ agamāsi, sabbaṁ vīsayojanasatikaṁ maggaṁ ekarattivāseneva agamāsi. Gacchanto ca pana devatānubhāvena gato. "Buddhānubhāvenā"tipi vadantiyeva. Tasmiṁ pana khaṇe Satthā Sāvatthiṁ piṇḍāya paviṭṭho hoti. So bhuttapātarāse kāyaālasiyavimocanatthaṁ abbhokāse caṅkamante sambahule bhikkhū "kahaṁ etarahi satthā"ti pucchi. Bhikkhū "Bhagavā Sāvatthiṁ piṇḍāya paviṭṭho"ti vatvā taṁ pucchiṁsu "tvaṁ pana

<sup>1.</sup> Ma 3. 281 pitthe.

<sup>2.</sup> Ma 1. 195 pitthe.

<sup>3.</sup> Khu 1. 84 pitthe.

<sup>4.</sup> Vi 1. 243; Khu 1. 191 piṭṭhesu.

<sup>5.</sup> Khu 1. 355 pitthe Suttanipāte.

<sup>6.</sup> Nikkhamitvā sabbattha ekarattivāsena (Ka)

kuto āgatosī"ti suppārakā āgatomhīti. Kadā nikkhantosīti. Hiyyo sāyam nikkhantomhīti. Dūratosi āgato, nisīda, tava pāde dhovitvā telena makkhetvā thokam vissamāhi, āgatakāle Satthāram dakkhissasīti. Aham bhante Satthu vā attano vā jīvitantarāyam na jānāmi, ekarattenevamhi katthaci aṭṭhatvā anisīditvā vīsayojanasatikam maggam āgato, Satthāram passitvāva vissamissāmīti. So evam vatvā taramānarūpo Sāvatthim pavisitvā Bhagavantam anopamāya Buddhasiriyā piṇḍāya carantam disvā "cirassam vata me Gotamo Sammāsambuddho diṭṭho"ti diṭṭhaṭṭhānato paṭṭhāya onatasarīro gantvā antaravīthiyameva pañcapatiṭṭhitena vanditvā gopphakesu daļham gahetvā evamāha "desetu me bhante Bhagavā dhammam, desetu Sugato dhammam, yam mamassa dīgharattam hitāya sukhāyā"ti. Atha nam Satthā "akālo kho tāva Bāhiya, antaragharam¹ paviṭṭhamhā piṇḍāyā"ti paṭikkhipi.

Tam sutvā Bāhiyo bhante samsāre samsarantena kabaļīkārāhāro na aladdhapubbo, tumhākam vā mayham vā jīvitantarāyam na jānāmi, desetu me dhammanti. Satthā dutiyampi paṭikkhipiyeva. Evam kirassa ahosi "imassa mam diṭṭhakālato paṭṭhāya sakalasarīram pītiyā nirantaram ajjhotthaṭam hoti, balavapītivego dhammam sutvāpi na sakkhissati paṭivijjhitum, majjhattupekkhāya tāva tiṭṭhatu, ekaratteneva vīsayojanasatikam maggam āgatattā darathopissa balavā, sopi tāva paṭippassambhatū"ti. Tasmā dvikkhattum paṭikkhipitvā tatiyam yācito antaravīthiyam ṭhitova "tasmātiha te Bāhiya evam sikkhitabbam 'diṭṭhe diṭṭhamattam bhavissatī'ti" ādinā² nayena dhammam desesi. So Satthu dhammam suṇantoyeva sabbāsave khepetvā saha paṭisambhidāhi arahattam pāpuṇi. Tāvadeva ca pana Bhagavantam pabbajjam yāci "paripuṇṇam te pattacīvaranti" puṭṭho "na paripuṇṇam"ti āha. Atha nam Satthā "tena hi pattacīvaram pariyesāhī"ti vatvā pakkāmi.

"So kira vīsati vassasahassāni samaņadhammam karonto 'bhikkhunā nāma attanā paccaye labhitvā aññam anoloketvā sayameva paribhuñjitum vaṭṭatī'ti ekabhikkhussāpi pattena vā cīvarena vā saṅgaham na

akāsi, tenassa iddhimayapattacīvaram na uppajjissatī"ti ñatvā ehibhikkhubhāvena pabbajjam na adāsi. Tampi pattacīvaram pariyesamānameva ekā yakkhinī dhenurūpena āgantvā uramhi<sup>1</sup> paharitvā jīvitakkhayam pāpesi. Satthā pindāya caritvā katabhattakicco sambahulehi bhikkhūhi saddhim nikkhanto Bāhiyassa sarīram sankāratthāne patitam disvā bhikkhū ānāpesi "bhikkhave ekasmim gehadvāre thatvā mañcakam āharāpetvā imam sarīram nagarato nīharitvā jhāpetvā thūpam karothā"ti. Bhikkhū tathā karimsu, katvā ca pana vihāram gantvā Satthāram upasankamityā attanā katakiccam ārocetyā tassa abhisamparāyam pucchimsu. Atha nesam Bhagavā tassa parinibbutabhāvam ācikkhitvā "etadaggam bhikkhave mama savakanam bhikkhunam khippabhiññanam vadidam Bāhiyo dārucīriyo"ti<sup>2</sup> etadagge thapesi. Atha nam bhikkhū pucchimsu "bhante tumhe 'Bāhiyo arahattam patto'ti vadetha, kadā so arahattam patto"ti. Mama dhammam sutakāle bhikkhaveti, kadā panassa bhante tumhehi dhammo kathitoti. Pindaya carantena antaravīthiyam thatvāti. Appamattako hi bhante tumhehi antaravīthiyam thatvā kathitadhammo katham so tāvattakena visesam nibbattesīti, atha ne Satthā "kim bhikkhave mama dhammam 'appam vā bahum vā'ti mā pamānam ganhatha. Anekānipi hi gāthāsahassāni anatthanissitāni na seyyo, atthanissitam pana ekampi gāthāpadam seyyo"ti vatvā anusandhim ghatetvā dhammam desento imam gathamaha—

101. "Sahassamapi ce gāthā, anatthapadasamhitā. Ekam gāthāpadam seyyo, yam sutvā upasammatī"ti.

Tattha **ekam gāthāpadam seyyoti** "appamādo amatapadam -pa- yathā matā"ti<sup>3</sup> evarūpā ekā gāthāpi seyyoti attho. Sesam purimanayeneva veditabbam.

Desanāvasāne bahū sotāpattiphalādīni pāpuņimsūti.

Bāhiyadārucīriyattheravatthu dutiyam.

#### 3. Kundalakesittherīvatthu

Yo ca gāthāsataṁ bhāseti imaṁ dhammadesanaṁ Satthā Jetavane viharanto Kundalakesiṁ ārabbha katheti.

Rājagahe kira ekā setthidhītā solasavassuddesikā abhirūpā ahosi dassanīvā pāsādikā. Tasmim ca vaye thitā nāriyo purisajihāsayā honti purisalolā. Atha nam mātāpitaro sattabhūmikassa pāsādassa uparimatale sirigabbhe nivāsāpesum, ekamevassā dāsim paricārikam adamsu, athekam kulaputtam corakammam karontam gahetvā pacchābāham bandhitvā catukke catukke kasāhi paharitvā āghātanam nayimsu. Setthidhītā mahājanassa saddam sutvā "kim nu kho etan"ti pāsādatale thatvā olokentī tam disvā patibaddhacittā hutvā tam patthayamānā āhāram patikkhipitvā mañcake nipajji. Atha nam mātā pucchi "kim idam ammā"ti. Sace etam "coro"ti gahetvā niyyamānam purisam labhissāmi, jīvissāmi. No ce labhissāmi, jīvitam me natthi, idheva marissāmīti. Amma mā evam kari, amhākam jātiyā ca gottena ca bhogena ca sadisam aññam sāmikam labhissasīti. Mayham aññena kiccam natthi, imam alabhamānā marissāmīti. Mātā dhītaram saññāpetum asakkontī pituno ārocesi. Sopi nam saññāpetum asakkonto "kim sakkā kātun" ti cintetvā tam coram gahetvā gacchantassa rājapurisassa sahassabhandikam pesesi "imam gahetvā etam purisam mayham dehī"ti. So "sādhū"ti kahāpane gahetvā tam muñcitvā aññam māretvā "mārito deva coro"ti rañño ārocesi. Setthipi tassa dhītaram adāsi.

Sā tato paṭṭhāya "sāmikaṁ ārodhessāmī"ti sabbābharaṇapaṭimaṇḍitā sayameva tassa āgu-ādīnaṁ saṁvidahati, coro katipāhaccayena cintesi "kadā nu kho imaṁ māretvā etissā ābharaṇāni gahetvā ekasmiṁ surāgehe vikkiṇitvā khādituṁ labhissāmī"ti. So "attheko¹ upāyo"ti cintetvā āhāraṁ paṭikkhipitvā mañcake nipajji. Atha naṁ sā upasaṅkamitvā "kiṁ te sāmi rujjatī"ti pucchi. Na kiñci me bhaddeti. Kacci pana me mātāpitaro tuyhaṁ kuddhāti. Na kujjhanti

bhaddeti. Atha kim nāmetanti. "Bhadde aham tam divasam bandhitvā niyyamāno corapapāte adhivatthāya devatāya balikammam paṭissuṇitvā jīvitam labhim, tvampi mayā tassā eva ānubhāvena laddhā, tam me devatāya balikammam ṭhapitan"ti cintemi bhaddeti. Sāmi mā cintayi, karissāmi balikammam, vadehi, kenatthoti. Appodakamadhupāyasena ca lājapañcamakapupphehi cāti. "Sādhu sāmi, aham paṭiyādessāmī"ti sā sabbam balikammam paṭiyādetvā "ehi sāmi, gacchamā"ti āha. Tena hi bhadde tava ñātake nivattetvā mahagghāni vatthābharaṇāni gahetvā attānam alankarohi, hasantā kīļantā sukham gamissāmāti. Sā tathā akāsi.

Atha nam so pabbatapādam gatakāle āha "bhadde ito param ubho va janā gamissāma, sesajanam yānakena saddhim nivattāpetvā balikammabhājanam sayam ukkhipitvā ganhāhī"ti. Sā tathā akāsi. Coro tam gahetvā corapapātapabbatam abhiruhi. Tassa hi ekena passena manussā abhiruhanti, ekam passam chinnapapātam<sup>1</sup>. Pabbatamatthake thitā tena passena core pātenti. Te khandākhandam hutvā bhūmiyam patanti. Tasmā "corapapāto"ti vuccati. Sā tassa pabbatassa matthake thatvā "balikammam te sāmi karohī"ti āha. So tunhī ahosi. Puna tāya "kasmā sāmi tunhībhūtosī"ti vutte tam āha "na mayham balikammenattho, vañcetvā pana tam ādāya āgatomhī"ti. Kim kāranā sāmīti. Tam māretvā tava ābharanāni gahetvā palāyanatthāyāti. Sā maraṇabhayatajjitā āha "sāmi ahañca ābharaṇāni ca tava santakāneva, kasmā evam vadesī"ti. So "mā evam karohī"ti punappunam yāciyamānopi "māremi evā"ti āha. "Evam sante kim te mama maranena, imāni ābharanāni gahetvā mayham jīvitam dehi, ito patthāya mam 'mata'ti dharehi, dasi va te hutva kammam karissami'ti vatva imam gāthamāha—

> "Idam suvannakeyūram, muttā veļuriyā bahū. Sabbam harassu bhaddante, mam ca dāsīti sāvayā"ti<sup>2</sup>.

<sup>1.</sup> Chinnatatam (Sī, Syā)

Ime suvannakeyūrā, sabbe veļuriyāmayā.
 Sabbañca ganhā bhaddante, mamam dāsiñca sāvayāti.
 (Sī, Syā, Ka) Khu 4. 242 pitthe pana passitabbam.

Tam sutvā coro "evam kate tvam gantvā mātāpitūnam ācikkhissasi, māressāmiyeva, mā tvam bāļham paridevasī"ti vatvā imam gāthamāha—

"Mā bāļham¹ paridevesi, khippam bandhāhi bhaṇḍikam. Na tuyham jīvitam atthi, sabbam gaṇhāmi bhaṇḍakan"ti.

Sā cintesi "aho idam kammam bhāriyam, paññā nāma na pacitvā khādanatthāya katā, atha kho vicāraṇatthāya katā, jānissāmissa kattabban"ti. Atha nam āha "sāmi yadā tvam 'coro'ti gahetvā nīyasi, tadāham mātāpitūnam ācikkhim, te sahassam vissajjetvā tam āharāpetvā gehe karimsu. Tato paṭṭhāya aham tuyham upakārikā, ajja me sudiṭṭham katvā attanam vanditum dehī"ti. So "sādhu bhadde, sudiṭṭham katvā vandāhī"ti vatvā pabbatante aṭṭhāsi. Atha nam sā tikkhattum padakkhiṇam katvā catūsu ṭhānesu vanditvā "sāmi idam te pacchimadassanam, idāni tuyham vā mama dassanam, mayham vā tava dassanam natthī"ti purato ca pacchato ca ālingitvā pamattam hutvā pabbatante ṭhitam piṭṭhipasse ṭhatvā ekena hatthena khandhe gahetvā ekena piṭṭhikacchāya gahetvā pabbatapapāte khipi. So pabbatakucchiyam paṭihato khaṇḍākhaṇḍikam hutvā bhūmiyam pati. Corapapātamatthake adhivatthā devatā tesam dvinnampi kiriyam disvā tassā itthiyā sādhukāram datvā imam gāthamāha—

"Na hi<sup>2</sup> sabbesu ṭhānesu, puriso hoti paṇḍito. Itthīpi panditā hoti, tattha tattha vicakkhanā"ti<sup>3</sup>.

Sāpi coram papāte khipitvā cintesi "sacāham geham gamissāmi, 'sāmiko te kuhin'ti pucchissanti, sacāham evam puṭṭhā 'mārito me'ti vakkhāmi, 'dubbinīte sahassam datvā tam āharāpetvā idāni nam māresī'ti mam mukhasattīhi vijjhissanti, 'ābharaṇatthāya so mam māretukāmo ahosī'ti vuttepi na saddahissanti, alam me gehenā"ti tatthevābharaṇāni chaḍḍetvā araññam pavisitvā anupubbena vicarantī ekam paribbājakānam assamam patvā vanditvā "mayham bhante tumhākam santike pabbajjam dethā"ti āha. Atha nam pabbājesum. Sā pabbajitvāva pucchi "bhante tumhākam pabbajjāya kim uttaman"ti. Bhadde dasasu vā kasiņesu parikammam katvā jhānam

nibbattetabbam, vādasahassam vā uggaņhitabbam, ayam amhākam pabbajjāya uttamatthoti. Jhānam tāva nibbattetum aham na sakkhissāmi, vādasahassam pana uggaņhissāmi ayyāti. Atha nam te vādasahassam uggaņhāpetvā "uggahitam te sippam, idāni tvam jambudīpatale vicaritvā attanā saddhim pañham kathetum samattham olokehī"ti tassā hatthe jambusākham datvā uyyojesum "gaccha bhadde sace koci gihibhūto tayā saddhim pañham kathetum sakkoti, tasseva pādaparicārikā bhavāhi, sace pabbajito sakkoti, tassa santike pabbajāhī"ti.

Sā nāmena Jambuparibbājikā nāma hutvā tato nikkhamitvā ditthe ditthe pañham pucchantī vicarati. Tāya saddhim kathetum samattho nāma nāhosi. "Ito Jambuparibbājikā āgacchatī"ti sutvāva manussā palāyanti. Sā gāmam vā nigamam vā bhikkhāya pavisantī gāmadvāre vālukarāsim katvā tattha jambusākham thapetvā "mayā saddhim kathetum samattho jambusākham maddatū"ti vatvā gāmam pāvisi. Tam thānam upasankamitum samattho nāma nāhosi. Sāpi milātāya jambusākhāya aññam jambusākham ganhāti, iminā nīhārena vicarantī Sāvatthim patvā gāmadvāre vālukarāsim katvā jambusākham thapetvā vuttanayeneva vatvā bhikkhāya pāvisi. Sambahulā gāmadārakā jambusākham parivāretvā atthamsu. Tadā Sāriputtatthero pindāya caritvā katabhattakicco nagarā nikkhanto te dārake jambusākham parivāretvā thite disvā "kim idan" ti pucchi. Dārakā therassa tam pavattim ācikkhimsu. Tena hi dārakā imam sākham maddathāti, bhāyāma bhanteti. Aham pañham kathessāmi, maddatha tumheti. Te therassa vacanena sañjātussāhā tathā katvā maddantā jambusākham<sup>1</sup> ukkhipimsu. Paribbājikā āgantvā te paribhāsitvā "tumhehi saddhim mama pañhena kiccam<sup>2</sup> natthi, kasmā me sākham maddathā"ti āha. "Ayyenamhā maddāpitā"ti āhamsu. Bhante tumhehi me sākhā maddāpitāti. Āma bhaginīti. Tenati mayā saddhim pañham kathethāti. Sādhu kathessāmīti.

Sā vaḍḍhamānakacchāyāya pañhaṁ pucchituṁ therassa santikaṁ agamāsi, sakalanagaraṁ saṅkhubhi. "Dvinnaṁ paṇḍitānaṁ kathaṁ suṇissāmā"ti nāgarā tāya saddhiṁyeva gantvā theraṁ vanditvā ekamantaṁ nisīdiṁsu. Paribbājikā

theram āha "bhante pucchāmi te pañhan"ti. Puccha bhaginīti. Sā vādasahassam pucchi, pucchitam pucchitam thero vissajjesi. Atha nam thero āha "ettakā eva te pañhā, aññepi atthī"ti. Ettakā eva bhanteti. Tayā bahū pañhā putthā, mayampi ekam pucchāma, vissajjissasi noti. Jānamānā vissajjissāmi, pucchatha bhanteti. Thero "ekam nāma kin"ti<sup>1</sup> pañham pucchi. Sā "evam nāmesa vissajjetabbo"ti<sup>2</sup> ajānantī "kim nāmetam bhante"ti pucchi. Buddhapañho<sup>3</sup> nāma bhaginīti. Mayhampi tam detha bhanteti. Sace mādisā bhavissasi, dassāmīti. Tena hi mam pabbājethāti. Thero bhikkhunīnam ācikkhitvā pabbājesi. Sā pabbajitvā laddhūpasampadā Kundalakesittherī nāma hutvā katipāhaccayeneva saha patisambhidāhi arahattam pāpuni.

Bhikkhū dhammasabhāyam katham samutthāpesum "Kundalakesittheriyā dhammassavanañca bahum natthi, pabbajitakiccañcassā matthakam pattam, ekena kira corena saddhim mahāsaṅgāmaṁ katvā iinitvā āgatā"ti. Satthā āgantvā "kāva nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave mayā desitadhammam 'appam vā bahum vā'ti pamāṇam mā ganhatha<sup>4</sup>, anatthakam padasatampi seyyo na hoti, Dhammapadam pana ekampi seyyova. Avasesacore jinantassa ca jayo nāma na hoti, ajjhattikakilesacore jinantasseva pana jayo nāma hotī"ti vatvā anusandhim ghatetvā dhammam desento imā gāthā abhāsi—

- 102. "Yo ca gāthāsatam bhāse, anatthapadasamhitā. Ekam dhammapadam seyyo, yam sutvā upasammati.
- 103. Yo sahassam sahassena, sangāme mānuse Jine. Ekañca jeyyamattānam, sa ve sangāmajuttamo"ti.

Tattha **gāthāsatan**ti yo ca puggalo sataparicchedā bahūpi gāthā bhāseyyāti attho. Anatthapadasamhitāti ākāsavannanādivasena anatthakehi padehi samhitā. **Dhammapadan**ti atthasādhakam khandhādipatisamyuttam, "cattārimāni paribbājakā dhammapadāni. Katamāni cattāri, anabhijjhā paribbājakā dhammapadam, abyāpādo paribbājakā dhammapadam, sammāsati paribbājakā

<sup>1.</sup> Khu 1. 3; Am 3. 296 pitthādīsu vitthāro. 2. Evam nāma me vissajjetabbanti (Sī)

<sup>3.</sup> Buddhamanto (Syā)

<sup>4.</sup> Mā minātha (Sī, Syā)

dhammapadam, sammāsamādhi paribbājakā dhammapadan"ti¹ evam vuttesu catūsu dhammapadesu ekampi dhammapadam seyyo. Yo sahassam sahassenāti yo eko saṅgāmayodho sahassena guṇitam sahassam mānuse ekasmim saṅgāme jineyya, dasamanussasatasahassam jinitvā jayam āhareyya, ayampi saṅgāmajinatam uttamo pavaro nāma na hoti. Ekañca jeyyamattānanti yo rattiṭṭhānadivāṭṭhānesu ajjhattikakammaṭṭhānam sammasanto attano lobhādikilesajayena attānam jineyya. Sa ve saṅgāmajuttamoti so saṅgāmajinānam uttamo pavaro saṅgāmasīsayodhoti.

Desanāvasāne bahū sotāpattiphalādīni pāpuņimsūti.

Kuṇḍalakesittherīvatthu tatiyam.

### 4. Anatthapucchakabrāhmaņavatthu

Attā haveti imam dhammadesanam Satthā Jetavane viharanto anatthapucchakam brāhmaṇam ārabbha kathesi.

So kira brāhmaņo "kim nu kho Sammāsambuddho atthameva jānāti, udāhu anatthampi, pucchissāmi nan"ti Satthāram upasankamitvā pucchi "bhante tumhe atthameva jānātha maññe, no anatthan"ti. Atthañcāham brāhmaṇa jānāmi anatthañcāti. Tena hi me anattham kathethāti. Athassa Satthā imam gāthamāha—

"Ussūraseyyam ālasyam, caṇḍikkam dīghasoṇḍiyam². Ekassaddhānagamanam, paradārūpasevanam. Etam brāhmaṇa sevassu, anattham te bhavissatī''ti.

Taṁ sutvā brāhmaṇo sādhukāramadāsi "sādhu sādhu gaṇācariya gaṇajeṭṭhaka, tumhe atthañca jānātha anatthañcā"ti. Evaṁ kho brāhmaṇa atthānatthajānanako³ nāma mayā sadiso natthīti. Athassa Satthā ajjhāsayaṁ upadhāretvā "brāhmaṇa kena kammena jīvasī"ti pucchi. Jūtakammena bho Gotamāti. Kiṁ pana te jayo hoti

<sup>1.</sup> Am 1. 338 pitthe.

<sup>3.</sup> Anatthajānanako (Sī)

<sup>2.</sup> Dīghasotthiyam (Sī), dīghasottiyam (Syā)

parājayoti. "Jayopi hoti parājayopī"ti vutte "brāhmaṇa appamattako esa, paraṁ jinantassa jayo nāma na seyyo. Yo pana kilesajayena attānaṁ jināti, tassa jayo seyyo. Na hi taṁ jayaṁ koci apajayaṁ kātuṁ sakkotī"ti vatvā anusandhiṁ ghaṭetvā dhammaṁ desento imā gāthā abhāsi—

- 104. "Attā have jitam seyyo, yā cāyam itarā pajā. Attadantassa posassa, niccam saññatacārino.
- 105. Neva devo na Gandhabbo. Na māro saha brahmunā. Jitam apajitam kayirā, tathārūpassa jantuno"ti.

Tattha haveti nipāto. Jitanti liṅgavipallāso, attano kilesajayena attā jito seyyoti attho. Yā cāyaṁ itarā pajāti yā panāyaṁ avasesā pajā jūtena vā dhanaharaṇena vā saṅgāmena vā¹ balābhibhavena² vā jitā bhaveyya, taṁ jinantena yaṁ jitaṁ, na taṁ seyyoti attho. Kasmā pana tadeva jitaṁ seyyo, idaṁ na seyyoti? Yasmā attadantassa -pa- tathārūpassa jantunoti. Idaṁ vuttaṁ hoti—yasmā hi yvāyaṁ nikkilesatāya attadanto poso, tassa attadantassa³ kāyādīhi niccaṁ saññatacārino evarūpassa imehi kāyasaññamādīhi⁴ saññatassa jantuno devo vā gandhabbo vā māro vā brahmunā saha uṭṭhahitvā "ahamassa jitaṁ apajitaṁ karissāmi, maggabhāvanāya pahīne kilese puna uppādessāmī"ti ghaṭentopi vāyamantopi yathā dhanādīhi parājito pakkhantaro hutvā itarena jitaṁ puna jinanto apajitaṁ kareyya, evaṁ apajitaṁ kātuṁ neva sakkuṇeyyāti.

Desanāvasāne bahū sotāpattiphalādīni pāpuņimsūti.

Anatthapucchakabrāhmanavatthu catuttham.

- 1. Saṅgāme vā (Sī, Syā)
- 3. Ananganassa (Syā)

- 2. Dhanalābhibhāvena (Ka)
- 4. Kāyasamācārādīhi (Ka)

#### 5. Sāriputtattherassa mātulabrāhmaņavatthu

Māse māseti imam dhammadesanam Satthā Veļuvane viharanto Sāriputtattherassa Mātulabrāhmaṇam ārabbha kathesi.

Thero kira tassa santikam gantvā āha "kim nu kho brāhmaņa kincideva kusalam karosī"ti. Karomi bhanteti. Kim karosīti. Māse māse sahassapariccāgena dānam dammīti. Kassa desīti. Niganthānam bhanteti. Kim patthayantoti. Brahmalokam bhanteti. Kim pana brahmalokassa ayam maggoti. Āma bhanteti. Ko evamāhāti. Ācariyehi me kathitam bhanteti. "Neva tvam brahmalokassa maggam jānāsi, nāpi te ācariyā, Satthāva eko jānāti, ehi brāhmaṇa, brahmalokassa te maggam kathāpessāmī"ti tam ādāya Satthu santikam netvā "bhante ayam brāhmaṇo evamāhā"ti tam pavattim ārocetvā sādhu vatassa brahmalokassa maggam kathethāti. Satthā "evam kira brāhmaṇā"ti pucchitvā "āma bho Gotamā"ti vutte "brāhmaṇa tayā evam dadamānena vassasatam dinnadānatopi muhuttamattham pasannacittena mama sāvakassa olokanam vā kaṭacchubhikkhāmattadānam vā mahapphalataran"ti vatvā anusandhim ghaṭetvā dhammam desento imam gāthamāha—

106. "Māse māse sahassena, yo yajetha satam samam. Ekañca bhāvitattānam, muhuttamapi pūjaye. Sāyeva pūjanā seyyo, yañce vassasatam hutan"ti.

Tattha sahassenāti sahassapariccāgena. Yo yajetha satam samanti yo vassasatam māse māse sahassam pariccajanto lokiyamahājanassa dānam dadeyya, ekañca bhāvitattānanti yo pana ekam sīlādiguņavisesena vaḍḍhita-attānam heṭṭhimakoṭiyā sotāpannam, uparimakoṭiyā khīṇāsavam gharadvāram sampattam kaṭacchubhikkhādānavasena vā yāpanamatta-āhāradānavasena vā thūlasāṭakadānamattena vā pūjeyya. Yam itarena vassasatam hutam, tato sāyeva pūjanā seyyo, seṭṭho uttamoti atthoti.

Desanāvasāne so brāhmaņo sotāpattiphalam patto, aññepi bahū sotāpattiphalādīni pāpuņimsūti.

Sāriputtattherassa mātulabrāhmaņavatthu pañcamam.

## 6. Sāriputtattherassa bhāgineyyavatthu

Yo ca vassasatam jantūti imam dhammadesanam Satthā Veļuvane viharanto Sāriputtattherassa bhāgineyyam ārabbha kathesi.

Tampi hi thero upasaṅkamitvā āha "kimbrāhmaṇa kusalaṁ karosī"ti. Āma bhanteti. Kim karosīti. Māse māse ekaṁ ekaṁ pasuṁ ghātesvā aggiṁ paricarāmīti. Kimatthaṁ evaṁ karosīti. Brahmalokamaggo kiresoti. Kenevaṁ kathitanti. Ācariyehi me bhanteti. "Neva tvaṁ brahmalokassa maggaṁ jānāsi, nāpi te ācariyā, ehi, Satthu santikaṁ gamissāmā"ti taṁ Satthu santikaṁ netvā taṁ pavattiṁ ārocetvā "imassa bhante brahmalokassa maggaṁ kathethā"ti āha. Satthā "evaṁ kirā"ti pucchitvā "evaṁ bho Gotamā"ti vutte "brāhmaṇa vassasatampi evaṁ aggiṁ paricarantassa tava aggipāricariyā mama sāvakassa taṁkhaṇamattaṁ pūjampi na pāpuṇātī"ti vatvā anusandhiṁ ghaṭetvā dhammaṁ desento imaṁ gāthamāha—

107. "Yo ca vassasatam jantu, aggim paricare vane.Ekañca bhāvitattānam, muhuttamapi pūjaye.Sāyeva pūjanā seyyo, yañce vassasatam hutan"ti.

Tattha **jantū**ti sattādhivacanametam. **Aggim paricare vane**ti nippapañcabhāvapatthanāya vanam pavisitvāpi tattha aggim paricareyya. Sesam purimasadisamevāti.

Desanāvasāne so brāhmaņo sotāpattiphalam pāpuņi, aññepi bahū sotāpattiphalādīni pāpuņimsūti.

Sāriputtattherassa bhāgineyyavatthu chaṭṭhaṁ.

### 7. Sāriputtattherassa sahāyakabrāhmaṇavatthu

Yaṁ kiñci yiṭṭhaṁ vāti imaṁ dhammadesanaṁ Satthā Veļuvane viharanto Sāriputtattherassa sahāyakabrāhmaṇaṁ ārabbha kathesi.

Tampi hi thero upasaṅkamitvā "kiṁ brāhmaṇa kiñci kusalaṁ karosī"ti pucchi. Āma bhanteti. Kiṁ karosīti. Yiṭṭhayāgaṁ yajāmīti. Tadā kira taṁ yāgaṁ mahāpariccāgena yajanti. Ito paraṁ thero purimanayeneva pucchitvā taṁ Satthu santikaṁ netvā taṁ pavattiṁ ārocetvā "imassa bhante brahmalokassa maggaṁ kathethā"ti āha. Satthā "brāhmaṇa evaṁ kirā"ti pucchitvā "evaṁ bho Gotamā"ti vutte "brāhmaṇa tayā saṁvaccharaṁ yiṭṭhayāgaṁ yajantena lokiyamahājanassa dinnadānaṁ pasannacittena mama sāvakānaṁ vandantānaṁ uppannakusalacetanāya catubhāgamattampi na agghatī"ti vatvā anusandhiṁ ghaṭetvā dhammaṁ desento imaṁ gāthamāha—

108. "Yam kiñci yiṭṭham va hutam va loke, Samvaccharam yajetha puññapekkho. Sabbampi tam na catubhāgameti, Abhivādanā ujjugatesu seyyo"ti.

Tattha yaṁ kiñcīti anavasesapariyādānavacanametaṁ. Yiṭṭhanti yebhuyyena maṅgalakiriyādivasesu dinnadānaṁ. Hutanti abhisaṅkharitvā kataṁ pāhunadānañceva, kammañca phalañca¹ saddahitvā katadānañca. Saṁvaccharaṁ yajethāti ekasaṁvaccharaṁ nirantarameva vuttappakāraṁ dānaṁ sakalacakkavāḷepi lokiyamahājanassa dadeyya. Puññapekkhoti puññaṁ icchanto. Ujjugatesūti heṭṭhimakoṭiyā sotāpannesu uparimakoṭiyā khīṇāsavesu. Idaṁ vuttaṁ hoti—evarūpesu pasannacittena sarīraṁ onamitvā vandantassa kusalacetanāya yaṁ phalaṁ, tato catubhāgampi sabbaṁ taṁ dānaṁ na agghati, tasmā ujugatesu abhivādanameva seyyoti.

Desanāvasāne so brāhmaņo sotāpattiphalam patto, aññepi bahū sotāpattiphalādīni pāpunimsūti.

Sāriputtattherassa sahāyakabrāhmaṇavatthu sattamam.

## 8. Āyuvaḍḍhanakumāravatthu

**Abhivādanasīlissā**ti imam dhammadesanam Satthā Dīghalanghikam<sup>1</sup> nissāya Araññakuṭiyam viharanto Dīghāyukumāram ārabbha kathesi.

Dīghalaṅghikanagaravāsino kira dve brāhmanā bāhirakapabbajjam pabbajitvā atthacattālīsa vassāni tapacaranam karimsu. Tesu eko "paveni me nassissati, vibbhamissāmī"ti cintetvā attanā katam tapam paresam vikkinitvā gosatena ceva kahāpanasate ca saddhim bharivam labhitvā kutumbam santhapesi. Athassa bhariyā puttam<sup>2</sup> vijāyi. Itaro panassa sahāyako pavāsam gantvā punadeva tam nagaram paccāgami. So tassa āgatabhāvam sutvā puttadāram ādāya sahāyakassa dassanatthāya agamāsi. Gantvā puttam mātu hatte datvā sayam tāva vandi, mātāpi puttam pitu hatthe datvā vandi. So "dīghāyukā hothā"ti āha, putte<sup>3</sup> pana vandāpite tunhī ahosi, atha nam "kasmā bhante amhehi vandite 'dīghāyukā hothā'ti vatvā imassa vandanakāle kiñci na vadethā"ti āha. Imasseko antarāyo atthi brāhmanāti. Kittakam jīvissati bhanteti. Sattāham brāhmanāti. Patibāhanakāranam atthi bhanteti. Nāham patibāhanakāranam jānāmīti. Ko pana jānevva bhanteti. Samano Gotamo jāneyya, tassa santikam gantvā pucchāhīti. Tattha gacchanto tapaparihānito bhāyāmīti. Sace te puttasineho atthi, tapaparihānim acintetvā tassa santikam gantvā pucchāhīti.

So Satthu santikam gantvā sayam tāva vandi. Satthā "dīghāyuko hohī"ti āha, pajāpatiyā vandanakālepi tassā tatheva vatvā puttassa vandāpanakāle tuņhī ahosi. So purimanayeneva Satthāram pucchi, Satthāpi tatheva byākāsi. So kira brāhmaņo sabbañnutannāņam apaṭivijjhitvāva attano mantam sabbannutannāņena samsandesi, paṭibāhanupāyam pana na jānāti. Brāhmaņo Satthāram pucchi "atthi pana bhante paṭibāhanupāyo"ti. Bhaveyya brāhmaṇāti. Kim bhaveyyāti. Sace tvam attano gehadvāre maṇḍapam kāretvā tassa majjhe pīṭhikam kāretvā tam parikkhipanto aṭṭha vā soļasa vā

āsanāni paññāpetvā tesu mama sāvake nisīdāpetvā sattāham nirantaram parittam kātum sakkuņeyyāsi, evamassa antarāyo nasseyyāti. Bho Gotama mayā maṇḍapādīni sakkā kātum, tumhākam pana sāvake katham lacchāmīti. Tayā ettake kate aham mama sāvake pahiṇissāmīti. "Sādhu bho Gotamā"ti so attano gehadvāre sabbam kiccam niṭṭhāpetvā Satthu santikam agamāsi. Satthā bhikkhū pahiṇi, te gantvā tattha nisīdimsu, dārakampi pīṭhikāyam nipajjāpesum. Bhikkhū sattarattindivam nirantaram parittam bhaṇimsu, sattame divase sāyam¹ Satthā āgacchi. Tasmim āgate sabbacakkavāļadevatā sannipatimsu. Eko pana avaruddhako nāma yakkho dvādasa samvaccharāni Vessavaṇam upaṭṭhahitvā tassa santikā varam labhanto "ito sattame divase imam dārakam gaṇheyyāsī"ti labhi. Tasmā sopi āgantvā aṭṭhāsi.

Satthari pana tattha gate mahesakkhāsu devatāsu sannipatitāsu appesakkhā devatā osakkitvā osakkitvā okāsam alabhamānā<sup>2</sup> dvādasa yojanāni patikkamimsu. Avaruddhakopi tatheva patikkami, Satthāpi sabbarattim parittamakāsi. Sattāhe vītivatte avaruddhako dārakam na labhi. Atthame pana divase arune uggatamatte dārakam ānetvā Satthāram vandāpesum. Satthā "dīghāyuko hohī"ti āha. Kīvaciram pana bho Gotama dārako thassatīti. Vīsavassasatam brāhmanāti. Athassa "Āvuvaddhanakumāro"ti nāmam karimsu. So vuddhimanvāva pancahi upāsakasatehi parivuto vicari. Athekadivasam dhammasabhāyam bhikkhū katham samutthāpesum "passathāvuso, Āyuvaddhanakumārena kira sattame divase maritabbam abhavissa, so idāni vīsavassasatatthāyī hutvā pañcahi upāsakasateti parivuto vicarati, atthi maññe imesam sattānam āyuvaddhanakāranan"ti. Satthā āgantvā "kāya nuttha bhikkhave etarahi kathāya sannisinnā"ti pucchitvā "imāya nāmā"ti vutte "bhikkhave na kevalam āyuvaddhanameva, ime pana Satthā gunavante vandantā abhivādentā catūhi kāranehi vaddhanti, parissayato muccanti, yāvatāyukameva titthantī"ti<sup>3</sup> vatvā anusandhim ghatetvā dhammam desento imam gāthamāha109. "Abhivādanasīlissa, niccam vuḍḍhāpacāyino. Cattāro dhammā vaddhanti, āyu vanno sukham balan"ti.

Tattha abhivādanasīlissāti vandanasīlissa, abhiņham vandanakiccapasutassāti attho. Vuḍḍhāpacāyinoti gihissa vā tadahupabbajite daharasāmaņerepi, pabbajitassa vā pana pabbajjāya vā upasampadāya vā vuḍḍhatare guṇavuḍḍhe apacāyamānassa, abhivādanena vā niccam pūjentassāti attho. Cattāro dhammā vaḍḍhantīti āyumhi vaḍḍhamāne yattakam kālam tam vaḍḍhati, tattakam itarepi vaḍḍhantiyeva. Yena hi paññāsavassa-āyusamvattanikam kusalam katam, pañcavīsativassakāle cassa jīvitantarāyo uppajjeyya, so abhivādanasīlatāya paṭippassambhati, so yāvatāyukameva tiṭṭhati, vaṇṇadayopissa āyunāva saddhim vaḍḍhanti. Ito uttaripi eseva nayo. Anantarāyena pavattassāyuno vaḍḍhanam nāma natthi.

Desanāvasāne Āyuvaḍḍhanakumāro pañcahi upāsakasatehi saddhim sotāpattiphale patiṭṭhahi, aññepi bahū sotāpattiphalādīni pāpuṇimsūti.

Āyuvaddhanakumāravatthu atthamam.

# 9. Samkiccasāmaņeravatthu

Yo ca vassasataṁ jīveti imaṁ dhammadesanaṁ Satthā Jetavane viharanto Saṁkiccasāmaṇeraṁ ārabbha kathesi.

Sāvatthiyam kira timsamattā kulaputtā Satthu dhammakatham sutvā sāsane uram datvā pabbajimsu. Te upasampadāya pañcavassā hutvā Satthāram upasankamitvā ganthadhuram vipassanādhuranti dve dhurānīti sutvā "mayam mahallakakāle pabbajitā"ti ganthadhure ussāham akatvā vipassanādhuram pūretukāmā yāva arahattā kammaṭṭhānam kathāpetvā "bhante ekam araññāyatanam gamissāmā"ti Satthāram āpucchimsu. Satthā "kataram ṭhānam gamissathā"ti pucchitvā "asukam nāmā"ti vutte "tattha tesam ekam vighāsādam nissāya bhayam uppajjissati, tañca pana Samkiccasāmaņere gate vūpasamissati, atha nesam pabbajitakiccam pāripūrim gamissatī"ti aññāsi.

Samkiccasāmaņero nāma Sāriputtattherassa sāmaņero sattavassiko jātiyā. Tassa kira mātā Sāvatthiyam addhakulassa dhītā, sā tasmim kucchigate ekena byādhinā tamkhanaññeva kālamakāsi. Tassā<sup>1</sup> jhāpiyamānāya thapetvā gabbhamamsam sesam jhāyi. Athassā gabbhamamsam citakato otāretvā dvīsu tīsu thānesu sūlehi vijjhimsu. Sūlakoti dārakassa akkhikotim pahari. Evam gabbhamamsam vijjhitvā angārarāsimhi khipitvā angāreheva paticchādetvā pakkamimsu. Gabbhamamsam jhāyi, angāramatthake pana suvannabimbasadiso dārako padumagabbhe nipanno viya ahosi. Pacchimabhavikassa sattassa hi Sinerunā otthariyamānassapi arahattam appatvā jīvitakkhayo nāma natthi. Punadiyase "citakam nibbāpessāmā" ti āgatā tathānipannam dārakam disvā acchariyabbhutacittajātā "kathañhi nāma ettakesu dārūsu khīyamānesu sakalasarīre jhāpiyamāne dārako na jhāyi, kim nu kho bhavissatī"ti dārakam ādāya antogāmam gantvā nemittake pucchimsu. Nemittakā "sace ayam dārako agāram ajjhāvasissati, yāva sattamā kulaparivattā ñātakā duggatā bhavissanti<sup>2</sup>. Sace pabbajissati, pañcahi samanasatehi parivuto vicarissatī''ti āhamsu. Tassa sankunā akkhikotiyā bhinnattā Samkiccanti<sup>3</sup> nāmam karimsu. So aparena samayena Samkiccoti paññāyi. Atha nam ñātakā "hotu, vaddhitakāle amhākam ayyassa Sāriputtassa santike pabbājessāmā"ti posimsu. So sattavassikakāle "tava mātukucchiyam vasanakāle mātā te kālamakāsi, tassā sarīre jhāpiyamānepi tvam na jhāyī"ti kumārakānam katham sutvā "aham kira evarūpā bhayā mutto, kim me gharāvāsena, pabbajissāmī"ti ñātakānam ārocesi. Te "sādhu tātā"ti Sāriputtattherassa santikam netvā "bhante imam pabbājethā"ti adamsu. Thero tacapañcakakammatthānam datvā pabbājesi. So khuraggeyeva saha patisambhidāhi arahattam pāpuni. Ayam Samkiccasāmanero nāma.

Satthā "etasmim gate tam bhayam vūpasamissati, atha nesam pabbajitakiccam pāripūrim gamissatī"ti ñatvā "bhikkhave tumhākam jeṭṭhabhātikam Sāriputtattheram oloketvā gacchathā"ti āha. Te "sādhū"ti vatvā

therassa santikam gantvā "kim āvuso"ti vutte mayam Satthu santike kammaṭṭhānam gahetvā araññam pavisitukāmā hutvā āpucchimhā, atha no Satthā evamāha "tumhākam jeṭṭhabhātikam oloketvā gacchathā"ti. Tenamhā idhāgatāti. Thero "Satthārā ime ekam kāraṇam disvā idha pahitā bhavissanti, kim nu kho etan"ti āvajjento tamattham ñatvā āha "atthi pana vo āvuso sāmaṇero"ti. Natthi āvusoti. Sace natthi, imam Samkiccasāmaṇeram gahetvā gacchathāti. Alam āvuso, sāmaṇeram nissāya no palibodho bhavissati, kim araññe vasantānam sāmaṇerenāti. Nāvuso imam nissāya tumhākam palibodho, apica kho pana tumhe nissāya imassa palibodho bhavissati. Satthāpi tumhe mama santikam pahiṇanto tumhehi saddhim sāmaṇerassa pahiṇanam paccāsīsanto pahiṇi, imam gahetvā gacchathāti. Te "sādhū"ti adhivāsetvā sāmaṇerena saddhim ekatimsa janā theram apaloketvā vihārā nikkhamma cārikam carantā vīsayojanasatamatthake ekam sahassakulam gāmam pāpuṇimsu.

Manussā te disvā pasannacittā sakkaccam parivisitvā "bhante kattha gamissathā"ti pucchitvā "yathāphāsukaṭṭhānam āvuso"ti vutte pādamūle nipajjitvā "mayam bhante ayyesu imam ṭhānam nissāya antovassam vasantesu pañcasīlam samādāya uposathakammam karissāmā"ti yācimsu. Therā adhivāsesum. Atha nesam manussā rattiṭṭhānadivāṭṭhānacankamanapaṇṇasālāyo samvidahitvā "ajja mayam, sve mayan"ti ussāhappattā upaṭṭhānamakamsu. Therā vassūpanāyikadivase katikavattam karimsu "āvuso amhehi dharamānakabuddhassa santike kammaṭṭhānam gahitam, na kho pana sakkā aññatra paṭipattisampadāya Buddhe ārādhetum, amhākañca apāyadvārāni vivaṭāneva, tasmā aññatra pāto bhikkhācāravelam, sāyam therūpaṭṭhānavelañca sesakāle dve ekaṭṭhāne na bhavissāma, yassa aphāsukam bhavissati, tena ghaṇḍiyā¹ pahaṭāya tassa santikam gantvā bhesajjam karissāma, ito aññasmim rattibhāge vā divasabhāge vā appamattā kammatthānamanuyuñjissāmā"ti.

Tesu evam katikam katvā viharantesu eko duggatapuriso dhītaram upanissāya jīvanto tasmim thāne dubbhikkhe uppanne aparam dhītaram upanissāya jīvitukāmo maggam patipajji. Therāpi gāme pindāya caritvā vasanatthānam āgacchantā antarāmagge ekissā nadiyā nhatvā vālukapuline nisīditvā bhattakiccam karimsu. Tasmim khane so puriso tam thānam patvā ekamantam atthāsi, atha nam therā "kaham gacchasī"ti pucchimsu. So tamattham ārocesi. Therā tasmim kāruññam uppādetvā "upāsaka ativiva chātosi, gaccha, pannam āhara, ekamekam te bhattapindam dassāmā"ti vatvā tena panne āhate attanā attanā bhunjananiyāmeneva sūpabyanjanehi sannahitvā<sup>1</sup> ekamekam pindam adamsu. Etadeva kira vattam, yam bhojanakāle āgatassa bhattam dadamānena bhikkhunā aggabhattam adatvā attanā bhuñjananiyāmeneva thokam vā bahum vā dātabbam, tasmā tepi tathā adamsu. So katabhattakicco there vanditvā pucchi "kim bhante ayyā kenaci nimantită"ti. Natthi upāsaka nimantanam, manussā devasikam evarūpameva āhāram dentīti. So cintesi "mayam niccakālam utthāya samutthāya kammam karontāpi evarūpam āhāram laddhum na sakkoma, kim me aññattha gatena, imesam santikeyeva jīvissāmī"ti. Atha ne āha "aham vattapativattam katvā ayyānam santike vasitum icchāmī"ti. Sādhu upāsakāti. So tehi saddhim tesam vasanatthanam gantva sadhukam vattapativattam karonto bhikkhu ativiya ārādhetvā dvemāsaccayena dhītaram datthukāmo hutvā "sace ayye āpucchissāmi, na mam vissajjissanti, anāpucchā gamissāmī"ti tesam anācikkhitvāva nikkhami. Ettakameva kirassa olārikam khalitam ahosi, yam bhikkhūnam anārocetvā pakkāmi.

Tassa pana gamanamagge ekā aṭavī atthi, tattha pañcasatānaṁ corānaṁ "yo imaṁ aṭaviṁ pavisati, taṁ māretvā tassa maṁsalohitena tuyhaṁ balikammaṁ karissāmā"ti devatāya āyācanaṁ katvā vasantānaṁ sattamo divaso hoti. Tasmā sattame divase corajeṭṭhako rukkhaṁ āruyha olokento taṁ āgacchantaṁ disvā corānaṁ saññamadāsi. Te tassa aṭavimajjhaṁ paviṭṭhabhāvaṁ ñatvā parikkhipitvā taṁ gaṇhitvā gāḷhabandhanaṁ

katvā aranisahitena aggim nibbattetvā<sup>1</sup> dārūni samkaddhitvā mahantam aggikkhandham katvā sūlāni tacchimsu. So tesam tam kirivam disvā "sāmi imasmim thāne neva sūkarā, na migādayo dissanti, kim kāranā idam karothā"ti pucchi. Tam māretvā tava mamsalohitena devatāya balikammam karissāmāti. So maranabhayatajjito bhikkhūnam tam upakāram acintetvā kevalam attano jīvitameva rakkhamāno evamāha "sāmi aham vighāsādo, ucchitthabhattam bhuñjitvā vaddhito, vighāsādo nāma kālakanniko, ayyā pana yato tato nikkhamitvā pabbajitāpi khattiyāva, asukasmim thāne ekatimsa bhikkhū vasanti, te māretvā balikammam karotha, ativiya vo devatā tussissatī"ti. Tam sutvā corā "bhaddakam esa vadeti, kim iminā kālakanninā, khattive māretvā balikammam karissāmā"ti cintetvā "ehi, nesam vasanatthānam dassehī"ti tameva maggadesakam katvā tam thānam patvā vihāramajjhe bhikkhū adisvā "kaham bhikkhū"ti nam pucchimsu. So dve māse vasitattā tesam katikavattam jānanto evamāha "attano divātthānarattitthānesu nisinnā, etam ghandim paharatha, ghandisaddena sannipatissantī"ti. Corajetthako ghandim pahari.

Bhikkhū ghaṇḍisaddaṁ sutvā "akāle ghaṇḍi pahaṭā, kassaci aphāsukaṁ bhavissatī"ti āgantvā vihāramajjhe paṭipāṭiyā paññattesu pāsāṇaphalakesu nisīdiṁsu. Saṁghatthero core oloketvā pucchi "upāsakā kenāyaṁ ghaṇḍi pahaṭā"ti. Corajeṭṭhako āha "mayā bhante"ti. Kiṁ kāraṇāti. Amhehi aṭavidevatāya āyācitaṁ atthi, tassā balikammakaraṇatthāya ekaṁ bhikkhuṁ gahetvā gamissāmāti. Taṁ sutvā mahāthero bhikkhū āha "āvuso bhātikānaṁ uppannakiccaṁ nāma jeṭṭhabhātikena nittharitabbaṁ, ahaṁ attano jīvitaṁ tumhākaṁ pariccajitvā imehi saddhiṁ gamissāmi, mā sabbesaṁ antarāyo hotu, appamattā samaṇadhammaṁ karothā"ti. Anuthero āha "bhante jeṭṭhabhātu kiccaṁ nāma kaniṭṭhassa bhāro, ahaṁ gamissāmi, tumhe appamattā hothā"ti. Iminā upāyena "ahameva ahamevā"ti vatvā paṭipāṭiyā tiṁsapi janā utthahiṁsu, evaṁ te neva ekissā mātuyā puttā,

na ekassa pituno, nāpi vītarāgā, atha ca pana avasesānam atthāya paṭipāṭiyā jīvitam pariccajimsu. Tesu ekopi "tvam yāhī"ti vattum samattho nāma nāhosi.

Samkiccasāmaņero tesam katham sutvā "bhante tumhe tiṭṭhatha, aham tumhākam jīvitam pariccajitvā gamissāmī"ti āha. Te āhamsu "āvuso mayam sabbe ekato māriyamānāpi tam ekakam na vissajjessāmā"ti. Kim kāraṇā bhanteti. "Āvuso tvam Dhammasenāpatisāriputtattherassa sāmaņero, sace tam vissajjessāma, sāmaņeram me ādāya gantvā corānam niyyādimsū"ti thero no garahissati, tam nindam nittharitum na sakkhissāma, tena tam na vissajjessāmāti. "Bhante Sammāsambuddho tumhe mama upajjhāyassa santikam pahiṇantopi, mama upajjhāyo mam tumhehi saddhim pahiṇantopi idameva kāraṇam disvā pahiṇi, tiṭṭhatha tumhe, ahameva gamissāmī"ti so timsa bhikkhū vanditvā "sace bhante me doso atthi, khamathā"ti vatvā nikkhami. Tadā bhikkhūnam mahāsamvego uppajji, akkhīni assupuṇṇāni hadayamamsam pavedhi. Mahāthero core āha "upāsakā ayam daharako tumhe aggim karonte, sūlāni tacchante, paṇṇāni attharante disvā bhāyissati, imam ekamante ṭhapetvā tāni kiccāni kareyyāthā"ti. Corā sāmaṇeram ādāya gantvā ekamante ṭhapetvā sabbakiccāni karimsu.

Kiccapariyosāne corajeṭṭhako asiṁ abbāhitvā sāmaṇeraṁ upasaṅkami. Sāmaṇero nisīdamāno jhānaṁ samāpajjitvāva nisīdi. Corajeṭṭhako asiṁ parivattetvā sāmaṇerassa khandhe pātesi, asi namitvā dhārāya dhāraṁ pahari, so "na sammā paharin"ti maññamāno puna taṁ ujukaṁ katvā pahari. Asi tālapaṇṇaṁ viya veṭhayamāno¹ tharumūlaṁ agamāsi. Sāmaṇeraṁ hi tasmiṁ kāle Sinerunā avattharantopi māretuṁ samattho nāma natthi, pageva asinā. Taṁ pāṭihāriyaṁ disvā corajeṭṭhako cintesi "pubbe me asi silāthambhaṁ vā khadirakhāṇuṁ vā kaļīraṁ viya chindati, idāni ekavāraṁ nami, ekavāraṁ tālapattaveṭhako viya jāto. Ayaṁ nāma asi acetano hutvāpi imassa guṇaṁ jānāti, ahaṁ sacetanopi na jānāmī"ti. So asiṁ

bhūmiyam khipitvā tassa pādamūle urena nipajjitvā "bhante mayam dhanakāraṇā aṭavim paviṭṭhāmhā, amhe dūratova disvā sahassamattāpi manussā pavedhanti, dve tisso kathā kathetum na sakkonti. Tava pana santāsamattampi¹ natthi, ukkāmukhe suvaṇṇam viya supupphitakaṇikāram viya ca te mukham virocati, kim nu kho kāraṇan"ti pucchanto imam gāthamāha—

"Tassa te natthi bhītattam², bhiyyo vaṇṇo pasīdati. Kasmā na paridevesi, evarūpe mahabbhaye"ti³.

Sāmaņero jhānā vuṭṭhāya tassa dhammaṁ desento "āvuso Gāmaṇi khīṇāsavassa attabhāvo nāma sīse ṭhapitabhāro viya hoti, so tasmiṁ bhijjante vā nassante vā tussateva, na bhāyatī"ti vatvā imā gāthā abhāsi—

"Natthi cetasikam dukkham, anapekkhassa gāmaṇi. Atikkantā bhayā sabbe, khīṇasamyojanassa ve.

Khīṇāya bhavanettiyā, diṭṭhe dhamme yathātathe. Na bhayaṁ maraṇe hoti, bhāranikkhepane yathā"ti<sup>4</sup>.

So tassa katham sutvā panca corasatāni oloketvā āha "tumhe kim karissathā"ti. Tumhe pana sāmīti. Mama tāva bho evarūpam pāṭihāriyam disvā agāramajjhe kammam natthi, ayyassa santike pabbajissāmīti mayampi tatheva karissāmāti. "Sādhu tātā"ti tato pancasatāpi corā sāmaņeram vanditvā pabbajjam yācimsu. So tesam asidhārāhi eva kese ceva vatthadasā ca chinditvā tambamattikāya rajitvā tāni kāsāyāni acchādāpetvā dasasu sīlesu patiṭṭhāpetvā te ādāya gacchanto cintesi "sacāham there adisvāva gamissāmi,

Khīṇā cassa bhavanetti, diṭṭhā dhammā yathā tathā. Nibbhayam maraṇam hoti, bhāravoropanam yathāti (Sī, Syā) Khu 2. 320 piṭṭhe pana passitabbam.

<sup>1.</sup> Cittutrāsamattampi (Syā)

<sup>2.</sup> Tāso te natthi na bhayam (Sī, Syā)

<sup>3.</sup> Khu 2. 320 pitthe Theragāthāyam.

Natthi cetasikam dukkham, anapekkhassa Gāmani.
 Atikkanto bhayam sabbam, khīnasamyojano isī.

te samanadhammam kātum na sakkhissanti. Corānam hi mam gahetvā nikkhantakālato patthāya tesu ekopi assūni sandhāretum nāsakkhi, 'mārito nu kho sāmanero, no'ti cintentānam kammatthānam abhimukham na bhavissati, tasmā disvāva ne gamissāmī"ti. So pañcasatabhikkhuparivāro tattha gantvā attano dassanena patiladdha-assāsehi tehi "kim sappurisa samkicca, laddham te jīvitan"ti vutte "āma bhante, ime mam māretukāmā hutvā māretum asakkonto mama gune pasīditvā dhammam sutvā pabbajitā, aham 'tumhe disvāva gamissāmī'ti āgato, appamattā samanadhammam karotha, aham Satthu santikam gamissāmī'ti te bhikkhū vanditvā itare ādāya upaijhāvassa santikam gantvā "kim Samkicca, antevāsikā te laddhā"ti vutte "āma bhante"ti tam pavattim ārocesi. Therena "gaccha Samkicca, Satthāram passāhī"ti vutte "sādhū"ti theram vanditvā te ādāya Satthu santikam gantvā Satthārāpi "kim Samkicca, antevāsikā te laddhā"ti vutte "āma bhante"ti tam pavattim ārocesi. Satthā "evam kira bhikkhave"ti pucchitvā "āma bhante"ti vutte "bhikkhave tumhākam corakammam katvā dussīle patitthāya vassasatam jīvanato<sup>1</sup> idāni sīle patitthāya ekadivasampi jīvitam seyyo''ti vatvā anusandhim ghatetvā dhammam desento imam gāthamāha—

110. "Yo ca vassasatam jīve, dussīlo asamāhito. Ekāham jīvitam seyyo, sīlavantassa jhāyino"ti.

Tattha dussīloti nissīlo. Sīlavantassāti dussīlassa vassasatam jīvanato sīlavantassa dvīhi jhānehi jhāyino ekadivasampi ekamuhuttampi jīvitam seyyo, uttamanti attho.

Desanāvasāne te pañcasatāpi bhikkhū saha paṭisambhidāhi arahattam pāpuṇimsu, sampattamahājanassāpi sātthikā dhammadesanā ahosīti.

Aparena samayena Samkicco upasampadam labhitvā dasavasso hutvā sāmaņeram gaņhi. So pana tasseva bhāgineyyo Adhimuttasāmaņero nāma. Atha nam thero paripuṇṇavassakāle āmantetvā "upasampadam te karissāmi, gaccha, ñātakānam santike vassaparimāṇam

pucchitvā ehī"ti uyyojesi. So mātāpitūnam santikam gacchanto antarāmagge pañcasatehi corehi balikammatthāya māriyamāno tesam dhammam desetvā pasannacittehi tehi "na te imasmim thāne amhākam atthibhāvo kassaci ārocetabbo"ti vissaṭṭho paṭipathe mātāpitaro āgacchante disvā tameva maggam paṭipajjantānampi tesam saccamanurakkhanto nārocesi. Tesam corehi viheṭhiyamānānam "tvampi corehi saddhim ekato hutvā maññe, amhākam nārocesī"ti paridevantānam saddam sutvā te¹ mātāpitūnampi anārocitabhāvam ñatvā pasannacittā pabbajjam yācimsu. Sopi Samkiccasāmaṇero viya te sabbe pabbājetvā upajjhāyassa santikam ānetvā tena Satthu santikam pesito gantvā tam pavattim ārocesi. Satthā "evam kira bhikkhave"ti pucchitvā "āma bhante"ti vutte purimanayeneva anusandhim ghaṭetvā dhammam desento imameva gāthamāha—

"Yo ca vassasatam jīve, dussīlo asamāhito. Ekāham jīvitam seyyo, sīlavantassa jhāyino"ti.

Idampi **Adhimuttasāmaneravatthu** vuttanayamevāti.

Samkiccasāmaņeravatthu navamam.

### 10. Khāņukoņḍaññattheravatthu

Yo ca vassasatam jīveti imam dhammadesanam Satthā Jetavane viharanto Khānukondaññattheram ārabbha kathesi.

So kira thero Satthu santike kammaṭṭhānaṁ gahetvā araññe viharanto arahattaṁ patvā "Satthu ārocessāmī"ti tato āgacchanto antarāmagge kilanto maggā okkamma ekasmiṁ piṭṭhipāsāṇe nisinno jhānaṁ samāpajji. Athekaṁ gāmaṁ vilumpitvā pañcasatā corā attano balānurūpena bhaṇḍikaṁ bandhitvā sīsenādāya gacchantā dūraṁ gantvā kilantarūpā "dūraṁ āgatāmha, imasmiṁ piṭṭhipāsāṇe vissamissāmā"ti maggā

okkamma pitthipāsānassa santikam gantvā theram disvāpi "khānuko ayan"ti saññino ahesum. Atheko coro therassa sīse bhandikam thapesi, aparopi tam nissāya bhandikam thapesi. Evam pañcasatāpi corā pañcahi bhandikasatehi theram parikkhipitvā sayampi nisinnā niddāyitvā arunuggamanakāle pabujihitvā attano attano bhandikam ganhantā theram disvā "amanusso"ti saññāya palāyitum ārabhimsu. Atha ne thero āha "mā bhāyittha upāsakā, pabbajito ahan"ti. Te therassa pādamūle nipajjitvā "khamatha bhante, mayam khānukasaññino ahumhā"ti theram khamāpetvā corajetthakena "aham ayyassa santike pabbajissāmī"ti vutte sesā "mayampi pabbajissāmā"ti vatvā sabbepi ekacchandā hutvā theram pabbajjam yācimsu. Thero Samkiccasāmanero viya sabbepi te pabbājesi. Tato patthāya **Khānukondañño**ti paññāvi. So tehi bhikkhūhi saddhim Satthu santikam gantvā Satthārā "kim Kondañña antevāsikā te laddhā"ti vutte tam pavattim ārocesi. Satthā "evam kira bhikkhave" ti pucchitvā "āma bhante, na no aññassa evarupo anubhavo ditthapubbo, tenamha pabbajita"ti vutte "bhikkhave evarūpe duppaññakamme patitthāya vassasatam jīvanato idāni vo paññāsampadāya vattamānānam ekāhampi jīvitam seyyo"ti vatvā anusandhim ghatetvā dhammam desento imam gāthamāha—

111. "Yo ca vassasatam jīve, duppañño asamāhito. Ekāham jīvitam seyyo, paññavantassa jhāyino"ti.

Tattha **duppañño** nippañño. **Paññavantassā**ti sappaññassa. Sesam purimasadisamevāti.

Desanāvasāne pañcasatāpi te bhikkhū saha paṭisambhidāhi arahattam pāpuṇimsu, sampattamahājanassāpi sātthikā dhammadesanā ahosīti.

Khāņukoṇḍaññattheravatthu dasamam.

### 11. Sappadāsattheravatthu

Yo ca vassasataṁ jīveti imaṁ dhammadesanaṁ Satthā Jetavane viharanto Sappadāsattheraṁ ārabbha kathesi.

Sāvatthiyam kireko kulaputto Satthu dhammadesanam sutvā pabbajitvā laddhūpasampado aparena samayena ukkanthitvā "mādisassa kulaputtassa gihibhāvo nāma ayutto, pabbajjāya thatvā maranampi me seyyo"ti cintetvā attano maranūpāyam cintento vicarati. Athekadivasam pātova katabhattakiccā bhikkhū vihāram gantvā aggisālāya sappam disvā tam ekasmim kute pakkhipitvā kutam pidahitvā ādāya vihārā nikkhamimsu. Ukkanthitabhikkhupi bhattakiccam katvā āgacchanto te bhikkhū disvā "kim idam āvuso"ti pucchitvā "sappo āvuso"ti vutte iminā kim karissathāti. Chaddessāma nanti. Tesam vacanam sutvā "iminā attānam damsāpetvā marissāmī"ti "āharatha, aham tam chaddessāmī"ti tesam hatthato kutam gahetyā ekasmim thāne nisinno tena sappena attānam damsāpeti, sappo damsitum na icchati. So kute hattham otāretvā ito cito ca āloleti, ghorasappassa mukham vivarityā angulim pakkhipati, neva nam sappo damsi. So "nāyam āsīviso, gharasappo eso"ti tam pahāya vihāram agamāsi. Atha nam bhikkhū "chaddito te āvuso sappo"ti āhamsu. Na so āvuso ghorasappo, gharasappo esoti. "Ghorasappoyevāvuso mahantam phanam katvā susuyanto dukkhena amhehi gahito, kim kāraņā evam tvam vadesī"ti āhamsu. Aham āvuso tena attānam damsāpentopi mukhe angulim pakkhipentopi tam damsapetum nasakkhinti. Tam sutva bhikkhu tunhi ahesum.

Athekadivasam nhāpito dve tayo khure ādāya vihāram gantvā ekam bhūmiyam ṭhapetvā ekena bhikkhūnam kese ohāreti. So bhūmiyam ṭhapitam khuram gahetvā "iminā gīvam chinditvā marissāmī"ti ekasmim rukkhe gīvam upanidhāya khuradhāram galanāļiyam katvā ṭhito upasampadāmāļato¹ paṭṭhāya attano sīlam āvajjento vimalacandamaṇḍalam viya sudhotamaṇikhandhamiva ca nimmalam sīlam addasa. Tassa tam olokentassa sakalasarīram pharantī pīti uppajji. So pītim vikkhambhetvā vipassanam vaḍḍhento saha paṭisambhidāhi arahattam patvā khuram ādāya vihāramajjham pāvisi. Atha nam bhikkhū "kaham gatosi āvuso"ti pucchimsu. "Iminā khurena galanālim

chinditvā marissāmī"ti gatomhi āvusoti. Atha kasmā na matosīti. Idānimhi sattham āharitum abhabbo jāto. Ahañhi "iminā khurena galanāļim chindissāmī"ti ñāṇakhurena sabbakilese chindinti. Bhikkhū "ayam abhūtena aññam byākarotī"ti Bhagavato ārocesum. Bhagavā tesam katham sutvā āha "na bhikkhave khīṇāsavā nāma sahatthā attānam jīvitā voropentī"ti. Bhante tumhe imam "khīṇāsavo"ti vadatha, evam arahattūpanissayasampanno panāyam kasmā ukkaṇṭhati, kimassa arahattūpanissayakāraṇam kasmā so sappo etam na ḍamsatīti. Bhikkhave so tāva sappo imassa ito tatiye attabhāve dāso ahosi, so attano sāmikassa sarīram ḍamsitum na visahatīti. Evam tāva nesam Satthā ekam kāraṇam ācikkhi. Tato paṭṭhāya ca so bhikkhu Sappadāso nāma jāto.

Kassapasammāsambuddhakāle kireko kulaputto Satthu dhammakatham sutvā uppannasamvego pabbajitvā laddhūpasampado aparena samayena anabhiratiyā uppannāya ekassa sahāyakassa bhikkhuno ārocesi. So tassa abhinham gihibhave adinavam kathesi. Tam sutva itaro sasane abhiramitva pubbe anabhiratakāle malaggahite samanaparikkhāre ekasmim Sonditīre nimmale karonto nisīdi. Sahāyakopissa santikeyeva nisinno. Atha nam so evamāha "aham āvuso uppabbajanto ime parikkhāre tuyham dātukāmo ahosin"ti. So lobham uppādetvā cintesi "iminā mayham pabbajitena vā uppabbajitena vā ko attho, idāni parikkhāre gaņhissāmī"ti<sup>1</sup>. So tato patthāya "kim dānāvuso amhākam jīvitena, ye mayam kapālahatthā parakulesu bhikkhāya carāma, puttadārehi saddhim ālāpasallāpam na karomā"ti-ādīni<sup>2</sup> vadanto gihibhāvassa gunam kathesi. So tassa katham sutvā puna ukkanthito hutvā cintesi "ayam mayā 'ukkanthitomhī'ti vutte pathamam gihibhāve ādīnavam kathetvā idāni abhinham guņam katheti, kim nu kho kāraņan"ti cintento "imesu samanaparikkhāresu lobhenā" ti ñatvā sayameva attano cittam nivattesi. Evamassa Kassapasammāsambuddhakāle ekassa bhikkhuno ukkanthāpitattā idāni

anabhirati uppannā. Yo pana teneva tadā vīsati vassasahassāni samaņadhammo kato, svassa etarahi arahattūpanissayo jātoti.

Imamattham te bhikkhū Bhagavato santikā sutvā uttarim pucchimsu "bhante ayam kira bhikkhu khuradhāram galanāļiyam katvā thitova arahattam pāpuṇāti, uppajjissati nu kho ettakena khaṇena arahattamaggo"ti. "Āma bhikkhave, āraddhavīriyassa bhikkhuno pādam ukkhipitvā bhūmiyam thapentassa pāde bhūmiyam asampatteyeva arahattamaggo uppajjati. Kusītassa puggalassa hi vassasatam jīvanato āraddhavīriyassa khaṇamattampi jīvitam seyyo"ti vatvā anusandhim ghaṭetvā imam gāthamāha—

112. "Yo ca vassasatam jīve, kusīto hīnavīriyo. Ekāham jīvitam seyyo, vīriyamārabhato daļhan"ti.

Tattha **kusīto**ti kāmavitakkādīhi tīhi vitakkehi vītināmento puggalo. **Hīnavīriyo**ti nibbīriyo. **Vīriyamārabhato daļhan**ti duvidhajjhānanibbattanasamattham thiram vīriyam ārabhantassa. Sesam purimasadisameva.

Desanāvasāne bahū sotāpattiphalādīni pāpuņimsūti.

Sappadāsattheravatthu ekādasamam.

### 12. Patācārātherīvatthu

Yo ca vassa satam jīveti imam dhammadesanam Satthā Jetavane viharanto Paṭācāram theram ārabbha kathesi.

Sā kira Sāvatthiyam cattālīsakoṭivibhavassa seṭṭhino dhītā ahosi abhirūpā. Tam soļasavassuddesikakāle sattabhūmikassa pāsādassa uparimatale rakkhantā vasāpesum. Evam santepi sā ekena attano cūļūpaṭṭhākena saddhim vippaṭipajji. Athassā mātāpitaro samajātikakule ekassa kumārassa paṭissuṇitvā vivāhadivasam ṭhapesum. Tasmim upakaṭṭhe sā tam cūļūpaṭṭhākam āha "mam kira asukakulassa nāma dassanti, mayi patikulam gate mama paṇṇākāram gahetvā āgatopi tatta pavesanam na labhissasi, sace te mayi sineho atthi,

idāneva mam gahetvā yena vā tena vā palāyassū"ti. So sādhu bhaddeti. "Tena hi aham sve pātova nagaradvārassa asukatthāne nāma thassāmi, tvam ekena upāyena nikkhamitvā tattha āgaccheyyāsī"ti vatvā dutiyadivase sanketatthāne atthāsi. Sāpi pātova kilittham vattham nivāsetvā kese vikkiritvā kundakena sarīram makkhitvā kutam ādāya dāsīhi saddhim gacchantī viya gharā nikkhamitvā tam thānam agamāsi. So tam ādāya dūram gantvā ekasmim gāme nivāsam kappetvā arañne khettam kasitvā dārupannādīni āharati. Itarā kutena udakam āharitvā sahatthā kottanapacanādīni karontī attano pāpassa phalam anubhoti. Athassā kucchiyam gabbho patitthāsi. Sā paripunnagabbhā "idha me koci upakārako natthi, mātāpitaro nāma puttesu muduhadayā honti, tesam santikam mam nehi, tattha me gabbhavutthānam bhavissatī"ti sāmikam yāci. So "kim bhadde kathesi, mam disvā tava mātāpitaro vividhā kammakāranā kareyyum, na sakkā mayā tattha gantun"ti patikkhipi. Sā punappunam yācitvāpi gamanam alabhamānā tassa araññam gatakāle pativissake āmantetvā "sace so āgantvā mam apassanto 'kaham gatā'ti pucchissati, mama attano kulagharam gatabhāvam ācikkheyyāthā"ti vatvā gehadvāram pidahitvā pakkāmi. Sopi āgantvā tam apassanto pativissake pucchitvā tam pavattim sutvā "nivattessāmi nan"ti anubandhitvā tam disvā nānappakāram yāciyamānopi nivattetum nāsakkhi. Athassa ekasmim thāne kammajavātā calimsu. Sā ekam gacchantaram pavisitvā "sāmi kammajavātā me calitā"ti vatvā bhūmiyam nipajjitvā samparivattamānā kicchena dārakam vijāyitvā "yassatthāyāham kulagharam gaccheyyam, so attho nipphanno"ti punadeva tena saddhim geham āgantvā vāsam kappesi.

Tassā aparena samayena puna gabbho patiṭṭhahi. Sā paripuṇṇagabbhā hutvā purimanayeneva sāmikaṁ yācitvā gamanaṁ alabhamānā puttaṁ aṅkenādāya tatheva pakkamitvā tena anubandhitvā "tiṭṭhāhī"ti vutte¹ nivattituṁ na icchi. Atha nesaṁ gacchantānaṁ mahā akālamegho udapādi. Samantā vijjulatāhi ādittaṁ viya meghatthanitehi² bhijjamānaṁ

viya udakadhārānipātanirantaram<sup>1</sup> nabham ahosi. Tasmim khane tassā kammajavātā calimsu. Sā sāmikam āmantetvā "sāmi kammajavātā me calitā, na sakkomi sandhāretum, anovassakatthānam me jānāhī"ti āha. So hatthagatāya vāsiyā ito cito ca upadhārento ekasmim vammikamatthake jātam gumbam disvā chinditum ārabhi. Atha nam vammikato nikkhamitvā ghoraviso āsīviso damsi. Tamkhanaññevassa sarīram antosamutthitāhi aggijālāhi dayhamānam viya nīlavannam hutvā tattheva pati. Itarāpi mahādukkham anubhayamānā tassa āgamanam olokentīpi tam adisvāva aparampi puttam vijāyi. Dve dārakā vātavutthivegam asahamānā mahāviravam viravanti. Sā ubhopi te urantare katvā dvīhi jannukehi ceva hatthehi ca bhūmiyam uppīletvā tathā thitāva ratthim vītināmesi. Sakalasarīram nillohitam viya pandupalāsavannam ahosi. Sā utthite arune mamsapesivannam ekam puttam ankenādāya itaram anguliyā gahetvā "ehi tāta, pitā te ito gato"ti vatvā sāmikassa<sup>2</sup> gatamaggena gacchantī tam vammikamatthake kālam katvā patitam nīlavannam thaddhasarīram disvā "mam nissāya mama sāmiko panthe mato"ti rodantī paridevantī pāyāsi.

Sā sakalarattim devena vuṭṭhattā Acīravatim nadim jaṇṇuppamāṇena kaṭippamāṇena thanappamāṇena udakena paripuṇṇam disvā attano mandabuddhitāya dvīhi dārakehi saddhim udakam otaritum avisahantī jeṭṭhaputtam orimatīre ṭhapetvā itaram ādāya paratīram gantvā sākhābhaṅgam attharitvā nipajjāpetvā "itarassa santikam gamissāmī"ti bālaputtakam pahāya taritum asakkontī punappunam nivattitvā olokayamānā pāyāsi. Athassā nadīmajjham gatakāle eko seno tam kumāram disvā "mamsapesī"ti saññāya ākāsato bhassi. Sā tam puttassatthāya bhassantam disvā ubho hatthe ukkhipitvā "sūsū"ti tikkhattum mahāsaddam nicchāresi. Seno dūrabhāvena tam asutvāva kumārakam gahetvā vehāsam uppatitvā gato. Orimatīre ṭhitaputto mātaram nadīmajjhe ubho hatthe ukkhipitvā mahāsaddam nicchārayamānam

disvā "mam pakkosatī"ti saññāya vegena udake pati. Itissā bālaputtam seno hari, jetthaputto udake vūļho.

Sā "eko me putto senena gahito, eko udakena vūļho, panthe me pati mato"ti rodantī paridevantī gacchamānā Sāvatthito āgacchantam ekam purisam disvā pucchi "kattha vāsikosi tātā"ti. Sāvatthivāsikomhi ammāti. Sāvatthinagare asukavīthiyam evarūpam asukakulam nāma atthi, jānāsi tātāti. Jānāmi amma, tam pana mā pucchi. Sace aññam jānāsi, pucchāti. Aññena me kammam natthi, tadeva pucchāmi tātāti. Amma tvam attano anācikkhitum na desi¹, ajja te sabbarattim devo vassanto diṭṭhoti. Diṭṭho me tāta, mayhameveso sabbarattim vuṭṭho, na aññassa. Mayham pana vuṭṭhakāraṇam pacchā te kathessāmi, etasmim tāva me seṭṭhigehe pavattim kathehīti. Amma ajja rattim seṭṭhiñca seṭṭhibhariyañca seṭṭhiputtañcāti tayopi jane avattharamānam² geham pati, te ekacitakasmim jhāyanti. Esa dhūmo paññāyati ammāti. Sā tasmim khaṇe nivatthavattham patamānam na sañjāni³, ummattikabhāvam patvā yathājātāva rodantī paridevantī—

"Ubho puttā kālakatā, panthe mayham patī mato. Mātā pitā ca bhātā ca, ekacitamhi dayhare"ti<sup>4</sup>—

Vilapantī paribbhami. Manussā taṁ disvā "ummattikā ummattikā"ti kacavaraṁ gahetvā paṁsuṁ gahetvā matthake okirantā leḍḍūhi paharanti. Satthā Jetavanamahāvihāre aṭṭhaparisamajjhe nisīditvā dhammaṁ desento taṁ āgacchamānaṁ addasa kappasatasahassaṁ pūritapāramiṁ abhinīhārasampannaṁ.

Sā kira Padumuttarabuddhakāle Padumuttarasatthārā ekam vinayadharattherim bāhāya gahetvā Nandanavane ṭhapentam viya etadaggaṭṭhāne ṭhapiyamānam disvā "ahampi tumhādisassa Buddhassa santike vinayadharattherīnam aggaṭṭhānam labheyyan"ti adhikāram katvā patthanam ṭhapesi. Padumuttarabuddho anāgatamsañāṇam pattharitvā patthanāya samijjhanabhāvam ñatvā "anāgate Gotamabuddhassa nāma sāsane ayam Patācārā nāmena vinayadharattherīnam

<sup>1.</sup> Amma ācikkhitum na yuttanti. Vadehi me tātāti (Syā)

<sup>2.</sup> Vātavutthi avattharamānam (Ka)

<sup>4.</sup> Khu 4. 238 pitthe Therī-apadāne.

<sup>3.</sup> Na sañjānantī (Syā)

aggā bhavissatī"ti byākāsi. Taṁ evaṁ patthitapatthanaṁ abhinīhārasampannaṁ Satthā dūratova āgacchantiṁ disvā "imissā ṭhapetvā maṁ añño avassayo bhavituṁ samattho nāma natthī"ti cintetvā taṁ yathā vihārābhimukhaṁ āgacchati, evaṁ akāsi. Parisā taṁ disvāva "imissā ummattikāya ito āgantuṁ mā daditthā"ti āha. Satthā "apetha, mā naṁ vārayitthā"ti vatvā avidūraṭṭhānaṁ āgatakāle "satiṁ paṭilabha bhaginī"ti āha. Sā taṁ khaṇaṁyeva Buddhānubhāvena satiṁ paṭilabhi. Tasmiṁ kāle nivatthavatthassa patitabhāvaṁ sallakkhetvā hirottappaṁ paccupaṭṭhāpetvā ukkuṭikaṁ nisīdi. Athassā eko puriso uttarasāṭakaṁ khipi. Sā taṁ nivāsetvā Satthāraṁ upasaṅkamitvā suvaṇṇavaṇṇesu pādesu pañcapatiṭṭhitena vanditvā bhante avassayo me hotha, patiṭṭhā me hotha. Ekañhi me puttaṁ seno gaṇhi, eko udakena vūļho, panthe me pati mato, mātāpitaro ceva me bhātā ca gehena avatthaṭā ekacitakasmiṁ jhāyantīti.

Satthā tassā vacanam sutvā "Paṭācāre mā cintayi, tava tāṇam saraṇam avassayo bhavitum samatthasseva santikam āgatāsi. Yathā hi tava idāni eko puttako senena gahito, eko udakena vūļho, panthe pati mato, mātāpitaro ceva bhātā ca gehena avatthaṭā, evameva imasmim samsāre puttādīnam matakāle tava rodantiyā paggharita-assu catunnam mahāsamuddānam udakato bahutaran"ti vatā imam gāthamāha—

"Catūsu samuddesu jalam parittakam, Tato bahum assujalam anappakam. Dukkhena phuṭṭhassa narassa socanā, Kim kāraṇā amma tuvam pamajjasī"ti.

Evam Satthari **anamataggapariyāyam** kathente tassā sarīre soko tanuttam agamāsi. Atha nam tanubhūtasokam ñatvā puna Satthā āmantetvā "Paṭācāre puttādayo nāma paralokam gacchantassa tāṇam vā leṇam vā saraṇam vā bhavitum na sakkonti, tasmā vijjamānāpi te na santiyeva. Paṇḍitena pana sīlam visodhetvā attano nibbānagāmimaggam khippameva sodhetum vattatī"ti vatvā dhammam desento imā gāthā abhāsi—

"Na santi puttā tāṇāya, na pitā nāpi bandhavā. Antakenādhipannassa, natthi ñātīsu tāṇatā<sup>1</sup>.

Etamatthavassam ñatvā, paṇḍito sīlasamvuto. Nibbānagamanam maggam, khippameva visodhaye"ti².

Desanāvasāne Patācārā mahāpathaviyam pamsuparimāne kilese jhāpetvā sotāpattiphale patitthahi, aññepi bahū sotāpattiphalādīni pāpunimsūti. Sā pana sotāpannā hutvā Satthāram pabbajjam yāci. Satthā tam bhikkhunīnam santikam pahinitvā pabbājesi. Sā laddhūpasampadā patitācārattā **Patācārā**tveva paññāyi. Sā ekadivasam kutena udakam ādāya pāde dhovantī udakam āsinci, tam thokam gantvā pacchijji. Dutiyavāre āsittam tato dūrataram agamāsi. Tatiyavāre āsittam tatopi dūrataranti. Sā tadeva ārammanam gahetvā tayo vaye paricchinditvā "mayā pathamam āsittam udakam viva ime sattā pathamavayepi maranti, tato dūrataram gatam dutiyavāre āsittam udakam viya majjhimavayepi maranti, tatopi dūrataram gatam tatiyavāre āsittam udakam viya pacchimavayepi marantiyevā"ti cintesi. Satthā Gandhakutiyam nisinnova obhāsam pharitvā tassā sammukhe thatvā kathento viya "evametam Patācāre, pañcannampi khandhānam udayabbayam apassantassa vassasatam jīvanato tesam udayabbayam passantassa ekāhampi ekakkhanampi jīvitam seyyo"ti vatvā anusandhim ghatetvā dhammam desento imam gāthamāha—

113. "Yo ca vassasatam jīve, apassam udayabbayam. Ekāham jīvitam seyyo, passato udayabbayan"ti.

Tattha **apassam udayabbayan**ti pañcannam khandhānam pañcavīsatiyā lakkhaṇehi udayañca vayañca apassanto. **Passato udayabbayan**ti tesam udayañca vayañca passantassa. Itarassa jīvanato ekāhampi jīvitam seyyoti.

Desanāvasāne Paṭācārā saha paṭisambhidāhi arahattam pāpuṇi.

Paṭācārātherīvatthu dvādasamam.

#### 13. Kisāgotamīvatthu

Yo ca vassasatam jīveti imam dhammadesanam Satthā Jetavane viharanto Kisāgotamim ārabbha kathesi.

Sāvatthiyam kirekassa setthissa gehe cattālīsakotidhanam angārā eva hutvā atthāsi. Setthi tam disvā uppannasoko āhāram patikkhipitvā mañcake nipajji. Tasseko sahāyako geham gantvā "samma kasmā socasī"ti pucchitvā tam pavattim sutvā "samma mā soci, aham ekam upāyam jānāmi, tam karohī"ti. Kim karomi sammāti. Attano āpane kilañjam pasāretvā tattha te aṅgāre rāsim katvā vikkinanto viya nisīda, āgatāgatesu manussesu ye evam vadanti "sesajanā vatthatelamadhuphānitādīni vikkinanti, tvam pana angāre vikkinanto nisinno"ti. Te vadeyyāsi "attano santakam avikkinanto kim karomī"ti. Yo pana tam evam vadati "sesajanā vatthatelamadhuphānitādīni vikkinanti, tvam pana hirañnasuvannam vikkinanto nisinno"ti. Tam vadeyyāsi "kaham hiraññasuvannan"ti. "Idan"ti ca vutte "āhara tāva nan"ti hattehi paticcheyyāsi. Evam dinnam tava hatthe hiraññasuvannam bhavissati. Sā pana sace kumārikā hoti, tava gehe puttassa nam āharitvā cattālīsakotidhanam tassā nivyādetvā tāya dinnam valanjevyāsi. Sace kumārako hoti, tava gehe vayappattam dhītaram tassa datvā cattālīsakotidhanam niyyādetvā tena dinnam valanjeyyāsīti. So "bhaddako upāyo"ti attano āpane aṅgāre rāsim katvā vikkinanto viya nisīdi. Ye pana nam evamāhamsu "sesajanā vatthatelamadhuphāņitādīni vikkiņanti, kim pana tvam angāre vikkinanto nisinno"ti. Tesam "attano santakam avikkinanto kim karomī"ti paţivacanam adāsi. Athekā Gotamī nāma kumārikā kisasarīratāya **Kisāgotamī**ti paññāyamānā parijinnakulassa dhītā attano ekena kiccena āpaṇadvāram gantvā tam setthim disvā evamāha "kim tāta sesajanā vatthatelamadhuphānitādīni vikkinanti, tvam hiraññasuvannam vikkinanto nisinno"ti. Kaham amma hiraññasuvannanti. Nanu tvam tadeva gahetvā nisinnosīti, āhara tāva nam ammāti. Sā hatthapūram gahetvā tassa hatthesu thapesi, tam hiraññasuvannameva ahosi.

Atha nam setthi "kataram te amma gehan"ti pucchitvā "asukam nāmā"ti vutte tassā assāmikabhāvam ñatvā dhanam patisāmetvā tam attano puttassa ānetvā cattālīsakotidhanam paticchāpesi. Sabbam hiraññasuvannameva ahosi. Tassā aparena samayena gabbho patitthahi. Sā dasamāsaccayena puttam vijāvi. So padasā gamanakāle kālamakāsi. Sā aditthapubbamaranatāya tam jhāpetum nīharante vāretvā "puttassa me bhesajjam pucchissāmī''ti matakalevaram ankenādāya "api nu me puttassa bhesaijam jānāthā"ti pucchantī gharapatipātivā vicarati. Atha nam manussā "amma tvam ummattikā jātā, matakaputtassa bhesajjam pucchantī vicarasī"ti vadanti. Sā "avassam mama puttassa bhesajjam jānanakam labhissāmī"ti maññamānā vicarati. Atha nam eko panditapuriso disvā "ayam mama dhītā pathamam puttakam<sup>1</sup> vijātā bhavissati aditthapubbamaranā, mayā imissā avassayena bhavitum vattatī"ti cintetvā āha "amma aham bhesajjam na jānāmi, bhesajjajānanakam pana jānāmī"ti. Ko jānāti tātāti. Satthā amma jānāti, gaccha, tam pucchāhīti. Sā "gamissāmi tāta, pucchissāmi tātā"ti vatvā Satthāram upasankamitvā vanditvā ekamantam thitā pucchi "tumhe kira me puttassa bhesajjam jānātha bhante"ti. Āma jānāmīti. Kim laddhum vattatīti. Accharaggahanamatte siddhatthake laddhum vattatīti. Labhissāmi bhante. Kassa pana gehe laddhum vattatīti. Yassa gehe putto vā dhītā vā na koci matapubboti. Sā "sādhu bhante"ti Satthāram vanditvā mataputtakam ankenādāya antogāmam pavisitvā pathamagehassa dvāre thatvā "atthi nu kho imasmim gehesiddhatthako, puttassa kira me bhesajjam etan"ti vatvā "atthī"ti vutte tena hi dethāti. Tehi āharitvā siddhatthakesu diyyamānesu "imasmim gehe putto vā dhītā vā matapubbo koci natthi ammā"ti pucchitvā "kim vadesi amma. Jīvamānā hi katipayā, matakā eva bahukā"ti vutte "tena hi ganhatha vo siddhatthake, netam mama puttassa bhesajjan"ti pati-adāsi<sup>2</sup>.

Sā iminā niyāmena ādito paṭṭhāya nam pucchantī vicari. Sā ekavehepi siddhatthake agahetvā sāyanhasamaye cintesi "aho

bhāriyam kammam, aham 'mameva putto mato'ti saññamakāsim, sakalagāmepi pana jīvantehi matakāva bahutarā"ti. Tassā evam cintayamānāya puttasineham¹ mudukahadayam thaddhabhāvam agamāsi. Sā puttam araññe chaḍḍetvā Satthu santikam gantvā vanditvā ekamantam aṭṭhāsi. Atha nam Satthā "laddhā te ekaccharamattā siddhatthakā"ti āha. Na laddhā bhante, sakalagāme jīvantehi matakāva bahutarāti. Atha nam Satthā "tvam 'mameva putto mato'ti sallakkhesi, dhuvadhammo esa sattānam. Maccurājā hi sabbasatte aparipuṇṇajjhāsaye eva mahogho viya parikaḍḍhamānoyeva apāyasamudde pakkhipatī"ti vatvā dhammam desento imam gāthamāha—

"Tam puttapasusammattam, byāsattamanasam naram. Suttam gāmam mahoghova, maccu ādāya gacchatī"ti<sup>2</sup>.

Gāthāpariyosāne Kisāgotamī sotāpattiphale patiṭṭhahi, aññepi bahū sotāpattiphalādīni pāpuṇimsūti.

Sā pana Satthāram pabbajjam yāci, Satthā tam bhikkhunīnam santikam pesetvā pabbājesi. Sā laddhūpasampadā **Kisāgotamī therī**ti paññāyi. Sā ekadivasam uposathāgāre vāram patvā dīpam jāletvā nisinnā dīpajālā uppajjantiyo ca bhijjantiyo ca disvā "evameva ime sattā uppajjanti ceva nirujjhanti ca, nibbānappattā eva³ na paññāyantī"ti ārammaṇam aggahesi. Satthā Gandhakuṭiyam nisinnova obhāsam pharitvā tassā sammukhe nisīditvā kathento viya "evameva Gotami, ime sattā dīpajālā viya uppajjanti ceva nirujjhanti ca, nibbānappattā eva³ na paññāyanti, evam nibbānam apassantānam vassasatam jīvanato nibbānam passantassa khaṇamattampi jīvitam seyyo"ti vatvā anusandhim ghaṭetvā dhammam desento imam gāthamāha—

114. "Yo ca vassasatam jīve, apassam amatam padam. Ekāham jīvitam seyyo, passato amatam padan"ti.

Tattha **amatam padan**ti maraṇavirahitakoṭṭhāsam, amatamahānibbānanti attho. Sesam purimasadisameva.

Desanāvasāne Kisāgotamī yathānisinnāva saha paṭisambhidāhi arahatte patiṭṭhahīti.

Kisāgotamīvatthu terasamam.

#### 14. Bahuputtikattherīvatthu

Yo ca vassasatam jīveti imam dhammadesanam Satthā Jetavane viharanto Bahuputtikam therim ārabbha kathebhi.

Sāvatthiyam kirekasmim kule satta puttā satta ca dhītaro ahesum. Te sabbepi vayappattā gehe patitthahitvā attano dhammatāya sukhappattā ahesum. Tesam aparena samayena pitā kālamakāsi. Mahā-upāsikā sāmike natthepi na tāva kutumbam vibhajati. Atha nam puttā āhamsu "amma amhākam pitari natthe tuyham ko attho kutumbena, kim mayam tam upatthātum na sakkomā"ti. Sā tesam katham sutvā tunhī hutvā punappunam tehi vuccamānā "puttā mam patijaggissanti, kim me visum kutumbenā"ti sabbam sāpateyyam majihe bhinditvā adāsi. Atha nam katipāhaccayena ietthaputtassa<sup>1</sup> bhariyā "aho amhākam ayyā 'jeṭṭhaputto me'ti dve koṭṭhāse datvā viya imameva geham āgacchatī"ti āha. Sesaputtānam bhariyāpi evameva vadimsu. Jetthadhītaram ādim katvā tāsam geham gatakālepi nam evameva vadimsu. Sā avamānappattā hutvā "kim imesam santike vutthena, bhikkhunī hutvā jīvissāmī"ti bhikkhunī-upassayam gantvā pabbajjam yāci. Tā nam pabbājesum. Sā laddhūpasampadā hutvā **Bahuputtikattherī**ti paññāyi. Sā "aham mahallakakāle pabbajitā, appamattāya me bhavitabban"ti bhikkhunīnam vattapativattam karontī "sabbarattim samanadhammam karissāmī''ti hetthāpāsāde ekam thambham hatthena gahetvā tam āviñchamānāva<sup>2</sup> samanadhammam karoti, cankamamānāpi "andhakāratthāne me rukkhe vā katthaci vā sīsam patihaññeyyā"ti tam rukkham hatthena gahetvā tam āvinchamānāva samanadhammam karoti, "Satthārā desitadhammameva karissāmī"ti dhammam āvajjetvā dhammam anussaramānāva samanadhammam karoti.

<sup>1.</sup> Katipāhaccayena jetthaputtassa geham agamāsi, jetthaputtassa (Sī, Ka)

<sup>2.</sup> Āvijjhamānā (Syā)

Atha Satthā Gandhakuṭiyaṁ nisinnova obhāsaṁ pharitvā sammukhe nisinno viya tāya saddhiṁ kathento "Bahuputtike mayā desitaṁ dhammaṁ anāvajjentassa apassantassa vassasataṁ jīvanato mayā desitaṁ dhammaṁ passantassa muhuttampi jīvitaṁ seyyo"ti vatvā anusandhiṁ ghaṭetvā dhammaṁ desento imaṁ gāthamāha—

115. "Yo ca vassasataṁ jīve, apassaṁ dhammamuttamaṁ. Ekāhaṁ jīvitaṁ seyyo, passato dhammamuttaman"ti.

Tattha **dhammamuttaman**ti navavidham lokuttaradhammam. So hi uttamo dhammo nāma. Yo hi tam na passati, tassa vassasatampi jīvanato tam dhammam passantassa pajṭivijjhantassa ekāhampi ekakkhaṇampi **jīvitam seyyot**i.

Gāthāpariyosāne Bahuputtikattherī saha paṭisambhidāhi arahatte patitthahīti.

Bahuputtikattherīvatthu cuddasamam.

Sahassavaggavannanā niţţhitā.

Atthamo vaggo.

### Dhammapadatthakathāya pathamabhāge

# $Sa\dot{m}va\dot{n}\dot{n}itapad\bar{a}na\dot{m}~anukkama\dot{n}ik\bar{a}$

Padānukkamo	Piṭṭhaṅkā	Padānukkamo	Piṭṭhaṅkā	
[ A ]		[ A ]	[ A ]	
Akataññū	396	Anapāyinī	24	
Akiñcano	381	Anavaṭṭhitacittassa	196	
Akkocchi	29	Anavassutacittassa	196	
Agandhakam	242	Anāvilo	375	
Agāraṁ	78	Anāsavassa	390	
Aggiṁ	421	Anikkasāvo	52	
Aggīva gacchati	179	Animitto	386	
Agghati solasim	319	Anivesano siyā	202	
Aciram vata	203	Anissito	388	
Ajini	29	Anuttaram	147	
Aññā nibbānagāminī	344	Anudhammacārī	102	
Aññā hi lābhūpanisā	344	Anudhāvati	379	
Aṇuṁ	179	Anupādiyāno	102	
Atittamyeva	232	Anubrūhaye	345	
Attano natthi	298	Anokaṁ	381	
Attanova avekkheyya	239	Antako	232	
Attahetu	378	Apassam	442	
Attanam	371	Apeto	52	
Attā hi	298	Appakā	379	
Atthapadam	408	Appamattassa	152	
Athāyaṁ	379	Appamattā	146	
Adhammena	378	Appamatto	164, 167, 272	
Adhisessati	203	Appamādamhi	146	
Anatthapadasamhitā	408, 417	Appamādarato	179	
Ananvāhatacetaso	196	Appamādavihārinam	274	

Padānukkamo	Piṭṭhaṅkā	Padānukkamo	Piṭṭhaṅkā
[ A ]		[ A ]	
Appamāde	146	Assaddho	396
Appamādena	178	Assumukho	306
Appamādo	145	Ahāsi	29
Appampi ce	102	[Ā]	
Abalassamva	167	Ākāse	388
Abhabbo	181	_	
Abhāvitam	78	Ādānapaṭinissagge	381
Abhikīrati	162	Āyukkhayena	110
Abhivādanasīlissa	425	Āraddhavīriyam Ā	48
Abhisambudhāno	214	Āvāsesu	329
Amatam padam	445	Ahārakkhayena –	111
Amatapadam	145	Āhāre	388
Amattaññum	47	[1]	
Amitteneva attanā	304	Iccheyya	378
Araññāni	404	Itarā	379
Ariyappavedite	359	Itarā pajā	419
Ariyānam	146	Iti bālassa	329
Avadhi	29	Iti bālo	298
Avijānatam	289	Idha	99
Avekkhati	165	Idha tappati	97
Averena	33	Idha vā	102
Asamvutam	47	Idha socati	83
Asatam	349	Indakhilupamo	392
Asantam	328	Indriyāni	390
Asabbhā ca	349	Indriyesu	47, 48
Asarīram	193	Imam sadevakam	212
Asāradassino	73	illialli Saucvakalli	212
Asāre	73	[U]	
Asubhānupassim	48	Uccāvacam	377
Asoko	165	Ujjhitasmiṁ	280

Padānukkamo	Piṭṭhaṅko	Padānukkamo	Piṭṭhaṅko
[ U ]		[0]	
Ujjugatesu	422	Okamokato	183
Uṭṭh <b>ā</b> navato	152	Okā	381
Udakaṁ	371	Ogho	162
Udayabbayam	442	Ovadeyya	349
Upadhiviveko	345	[ Ka ]	
Upasantassa	395	Kaṭukapphalaṁ	304
Upasammati	408	Kanham dhammam	380
Upeto	52	Katapuñño	85, 99
Ubbhato	183	Kammakiliṭṭhaṁ	83
Ubhayattha	97, 99	Kammavisuddhim	85
Ubhayattha modati	85	Kammasannicayo	386
Ubhayattha socati	83	Kayirā	206, 264
Uyyuñjanti	385	Kayirātha	162
Usukārā	371	Karoti vā	15, 24
Usukārova	182	Kalam	319
[E]		Kāmakāmā	377
Ekaṁ	408	Kāmagavesino	404
Ekaghano	372	Kāmaratisanthavam	164
Ekacaram	193	Kāmesu	232
Ekacariyam	296	Kāyaviveko	345
Etesam	267	Kuto dhanam	299
Evam	242	Kuto puttā	299
Evam game	237	Kubbato	242
Evam dhammāni	375	Kumbhūpamam	201
Evametam	344	Kurute	232
Esa dhammo	33	Kusalo	212
[0]		Kusītaṁ	47
Okamokaṁ	385	Kusīto	437
Okamokata-ubbhato	183	Ko	212

Padānukkamo	Piṭṭhaṅkā	Padānukkamo	Piṭṭhaṅkā
[ Ka ]		[ Ca ]	
Ko imam	212	Cittaviveko	345
Ko pacessati	213	Cittassa damatho	188
Ko pana		Cūļapanthako	154
[ Kha - Ga ]		[ Cha - Ja - Jh	a ]
Khippam	302	Chāyāva	24
Gataddhino	383	Chuddho	204
Gati	387	Jantu	421
Gato	178	Jāgarato bhayam	197
Gambhīro	375	Jitaṁ	419
Garahito	178	Jitañca rakkhe	201
Gāthāsatam	417	Jīvitaṁ	432
Guhāsayam	194	Jutimanto	381
Gocare	146	Jeyyamattānaṁ	418
Gocaro	387	Jotiraso	127
[ Ca ]		Jhāyino	432
Cakkaṁva	15	[ Ña - Ḍa ]	
Cajanti	377	Nattam	326
Cattāro dhammā	425	Ñatvā	146
Candanam	267	Paham Paham	179
Capalam	182	Pahantam Pahantam	323
Caram	296	Panamam	323
Caranti	304	[ Ta ]	
Cittam	182	Taṁ kammaṁ	310
Cittam guttam	191	Tam ve	48
Cittam dantam	188	Tagaramallikā vā	267
Cittam rakkhetha	191	Tacchakā	371
Cittam samyamessanti	194	Tato	15, 24, 42
Cittaklesehi	381	Tato kare	206, 211
Cittamidam țhapetvā	201	Tatrābhiratimiccheyya	381

Padānukkamo	Piṭṭhaṅkā	Padānukkamo	Piṭṭhaṅkā
[ Ta - Tha ]		[ Da ]	
Tādi	392	Duppañño	434
Tādino	390, 392, 395	Dummedhā	304
Tādisaṁ	348	Dummedhino	164
Tejanam	182, 371	Durannayam	388
Te jhāyino	147	Durannayā	387
Tena so	300	Dussīlo	432
Tesam	274	Dūrakkham	182
Te sāram	73	Dūraṅgamaṁ	193
Thale khitto	183	Devānam	178
Thūlaṁ	179	[Dho]	
[ Da ]	1	[ <b>Dha</b> ] Dhanaṁ	378
Dabbī sūparasam ya		Dhanam me atthi	298
Damayanti	371		152
Damasaccena	52	Dhammajīvino Dhammapadam	212, 417
Dassayanti	377	Dhammapīti	359
Daļham	437	Dhammamuttamam	339 447
Daļham kayirā	296	Dhammassa hoti	102
Daļhaparakkamā	147	Dhammā	14, 24
Dāruṁ	371	Dhammāni	375
Disodisam	209	Dhammānuvattino	379
Disvā	83	Dhammiko	379
Dīghaṁ	289		
Dīghā	288	Dhamme	379
Dīpaṁ	162	[ Na ]	
Dukkhamanveti	15	Nam 15,	24, 206, 211
Dukhena	377	Nagarūpamam	201
Duggatim gato	97	Na tam	210
Ducchannam	78	Na taṁ kammaṁ	306
Dunniggahassa	187	Natthi bāle	296
Dunnivārayam	182	Namayanti	371

Padānukkamo	Piṭṭhaṅkā	Padānukkamo	Piṭṭhaṅkā
[ Na ]		[ Pa ]	
Nayanti	371	Papupphakāni	214
Naro	396	Pabbataṭṭhova	165
Nikete	385	Pamattesu	167
Niggayhavādim	348	Pamādaṁ	164
Niccam	147	Pamāde	179
Nidhīnam	347	Pamādo	146, 178
Nindāpasamsāsu	372	Pamodanti	146
Nibbānasseva santike	181	Parakulesu ca	329
Niratthaṁva kaliṅgarar	in 204	Parikkhīṇā	388
Nisammakārino	152	Paricare	421
Nudati	165	Pariññātabhojanā	386
Nupanayhanti	29	Paridahissati	52
Nettikā	371	Parinibbutā	381
rn i		Paripūrati	196
[ Pa ]	221	Paripphandatidam cittam	183
Pacinantam	231	Pariplavapasādassa	196
Paccayasannicayo	386	Pariyodapeyya	381
Pajā	379	Parihānāya	181
Paññavantassa	434	Pariļāho	383
Paññavā	379	Pare	42
Paññā	196	Paresam katākatam	239
Paṇḍitaṁ	348	Paresam vilomāni	239
Paṇḍitaṁ payirupāsati	302	Paleti	236
Paṇḍitā	146, 371-2	Pavattāram	347
Paṇḍito	380	Pavāyati	267
Paṇḍito vāpi	300	Pasamsanti	178
Pathavim	203	Pasannena	24
Pathavisamo	392	Pasahati	47
Padam	15, 146, 388	Passato	442
Padutthena	15	Pahātave	183

Padānukkamo	Piṭṭhaṅkā	Padānukkamo	Piṭṭhaṅkā
[ Pa ]		[ Pha ]	
Pahīnamānassa	390	Phandanam	182
Pāpam na paccati	312	Phuṭṭhā	377
Pāpam me	97	Phusanti	147
Pāpakārī	83, 97	Pheṇūpamam	214
Pāpamittā	350	[ Ba ]	
Pāpiyo	206, 348	Bahujāgaro	167
Pāragāmino	379	Bālamanveti	323
Pāramessanti	380	Bālā	164, 304
Pāvako	323	Bālānam	289
Piyo hoti	349	Bālo	300, 319
Pihayanti	390	Buddhassa	345
Puññam me	99	Byāsattamanasaṁ naraṁ	
Puññakkhayena	111	•	,
Puññapāpapahīnassa	197	[ Bha ]	2.40
Puññapekkho	422	Bhajamānassa	348
Puttamicche	378	Bhamaro	236
Puttā me atthi	298	Bhayadassi vā	179
Puthujjane	281	Bhasmacchannova	323
Puppham	212, 236	Bhāvitattānam	420
Pupphagandho	267	Bhāvetha	380
Puppharāsimhā	264	Bhāsati vā	15, 24
Pupphāni heva	231	Bhāsamāno	101
Pubbaṅgamā	14, 24	Bhiyyo	99
Purisādhamā	350	Bhiyyo tappati	97
Purisuttamo	396	Bhūmaṭṭhe	165
Purekkhāram	329	Bhūmirāmaņeyyakam	400
Pūjanā	420	Bhojanamhi	47-8
Pūjā	329	[ Ma ]	
Pecca	97, 99	Maggam	274
Pecca socati	83	Maghav <del>ā</del>	178

Padānukkamo	Piṭṭhaṅkā	Padānukkamo	Piṭṭhaṅkā
[ Ma ]		[ Ma ]	
Maccudheyyam	380	Medhāvim	348
Maccuno	146	Medhāvī	164, 191
Maccena	264	Mokkhanti	194
Mattaññum	48	[ Ya ]	
Madhuvā	312	Yaṁ katvā	310
Manam	395		
Manasā	15	Yam kiñci	422
Mano	14, 24	Yajetha	420, 422
Manopubbangamā	14, 24	Yattha	404
Manomayā	15, 24	Yatthakāmanipātinam	191
Manoramam	280	Yatthakāmanipātino	187
Manosetthā	15, 24	Yathā matā	146
Mameva kata maññantu	329	Yadā ca	312
Mamevātivasā assu	329	Yamalokañca	212-3
Marīcidhammam	214	Yasobhivaḍḍhati	152
Mahāpathe	280	Yassa	390
Mah <del>a</del> panthako	154	Yassāsavā	388
Mānuse	418	Yāva	312
Māradheyyam	183	Yāvadeva	326
Mārabandhanā	194	Yiṭṭhaṁ	422
Mārassa	214	Ye ca tam	29
Māro	274	Ye ca tattha	42
Mālāguņe bahū	264	Ye cittam	194
Micchāpaņihitam cittam	206	Ye pamattā	146
Mīyanti	146	Yesam	386
Muddham	326	Yo	418
Munī care	237	Yogakkhemam	147
Muhuttamapi ce	302	Yo ca sīlavatam	272
Me	29	Yojanam	289
Medhagā	42	Yo bālo	299

Padānukkamo	Piṭṭhaṅkā	Padānukkamo	Piṭṭhaṅkā
[ Ra - La ]		[ Va ]	
Raṭṭhaṁ	378	Viññū	302
Ratā	146	Vindati	274
Ramaṇīyāni	404	Vipātayam	326
Ramanti	385	Vippamuttassa	383
Ramissanti	408	Vippasannena	359
Rahado	375, 392	Vippasanno	375
Rukkhamva dubbalam	47	Vippasīdanti	375
Ruciram	242	Vippahāya	380
Lapayanti	377	Vimuttassa	395
Lahuno	187	Vimuttānaṁ	274
Loke	381	Vimokkho	387
[ Va ]		Virujjhati	392
Vajjadassinam	347	Vivekaṁ	345
Vannavantam	242	Visesato	146
Vane	421	Visokassa	383
Vantakasāva'ssa	52	Vihaññati	298
Vantāso	396	Viharantam	47
Vasam	232	Vītarāgā	404
Vassasatam	432	Vīriyamārabhato	437
Vassikī	267	Vuḍḍhāpacāyino	425
Vahato	15	Verī vā pana	206
Vāti devesu uttamo	272	Verena	33
Vātena	372	[Sa]	
Vāto	47	Samyojanam	179
Vārijova	183	Samvaccharam	422
Vicessati	212	Saṁsārā	392
Vijānanti	42	Saṁsāro dīgho	289
Vijānāti	302	Samhitam	101
Vijjati	383	Sagandhakam	242

Padānukkamo	Piṭṭhaṅkā	Padānukkamo	Piṭṭhaṅkā
[ Sa ]		[ Sa ]	
Saṅkāradhānasmim	280	Samatham	390
Saṅkārabhūtesu	280	Samiñjanti	372
Sankhātadhammānam	319	Samiddhimattano	378
Saṅgāmajuttamo	418	Samīrati	372
Saṅgāme	418	Sampannasīlānam	274
Sajjukhīramva	323	Sammati	29
Saññatassa	152	Sammadakkhāte	379
Satam	420	Sammadaññā	274, 395
Satam hi so	349	Sammanti	33, 42
Satañca gandho	267	Sammā cittam	381
Satīmato	152	Sammāpaņihitam	210
Satīmanto	385	Sambodhiyangesu	381
Sadā	178	Sa ve	52, 418
Sadā ramati	359	Sa ve bālo	300
Saddhammam	289	Sahassam	418
Saddhammam avijānato	196	Sahassamapi	408
Sanantano	33	Sahassena	418, 420
Santam	395	Sahāyatā	296
Santassa	289	Sātatikā	147
Sandhicchedo	396	Sādhu	306
Sannicayo	386	Sārañca	73
Santo	377	Sārathinā	390
Sappurisā	377	Sāramatino	73
Sappuriso	267	Sāre	73
Sabbaganthappahīnassa	383	Sāvako bhikkhu	345
Sabbattha	377	Sīlavantassa	432
Sabbadhi	383	Sīlesu	52
Sabbā disā	267	Sukkaṁ	380
Samam	420	Sukkamsam	326
Samativijjhati	78	Sukham seti	359

Padānukkamo	Piṭṭhaṅkā	Padānukkamo	Piṭṭhaṅkā
[ Sa ]		[ Sa ]	
Sukhamanveti	24	Seṭṭhataṁ	178
Sukhāvaham	188, 191	Seyyam sadisamattano	296
Sukhena	377	Seyyaso	211
Sucikammassa	152	Seyyo	418, 420
Sucigandham	280	Seyyo hoti	348
Suññato	386	Selo	372
Suttam gāmam	229	So	52, 83, 319
Suttesu	167	Sokinim pajam	165
Sudantā	390	Socati	83
Suduttaram	380	F T T T	
Sududdasam	191	[ Ha ]	
Sudesitam	212	Haṁsāva	385
Sunipuṇam	191	Hatāvakāso	396
Subbato	392	Hanti	326
Subhānupassim	47	Have	419
Subhāvitam	78, 381	Hitvā kāme	381
Subhāsitā vācā	242	Hitvā yāti	167
Sumedhaso	167	Hīnavīriyam	47
Susamvutam	48	Hīnavīriyo	437
Susamāhito	52	Hutaṁ	422
Sekho	213	Huraṁ vā	102

# Dhammapadaṭṭhakathāya paṭhamabhāge

# Lakkhitabbapadānam anukkamaņikā

Padānukkamo	Piţţhaṅkā	Padānukkamo	Piţţhaṅkā	
[ A ]		[ A ]		
Aggadakkhiņeyyabhāva	183	Appamattānam ubhayat	tha	
Attanā ca deti parañca		modanatā	85	
samādapeti	360	Appassutapuggalānam		
Attanāpi na deti parampi		dhammo	102	
samādapeti 360		Abhivādanādīnam ānisamsā		
Attanāva dānam deti para		cattāro	425	
samādapeti	360	Amitabhogā pañca	243	
Addhā dve	383	Arakkhitabbaṭṭhāne rak		
Addhikānam dinnam		Arahattapattānam	majara 5	
sahassānisaṁsaṁ	283	ekantavippasannāva	375	
Anāgāmi-ariyasāvakānan		Ariyadhanānam sattann		
samādānavasena uposa		lokuttaradāyajjatā	75	
kammam nāma natthi	240		302-3	
Anāgāmino pakatiyāva		Ariyadhanāni satta		
ekabhattikā ca	240	Ariyasāvakānam kiccār		
brahmacārino ca	240	Aruṇavatīmattika	283	
Anupubbikathā	4	Avīcisantāpa	81	
Anuruddhādīnam	0.0	Asāreti ettha asāradhan		
laddhadhammavisesā	89	Asuravimāna	173	
Anuruddhassa pabbajjā	87-8	Ahipeta	320-1	
Anojādevī	353	Ahipetassa atītavatthu	322	
Antarāyānam paṭibāhana		Ahivātarogena		
kāraņāni	423-4	maraṇānukkamo	120, 147	
Aparacchānadī	355	Agārikā, nāgārikānam		
Appam dinnam bahum h		dhammajīvikatā	152	
bahum dinnam bahutar				
Appamattānam ubhayattl		[Ā]		
nandanatā	99	Āyuvaḍḍhanakumāra	424	

Padānukkamo	Piṭṭhaṅkā	Padānukkamo Piṭṭha	aṅkā
[I]		[ Ka ]	
Itthīnam cīvaradānam m	nahā-	Kalaṁ nāgghati soļasiṁ 319,	320
latāpasādhanam labhi	249	Kalyāṇāni pañca	244
Idhamodanapeccamodar	nānaṁ	Kāmagavesakānam aramaņa-	
visesatā	85	ṭṭhānameva vītarāgānaṁ	
Idhasocanapeccasocanā	naṁ	ramaṇaṭṭhānaṁ 40	03-4
visesat <del>ā</del>	83	Kāyikapariļāha	383
		Kāsāvajātaka :	50-1
[U]		Kāļayakkhiniyā	
Utena	105	sakkārakāraṇaṁ	34
Uttamagandhā tayo	265	Kisāgotamī	443
Upatissakolitavatthu	56, 61	Kulānaṁ upagamanā,	
Uppalavaṇṇā	310	nupagamanaṅgāni nava	217
Uruvelakassapādīnam		Koṭṭhāsā pañca	387
atītavatthu	63-5	Koṇḍaññattherassa	
[E-O]		atītavatthu	61-3
Ekapadavārassa		Kosambiyaṁ	
kusaladhammā chapai	ĭñāsa 230	samghabhedassa kāraņam	35
•		Kosalassa mahāyañño	285
Ekavācāyapi atthanissita		[ Kha ]	
	8, 412, 417	Khamāpanānisamsa	329
Erāvaņo nāma hatthī	173	Khāṇukondañña	434
Ehibhikkhu	356	Khīṇāsavānam akujjhanatādīni	
Ovādā, nusāsanānam		Khīnāsavānam katthaci	312
visesatā	349	alaggatāva	385
[ Ka ]		Khīṇāsavāṇaṁ parilāho na	505
Kathitadhammānam sav	anā-	vijjati	383
savanādīni	241-2	Khīṇāsavānaṁ maraṇacetanā	303
Kantāraddhā	383	natthi	13
Kammasarikkhakavipāk		Khujjuttarāya pubbakammam	144
	~ <b>_</b>	12114)Juliara ja puodakainintaini	

Padānukkamo	Piṭṭhaṅkā	Padānukkamo	Piṭṭhaṅkā
[ Ga - Gha ]		[ Ta - Da ]	
Ganthadhuram	5	Te sāranti ettha sāradhar	nmā
Gandhajātānam sīlagand	ho	cha	73
anuttaro	267	Dānacatukka 49	9, 359, 360
Gandhajātāni tīņi	265-6	Dānānisamsacatukka	49
Gahaṭṭha,pabbajitānam		Du-Sa-Na-So	287-288
pamādatā	146	Devadattassa Ajātasattus	smiṁ
Ghosakadevaputta	110, 113	palobhanam	89, 90
[ Ca ]		Devadattassa pathavim	
Cattāro janā javamānā		paviṭṭhatā	94, 95
na sobhanti	246	Devadattassa pabbajjānu	l <b>-</b>
Candapajjotassa	2.0	jānanakāraṇaṁ	95
atītavatthu	126-7	Devadattassa Bhagavati	
Candabhāgā nadī	355	āghātabandhanam	90
Cavanāni devalokato		Deva, manussānam	
cattāri	110-1	āyuppamāṇāni	231
Cittappasādassa sirisamp	attikā 17	Desanādhammo	14
Cittassa upakkilitthatā	15	[ Dha ]	
Cittassa pabhassaratā	15	Dhanañcayasetthino ovā	dā
Cittassa pubbakammam	332	dasa	251, 254-5
Cittahatthatthera	195	Dhammam pivati nāma	359
Cūļapanthakassa atītavat	thu 159	Dhammapadāni cattāri	417-8
Cetasikapariļāha	383	Dhammassa sahāyatā	296
Corapapāta	414	Dhammā cattāro	14
[ Jha - Ña - Ṭha	.]	[ Na ]	
Jhānaṁ duvidhaṁ	147	Natthipūvam	86-7
Ñāṇaphusanā	147	Nadiyo tisso	355
Ñātakānaṁ chāyā sītalā	226	Nāradajātaka	26, 28
Ţhānantarappattānam		Nigamavāsitissattherassa	ì
abhinīhārasampannatā	216	atītavatthu	180

Padānukkamo	Piṭṭhaṅkā	Padānukkamo	Piṭṭhaṅkā
[ Na ]		[ Pa - Pha ]	
Nibbānassa suññatādi-		Panthaka (mahā, cūļa)	153-4
nāmāni	386-7	Pamattapuggalānam dha	mmo 102
Nimittānukkama	54	Pamattassa apāyā	
Nissattadhammo	14	sakagehasadisat <del>a</del>	6
Nīlavāhinī nadī	355	Pamattā, pamattānam	
Miavaiiiii naui	333	jīvājīvatā	145
[ Pa ]		Pamattāpamattānam	4.46
Paṁsukūlacīvara	387	matāmatatā	146
Paccūsakāle	203	Pamādavihārino ubhaya	
Paññavanto sacakkhuk	ā nāma 280	tappanatā	97
Paññācakkhuvirahitā a	ndhā	Pamādavihārino ubhaya socanatā	ша 82
nāma	280	Param samādapeti attan	
Pañhā cattāro	370	na deti	360
Paṭācāra	442	Paradārakammassa ānis	
Paṭācārāya atītavatthu	440	Parinibbānāni dve	381
Paṭipatti, paṭivedha-	770	Pariyattidhammo	14
	atā 301	Parivitakkānam na	
dhammānam jānājān		maggaphalapaṭivedhā	70
Paṇḍita	367	Pariļāho duvidho	383
Paṇḍitamānī	300	Pāradārikakammassa	
Paņḍitasāmaņerassa		ānisamsā	285-7
atītavatthu	359	Pāricchattakarukkha	173, 267
Paṇḍitānam neva atta-		Palileyyahatthivatthu	37, 41
paratthahetu pāpam	karoti 378	Pālileyyahatthinā	
Paṇḍitena pacchānutap	ppa-	Bhagavato upaṭṭhānan	
kammam na kattabb	am 306	Pupphagandho	265-6
Paṇḍukambalasilā	173	Pūtigattatissattherassa	204.5
Patipūjikā	230	atītavatthu	204-5
Padacetiyam adhitthāy		Pemam aṭṭhimiñjam āha thitam	116
paññāyati	129	ımam Phusanā dve	147
Pamayan	12)	i ilusalia uvo	14/

Padānukkamo	Piṭṭhaṅkā	Padānukkamo	Piṭṭhaṅkā
[ Ba - Bha ]		[ Ma ]	
Bandhulasenāpati	215, 222	Mahākappinattherassa	
Bahujanā Buddhānam		atītavatthu	351
āgamanam paccāsīsant		Mahākassapattherasaddh	i-
Bahuputtikattherī	446	vihārikassa atītavatthu	295
Buddhavacanam kathiyan			360
nam appamādatā	145	Mahāduggata	300
Buddhassa ñātikulasahas		Mahāpālattherassa	
dve asīti	3	andhakāraṇaṁ	13-4
Buddhassa candopamatā	256	Mahāpālattherassa	
Buddhānam		arahattappattatā	8
uppannādhikaraṇaṁ sattāhameva	136	Mahāpālassa	
Buddhā nāma ekatthāne	130	pabbajjūpasampadā	4, 5
nibaddhabhikkham na		Mahāpuññā pañca	243
ganhanti	216	Mahābhinikkhamanam	53
Bhagavato Pālileyyaka-	210	Mahālatāpasādhanalābhā	
vanasaņde vassūpagam	anam 37	itthiyo tissova	260
Bhojane amattaññutā	47	•	
		Mahālatāpasādhanassa vi	
[ Ma ]	29.0	Mahāvilokanāni pañca	. 53
Makkaṭadevaputtavatthu	38-9 169	Mātāpitaro puttānam dha	
Maghassa atītavatthu Maghassa itthiyo	109	dātukāmatā	211
catasso	171, 174	Micchādiţţhikānam	
Macchānam dinnam	171, 174	akkosanādīni	135-6
satānisamsam	283	Mūlagandho	265-6
Matthakundalino devalok		Mettasuttānisamsa	200, 201
pattikāraņam	17-8	Mettāya ānisamsā	139
Matakā eva bahukā	444	[ Ya - Ra ]	
Manaso dhammānam			nom
pubbaṅgamatā	15, 24	Yasakulaputtappamukhāi	
Maraṇassa abhāyakasatto	)	atītavatthu	63
nāma natthi	84	Ratanattayaguṇānam	
Mallikāya atītavatthu	290	ānubhāvā	355

Padānukkamo	Piṭṭhaṅkā	Padānukkamo	Piṭṭhaṅkā
[ La ]		[ Sa ]	
Laddhabyākaraņā tevīsa	. 53	Samkicca	426
Lābhūpanisā	344	Samvaccharam yajatopi	
Lokavolokanāni dve	203	vandanaṁ mahapphala	ıtaram 422
[ Va ]		Sakkassa nāmalābha-	
Vaṭṭaddhā	383	kāraņāni	168
Vanavāsītissa (3)	338	Sakkassa maņipallaṅko	174
Vassasatam aggipāricari		Sakkassa vatapadāni	
taṁkhaṇamattā pūjā	ryayapı	satta	168, 172
mahapphalatarā	421	Saṭṭhikūṭapetassa atīta-	
Vassasatam jīvanato ekā		vatthu	324
jīvitam seyyo	432, 434,	Sattaratanavassa	365
• • •	,	Saddhāya lokiya-	
437, 442, 445, 447		lokuttarat <del>ā</del>	48
Vassasatam dinnadānato	•	Sannicayā dve	386
kaṭacchubhikkhāmatta	420	Sappadāsa	436
mahapphalataram	420 126	Sappadāsattherassa atīta-	
Vāhanāni pañca		vatthu	436
Vipassanādhuram	5	Sappurisānam sukhita, d	
Vipākaphusanā	147	kālepi nibbikārāva	376-7
Vimuttiyo pañca	274	Sabbaññutaññāṇalābho	55
Vivaṭanakkhattadivasa	245	Samaṇadhamma	185
Vivekānam		Samānadevaputtā tayo	269
paramparakāraņatā	345	Sarīram jhāpetvā thūpam	1
Vivekānam sanganika-		karotha	412
vinodanatā	345	Sāmāvatī	122
Visākhāya atītavatthu	263	Sāmāvatiyā atītavatthu	143
Visākhāya udānagāthāy	0	Sāyaṁ	203
pañca	262-3	Sāragandho	265-6
Vejayanto nāma pāsādo	173	Sāriputtattherassa ciratar	ena
Verānam vūpasamūpāyo	33	sāvakapāramiñāṇapatta	atā 61

Padānukkamo	Piţţhaṅk <b>ā</b>	Padānukkamo	Piṭṭhaṅkā
[ Sa ]		[ Sa ]	
Sāriputtamoggallānā	nam	Subhānupassī nāma	47
atītavatthu	66, 72	Sumanādevīvatthu	97
	ŕ	Sekhāsekhānam caraņatā	237
Sāvatthiyā ariyasāva		Setthīnam vihārā tayo	133
manussā pañcakoţ	imatt <del>ā</del> 4	Sotāpannopi uppanna-	
Sāsane dhurāni dve	5	sokassa nādhivāsanatā	98
Sīvalittherassa pubb	akammaṁ 401	Soreyyatthera	210
Sudassanam nāma k	umbhaṁ 174	Sosānikadhutaṅgadharass	sa
Suddhodanassa mag	galābho 74, 75	vattāni	44

## Dhammapadatthakathāya pathamabhāge

# Nāmānam anukkamaņikā

Nāmānukkamo	Piṭṭhaṅkā	Nāmānukkamo	Piţţhaṅkā
[ A ]		[ Ā	X - I ]
Aṅga (raṭṭha)	243, 319	Ājīvaka	196
Aṅgulimāla	94, 306	Ānandatthera	28, 32, 39, 40,
Aciravatī	228	71, 86	6, 88, 91, 136, 140,
Ajātasattu	89, 90, 382	181, 2	208, 216, 217, 219,
Aññātakoṇḍañña	55	24	1, 259, 262, 265-6,
Atthadassī (Buddha)	53	29	8, 304-5, 309, 316,
Adinnapubbaka (brāl	nmaṇa) 16, 17	330, 3	332, 342, 348, 350,
Anāgāmī	55, 130, 193,		382, 387, 390, 398
	240, 409	Ānandaseţţhi	297-99
Anāthapiņḍika	3, 39, 41, 75,	Āļavaka (upāsak	(a) 216
97,	131, 179, 180,	Isigilipassa	272
205, 216, 260, 261		,	TT 1
Anupiyambavana	86	_	U]
Anuruddha 80	6, 88, 89, 339,	Uggasena	290
	387-8	Utena	123-4, 126
Anekavannadevaputt	a 269	Uttarakuru	375, 409
Anojā (devī)	153, 358	Uttiṇṇa	37
Anoma (aggasāvaka)	67, 70	Udāyitthera	300-1
Anomadassī (Buddha	a) 53, 67, 71	Udumbaravana	180
Anomā (nadī)	54	Upatissa	56-8, 60, 396, 398
Amaravatī (nagara)	52-3	Upatissagāma	56
Avīcimahāniraya	82	Upatissamāṇava	. 335
Assajitthera	58-9, 72	Upālitthera	88, 339
Assajipunabbasuka	348-9	Uppalavaṇṇā	216, 310,
Ahipeta	320, 322-3		313, 358
Allakappa (raṭṭha)	103, 108	Uruvela	55

Nāmānukkamo	Piţţhaṅkā	Nāmānukkamo	Piţţhaṅk <del>ā</del>
	1 Iţţilalika		1 iţţiialika
[U-E]		[ Ka ]	
Uruvelakassapa	61, 63	Kukkuṭavatī (nagara)	353
Erāvaṇa (hatthi)	173	Kukkuţaseţţhi	130, 133
[ Ka ]		Kukkuṭārāma	133
Kakusandha (Buddha)	53, 65-6	Kuṇḍakudāla	197-8
Katthanagaratthera	10	Kuṇḍalakesītherī	417-8
Kapilapura	74	Kudālapaņdita	197, 199
Kapilavatthu	306	Kumbhaghosaka	147, 149,
Kappaṭa (vāṇija)	79, 80		151, 152
Kappāsikavana	55, 301	Kumārakassapa	1, 410
Kambaladāyakatissatth	era 337-8	Kuru (raṭṭha)	128
Kallavāla (gāma)	61	Kusināra	215, 222
Kassaka	304-6	Kūṭāgārasālā	167
Kassapatthera	165	Keņiya (jaţila)	205
-	53, 65, 144,	Kesava (tāpasa)	218, 219
155, 204, 249-50, 264,		Kesava (rāja)	218
270, 28	9, 313, 321,	Kokālika	92
	2, 356, 359,	Koṇāgamana (Buddha)	53, 65
	409, 436	Koṇḍañña (Buddha)	53
Kākapeta	321	Komāra	155, 157
Kākavaliya	243	Kolita 56	5-7, 59, 60
Kāna	372-5	Kolitagāma	56
Kālī	44	Kosambaka (bhikkhū)	34, 41
Kāsi (raṭṭha)	13, 42, 264	Kosambī 34, 36, 3	37, 42, 89,
Kāļī	112-3, 119	103-4, 10	07-8, 111,
Kāļudāyitthera	73	120-1,	123, 130,
Kikī (rājā)	250, 265		133, 392
Kimila	86, 88-9	Kosambīvāsītissatthera	392,
Kisāgotami	54, 443,		395
-	445-6	Kosala (raṭṭha)	24, 205,
Kīṭāgiri	348-9		225, 380

Nāmānukkamo	Piṭṭhaṅkā	Nāmānukkamo	Piṭṭhaṅkā
[ Ka - Kl	ha]	[ Gha ]	
Kosala (rājā)	36, 41, 89,	Ghosakadevaputta	110
184,	243, 244, 247,	Ghositārāma	34, 103, 133
282	, 285, 288, 312	[ Ca ]	
Khadiravaniya-		Cakkhupālatthera	2, 11, 13
revatatthera	396, 403	Candapajjota	123, 124
Khantivāda	96	Candakinnarī	74
Khāņukoņḍaññatthe	ra 433-4	Candadevaputta	369-71
Khujjuttarā	134, 144, 216	Candavatīnagara	67
Khemā	216	Cātumahārājika	35
[ Ga - Gl	ha 1	Cālikāpabbata	182
Gaṅgā	180	Cittagahapati 216,	, 327, 330, 332
Ganadevaputta	352	Cittahatthatthera	194, 199
Ganthibhedakacora	299, 300	Cittā	171-2, 174
• •	225, 364, 442,	Cundasūkarika	80, 82
•	445, 447	Cūļa-anāthapiņḍika	216
Gandhabba	419	Cūļakāļatthera	42-5, 61-2
Gayāsīsa	56, 92	Cūļadhammapāla	96
Garahadinna	,	Cūḷapanthakatthera	153-9, 161-3
(Nigaṇṭhasāvaka)	275,	Cūļapāla	3, 12
<i>.</i> ,	277-81	Cūļamāgaņḍiya	130
Gijjhakūṭa 32	20-23, 326, 382	Cūļarathadevaputta	269
Gotama (Buddha)	22-3, 53, 66,	Cūļasubhadda	98
,	130, 135, 137,	Cūļaseţţhi	162
256, 264,	275, 277, 315,	[ Cha - J	a l
319, 356,	367, 411, 422,	Chattapāṇi-upāsaka	240
	424, 440	Channatthera	350-1
Godhika	273, 274	Jaṭila	243
Godhikatthera	272	Janapadakalyāṇi	74, 76, 78, 80
Ghosaka	144, 115, 116,	Jambuka-ājīvaka	313, 316-9
1	120-3, 130, 133	Jambukatthera	320

Nāmānukkamo	Piṭṭhaṅkā	Nāmānukkamo	Piṭṭhaṅkā
[ Ja ]		[ Ta ]	
Jambudīpa 28, 39,	, 57, 141, 258,	Tissatthera	25, 29, 392
•	290, 310, 416	Tissasāmaņera	338-40, 344
Jālinī (devadhītā)	387	Tusita	53, 85
Jīvaka 15	55, 157, 382-3	[ Da ]	
Jīvakambavana	382	Dabbamallaputta	410
Jetavana 9, 12, 2	29, 34, 41, 43,	Dārucīriya	410
49, 73, 75,	77, 83, 86, 94,	Dārucīriyatthera	408
97, 99,	163-6, 178-9,	•	159, 161, 215
183,	186, 207, 235,	Dīghakārāyana	225
236, 2	261, 275, 282,	Dīghāvukumāra	42
293-4, 2	299, 301, 304,	Dīpaṅkara (Buddha)	53
310, 3	327, 333, 337,	Devadatta 4	19, 51, 86, 88,
341, 3	343, 346, 348,		96, 382
350-51,	358-9, 371-2,	Devila (tāpasa)	26-8
375-7	7, 379-80, 386,	[ Dha ]	
390, 39	2, 395-6, 403,	Dhanañcaya (setthi)	243-4, 247-8,
408,	413, 418, 425,	<i>y</i> /	264
433-4,	437, 443, 446	Dhanasetthi	153-4
Jetavanamahāvihāra	3	Dhammadassī (Buddl	na) 53
Jotika	243, 244	Dhammadinnā	290, 292
[ Ta ]		Dhammika-upāsaka	83, 378
	159, 161, 251,	Dhammikatthera	377, 379
	207, 209	[ Na ]	
Tāpasa	196	Nanda	206
Tambapaṇṇidīpa	1	Nandakumāra	74
Tāvatimsadevaloka	17, 39,	Nandagopālaka	205
41, 7	6, 110, 172-3,	Nandatthera	73, 75, 80
229,	231, 267, 352	Nandamāṇava	311
Tissa (Buddha)	53, 64	Nandavana	440
Tissakumāra	366	Nandā	171-2, 174

Nāmānukkamo	Piṭṭhaṅkā	Nāmānukkamo	Piṭṭhaṅkā
[ Na ]		[ Pa ]	
Nandā (pokkharaṇī)	172, 175	Pālileyyaka (vana)	41, 77
Narinda	139	Pāvārikasetthi	130, 133
Nāgasenatthera	81	Pāvārikārāma	133
Nārada	219	Pāveyya (ājīvaka)	237-8, 240
Nārada (tāpasa)	26-8	Pāveyyakabhikkhū	301-2
Nārada (Buddha)	53	Piṅgala	96
Nāļāgiri	90	Piņḍapātadāyakatissa	338
Nigaṇṭha	196	Piṇḍapātikatthera	253
Nigamavāsitissatthera	179-80	Pippaliguh <del>ā</del>	293
Nigrodhamahāvihāra	3	Pipphaliguhā	164
Niraya	238	Piyadassī (Buddha)	53
Nisabha (aggasāvaka)	67, 70	Pukkusāti	304, 410
Nerañjarā (nadī)	54	Puṇḍarīka (hatthi)	282
[ Pa ]		Puṇṇa (seṭṭhi)	243
Paccekabuddha	50-1	Puṇṇatthera	339
Pañcavaggiya	55, 58	Puṇṇavaḍḍhanakumāra	244, 247
Paṭācārātherī	437	Pubbārāma	242, 389
Paṭācārī	440, 442	Pūtigattatissatthera	202-3, 205
Paṇḍava (pabbata)	54	Pūrantappa (rāja)	104, 106
Paṇḍitasāmaṇera	359, 367,	Pesakāragāma	351
	369, 371		•
Patipūjika (kumārika)	229, 232	[ Pha - Ba ]	
Paduma		Phussa (Buddha)	
	3, 263, 310,		, 222-5, 260
	1, 385, 440	Bahuputtikattherī	446-7
Pasenadikumāra	215	•	5, 36, 50, 79,
Pasenadikosala	180, 215,		159-60, 176,
<b>D</b> .	240	, and the second	08, 218, 222,
Pala	3		36, 287, 290,
Palita	9	292, 295,	322, 351-2,
Pālitatthera	9		359, 402

Nāmānukkamo	Piṭṭhaṅkā	Nāmānukkamo	Piṭṭhaṅkā
[ Ba ]		[ Ma ]	
Bālanakkhatta	163	Mallikādevī 2	22, 224-5, 241,
Bāhiyadārucīriyatther	a 412	260,	285-6, 289-90,
Bimbisāra (rāja)	56, 65-6, 89,		292
148,	243, 247, 306	Mahākaccāyanatthe	ra 207, 209,
Belaṭṭhasīsatthera	386-7	·	389-90
Brahmadatta 3	6, 42, 50, 79,	Mahākappinatthera	351, 358-9
	143, 197, 218	Mahākappinarājā	353
Brahmaloka	197	Mahākassapatthera	
[Bha]		•	268, 72, 293, 6,
Bhagu	86, 88-89		339, 338, 5, 387
Bhagga	279	Mahākāļatthera	42-3, 46-7, 61
Bhaddavaggiya	55, 61, 63	Mahākosala	215
Bhaddavatiyasetthi	122, 126	Mahādhammapāla	75
Bhaddavatī (nagara)	120	Mahānāma	86, 219, 220
Bhaddiyatthera	89	Mahāpajāpati	74
Bhaddiyanagara	86, 88-9,	Mahāpanthaka	154-5, 157
	243, 260	Mahāpāla	3, 4
Bhaddiyasetthi	260	Mahāmāyā	71
[ Ma ]		•	
Magadha (rattha) 54.	61, 169, 319	Mahāmoggallānatth	
Magha 169,	170, 171, 178		67, 71, 89, 92,
Maṅgala (Buddha)	53		, 219, 234, 236,
Macala (gāma)	169		7, 261, 320-24,
Macchariyakosiyaseţţ	hi 232, 237	339,	, 341, 350, 375,
Macchikāsaņḍanagara	a 327	M 1 = 11 1 1 11	388, 390
Maṭṭhakuṇḍalī	16-8, 22-3	Mahārathadevaputta	
Mandadhātuka	407	Mahāli	167, 169
Malla	86	Mahālilicchavī	222, 178, 215
Mallarājaputta	215	Mahāvāsagāma	199
Mallarājā	222	Mahāvihāra	133

Nāmānukkamo	Piṭṭhaṅkā	Nāmānukkamo	Piṭṭhaṅkā
[ Ma ]		[ Ma ]	
Mahāsamudda	341-2	Rādhatthera	346-8
Mahāsubhadda	97	Rāhula	54, 71, 74
Mahāsuvaņņa (kuṭ	umbika) 2	Rāhulakumāra	75
Mahāsena brāhma	ņa 333	Revata (Buddha)	53
Mahindarāja	64	Revata (kumāra)	396
Māgaņḍiya	103, 128, 130,	Revatatthera	399, 408
	135-8, 142, 145	II.a. Val	Ī
Mātaṅga	40	[ La - Va ]	-
Mātali	177	Lakuṇḍakabhaddiyatth	
Mātikagāma	184	Lakkhaṇatthera	320, 323
Mātulaputta	311		67, 178, 215
Mātulabrāhmaņa	420-1	Lohakumbhī	287-8
Māra	273-4, 419	Vaṅgantabrāhmaṇa	333
Mālabhārī (devapu	utta) 229, 231	Vanavāsikatissatthera	333
Migadāya	55	Vanavāsikatissasāmaņ	era
Migāraseţţhi	244, 247, 251,	338	8-9, 443, 445
	252, 256-9, 389	Varuņa (upaṭṭhaka)	67
Meghiyatthera	182-3	Vāsabhakhattiya	241
Meņḍakaseṭṭhi	243-4, 264	Vāsuladatta	123, 128
Moggalī	56	Viṭaṭūbha 214, 2	220-1, 225-6,
[ Ya -	Ra 1		229
Yasavā (khattiya)	67	Vinayadharattherī	440
Yasodharā	67	Vipassī (Buddha)	53
Rājagaha	49-50, 54, 56-8,	Visākha (upāsaka)	65, 242-3
	73, 75, 89-91, 94,	Visākhā (upāsikā)	3, 39, 97
ŕ	4, 147, 149, 151,	216, 245, 246	, 248, 251-3,
	4, 225, 232, 268,		255-65, 400
	270, 272, 293-4,	Vejayantaratha	177
•	6, 316, 320, 333,	Veṭhadīpaka (tāpasa)	103
	383, 413	Vethadīpaka (rattha)	103
	, I	- · · · · · · · · · · · · · · · · · · ·	

Nāmānukkamo	Piṭṭhaṅkā	Nāmānukkamo	Piṭṭhaṅkā	
[ Va ]		[ Sa	[ Sa ]	
Vepacitti (asurinda)	176	Sāmāvatī	103, 122-3,	
Verañjā	375-6		134-5, 137-40	
Vesālī (nagara)	167, 215, 222	Sāriputtatthera	45, 49-50, 56,	
Vessantara	53, 74	59, 61, 6	6, 71, 75, 89, 92,	
Vessabhū (Buddha)	53	216, 2	19, 333-5, 338-9,	
Veļukaņḍakīnandamā	ītā	341, 340	5-7, 349-50, 366,	
(upāsikā)	216	369	9-70, 387, 390-2,	
Veļuvana 52	2, 56-7, 59-61,	395-8, 406	, 416, 420-2, 426	
73, 80, 90, 1	147, 153, 268,	Sārī	56	
272, 302, 3	306, 313, 320,	Sāvatthī 2	, 3, 4, 12, 16, 18,	
323, 38	37, 405, 420-2	39, 41, 4	3, 50, 75, 83, 94,	
[ 0 ]		97, 9	9, 133, 163, 179,	
[Sa]	425 7 420	186, 18	9, 191, 194, 199,	
Samkiccasāmaņera	425-7, 430,	202, 205,	207, 210, 212-5,	
0 1 11114 -4	432-4	220, 22	22-3, 225-6, 229,	
Samgharakkhitamātu,		232, 237-	8, 240, 242, 244,	
Sakadāgāmī	98, 193	247, 25	51-2, 258-9, 261,	
Sakka (devarājā)		265, 27	5, 293, 297, 304,	
	3, 175, 177-8,	310-1, 32	7, 330, 333, 335,	
	290-1, 320-3,	346, 35	4, 358, 366, 376,	
	317, 365, 389	377, 3	79, 410-1, 425-6,	
Saṅghadāsī	250, 264	435, 43	7, 440, 443, 446,	
Sañcaya (paribbājaka	57, 59	Sikhī (Buddha)	53	
Saṭṭhikūṭapeta	323, 326	Siddhattha (Buddh	(a) 53	
Sappadāsatthera	434, 436-7	Sirigutta	275-81	
Sabhiyaparibbājaka	410	Sirivaḍḍhana	72	
Sarada (tāpasa)	67, 72	Sirivaddhanakutur	mbika 67	
Sarada (māṇava)	67	Sīvalitthera	399, 400	
Sahampati (brahmā)	55	Sujā 171	-2, 174, 268, 270	

Nāmānukkamo	Piṭṭhaṅkā	Nāmānukkamo Piṭṭhaṅkā
[ Sa ]		[ Sa ]
Sujāta (Buddha)	53	Sumedhā 52
Sujātā (devī)	54, 263	Suva (rāja) 180-1
Suddhodana	71, 73	Sūriya (devaputta) 369-71
Sudhammatthera	327, 329	Selabrāhmaņa 243
Sudhammadevasabhā	400	Sotāpanna 17, 52, 55, 59,
Sudhammā	171	85, 97-9, 102, 141, 147,
Sunanda (rājā)	263	164, 178, 181, 188, 193,
Sundarā (aggasāvikā)	67	204, 278, 265, 323
Suppabuddhakuṭṭhi	302-4	Sotthiya 54
Suppāvāsā	216	Sobhita (Buddha) 53
Sumana (deva)	32	Soreyyatthera 207, 210, 211
Sumanadevī	97-8, 243	Soreyyanagara 208
Sumanapaccekabuddha	309	[ Ho ]
Sumana (Buddha)	53	[ Ha ]
Sumanamālākāra	133-4, 306,	Hamsavatī (nagara) 63, 263
	310	Hatthaka (upāsaka) 216
Sumanā (aggasāvikā)	67	Himavanta 26, 53, 130-1, 180,
Sumedha (Buddha)	53	295, 351

### Dhammapadatthakathaya pathamabhage

## Nānāpāṭhā

Paṭhamo mūlapāṭho, Sī = Sīhaļapotthakaṁ, Syā = Syāmapotthakaṁ, Kaṁ = Kambojapotthakaṁ, I = Iṅgalisapotthakaṁ, Ka = kesuci Marammapotthakesu dissamānapāṭho, Ka-Sī = kesuci Sīhaļapotthakesu dissamānapāṭho, Ṭṭha = Aṭṭhakathā.

#### Dhammapadatthakathāya

Nānāpāṭhā P	iṭṭhaṅkā
[ A ]	
Amsakūṭānam upari = Jattūnamupari (Sī)	315
Akkhikāṇassa = Anakkhikakālassa (Sī)	7
Akkuṭṭho = Kuddho (Ka)	29
$Agg\bar{a}$ neva = $Aggagg\bar{a}$ neva ( $S\bar{i}$ )	355
Ajini = Ajinī (?)	29
Aṭṭhaṅgulamattampi = Aḍḍhaṅgulamattampi (Syā)	267
Atthihi = Atthehi (Si)	95
$Atis\bar{a}ra\dot{m} = At\bar{i}s\bar{a}ra\dot{m} (S\bar{i})$	117
Attadantassa = Anaṅgaṇassa (Syā)	419
Anapāyinīti = Anupāyinīti (Ka)	23
Anākulatāya = Akalusatāya (Sī)	375
Anāhariyam = Asamhāriyam (Sī)	176
Anivattagamanam = Anivattanīyagamanam (Sī)	41
Anupubbikath $\bar{a}$ = Anupubb $\bar{i}$ kath $\bar{a}$ (S $\bar{i}$ , Sy $\bar{a}$ )	103
Anubandhamāno = Anubuddhasamānam (Sī), Anubuddhamāno (Syā	i) 368
Anopamaguṇaṁ = Anomaguṇattaṁ (Syā)	391
Anopamaguṇāti = Anomaguṇāti (Sī, Syā)	319
Antaragharam = Antaravīthim (Syā)	411
Aparacchā = Aravacchā (Sī), Āravapacchā (Syā)	355
Aparicinnatthāne = Aparicitatthāne (Sī, Syā)	45

Nānāpāṭhā	Piṭṭhaṅkā
[ A - Ā ]	
Apasabyam = Apasādam (Sī), Apabyāyam (Syā),	
Appabyāyakammaṁ (Ka)	303
Ambaṇam = Ammaṇam (Sī), Ambaṇakam (Syā)	203
Amittamaddanam = Amittamathanam (Sī), Amittadamanam (Ka)	198
Ayakapalla $\dot{m}$ = Ayakap $\bar{a}$ la $\dot{m}$ (S $\bar{i}$ )	95
Aruṇavatīmattikañca = Aruṇavaṇṇamattikañca (Sī)	283
Alabham $\bar{a}$ n $\bar{a}$ = Dadam $\bar{a}$ n $\bar{a}$ (S $\bar{i}$ )	424
Allakapparațțhe = Ajitarațțhe $(S\bar{i})$	108
Asabbham = Asabbhivācam (Syā)	163
$\bar{A}gantv\bar{a} = Gantv\bar{a} (Sy\bar{a})$	395
$\bar{A}$ cikkhitāraṁ = $\bar{A}$ cikkhātāraṁ (Sī)	347
Āyakammikam = Āyuttakam (Syā, Ka)	118
$\bar{A}$ rocita $\dot{m} = \bar{A}$ ropita $\dot{m}$ (Sy $\bar{a}$ )	350
$\bar{A}$ limpent $\bar{a}$ pi = $\bar{A}$ limpetv $\bar{a}$ pi ( $S\bar{\imath}$ )	143
$\bar{A}$ lopam katv $\bar{a} = \bar{A}$ luppak $\bar{a}$ ram (S $\bar{i}$ ),	
Ālopakārakam katvā (Syā)	315
Āvijjhitvā = Āvajjetvā (Sī), Āviñchitvā (Ka)	198
$\bar{A}$ sane = Attan $\bar{a}$ (Ka)	389
Āsīsamānena = Āsimsamānena (Sī, Syā)	1
$\bar{A}$ ļāne = $\bar{A}$ ļāhane (Syā, Ka)	81
$\bar{A}$ ļāhane = $\bar{A}$ ļahane (Ka)	87
[U]	
Ujukasantānena (Sī, Ka)	204
Utenoti = Udenoti (Sī)	105
Udañcanabhāvappatti = Udakacalanabhāvappatti (Syā),	
Udakasiñcanabhāvappatti (Ka)	60
Uddhacchiddakav $\bar{a}$ tap $\bar{a}$ n $\bar{a}$ ni = Uddhacchikav $\bar{a}$ tap $\bar{a}$ n $\bar{a}$ ni (S $\bar{i}$ ),	
Khuddacchiddakavātapānāni (Syā)	135
Upacchijjissati = Ucchijjissati (Sī, Syā)	290
Upaṭṭhiyamāno = Uṭṭhahiyamāno (Sī)	37

Nānāpāṭhā	Piṭṭhaṅkā
[U]	
Upasampadāmāļato = Upasampadakālato (Syā, Ka)	435
Uppāṭetvā = Ubbattetvā (Sī, Syā)	48
Ubbejanīyo = Ubbegajaniyo (Ka)	105
Uramhi = Vāma-ūrumhi (Syā, Ka)	412
Ekovettha = Vāṇijo (Ka)	408
[0]	
Otāram = Okāsam (Ka)	225
Omuttentipi = Ummihantipi (Syā)	392
[ Ka ]	
Kaṇḍakaṁ = Kanthakaṁ (Sī, Syā)	54
Kaṭṭhattharake = Kaṭṭhatthare (Ka)	87
Katipāheneva = Katipāhasseva (Sī, Syā)	204
Kathāpariyosāne = Gāthāpariyosāne (Ka)	133
Kappaṭo = Kappako (Syā)	79
Kāyasaññamādīhi = Kāyasamācārādīhi (Ka)	419
Kālena kālam = Kālānukālam (Sī, Syā)	205
$K\bar{a}s\bar{a}v\bar{a}ni = K\bar{a}s\bar{a}y\bar{a}ni (S\bar{\imath}, Sy\bar{a})$	65
Kiñci = Na kiñci (Sī, Syā)	394
Kiñci ñāti = Kañci ñātiṁ vā (Syā)	163
Kimaṅgaṁ = Kimaṅga (Sī)	5
Kimilam = Kimbilam (Sī, Syā)	86
Kirīti = Kiņīti (Sī)	215
Kuṭikaṁ = Kuṭiṁ (Ka)	311
Kunthadharo = Kunthakaro (Si)	161
$K\bar{u}$ taṭṭaparājitā = $K\bar{u}$ ṭaḍḍaparājitā ( $Ka$ )	224
Koseyyavatthapūrāji = Pattavattha (Sī), Suttavattha (Syā)	249
[ Kha ]	
Khīrapakehi = Khīrapāyakepi (Sī, Ka)	227
$Khudda\dot{m} = Khuda\dot{m} (S\bar{i})$	370

Nānāpāṭhā	Piṭṭhaṅkā
[ Ga ]	
Gaṇhissāmīti = Nāsessāmīti (Syā)	436
Gatāti = Katāti (Ka)	381
$Gato = Galito (S\bar{i})$	370
$Gahetv\bar{a} = Gaṇetv\bar{a} (S\bar{\imath})$	101
Giraggasamajjam (Sī, Ka)	56
[ Gha ]	
Ghaṭiyā = Ghaṭito $(S\bar{i}, Sy\bar{a})$	269
Ghațetvā = Ghațtetvā (Ka)	213
Ghațiesi ghațiesi = Ghațesi ghațesi (Syā)	160
Ghaṇḍiyā = Gaṇḍiyā $(S\bar{i}, Sy\bar{a})$	184, 427
Ghanavassa $\dot{m}$ = Ghanakarakavassa $\dot{m}$ (S $\bar{i}$ )	228
[ Ca ]	
Cakkapathe = Cakkap $\bar{a}$ de (S $\bar{i}$ , Sy $\bar{a}$ )	192
Candamaṇḍalaṁ = Candaṁ (Sī, Ka)	370
Caritavasena = Cariyāvasena (Syā)	60
Cariyāvasena = Pubbacariyavasena (Ka)	243
Cittagahapativatthu = Sudhammattheravatthu ( $S\bar{i}$ , $Sy\bar{a}$ )	332
Cittahatthattheram = Cittahaṭṭhattheram (Ka)	194
Cuṇṇakādīhi = Vaṇṇakādīhi (Sī, Ka)	245
Cumbaṭakaṁ = Cumbuṭakaṁ (Ka)	90
Celakaṭṭhi = Celakaṇṭhī (Sī), Velakaṁsī (Syā)	126
[ Cha - Ja ]	
Chinnapapātam = Chinnataṭam (Sī, Syā)	414
Challi = Jalli $(S\bar{\imath})$	382
Jambusākham = Rajam (Sī, Syā)	416
Jātasaṁvaḍḍho = Jātisaṁvuḍḍho (Ka)	179
Jīvitaphalanti = Saphalanti (Syā)	287
Jeṭṭhāpacāyanakammam = Jeṭṭhāpacāyikakammam (Syā)	172

Nānāpāṭhā	Piṭṭhaṅkā
[ Ṭha - Ta ]	
$\bar{T}h\bar{a}nesu = V\bar{a}resu (S\bar{i}, Sy\bar{a})$	391
$Ta\dot{m} = Tasm\bar{a} (S\bar{\imath})$	384
Tamattabhāvam = Tamabhāvam (Sī)	15
$Tass\bar{a} = Tassarin (S\bar{\imath})$	426
Tikhiņena = Tiņhena (Sī, Syā)	81
Tiṭṭhantīti = Ṭhassantīti (Sī)	424
Tissattheravatthu = Thullatissattheravatthu $(S\bar{\imath})$	29
Tuṭṭhahaṭṭho = Haṭṭhapahaṭṭho $(S\bar{i})$	311
Te eta $\dot{m}$ = Te eva (Ka)	380
[ Da - Dha ]	
Dassatīti = Ñassatīti (Sī)	251
Daharadaharānam = Daharatarānam (Sī, Syā)	292
Dīghalaṅghikaṁ = Dīghalambikaṁ (Sī, Syā)	423
Dīghītissa = Dīghāvupitussa (Ka)	36
Duṭṭhassa = Dubbinītassa (Sī, Syā)	293
Dussaṇṭhāpito = Dussaṇṭhāpiyo (Sī)	192
Dussante = Dasante $(S\bar{i})$	115
Devilo = Devalo $(S\bar{i}, Sy\bar{a})$	26
Dosam = Vivaram (Sī, Syā)	283
Dosena = Rosena (Sī)	234
Dhure = Pure $(Sy\bar{a}, Ka)$	139
Dhūmāyantopi = Dhūpāyantopi (Sī)	234
[ Na ]	
Nakhubhati = Nakkhubbhati (Sī), Nakkhambhati (Ka)	375
Nikkammikā = Nikkammā (Sī, Syā)	137
Nikkhamanato = Nekkhammato $(S\overline{i})$	103
Nibbattaṭṭhānaṁ = Parinibbutaṭṭhānaṁ (Ka)	274
Nibbattetvā = Nimmathetvā (Sī, Syā)	429

Nānāpāṭhā	Piṭṭhaṅkā
[ Na ]	
Nibbānappattā eva = Nibbānam patvā evam (Syā)	445
Nibbinditv $\bar{a} = Nibbijjitv\bar{a}$ (Sī)	55
Nimātā nipitāti = Nimmātāpitikāti (Sī)	220
Niratthakam = Na laṭṭhakam (Sī), Na siliṭṭhakam (Syā)	306
Nirayabhāgino = Nirayagāmino (Sī, Syā)	340
Nivatthadussakaṇṇe $v\bar{a} = Das\bar{a}kaṇṇe v\bar{a} (S\bar{\imath})$	246
Niviṭṭhagatto = Nibbiddhagatto (Sī, Syā)	38
Nivuṭṭhaṁ = Niviṭṭhaṁ (Ka)	128
Nivutthaṭṭhānaṁ = Nibbattaṭṭhānaṁ (Sī, Syā)	298
Nisānapāsāṇasadisam = Satthakanisādana $(S\bar{i}, Sy\bar{a})$	196
Nisāmetvā = Niyāmetvā (Ka)	380
Nīlavāhinī = Nīlavāhanā (Ka), Nalavāhanā (Syā)	355
$Nhatv\bar{a} = Nah\bar{a}t\bar{a} (S\bar{\imath})$	289
Nhānatittha $\dot{m}$ = Nahānatittha $\dot{m}$ (Sī, Syā)	2
[ Pa ]	
Pakkadhūpanatelam = Cakkadhūpanatelam (Syā)	201
Pakkuthitatele = Pakkuthitatelena (Ka)	145
Pakkuthikam = Pakkaṭṭhitam (Sī)	81
Pakkhantariko = Pakkhuttariyo ( $S\bar{\imath}$ )	219
Paccisam = Paccayim (Sī)	292
Pañhaṁ = Cattāro pañhe (Syā, Ka)	369
Pañhaṁ pucchanāya = Pañhapucchāya (Sī), Pañhaṁ pucchāya (Sy	ā) 22
Pați-adāsi = Pațikkhipi (Sī)	444
Paţicchāpetvā = Paţicchādesi (Ka)	374
Paṭipādeyyāsīti = Paṭiyādeyyāsīti (Sī)	230
Paṭibāhanto = Paṭidahanto (Ka)	201
Paṭibhāṇo = Padabhāṇo (Sī, Syā)	340
Paṭiyādesi = Paṭipādesi (Sī, Syā)	12
Paṭihananakaṭṭhānaṁ = Paṭihananaṭṭhānaṁ (Syā)	139

Nānāpāṭhā	Piṭṭhaṅkā
[ Pa ]	
Patikiṭṭhataro = Kiliṭṭhatarova (Ka)	283
Patthapatthapulakam = Patthapatthapūlakam (Syā),	
Patthapatthamūlakam (Ka)	375
Pattāsane = Paññattāsane (Ka)	69
Panunnapamādo = Panuṇṇapamādo (Sī), Panudapamādo (Ka)	165
Parikarabandhanatthāne = Parikkhārabandhanatthāne (Ka)	223
Paricinno = Paricchinno (Ka)	7
Parittāso = Paribhāso nāma (Ka)	375
Paridahi = Parihari $(S\bar{\imath})$	409
Parimadditvā = Pariggaņhitvā (Syā)	57
Parivaccham = Parisajjam (Ka)	133
Parivattamānā = Pavaṭṭamānā (Sī, Syā)	8
Parihariyamāno = Paricāriyamāno (Sī, Syā)	53
Palāyantāva = Palātā (Sī, Syā)	147
Palobhetvā = Payojetvā (Sī)	287
Paviddhattā = Pavijjhitattā (Ka)	91
Pavesetukāmo = Pesetukāmo (Ka)	375
Pasannākāramasā = Paṇṇākāramassā (Syā)	257
Pasādhanapeļakam = Pasādhanapeļikam (Sī)	144
Pahamsitvā = Ghamsitvā (Ka)	161
Paharitvā = Abhihanitvā (Sī, Syā)	382
Pākabhattam = Pākavaṭṭam (Sī), Pākavattam (Syā)	299
$P\bar{a}jento = V\bar{a}hento (S\bar{i})$	222
$P\bar{a}loti = P\bar{a}litoti (S\bar{i})$	3
Pāveyyam = Pāṭhikam (Sī), Pāṭikam (Syā)	237
Pāveyyake = Pāṭheyyake (Sī, Syā)	301
Piṇḍapātikatthero = Piṇḍapātacārikatthero (Ka)	253
Puṭake = Piṭake (Sy $\bar{a}$ )	332
Puṭṭho = Phuṭṭho $(S\bar{i}, Sy\bar{a}, Ka)$	376
Puttanattapanattaparivāram = Puttanattaparivāram (Sī, Syā)	258
Puttanattesu = Puttanattasahassesu (Sī, Syā)	258

Nānāpāṭhā	Piṭṭhaṅkā
[ Pa - Pha ]	
Pupphapaṭā = Pupphapaṭṭā (Syā)	309
Purato = Parato $(S\bar{i})$	115
Pūrantappo = Parantapo (Sī, Syā)	104
Pothesi = Poṭhesi (Sī), Poṭesi (Ka)	223
Phalake = Phallanke (Sī)	12
[ Ba ]	
$B\bar{a}lha\dot{m} = B\bar{a}le\ (S\bar{\imath})$	415
Buddhapa $\tilde{n}$ ho = Buddhamanto (Sy $\bar{a}$ )	417
Balābhibhavena = Dhanalābhibhāvena (Ka)	419
Balibaddassa = Balivaddassa $(S\bar{i}, Sy\bar{a})$	14
Balo, balavāhano = Vālo vālavāhano (Sī)	353
Bahum $\bar{a}y\bar{a} = Bahumant\bar{a} (S\bar{i}, Sy\bar{a})$	284
Bālakaloṇakagāmam = Bālakaloṇakārāmam (Sī, Syā),	
Pālileyyakagāmam (Ka)	36
$B\bar{a}$ lyena = $B\bar{a}$ llena ( $S\bar{\imath}$ )	164
Bidalamañcake vā = Viraļamañcake vā (Ka)	87
Byāsattamanasaṁ = Byāsattamānasaṁ (Syā, Ka)	228
[ Bha ]	
Bhatakena = Bhatikena (Syā)	148
Bhattavetana $\dot{m}$ = Vetana $\dot{m}$ (S $\bar{i}$ , Sy $\bar{a}$ )	16
Bhavissanti = Na bhavissanti (Syā)	426
Bhus $\bar{a} = Khar\bar{a} (S\bar{\imath})$	382
[ Ma ]	
Maggakilanto = Magge kilamanto (Syā)	186
Macalagāme = Acalagāme (Syā)	169
Maccuparāyaņo = Mañcaparāyano (Sī)	118
Maṭṭhakuṇḍaliṁ = Maṭṭakuṇḍaliṁ $(S\bar{\imath})$	16
Maddakucchim = Maddakucchipabbatam (Ka)	382

Nānāpāṭhā	Piṭṭhaṅkā
[ Ma ]	
Manosilārase = Manosilātale (Ka)	308
Mallamuṭṭhiyuddham yujjhantā = Mallayuddham bujjhantā $(S\bar{\imath})$	376
Mandadhatuko = Muddhadhatuko (Si)	407
$M\bar{a}gandiy\bar{a} = M\bar{a}gandiy\bar{a} (S\bar{\imath}, Sy\bar{a})$	128
Mā gaṇhatha = Mā minātha (Sī, Syā)	417
$M\bar{a}$ tuṭṭh $\bar{a}$ ne = $M\bar{a}$ tiṭṭh $\bar{a}$ ne ( $S\bar{\imath}$ , $Sy\bar{a}$ )	257
Māretabbāti = Māritā (?)	228
$M\bar{a}ladh\bar{a}r\bar{\imath} = M\bar{a}labh\bar{a}r\bar{\imath} \ (S\bar{\imath}, Sy\bar{a})$	18
Micchāgāham = Micchāgahanam (Sī)	42
Mettacittena = Mettena $(S\bar{i})$	170
$Med\bar{a}lupa\dot{m} = Ulumpa\dot{m} (S\bar{i})$	225
[ Ya ]	
Yathāruci = Yathāruciyā (Syā), Yathāruciṁ (Ka)	186
$Yv\bar{a}ya\dot{m}$ tagaracandana $\dot{m}=Y\bar{a}ya\dot{m}$ tagaracandan $\bar{i}$ ( $S\bar{i}$ )	272
$Y\bar{a}$ va arahatt $\bar{a} = Y\bar{a}$ va arahattam (Ka)	178
[ Ra ]	
Ratanesu = Saraṇesu (Sī, Ka)	256
$R\bar{a}jabali\dot{m} = R\bar{a}jap\bar{\imath}la\dot{m}$ (Sy $\bar{a}$ )	205
$R\bar{a}j\bar{a}$ ņa $\dot{m}=R\bar{a}jada$ ņda $\dot{m}$ (Ka)	125
[ La ]	
Lakkhayoggam = Lakkhanayoggam (Ka)	34
Lañjam = Lañcam (Syā)	135
[ Va ]	
Vakkhā = Rukkhā (Sī, Syā, Ka)	219
Vajjhappattānam = Paccāmittānam (Ka)	41
Vanappatim = Vanaspatim (Sī)	2
Vassāratte = Vassāvāse (Syā, Ka)	130
$V\bar{a}yati = Y\bar{a}ti (S\bar{i}, Sy\bar{a})$	267

Nānāpāṭhā	Piṭṭhaṅkā
[ Va ]	
Vāretvā = Dhāretvā (Ka)	30
Vālukam = Vālikam (Sī, Syā)	2
Vicārentesu = Viharantesu (Syā), Vicarantesu (Ka)	97
Vicessati = Vijessati (Sī, Syā)	212
Viṭaṭūbhaṁ = Viḍūḍabhaṁ (Sī, Syā)	214
Viddhamsitacammam = Viddhastacammam (Sī, Syā)	63
Vibhātāya = Vibhātamānāya (Sī), Vibhāyamānāya (Syā)	105
Vilapamānā = Vippalapamānā (Sī, Syā)	98
Vilapasi = Vippalapasi (Sī, Syā)	98
Visākhapuņṇamadivase = Visākhapuṇṇamīdivase (Syā)	54
Vissakammena = Vissukammena (Syā), Visukammena (Ka)	54
$Vissatth\bar{a} = Vissatth\bar{a} (Sy\bar{a})$	219
Vīsati = Vīsaṁ (Sī)	126
[ Sa ]	
Samsanditv $\bar{a}$ = Sannetv $\bar{a}$ (S $\bar{i}$ ), Sandetv $\bar{a}$ (Sy $\bar{a}$ )	402
Sakkāram = Adhikāram (Sī)	71
Sakkāram = Sakkharam (Sī), Sakkaram (Syā)	232
Saṅkāradhānasmim = Saṅkāraṭhānasmim (Ka)	280
Saccakārasadisam = Lañjakārasadisam (Syā)	114
Sañcayassa = Sañjayassa (Sī, Syā)	52
Saṭṭhivassikatthero = Vassasatikatthero ( $S\bar{i}$ , $Sy\bar{a}$ )	60
Satasahassagghanakam = Sahassagghanikam (Sī, Syā)	262
Satasahassavijjulatā = Sataramsivijjullatā (Sī)	307
Sattayojanamatthakehi = Chayojanamatthaketi (Syā)	244
Sannahitvā = Sannetvā (Sī), Sannehitvā (Syā)	428
Sabbameva = Khippameva (Syā, Ka)	127
Sabbaravaññū = Sabbarutaññū (Ka)	148
Samaggavāsam = Samaggasamvāsam (Syā)	150
Sampattasaddhammapado = Sampannasaddhammapado ( $Sy\bar{a}$ )	1

Nānāpāṭhā	Piṭṭhaṅkā
[ Sa ]	
Sampādetvāna = Sannipātetva (Sī), Sannipātetvāna (Syā)	69
Samānam = Samabhāgikam (Syā)	353
Samitagamanena = Mitagamanena ( $S\bar{i}$ )	246
Sasineho = Sasneho ( $S\bar{i}$ )	215
Sahapamsukīļakā = Saha pamsukīļāya (Sī)	67
Sahassanayapaṭimaṇḍite = Sahassanayasampanne (Sī, Syā)	59
Sāriputtattheravatthu = Aggasāvakavatthu (Sī), Sañjayavatthu (Syā	) 73
Sāriyā = Rūpasāriyā (Sī, Ka)	56
Sippalivanam = Simbalivanam (Sī)	177
Sīhavijambhita = Sīhavikkanta (Sī, Syā)	159
Sujāti = Sujātāti (Sī, Syā, Ka)	171
$Suv\bar{a} = Suvak\bar{a} (Sy\bar{a})$	180
Seyyamāno = Semānako (Sī), Sayamāno (Syā)	11
Sottiyena = Sotthiyena (Sī, Syā, Ka)	54
[ Ha ]	
Hatthināgam = Hatthinā tam (?)	124
Haraṇākāram = Gamanākāram	369
Haripattā = Haritapattā (Sī, Syā, Ka)	180
$H\bar{a}retv\bar{a} = H\bar{a}petv\bar{a}$ (Ka)	224

# Dhammapadaṭṭhakathāya paṭhamabhāge

Paṭhamapādā	Piṭṭhaṅkā	Paṭhamapādā	Piṭṭhaṅkā
[ A ]		[ A ]	
Akataññussa posassa		Aniccā vata saṅkhārā	
(Khu 5. 17, 199)	96	(Dī 2. 129, 161)	45
Akaramhasa te kiccam	1	Api vīraka passesi	
(Khu 5. 97)	93	(Khu 5. 54)	93
Akkocchi mam avadhi	mam 29	Appam pivitvāna nihīnaja	.cco
Akkhī bhinnā paţo naţ	tho	(Khu 5. 47)	376
(Khu 5. 32)	94	Appaṁ vā bahuṁ vā nādo	lasāma
Acāri vatāyam vitudar	n vanāni	(Khu 2. 115, 148)	21
(Khu 5. 56)	93	Appam vā bahum vā bhās	
Aciram vata'yam kāyo	203	(Vi 3. 51)	58
Acchariyam vata abbh		Appakā te manussesu	379
(Khu 2. 114, 148)	21	Appakenāpi medhāvī	
Ajjeva Buddham sarar	ıam vaiāhi	(Khu 5. 2)	162
(Khu 2. 115, 148)	21	Appamatto ayam gandho	272
Añjanānam khayam di		Appamatto pamattesu	167
Aññā hi lābhūpanisā	344	Appamādarato bhikkhu	179,181
Attā have jitam seyyo	419	Appamādena Maghavā	178
Atthakāmosi me yakkl		Appamādo amatapadam	145
(Khu 2. 115, 148)	22	Appampi ce samhita	101
Atha vāssa agārāni	22	bhāsamāno	101
(Khu 1. 33, 34)	115	Abbahī vata me sallam	20
Anavatthitacittassa	113	(Khu 2. 113, 147)	20
•••	106 205	Abhikkantena vaṇṇena	23
(Khu 5. 104)	196, 295	Abhivādanasīlissa	425
Anavassutacittassa	196	Alaṅkato Maṭṭhakuṇḍalī	10
Anikkasāvo kāsāvam	52	(Khu 2. 113, 146)	18

Paṭhamapādā	Piṭṭhaṅkā	Paṭhamapādā P	Piṭṭhaṅkā
[ A - Ā ]		[ U ]	
Alīnacittam nissāya		Uddham adho ca tiriyam	
(Khu 5. 37)	347	(Sam 1. 123)	274
Asantam bhavanamicchey	yya 328	Upasāļakanāmāni	
Asāre sāramatino	73	(Khu 5. 41)	342
Asubhānupassim viharant	taṁ 47	Upemi saraṇam Buddham	
Assaddho akataññū ca	396	(Khu 2. 115, 148)	22
Aham nāgova sangāme		Ubho khañjā ubho kuņī	237
(Khu 1. 59)	136	Ubho puttā kālakatā	
Aham bhante Moggallana	a 321	(Khu 4. 238)	440
Ādittam vata mam santan		Uyyuñjanti satīmanto	385
(Khu 2. 113, 147)	20	Ussūraseyyam ālasyam	418
Ābādhikoham dukkhito		[E-O]	
gilāno (Khu 2. 115, 148	3) 21	Ekassa caritam seyyo	
[1]		(Vi 3. 496; Ma 3. 192)	40
I I I I I I I I I I I I I I I I I I I	in 127	Ekissā kaņţham chetvāna	292
Idam me āsanam vīra	69	Etamatthavasam ñatvā	
	414	(Khu 1. 54)	442
Idam suvannakeyūram		Evam ce sattā jāneyyum	
Idha tappati pecca tappati		(Khu 5. 5)	292
Idha madati pecca nanda		Evam nissayasampanno	
Idha modati pecca modati	1 65	(Khu 5. 37)	347
Idha socati pecca socati	92 202	Evam visesato ñatvā	145
(Khu 1. 15)	82, 292	Evam sankārabhūtesu	280
Imehi aṭṭhīhi	0.5	Evam hi dhīrā kubbanti	
tamaggapuggalam	95	(Sam 1. 122)	273
[ U ]		Esa bhiyyo pamuyhāmi	139
Utthanavato satīmato	152	Ovadeyyānusāseyya	349
Utthānena'ppamādena	162	[ Ka ]	
Udakam hi nayanti nettik	ā 371	Kaṇhaṁ dhammaṁ vippah	īāya 380
Udakathalacarassa pakkhi	ino	Katham hi Bhagavā tuyhar	'n
(Khu 5. 54)	93	(Sam 1. 122)	273

Paṭhamapādā	Piṭṭhaṅkā	Paṭhamapādā Piṭṭth	naṅkā
[ Ka - Kha - Ga	ı 1	[ Ca - Ja - Ña ]	
Kadāham kāsikam vatth	_	Caranti bālā dummedhā	304
Kadāham pāsādam rami	nam 262	Jarājajjaritā honti	5
Kadāham mañcapīṭhañc		Jetvāna maccuno senam	
Kadāham sappinavanīta		(Sam 1. 123)	274
Kadāham salākabhattam		Nātametam kurungassa	0.2
Kappānam satasahassan		(Khu 5. 6)	93
Kammantā nappavattant		[ Ta ]	
Karaṇīyamatthakusalena		Tam puttapasusammattam	
Kāmam patāmi nirayam		(Khu 1. 54)	445
(Khu 5. 10)	283	Tañca kammam katam sādhu	310
· · ·	53	Tatrābhiratimiccheyya	380
Kālaṁ desañca dīpañca Kālo deva mahāvīra	33	Tassa ayomayā bhūmi	81
	53	(Ma 3. 222) Tassa te natthi bhītattaṁ	01
(Khu 4. 305)		(Khu 2. 320)	431
Kumbhūpamam kāyami		Tassa sokaparetassa	731
viditvā	201	(Sam 1. 123)	274
Ko imam pathavim vice	ssati 212	Te jhāyino sātatikā	145
Khīṇāya bhavanettikā		Tesam sampannasīlānam	274
(Khu 2. 320)	431	[ Da ]	
Gataddhino visokassa	383	Dantam nayanti samitim	
Gamanāgamanampi diss		(Khu 1. 59)	136
(Khu 2. 113, 147)	20	Diso disam yam tam kayirā	206
Gāme vā yadi vāraññe	400	Disvāna taṇhaṁ aratiṁ	
[ Ca ]		ragañca (Khu 1. 409)	130
Cakkhūni jīrantu mamā	vitāni 7	Dīghā jāgarato ratti	288
Cakkhūni bhijjantu man	, , ,	Dujjīvitamajīvimha	
Cakkhūni hāyantu mam	•	(Khu 5. 100)	287
Catuppadim sankhamuk	3	Dunniggahassa lahuno	187
Catūsu samuddesu jālari		Dūraṅgamaṁ ekacaraṁ	193
parittakam		Devatānusi gandhabbo	20
•	342, 441	(Khu 2. 113, 147)	20
Candanam tagaram vāpi		Doso rajo na ca pana renu	157
Carañce nādhigaccheyya	a 296	vuccati (Khu 7. 406)	157

Paṭhamapādā	Piṭṭhaṅkā	Paṭhamapādā	Piṭṭhaṅkā
[ Dha ]		[ Pa - Pha - Ba ]	]
Dhammapīti sukham seti	359	Pañcayojanikā jivhā	321
Dhammo have rakkhati		Paţikkhitto tikicchāya	8
dhammacārim (Khu 2.	272) 62	Patodam te karissāmi	79
[ Na ]	,	Patodam me karissasi	79
Na attahetu na parassa he	etu 378	Pathavisamo na virujjhat	
Na taṁ kammaṁ kataṁ		Padmam yathā kokanada	
Na tam jitam sādhu jitam		sugandham (Sam 1. 81	*
(Khu 5. 16)	198	Pamādam appamādena	165
Na taṁ mātā pitā kayirā	210	Pamādamanuyuñjanti	163
Natthi anto kuto anto	210	Pare ca na vijānanti	42
	288	Pāṇātipātā viramāmi khip	
(Khu 5. 100)		(Khu 2. 115)	. 22
Natthi cetasikam dukkha		Pāṇātipātā viramassu khi	
(Khu 2. 320)	431	(Khu 2. 115, 148)	21
Na paresam vilomāni	239	Piṇḍapātikassa bhikkhun	
Na pupphagandho	267	(Khu 1. 111)	272
paṭivātameti	267	Puttā matthi dhanammatt	hi 298
Na bhaje pāpake mitte	350	Pupphāni heva	
Na me piyo āsi		pacinantam	228, 231
akanhanetto (Khu 5. 66	6) 96	Pubbeva sannivāsena	
Na santi puttā tāṇāya	442	(Khu 5. 66)	116
Na hi dhammo adhammo	ca	Phandanam capalam citta	
(Khu 2. 272)	14	Pheṇūpamam kāyamimai	
Na hi pāpam katam kami	mam 323	viditv <del>ā</del>	214
Na hi verena verāni	33	Bahumpi ce samhita	
Na hi sabbesu ṭhānesu		bhāsamāno	101
(Khu 4. 242)	415	Bālo kho tvam asi māṇav	⁄a
Nānāpupphañca gandhañ	ca 69	(Khu 2. 113, 147)	19
Nidhīnamva pavattāram	347	[ Ma ]	
Nibbutā nūna sā mātā	54	Maccheravinaye yuttam	169, 172
Neva devo na gandhabbo	419	Madhuvā maññati bālo	312
No ce labhetha nipakam		Manussasseva te sīsam	
sahāyaṁ (Vi 1. 496)	40	(Khu 5. 103)	295

Paṭhamapādā	Piṭṭhaṅkā	Paṭhamapādā Piṭṭh	naṅkā
[ Ma ]		[ Ya ]	
Manussindam jahitvāna		Yatho saṅkāradhānasmim	280
(Khu 5. 116)	219	Yatthe'ko labhate babbu	
Manopubbangamā		(Khu 5. 32)	374
dhammā	2, 14, 23	Yamhi saccañca dhammo ca	
Mama lohitabhakkhassa		(Khu 5. 41)	342
(Khu 5. 97)	93	Yassa ete dhanā atthi	J72
Mameva kata maññantu	328	(Am 2. 398, 399)	303
Mahāvīra mahāpañña			303
(Sam 2. 122)	273	Yassa nittinno panko	70
Mātāpettibharam jantum		(Khu 1. 104)	78
Mā pamādamanuyuñjeth		Yassāsavā parikkhīņā	388
Mā bāļham paridevesi	415	Yassindriyāni samathaṅgatāni	
Mā mam tvam saraņam		Yāvajīvampi ce bālo	300
gaccha	139	Yāvadeva anatthāya	326
Māse māse kusaggena	319	Ye ca kho sammadakkhāte	379
Māse māse sahassena	420	Yesam sannicayo natthi	386
Muhuttamapi ce viññū	301	Yesam sambodhiyangesu	380
Moho rajo na ca pana re	-	Yo ca gāthāsatam bhāse	417
vuccati (Khu 7. 406)	157	Yo ca vantakasāva'ssa	52
Mohasambandhano loko		Yo ca vassasatam jantu	421
(Khu 1. 176)	142	Yo ca vassasatam jīve	432,
[ Ya ]		433, 434.	•
Yam kiñci yiţtham va hu	ıtaṁ va	442, 445	•
loke	422	Yo dandena adandesu	, 117
Yañca kandasi yañca roc	lasi		115
(Khu 2. 113, 147)	20	(Khu 1. 33, 34)	
Yathā agāram ducchanna	am 78	Yodha puññañca pāpañca	403
Yathā agāram succhanna		(Khu 1. 72)	
Yathā pi puppharāsimhā		Yo dhīro dhitisampanno	
Yathāpi bhamaro puppha		(Saṁ 1. 123)	274
Yathāpi rahado gambhīr		Yo bālo maññati bālyaṁ	299
Yathāpi ruciram puppha	m 242	Yo sahassam sahassena	417

Paṭhamapādā	Piṭṭhaṅkā	Paṭhamapādā P	Piṭṭhaṅkā
[ Ra - La - Va ]		[ Sa ]	
Rattassa hi ukkutikam pa		Saddhādhanam sīladhanam	l
bhave (Am-Ṭṭha 1. 335	,	(Am 2. 398)	302
Ramaṇīyāni araññāni	404	Saddho sīlena sampanno	
Rāgo rajo na ca pana reņ		(Khu 1. 56)	332
vuccati (Khu 7. 406)	157	Santaṁ tassa manaṁ hoti	395
Rājato vā upasaggam		Santi rukkhā haripattā	
(Khu 1. 33, 34)	115	(Khu 5. 190)	180
Lasī ca te nipphalikā		Sabbattha ve sappurisā caja	
(Khu 5. 33)	93		11111 <i>311</i>
Vadhake Devadattamhi		Sabbo jano himsito	0.6
(Khu 3. 51)	94	piṅgalena (Khu 5. 66)	96
Varamassatarā dantā		Sammuyhāmi pamuyhāmi	139
(Khu 1. 59)	136	Sahassakkhattumattānam	158
Vārijova thale khitto	182	Sahassanetto Devindo	11, 12
Vāripokkharapatteva		Sahassamapi ce gāthā	412
(Khu 1. 71)	312	Sahassamapi ce vācā	408
Vālodakam apparasam		Sahassaramsī satatejo	27
nihīnam (Khu 5. 47)	376	Sādum vā yadi vā'sādum	
Visākhā vīsati puttā	258	(Khu 5. 116)	219
Vedanam pharusam jānir		Sādūni ramaņīyāni	
(Khu 1. 33, 34)	115	(Khu 5. 116)	219
[ Sa ]		Sādhu kho sippakam nāma	
Sace labhetha nipakam		**	325
sahāyam (Vi 3. 496)	40	(Khu 5. 25)	
Saccam kho vadesi māņa	va	Sārañca sārato ñatvā	73
(Khu 2. 113, 147)	20	Sālīnaṁ odanaṁ bhuñje	
Saṭṭhi kūṭasahassāni		(Khu 5. 116)	219
(Khu 2. 217)	324	Sāvako te mahāvīra	
Saṭṭhi vassasahassāni		(Sam 1. 122)	273
(Khu 5. 100)	287	Svāham abbūļhasallosmi	
Sattarattindivam Buddho	69	(Khu 2. 147)	20

Paṭhamapādā	Piṭṭhaṅkā	Paṭhamapādā	Piṭṭhaṅkā
[ Sa ]		[ Sa ]	
Svāham muditamano pas	sannacitto	So māṇavo tassa pāvadi	
(Khu 2. 115, 148)	21	(Khu 2. 113, 146)	19
Sukaram sādhunā sādhu		Sovannamayo pabhassaro	)
(Khu 1. 150)	92	(Khu 2. 113, 146)	19
Sukarāni asādhūni		Soham ajja pajānāmi	257
(Khu 1. 38)	92	Soham nūna ito gantvā	
Sududdasam sunipuņam	190	(Khu 5. 100)	288
Subhānupassim viharant	am 47	(1111 3. 100)	200
Subhāsitam suņitvāna	407	[ Ha ]	
Sekho pathavim vicessat	i 212	Hoti sīlavataṁ attho	
Selo yathā ekaghano	372	(Khu 5. 3)	92
So karassu ānubhāvam	295	Handāham hatacakkhusm	ni 11